


A. xxxi. Gov



Digitized by the Internet Archive
in 2018 with funding from
Wellcome Library

<https://archive.org/details/b30409755>


JOANNIS DE GORTER

A. L. M. MEDICINÆ DOCTORIS ET
PROFESSORIS ORDINARIII

OPUSCULA VARIA MEDICO-THEORETICA

Quorum seriem sequens pagina indicabit.

EDITIO SECUNDA ITALICA.



PATAVII. Typis Seminarii. MDCCLXI.

Apud Joannem Manfrè.

SUPERIORUM PERMISSU, & PRIVILEGIO.

D. Luigi Longo

JOANNE DE CORLE

THE HISTORY OF THE

WELLS OF THE



OF THE

ARCHAEOLOGICAL

AND

ANTHROPOLOGICAL



AND

OF THE

OF THE

OF THE

I N D E X

T R A C T A T U U M.

- I. De Secretione humorum e sanguine ex solidorum fabrica præcipue, & humorum indole.
Pag. 1
- II. Oratio inauguralis de dirigendo studio in Medicinæ praxi, sive de Tabulis pro disciplina Medica concinnandis. 26
- III. Exercitatio Medica prima de Motu vitali. 41
- IV. Exercitatio Medica secunda de Somno & Vigilia. 64
- V. Exercitatio Medica tertia de Fame. 87
- VI. Exercitatio Medica quarta de Siti. 102
- VII. Exercitatio Medica quinta de Actione viventium particulari. 119
- VIII. Oratio de Praxis Medicæ repurgatæ certitudine. 141
- IX. Oratio de animi & corporis consensione mirabili tam in secunda quam adversa valetudine. 148

TYPOGRAPHUS LECTORI.



*N*emo miretur, me tam sæpe libros edere hoc nomine inscriptos. Leguntur, placent, emuntur. Et quidem est, cur legantur, placeant, emanant. Veniunt quippe ab Auctore, cujus opera cognovisse neminem potest pœnitere. Ac memini me professum alias quæcumque inde ad me pervenirent libentissime statim excusurum, optavisseque ut magna talium librorum copia suppeteret. Nunc res ex voto accidit, ac supra spem. Cum enim ad Gorterum exempla quædam ex hac officina delata fuissent, ille operam hanc & diligentiam quamcumque meam non aspernatus, per summam humanitatem ipse mihi exemplaria sua manu emendata passim & aucta ultro mittere cœpit. Cui pro tam singulari beneficio & officio cum par referre non possim, at gratum animum meum publica prædicatione testari certe non desinam. Nunc, quod haud ita pridem in præfatione ad Medicinæ compendium sum pollicitus me primo quoque tempore facturum, novum volumen emitto, quod non solum Medicis, sed & Physicis & eruditis aliis placere profecto debet. Multa enim continet ac varia brevibus opusculis concinne pertractata. Reperies hic initio statim librum de secretionibus humorum libro de Perspiratione jamdiu a nobis edito necessario adjungendum, cujus vel appendix est, vel coronis; tum vero exercitationes varias de Somno, de Vigilia, de Fame, de Siti, de animæ conjunctione cum corpore, aliisque plurimis rebus utilibus juxta ac jucundis, in quibus, ut in ceteris spectatum & notum omnibus Auctoris ingenium, acumen, judicium, eruditio, perspicuitas ubique mirifice elucent. Quare mihi, absit verbo invidia, grati atque obstricti esse debent Itali mei, per quem tam præclara facile possunt cognoscere. Sed gratiam, ut par est, Auctori optime merito habeant; mihi instar magni muneris erit, si hæc in bibliothecas suas recipere non graventur.

LECTORI

S. P. D.

J. O. D. E. G. O. R. T. E. R.



Ultum licet fuerit de Secretione disputatum, lubet tamen eam iterum ad examen revocare; quum plurimæ sæpe dantur viæ, quibus eundem aggredimur scopum, & quod a multis sæpe non perficitur opus, ab uno aliorum omnium adminiculis adjuto ad perfectionem deducitur. Sed judicabis forsan B. L. quod tantum faciat ad Insensibilis Perspirationis cognitionem, hoc Opusculum una cum priore, quod ante biennium publici juris feci, edendum fuisse: hoc concedo, in eadem tunc quoque eram sententia; ideoque hanc rem aggressus: verum tot mihi in ea explicanda occurrebant difficultates, ut me ex iis, non nisi maturiori examine, potuerim extricare; nunc vero in hunc ordinem redacta, ut a quovis possit intelligi commode, hoc Opusculum in ea forma, quæ priori posset adjungi, in publicum prodire necessarium duxi. Quid autem in hoc negotio præstiterim, æquo Tuo relinquitur judicio. Confido tamen hos exiguos labores communi utilitati, & ad promovendam præstantissimæ artis Medicæ scientiam haud inutiles fore. Alii in hac re quid egerint, hic non est loci examinare, neque etiam in ipso opusculo eorum ponderabuntur sententiæ & opera. Nec refert, Hippocrates an consentiat, vel Galenus; in arte Medica auctoritas enim non vincit, sed veritas: hæc fuit ratio, cur nullibi nomina adjeci auctorum, qui mecum consentiunt, & eo minus eorum, quos impugnare videor, quum refutationibus intentus, non raro sibi accumulet invidiam, & parum profit arti. Præstantius ergo esse duxi, quid boni præstiterint alii colligere, propriaque inventa & judicium adjicere, ne ars semper maneat longa, quam

ut

ut per cavillationes , inutileſve objectiones ſcientia medica magis evaderet intricata. Tractatulum in duas diſpertivi partes , quarum prior ſingularia tanquam data continet , ex quibus , in poſteriore , ipſæ ſecretiones variæ ſunt explicandæ . Omnia per theſes abſolvere conatus , ut uno intuitu totum poſſes contemplari negotium ; & eandem ob rationem brevium adjeci . Paucos credo invenies in impreſſione errores , quamvis ad me propter loci diſtantiam non pervenerint ſpecimina : hoc indiſtriæ Viri eruditiffimi , in Medicis experientiſſimi atque Phyſicis , Medicinæ Doctõris , GERARDI A SWIETEN debetur , qui ex ſingulari erga ſtudia amore , tædioſiſſimum hunc ultro in ſe recipere voluit laborem , cui ego igitur maximas debeo gratias . Si interim occurrunt , in hoc Opusculo , quæ non ſatis placent , in bonam partem conſulas , non enim omnes poſſumus omnia , quæ autem utilia , ad ægrotantium ſalutem utaris , rogo .

Dabam Harderovici

Die 2. Julii 1727.

I N D E X

7

I N L I B R U M D E S E C R E T I O N E .

Numerus appositus §. exhibet, non vero paginam.

A

A Bſorptio quomodo fit .	20
Adſtringentia quandoque incrassant ſanguinem, & chylum non attingunt .	7
Animalia viventia diſſecta, corpori noſtro applicata, quare reſerant obſtructiones .	33
Aqua quare refrigerat .	14
Arteriarum curſus ad organa ſecretoria varius .	42
Arteriæ vehunt ad omnia organa ſecretoria liquidum ejuſdem fere indolis .	43

B

B Ilis ſecretio exponitur .	56. B.
------------------------------------	--------

C

C Aloris gradus qualis omnium maxime movet ſecretiones .	33
Calor nimius condensat ſanguinem . 33. minuere poteſt ſecretionem .	33
Canales flexiles liquore impleti fiunt cylindrici . 38. minimi cur ſponte implentur .	20
Cantharides urinam movent .	7
Chalybis vis attrahitrix augetur attactu magnetis .	6
Circulatio conſervat ſanguinis fluorem . 31. impedit corruptionem . 37. celerior & tardior incrassat ſanguinem . 32. retardata generat viſcidum .	32
Coadunatio liquorum ſpontanea, generalis poteſt eſſe ſecretionis cauſa .	45
Cohæſio major & minor fieri poteſt inter partes liquidi & ſolidi . 6. quibuſdam fluidi heterogenei particulis poteſt conciliari . 7. augetur . 53. firmior partium ſimilium inter cauſas generales ſecretionum poteſt citari . 46. quorundam liquidorum cauſam generalem poteſt exhibere ſecretionis . 47. minui poteſt . 6. in quibuſdam liquidis, reliquis intactis .	7
Colliquativi ſudores & urinæ unde .	33
Concretiones quare præprimis in vasis majoribus . 23. juvantur diminuto vehiculo . 8. impediuntur copioſo vehiculo .	8
Confuſi duo liquores diverſæ naturæ, alter eorum in ſpherulas convertitur .	16
Conſiſtentia humorum mutari poteſt ſecretione peracta .	6
Cordis potentia ſupputatur . 44. non tanta ut vulgo ſtatuitur .	21
Crassiſſis humoris diſtinctio .	52
Crassus humor poteſt ſecerni . 52. poteſt mutari . 6. 64. fit tenuis . 63. confer tenax, glutinofus, viſcidus .	
Cribra cum figuratis poris non inveniuntur .	29
Cryſtallizatio ſalium .	8

D

D Iviſio proprietatum liquorum in 3 Claſſes . 4. ſecretionis generalis .	43
---	----

E

E Xcretio quare difficiliſſima ſecretione .	18
Exercitiis violentioribus cur abſumitur pinguedo & medulla .	19

F

F Ermentatione minuitur olei cohæſio .	6
Fermentum an detur perpetuum .	37

Fi-

<i>Fibræ sunt semper in statu violento.</i>	41
<i>Fluida quædam tenacius, alia laxius adherent solidis.</i>	17
<i>Fluidorum motus juxta solida parallelus omnium facillimus.</i>	18
<i>Fluiditas non pendet a parvitate particularum. 53. & unde. 53. confer lævitas, tenuitas, mobilitas.</i>	
<i>Fluidioris secretio.</i>	45. 55
<i>Frigus intensum condensat sanguinem. 33. minuit secretionem.</i>	33

G

G <i>Lobulorum magnitudo potest augeri.</i>	52
G <i>Globuli rotundi fiunt. 4. 16. 19. rubri retinentur in arteriis & venis ad promovendas secretiones. 8. differunt magnitudine.</i>	28
<i>Glutinosa ad latera vasorum.</i>	25
<i>Glutinosus humor secernitur. 45. 53. non constat semper particulis majoribus.</i>	53
<i>Glutinositas unde dependet.</i>	53
<i>Gravia intime mista cum liquore leviori, per vasa mota, inferiorem canalis partem non magis petunt quam alia. 11. non separantur, quamvis mistura projiciatur verticaliter. 12. totius massæ impetum adaugent. 14. non exacte mista, & in altum pulsa, eandem non attingent altitudinem ad quam perveniet liquor levior. 13. non feruntur ad cerebrum. ib. quare sustinentur in liquido leviori. 11. quomodo secretiones adaugent. 14. quomodo secretiones speciales adaugent. ib. calefaciunt.</i>	ib.
<i>Guttulæ duæ sese invicem tangentes uniuntur, & spherulam formant.</i>	4

H

H <i>Omogenei liquores quales 7. raro reperiuntur.</i>	7
H <i>Humores a quibus causis ducuntur per minutissima vasa. 44. nulli perpetui a nativitate. 37. omnes corrumpuntur sponte. ib. confer liquores & fluida.</i>	

I

I <i>Incantati quales dicuntur falso. 58. quomodo curandi.</i>	ib.
I <i>Injectiones anatomicae quare raro ultima attingunt vascula.</i>	44

L

L <i>Levissima in medio canalis.</i>	25
L <i>Levia quomodo refrigerant.</i>	14
<i>Liquidorum mutatio post secretionem. 65. motus circa canalis axim celerrimus. 24. partes facilius inter se moventur quam separantur.</i>	5
<i>Liquores concrescibiles per canales motu non perturbato pulsati concreescere possunt. 23. tenuissimi sola permistione concreescere possunt. 15. minimis tubulis recepti descendunt tamen propria gravitate. 22. omnes non aque facile juxta solida moventur. 19. confer humores & fluida.</i>	

M.

M <i>Aceratio attenuat.</i>	6
M <i>Magnitudo partium & orificiorum varia, causa est generalis secretionis. 48. non determinanda ex tenacitate liquoris.</i>	53

I N D E X.

Medullæ secretio in ossibus. 19. absumentio.	9
Mercurius quare salivam movet.	19
Mobilissimæ partes circa axim canalis feruntur.	7. 14
Morbofi humoris evacuatio specialis.	25
Morbus cum valida circulatione quare extenuat corpus.	56. F. 19
Motus intestinus, in fluidis a parva causa potest excitari. 3. vermicularis vasorum quid facit.	44

N

N ervorum morbi quomodo mutant secretionem.	10
Nervi copiosi quare ad glandulas. ib. abscissi cur non emittunt liquorem.	22
Nutritum unguentum fit ex oleo & liquore saturni.	15

O

O bstuctiones quare resolvuntur applicatis animalibus calentibus.	33
Offa Helmontiana.	15
Orificia vasorum amplitudine differunt. 39. circularia ad axim.	38

P

P inguedinis secretio. 17. 19. consumptio.	19
Plexus arteriarum quare.	23
Polypi cur præcipue in vasis majoribus.	ib.
Pororum figura quid faceret ad secretionem.	29
Pressio circumjacentium ducit sanguinem ad minutissima vasa.	44

R

R Amorum capacitates simul sumptæ superant capacitatem trunci.	40
Refrigerantia quomodo promovent secretiones.	33
Reticularis arteriarum concursus præcipua causa fluiditatis.	31
Rubedo partis unde.	34

S

S Alium crystallizatio.	8
Salivæ secretio.	7. 14
Sanguis communes, & proprias possidet qualitates. 3. crassior calore & frigore nimio. 33. aucto & minuto motu. 32. stagnatione.	30
Sanguis fluidus manet circulatione. 31. fluidissimus in tepore.	33
Sanguis ruber quousque pervenit. 34. per arterias ad organa secretoria vectus ubique fere ejusdem est indolis. 43. vegetus in corpore debili transfusus quare non erigit vires. 27. maternus an existat. 37. in sinistro ventriculo cordis exacte mixtus. 35. diversis particulis constat. ib. omnes possidet liquores vel materiam ex qua fiunt omnes secretorii humores.	36
Sanguinis globuli vide globuli. motus tardior in ramis. 26. partes visibiles sphericæ. 29. differunt magnitudine. 28. propria indole secretioni favent. 27. resorptio ex vasis pellucidis. 9. vocabulum late sumtum quid notat.	3
Sanguinem quæ ducunt ad minutissima vasa.	44
Secretio bilis. 56. B. crassioris humoris. 52. fluidioris. 45. 55. glutinosi. 45. 55. medullæ in ossibus. 19. morbofi humoris. 56. F. seminis. 56. D. spirituum. 31.	b 56. A.

56. *A. tenuioris*. 54. *urinae*. 31. 56. *C. copiosior in tepore*. 33. *aucta humorum velocitate*. 58. *non semper*. 32. *minuto motu quomodo*. 59. *minor*. 58. 59. *particularis*. 56. *demendo vehiculum producitur*. 9. *diluendo etiam efficitur*. 10
- Secretio diversorum liquorum ex eodem sanguine*. 43. *ramo*. 31. 40. *non dicitur quando similis humor distribuitur per vasa, non per poros figuratos*. 29
- Secretiones omnes non ex sanguinis massa*. 1
- Secretionis divisio generalis*. 43. *causae generales*. 45, 46, 47, 48, 49, 50, 51. *mutatio*. 57. *aucta circulatione*. 58. *minuta circulatione*. 59. *mutata coherendi potentia*. 60. *globulorum & pororum magnitudine*. 61. *vehiculi quantitate*. 62. *differentia globulorum magnitudine*. 28. *intellectus non acquiritur sine cognitione fluidorum, & solidorum*. 2. *liquor praexistit talis ut separatur, vel materia ex qua preparatur*. 36
- Seminis excretio quare debilitat*. 56. *D. secretio*. 56. *D.*
- Seri resorptio*. 9
- Solida liquefacta globulos formant*. 4
- Spirituum secretio*. 31. 56. *A. effusio in glandulis quid facit*. 10
- Stiptica coagulant sanguinem & serum*. 6
- Suctione adducitur liquor*. 5
- Sudor disparet accedente febris paroxysmo*. 20

T

- T** *Enax, videatur glutinosus, crassus, viscidus*. 63
- Tenuis humor fit crassus*. 32
- Tenuioris secretio*. 54. *minuitur*. 32
- Tepor fluiditatem sanguinis juvat*. 33. *favet secretionibus*. ib.
- Transfusio sanguinis quare frustra instituitur*. 27
- Tubuli minimi liquore immersi, eum attollunt contra naturalem gravitatem*. 20. *quo angustiores, eo altior liquoris ascensus*. 21

V

- V** *Afa minima cur facile implentur*. 21. *semper premunt contentum*. 41
- Vascula minima abscissa cur non effundunt humores*. 22
- Vasorum recipiendi potentia quid facit*. 44. *cursus varius ad diversa organa cur*. 51
- Vehiculi inequalis quantitas quid facit*. 49. *eadem quantitate omnia non impediuntur concrecere*. 9. *diminutio concretioni favet*. 8. 9. *augmentum juvat concretionem*. 10. & *minuit*. 8
- Velocitas liquidorum respondet diametrorum vasorum quadratis inverse*. 26. *inequalis causa variae secretionis*. 50
- Venae sectio quomodo quandoque secretionem excitat*. 32
- Vermicularis motus propellit humores*. 44
- Viscidum, confer glutinosus, crassus. dissolvitur motu & putredine*. 32. *generatur motu minuto*. ib.
- Urinae secretio*. 31. 56. *C. sedimentum unde augetur & minuitur*. 8

I N D E X

I N E X E R C I T A T I O N E S .

Prior numerus Exercitationes, posterior Paragraphos indicat.

A

Absorptio fit in ore &c. 4. 7. quomodo fit. 4. 14. intestini coli probatur. 4. 14.

Absorbentia. 5. 25

Acidum an famis naturalis causa. 3. 35

Acor ventriculi an famis causa. 3. 15

Acutorum sitis minor. 4. 39

Actio corporis inhibet spontaneam corruptelam. 2. 55

Actiones mentis puræ. 4. 1

Actio viventium particularis definita. 5. 1.

ejus causa. 5. 30. seq. Differt a motu

mechanico. 5. 2. ab elasticitate & con-

tractilitate. 5. 3. ab Attractione. 5. 4.

a motu intestino, animali Vitali. 5. 5. 6.

7. Probatur ejus existentia. 5. 8. ejus

leges. 5. 43. Sola turbari potest. 5.

45. Adjuvat circulationem. 5. 46. seq.

Admittit specifica auxilia. 1. 48

Actio Chylificationis. 5. 11

Actio Lienis. 5. 13. Funiculi & placenta. 5. 27

Actiones inconstantes. 5. 26. Ovarii. 5.

28. uteri, testium, genitalium, mam-

marum. 5. 29. & seq.

Actio ex stimulo. 5. 33. ejus usus. 5.

36. Inter actiones particulares & vi-

talem consensus. 5. 37. seq. egent spi-

rituum influxu. 5. 44

Acuti morbi concoquuntur somno. 2. 36

Adipsia Vid. Sitis minor.

Aer promovet putredinem. 4. 14. an

nutriat. 3. 3. sæpe renovandus est. 3.

4. frigidior appetitus majoris causa.

3. 43.

Acre vigiliæ causa. 2. 24

Ἀγρυπνία. 2. 30. qualia medicamenta

exigit. 2. 31

Alcali an famis causa. 3. 35

Alimenta an sumenda ante somnum.

2. 57. quomodo somnum inferant. 2.

51. citius subiguntur vigilia quam so-

mnus. 2. 36

Alimentorum necessitas. 3. 21. fastidium

ex morbosis liquoribus. 3. 33. defe-

ctus in sanguine non est sola famis

causa. 3. 14. reliquia in ventriculo

an famis causa. 3. 17. multitudo quæ

mala faciat. 2. 22. vapor an cerebrum

obnubilet. 2. 51

Alvi egestio. 5. 22

Alvi fluxus quando pessimus. 3. 36

Ammoniacy salis generatio. 4. 29

Anima non est causa motus vitalis. 1. 15

Animi affectus quid faciant. 2. 63. quid

faciant in motu vitali. 1. 74. motu

protrahuntur vigiliæ. 2. 27

Animalis motus definitur. 1. 7. auget

motum vitalem. 1. 75

Anorexia vel Dysorexia ex motu inso-

lito. 3. 34. ex heterogenio quopiam.

3. 34

Antliæ inæqualis motus fit æqualis inter-

posito vase aere elastico pleno. 1. 50

Anxietas dolore periculosior. 1. 76

Apoplexia ex vena jugulari compressa.

2. 52

Appetitus cur natus. 3. 6. vitatur in

morbis tripliciter. 3. 28. major in o-

perariis. 3. 43. aere frigidior. 3. 43.

caninus quid. 3. 44. hujus vitium in

ventriculo. ib. curatio. ib. causa vi-

detur liquor morbosus acidus. ib. alie-

nus triplex, fastidium, pica & malacia.

3. 45. restitutus. 3. 47. quando fit ma-

ior. 3. 42. in gravidis. 3. 47. in mor-

bis non semper bonum signum. ib.

Appetitus major in nutrice laudandus.

3. 42. in reconvalescentibus. ib.

Aqua an nutriat. 3. 5. diutius careri

potest quam aere. 3. 5

Aquosi potatione prolongare vigilias no-

cet. 2. 22

Archæus vid. *vitalis motus*.

Ardentis febris exitus. 4. 32

Arteriæ aortæ & pulmonalis intume-

scencia non est causa motus vitalis.

b 2 1. 22.

1. 22. moventur motu vitali. 1. 48.
non moventur impletione vasorum in
suis lateribus. 1. 48. cur vacuæ in ca-
daveribus. 1. 65. implentur motu au-
cto. 2. 52
Arteriæ portarum specialis fabrica & u-
sus. 1. 59. circulatio. 1. 57
Arteriarum actio. 1. 44. motus vitalis.
1. 42. fabrica. 1. 43. succus acris quid
faciat. 1. 77. motus non dependet ab
elasticitate fibrarum. 1. 49. pulsus e-
lasticitate laterum extinguitur. 1. 50.
pulsus fit motu vitali. 1. 51. Motus
vitalis multa obscura exponit. 1. 53.
Contractilitas quid faciat. 1. 64. &
cordis motus sibi mutuo respondent.
1. 73
Artuum tremor a vigilia. 2. 19
Ascensus liquoris in arbore non fit a so-
la attractione. 1. 10
Asthmatis explicatio. 1. 70
Atretæ puellæ Historia. 4. 14
Attractio non est sola causa ascensus li-
quoris in arbore & vegetabilibus. 1. 10
Auricularum cordis motus vitalis. 1. 23
- B**
- B**ilis secretio quomodo ex venis. 3.
19. 5. 20. vesicula ubi definit. 3.
23. evacuatio quomodo. 3. 23. effe-
ctus in duodeno. 3. 23. mutatio in
vesicula. 3. 23. & 24. Hepaticæ &
Cysticæ differentia. 3. 23. sensim re-
liquias alimentorum in ventriculo dis-
solvit. 3. 23. regurgitatio nequit fieri
in ventriculum, quamdiu plenus. 3.
23. non effunditur e vesicula, ventri-
culo depleto. 3. 23. duplici modo po-
test destruere appetitum. 3. 35. defe-
ctus & vitiosa indoles destruit appe-
titum. 3. 35. & 36
Biliosi non generant in sanguine lento-
rem. 4. 17
Bilioforum sitis. 4. 17
Bohnii sententia de famis causa. 3. 22
Βελιμία. 3. 12. quid sit. 3. 43
- C**
- C**achexiæ generatio. 4. 26
Cacochylia quid. 4. 23
Cacochyliæ sitim facientis signa. 4. 24.
& 27. curatio. 4. 25. & 28
Cachochymiæ generatio. 4. 26
Calor auctus auget erysipelas. 4. 19
Caloris perceptio. 1. 61
Calor corporis quomodo augetur vesti-
mentis & stragulis. 2. 59. Causa ca-
loris & frigoris in organis. 5. 47
Cantharides sitis causa. 4. 10
Capitis gravitas a vigiliis. 2. 19
Capitis hebetudo a vigiliis. 2. 19
Capite declivo vel elevato an decum-
bendum sit. 2. 58
Capsulæ nervorum. vid. Nervorum ca-
psulæ. Glissoni usus. 1. 58. & 60. gan-
gliorum alterne contractæ non con-
stituunt causam motus vitalis. 1. 35
Cartilaginum flexura in inspiratione. 1.
27
Catarrhosorum sitis. 4. 29
Cerebelli fabrica. 1. 38
Cerebellum suppeditat spiritus motui vi-
tali. 1. 19. non agit tanta vi, quan-
ta vis est motus vitalis. 1. 19. suppe-
ditat spiritus motui vitali, sed non est
causa constrictionis alternæ. 1. 33. an
in somno majorem spirituum copiam
secernat. 2. 37
Cerebrum non habet receptaculum pro
spiritu. 2. 47
Cerebri & Cerebelli secretio. 5. 16
Cerebri & ventriculi consensus unde. 3.
26
Chyli propulsio in vasa lactea. 1. 69.
defectus in nobis sentitur quoad ejus
qualitatem. 3. 22. in corpore mutatio
& effectus. 3. 25. defectus perceptio
quandoque, interdum vero ventriculi
sensus prævalet. 3. 26. aut cibi defe-
ctus famis causa. 3. 22
Chylificationis actio. 5. 11
Chronici morbi a longiori somno non
concoquuntur. 2. 36
Chronico morbo laborantes quandoque
exposcunt cretam aliaque terrea. 3.
46. non est naturale sitire. 4. 39
Chronicorum sitis. 4. 23
Cibus nutrit. 3. 6. ejus defectus diutius
potest ferri quam aquæ vel aeris. 3.
6. cur producat somnolentiam. 2. 51
Circulatio per hepar. 1. 57. in vena por-
tarum. 1. 57. celerior in vigilia quam
in somno. 2. 14
Circulationis causa in arteriis. 1. 44.
causa

INDEX IN EXERCITATIONES.

13

causa per viscera explicatur. 1. 56. ad-
juvatur actione particulari. 5. 46
Coctio an promoveatur vigiliis. 2. 16.
fit perfectior in somno. 2. 36. fit so-
mno. 2. 54. an major in somno. 2. 42
Coli intestini absorptio probatur. 4. 14
Compressio nervorum an somni causa.
2. 49
Constrictio duræ matris examinatur. 1. 32
Consensus inter motum particularem &
animalem sensus &c. 5. 37. seq.
Consuetudo multum valet. 2. 55. & 56.
quid faciat in somno & vigilia. 2. 46
Contractilitas arteriarum quid faciat. 1.
64. Capsulæ nervi quid faciat. 1. 63.
Differt a motu vitali. 1. 72
Convulsionis prædictio ex somno inquie-
to. 2. 64
Cor non est præcipua pulsus causa. 1. 52
Cordis motus vitalis. 1. 17. ad 23. vis de-
terminatur. 1. 45. vis non sufficit circu-
lationi per hepar. 1. 58. & arteriarum
motus sibi respondent mutuo. 1. 73
Corporis munitio in somno. 2. 59
Corpus impletum iners a nimio somno.
2. 28
Corruptela spontanea quomodo fit, & im-
peditur actione corporis. 2. 55
Creta interdum exposcitur in chronicis.
3. 46
Cruditatis causa. 3. 36
Crusta phlogistica indicat sanguinis den-
sitatem. 1. 55
Κυρωσις. 3. 12

D.

Debilibus somnus implacidus malus.
2. 64
Debiles decumbunt in dorsum. 2. 58
Decubitus qualis in somno esse debeat.
2. 58. in latus, dorsum &c. 2. ib.
Delirium in perseverante morbo. 4. 39
cognoscitur ex decubitu in ventrem. 2.
58. præfagitur somno implacido. 2. 64
Delirii ex siti prædictio. 4. 37. instantis
signa. 1. 46. prædictio. 2. 26
Definitio quomodo facienda. 2. 2
Diætetica regula bibendi. 4. 7
Diaphragmatis constrictio auget capaci-
tatem pectoris & tumere facit ven-
trem. 1. 26
Diaphoretica sitis causa. 4. 10

Diathesis phlogistica. vid. *Lentor*.
Differentia somni & vigiliæ in qua re
quærenda. 2. 5
Digestio & nutritio differunt. 2. 36
Dilatationis cordis causa. 1. 23
Diuretica sitis causa. 4. 10
Dipsadis morsus sitim facit. 4. 36
Dolor vigiliæ causa. 2. 24
Duræ matris alterna constrictio non est
causa motus vitalis. 1. 32. matris ad-
hæsiō cum cranio haud concedit ejus
oscillationem. 1. 32
Dysenterix sæpe largior potatio prodest.
4. 12. malum signum sitis. 4. 12

E.

Egestio alvi, renum, Perspirationis
5. 22. & seq.
Elasticitas quantum differat a motu vi-
tali. 1. 49. canalis non auget veloci-
tatem. 1. 49. non est motus arteria-
rum causa. 1. 49. arteriarum extin-
gueret pulsum. 1. 50
Elasticitatis definitio. 1. 49. restitutio
est causa respirationis vitalis. 1. 29
Erysipelatosi non ferunt pingua. 4. 19.
non generant in sanguine lentorem.
4. 17
Erysipelatosorum sitis. 4. 17
Erysipelas num pertineat ad bilem corru-
ptam, num ad inflammationem. 4. 17
Evacuationes copiosiores humoris tenu-
joris sitis causa. 4. 10
Excretoria. 5. 21. 22
Excretorium vas nullum in liene. 3. 18
Exercitatis cur major somni necessitas.
2. 45
Exspiratio quomodo fiat. 1. 28

F.

Fames cur data. 3. 6. an sensus. 3. 7.
distinctus. 3. 8. ab accepto cibo
cessans. unde. 3. 27
Famis sensus in duobus locis. 3. 25. &
26
Fastidium quid. 3. 45. curatio. ib.
Febris ardentis causa. 1. 77. exitus. 4.
32
Febricitantibus sitientibus & quibus præ-
cordia elevata murmurant Lac nocet.
4. 38
Fibræ rubræ solæ an motus organa. 1.

41. pellucidæ & albæ an motu gaudeant. 1. 41
 Fibris omnibus est concessus motus vitalis. 1. 58
 Fibrarum muscularium fabrica. 1. 40
 Filia Solis. vid. *Vitalis motus*.
 Frigoris perceptio. 1. 61. sensus a vigiliis. 2. 18
 Funiculi actio inconstans. 5. 27

G

- G** Anglia nervorum non faciunt motum alternum vitalem. 1. 35
 Gangliorum necessitas. 1. 62
 Gaudium quando nocet. 2. 27
 Gelatina materiem suppeditat spiritibus. 2. 47
 Gelatinæ origo. 2. 16
 Genitalium Actio. 5. 31
 Glandula cur majori copia nervorum ornatur. 4. 29
 Glandularum secretio. 5. 15
 Glissonii capsulæ usus. 1. 58. & 60
 Gravitatis sensus & gravitas ad stateram ut differant. 2. 13
 Gustus qualem usum habeat. 3. 21. qualis sit sensus. 3. 6
 Gravidarum inappetentia. 3. 40
 Gravidis adscribitur malacia. 3. 46. appetitus restitutus. 3. 47. appetitus restitutus cum non redeuntibus mensibus. ib.

H.

- H** Æmorrhagiæ instantis signa. 1. 46
 Hepatis vasa. cur non collabantur. 1. 59. circulatio. 1. 57. & 58
 Horrores a vigiliis longioribus. 2. 48
 Humectantur solida per somnum. 1. 54
 Humiditas putredinis mater. 4. 16
 Humiditatis consumptio non omni tempore æqualis. 4. 4
 Humor tenuis acer vigiliarum causa. 2. 25
 Hydrophobia laborantes sitiunt. 4. 36
 Hydrops sitis causa. 4. 10
 Hydropicis placare sitim copiosiori ingestione, nocet. 4. 12
 Hydropicorum sitis fallenda. 4. 12. & 4. 28
 Hypnotica. 2. 30. quando convenient. 2. 24. quali modo somnum producant. 2. 48

Hypnoticorum usus ad producendam quietem in somno. 2. 60

I.

I Chor. vid. *sanies*.

- Imbecilli mature lectum petunt. 2. 56. diutius dormire debent. 2. 56
 Inappetentiæ naturalis causa. 3. 29. ex animi pathemate. 3. 30. ex consensu aliarum partium. 3. 31. ex morborum humoribus. 3. 32. ex majori evacuatione. 3. 32. & 42. ex abstinentia a cibo. 3. 32. retentione evacuandorum & malignorum. 3. 32. ex bilis alienatione. 3. 35. confectione vitiata. ib. defectu. 3. 36. denegato reditu in ventriculum per morbos. 3. 36. habetur quando portio ingesti cibi non remanet in ventriculo. 3. 37
 Inappetentia ex collecta pinguedine. 3. 37. ex organo sentiente inutili facto. 3. 38. in morbis nunquam bonum præsagium exhibet. 3. 40. post morbos sanatos. 3. 40. in gravidis. ib. in lactantibus. ib. causæ compositæ qui finguntur. 3. 39. effectus variant. 3. 40.
 Incubus dormientium in dorsum. 3. 58
 Inedia an imperanda ante somnum. 2. 57
 Infantes æque somno quam alimentis pinguescunt. 2. 13. diutius dormire debent. 2. 56
 Inflammatio quomodo curatur venæ sectione. 1. 53. non ab obstructione sed ab aucto motu vitali. 1. 53
 Inflammationis causa. 1. 77
 Ingenium acuitur somno. 2. 54
 Inquietudo quid mali faciat in somno. 2. 61
 Infecta non semper fruuntur motu vitali. 1. 12
 Insomnia quid faciant. 2. 38. quid mali faciant. 2. 62
 Inspiratio quasnam partes mutet. 1. 27
 Intestina a corpore separata cur pergant moveri. 1. 62
 Intestinorum motus vitalis. 1. 68. fabrica & actio. 1. 68
 Intestini colli absorptio probatur. 4. 14
 Irritatio facit motum & calorem. 1. 51
 Irritamentum est vigiliæ causa. 2. 24.
 sudorifera sitis causa. 4. 10
 In-

Involucra nervorum. vid. *Nervorum Capsulae*.

L

- L** Aborantibus cur major somni necessitas. 2. 45
 Lacrymarum secretio. 5. 18
 Lactantium inappetentia. 3. 40
 Lac an malum siticulosi. 4. 38
 Lacteorum motus vitalis. 1. 67
 Lactea vasa num famis organum. 3. 22.
 non facile absorbent pingua. 2. 51
 Lætitia quid faciat. 2. 27
 Laterum ventriculi contactus an famis causa. 3. 20
 Levitatis sensus per somnium. 2. 54
 Lentor phlogisticus non educitur sanguinis missione. 1. 53. effectus inflammationis. 1. 55. nullus in sanguine biliorum. 4. 17. sitis causa. 4. 20
 Lentoris sitim facientis signa. 4. 21. curatio. 4. 22
 Lienteriæ curatio. 3. 42. frustra a multis conatur. ib.
 Lien viscus intricatissimum. 3. 18
 Lienis succus acidus per lymphatica. 3. 18. vel vasa brevia delatus an famis causa. 3. 19
 Lienis actio. 5. 13
 Ligamenta vasis non carent. 1. 60. hepatis arteriis scatent. 1. 60
 Lingua varium sensum exercet. 3. 9
 Lipothymix explicatio. 1. 64
 Longitudo somni definitur. 2. 56
 Lumborum pulsatio mensium instantium signum. 1. 46
 Lympha digestrix acida an famis causa. 3. 16
 Lymphatica lienis an tantum in superficie. 3. 18. arteriæ implentur sanguine rubro per majorem motum. 1. 53
 Lymphaticorum motus vitalis. 1. 66

M

- M** Acrescit corpus a vigiliis. 2. 15
 Malacia adscribitur gravidis. 3. 46
 Mammarum actio. 5. 32
 Mature lectum petere sanitati conducit. 2. 56
 Mediastinum tenditur in inspiratione. 1. 27
 Medicamentorum selectus perversus. 1. 1

Membranæ omnes vasculosæ sunt. 1. 60
 Membrum cur movendum si sanguis tardius fluat ex venâ aperta. 2. 13
 Mensium fluxus a motu vitali vasorum. 1. 53

- Mentis actiones puræ. 4. 1. actio non est causa motus vitalis. 1. 16
 Meridiari quando conducatur. 2. 56
 Meseraicarum suctio an famis causa. 3. 14
 Metastasis ad caput præfagia. 2. 26
 Mœstitia quid faciat. 2. 27
 Morbi raro occurrentes sedulo describuntur, contra vero qui frequenter videntur. 1. 1. ex phænomeno quid considerant. 4. 9
 Motus animalis. vid. *animalis motus*. vitalis. vid. *vitalis motus*. vitalis a paucis descriptus. 1. 2. definitio. 1. 3. causa generalis. 1. 4. causæ generales dividuntur. 1. 5. potentia tam in laceratis pallescentibus quam fibris rubris muscularibus detegitur. 1. 41. celerior in quibusdam arteriarum ramis non dependet ab elasticitate. 1. 46. majoris causa non est obstructio. 1. 47. inæqualis elasticitate fit æqualis. 1. 50. a stimulo exponitur. 1. 76. & quietis vicissitudo. 2. 1. muscularis quando torporem discutit. 2. 8. humorum major ad caput vigiliarum causa. 2. 26. insolitus sitim facit. 4. 35. vitalis tardior in somno quam in vigilia. 2. 36. major implet arterias. 2. 52. minor implet arterias. 2. 52. retrogradus ex ductu hepatico in cysticum. 3. 23
 Motuum leges. 1. 6. leges aliæ in viventibus. 1. 7. motus viventium particularis. 5. 9. ejus consensus cum animali. 5. 40
 Movendum corpus num sit post cibum sumtum. 2. 55
 Munitio corporis in somno. 2. 59
 Musculorum fabrica. 1. 40. rubedo a sanguine rubro. 1. 41

N

- N** *Ἀπνοία*. 2. 30. quomodo somnum faciant. 2. 48
 Natura. vid. *vitalis motus*.
 Necessitas vigiliarum. 2. 28
 Nervos ad sitim quid afficit. 4. 5
 Ner-

- Nervus ipse non facit alternam contractionem in motu vitali. 1. 34
- Nervorum capsulae sua contractilitate faciunt continuare motum vitalem in partibus a reliquo corpore separatis. 1. 62. compressio an somni causa. 2. 49
- Nervi sitis ubinam locati. 4. 6
- Nitri in nobis mutatio. 4. 29. conversio a putredine. 4. 29
- Notiones conjungendae ut fiat Definitio. 2. 3
- Nox somno data est. 2. 56
- Nudo corpore non dormiendum. 2. 59
- Nutritio & digestio differunt. 2. 36
- Nutrimenti necessitas. 3. 1. tria genera. 3. 2
- O
- O**bstitutio non est causa inflammationis. 2. 53. non est auctae velocitatis causa. 1. 47
- Obvia despiciuntur. 1. 1
- Oleositas alimentorum non est somni causa. 2. 51
- Oleosa non facile absorbentur. 2. 51
- Opiata quali modo somnum faciant. 2. 48
- Opii usus ad quietem producendam in somno. 2. 60
- Orbicularis uteri musculus quando invenitur. 1. 41
- Organi structura non est causa motus vitalis. 1. 16. fabrica est causa motus alterni. 1. 37. & 39. ab anatomicis non satis detecta. 1. 40
- Organa praeparatoria. 5. 10. Secretoria. 5. 14
- Organum generale praeparationis. 5. 12
- Organi fabrica causa actionis particularis. 5. 35. an ejus calor & frigus pendeat ab actione particulari. 5. 47
- Oscillatio durae matris examinatur. 1. 32
- Oscula lacteorum quomodo chylum recipiant. 1. 69
- Ossium motus vitalis. 1. 71
- Otiosis cur minor somni necessitas. 2. 45
- Ovarii actio. 5. 28
- P
- P**apaveris usus ad quietem inducendam in somno. 2. 60
- Partes albae non carent vasis. 1. 60
- Pathematum consensus. 5. 41
- Pepasmus in somno cur fiat. 2. 36
- Perspiratio largior in vigilia quam in somno. 2. 13. qualis in somno. 2. 42. ejus egestio. 5. 24
- Pervigilium. 2. 30
- Phaenomena siccitatem indicantia. 4. 11
- Phlogistica Diathesis. vid. *Lentor*.
- Pica laborantes quid sentiant. 3. 46
- Pingua non facile absorbentur. 2. 51. non feruntur ab erysipelatosi. 4. 19
- Pinguedo colligitur somno. 2. 54
- Placentae actio inconstans. 5. 27
- Plantarum motus vitalis. 1. 9
- Plantae amputatae novos ramos emittunt. 1. 13
- Pleuritis quomodo curatur venae sectione. 1. 54
- Potus necessitas. 4. 4. necessitas in acutis. 4. 8.
- Prognosis duplex ex sitis praesentia. 4. 37
- Pancreaticus succus acidus an famis causa. 3. 15
- Pueri diutius dormire debent. 2. 56
- Pulmonis elaterium juvat cordis dilationem & impletionem. 1. 23
- Pulmones tenduntur & expanduntur in inspiratione. 1. 27. non transmittentes sanguinem non ponunt causam expirationis. 1. 30
- Pulmo organum generale praeparationis. 5. 12
- Pulmonum motus vitalis. 1. 70
- Pulsatio haemorrhagiae praesagium. 1. 46. quomodo generatur. 1. 52
- Pulsus in somno qualis. 2. 40. quomodo fiat a motu vitali. 1. 52. tardior in somno quam vigilia. 2. 12. an major vel minor in somno. 2. 35
- Puris sitim facientis signa. 4. 33
- Purulentorum sitis. 4. 32
- Purgantia sitis causa, & quid circa ea observandum. 4. 10
- Pus tribus modis fertur ad sitis organum. 4. 32
- Putrido morbo laborantes petunt falsa & acida. 3. 46
- Putredinis effectus. 4. 14
- Putredo promovetur ab aere. 4. 14
- Putrefacta ore masticata sitis sine defectu humidi causa. 4. 13

Quietis & motus vicissitudo. 2. 1
Quietis fere eadem habet phænomena ut somnus. 2. 31. an imperanda post cibum. 2. 55. corporis debet esse in somno. 2. 60. somno conducit. 2. 50
 Quiescentis mutatio in corpore. 2. 32.
 Generationis necessitas. 3. 1

R

Rachitidis causa vigilia. 2. 19
Ramorum omnium arteriæ non est æqualis circulatio. 1. 46
 Recidivæ præfagium. 2. 26
 Reconvalescentes diutius dormire debent. 2. 56
 Reconvalescentes non nimis appetitui indulgere debent. 3. 42
 Reditus sanguinis impeditus somni causa. 2. 52
 Refutatio quali modo tractanda. 2. 38
 Relaxationis cordis causa. 1. 20. ad 22
 Reminisci, ratiocinari ad sensus internos possunt referri. 4. 1
 Renum & urinæ egestio. 5. 23
 Respiratio animalis & vitalis. 1. 24. an promoveat sanguinem per venam portarum. 1. 57. an major vel minor in somno. 2. 35. æque frequens potest majorem & minorem quantitatem sanguinis transmittere. 2. 41. qualis in somno. 2. 41
 Respirationis vitalis phænomena. 1. 25
 Rubedo ab aucto motu vitali arteriæ. 1. 53

S

Sal nitrosus putredine convertitur in alcali volatile. 4. 29
 Salis ammoniaci generatio. 4. 29
 Salivæ secretio. 5. 19
 Sal marinus sitim excirat. 4. 29
 Sanguinis globuli rubri nihil faciunt ad morum. 1. 41. missio in pleuritide. 1. 54. fluentis defectu non fit exspiratio vitalis. 1. 30. motus tardior somno. 2. 40. copia premens cerebrum an somni causa. 2. 49. defectus an somni causa. 2. 50. reditus somni causa. 2. 52
 Sanitati conducit mature lectum petere. 2. 56

Sani quantum debeant bibere. 4. 7
 Sanies sitis sine defectu humidi causa. 4. 13.
 Scorbuti signum sitis major. 4. 26
 Secretoria organa. 5. 14
 Secretio glandularum. 5. 15. cerebri & cerebelli. 5. 16. Succus Nervosus. 5. 17. Lacrymarum. 5. 18. Salivæ. 5. 19. Bilis. 5. 20
 Semen vegetabile vetustate effectum terræ commissum non progerminat. 1. 10
 Semina vegetabilium non semper fructuantur motu vitali. 1. 12
 Senes diutius dormire debent. 2. 56
 Sensus quid. 4. 1. duæ distinctiones. ib. organici. ib. externi nisi a validiore causa excitantur in somno. 2. 34. specialis describitur. 3. 8. in parte distincta. 3. 9. animalis & naturalis. 3. 11
 Sensuum internorum nulla actio in somno. 2. 33. tria genera. 3. 10. tres classes, 1. quinque sensus, 2. ex abundantia. 3. ex defectu. 4. 2. distinctio in puros & organicos. 4. 2. eorum consensus cum motu particulari. 5. 42
 Siccitas sitim faciens quæ phænomena præbet. 4. 11
 Signa impetus majoris ad caput. 2. 26
 Sitire in Medicamento purgantis potione bonum. 4. 39. non est naturale in Chronicis. 4. 39
 Siticulosis an lac prohibendum. 4. 38
 Sitiens aliquid sentit. 4. 3
 Sitis causæ evacuationes copiosiores humoris tenuis. 4. 10. Hydrops. 4. 10. Cantharides. ib. purgantia. ib. ad sensum pertinet. 4. 3. ex morfu Dipsadis. 4. 36. minor seu adipisia. 4. 39. minor in acutis. 4. 39. in inflammatoriis & erysipelatosi. 4. 39. est sensus distinctus. 4. 3. 1. quia exercetur in speciali corporis loco. 4. 3. 2. quia nullus similis. 4. 3. 3. quia specialis ejus causa. ib. causa naturalis. 4. 4. & 5. quando dicitur. 4. 4. a quibus nervis percipitur. 4. 6. cur nobis data. 3. 5. quid indicat. 4. 5. num fiat ex humidi defectu, quomodo cognoscitur. 4. 11. tolerata nocet. 4. 8. non naturalis. 4. 9. quomodo fiat. 4. 9. in ejus causis 3 observanda. ib. ex siccitate quam cautelam habet. 4. 12. inter ma-

- mala signa dysenteriae locata ab Hipp. 4. 12. ex evacuatione vix temperatur potu. 4. 12. causae sine defectu humidi. 4. 13. absentia in hydropicis quid designat. 4. 11. in alvo adstricta curatio. 4. 14. hydropicorum funestissimum signum. 4. 14. in alvo adstricta unde oritur. 4. 14. ex putredine num fiat, quomodo cognoscitur. 4. 15. ex putredine nulla difficilior curatu. 4. 16.
- Sitis biliosorum & erysipelatosorum morborum, & quid in his observatur. 4. 17. ex erysipelate natae signa. 4. 18. ex erysipelate natae curatio. 4. 19. ex Lentore. 4. 20. ex Lentore num fiat, quomodo cognoscitur. 4. 21. ex Lentore natae curatio. 4. 22. in Chronicis. 4. 23. ex cacochylia natae signa. 4. 24. & 27. ex cacochylia natae curatio. 4. 25. & 28. ex humoribus morboris. 4. 26. major inter scorbuti signa refertur. 4. 26. hydropicorum fallenda. 4. 28. catarrhosorum. 4. 29. ex catarrhis natae signa. 4. 30. curatio. 4. 31. in morbis purulentis. 4. 32. ex pure signa. 4. 33. cura. 4. 34. ex motu insolito. 4. 35. ab applicatis vel exhibitis externis. 4. 36. praeter rationem soluta in acutis morbis mala. 4. 11. & 39
- Somnus aequae quam alimentum nutrit infantes. 2. 15
- Somnolenti phaenomena. 2. 34
- Spiritus rector. vid. *Vitalis motus*. quid faciant ad motum vitalem. 1. 37. cerebelli tarde & aequabiliter fluunt. 1. 38. ipsi non faciunt alternum motum vitalem. 1. 36
- Spiritus copiosiores in vigiliis. 2. 6. consumuntur vigiliis. 2. 7. & 11. animalis & vitalis an differant. 2. 12. tardius fluunt in somno quam in vigiliis. 2. 17. vitales consumuntur in vigiliis. 2. 18. quomodo generantur somno. 2. 29. in somno minus consumuntur quam in vigilia. 2. 33. nostri & fermentati ut differant. 2. 45. an existant in sanguine, an vero ex eo praeparantur. 2. 47
- Spirituum fluxus minuitur opio, narcoticis & hypnoticis. 2. 48. fluxus est motus vitalis causa. 1. 18. praeparatio duplex. 2. 8. Defectus causa somni. 2. 20. copia an major e cerebello in somno secernitur. 2. 37. fluxus quali modo fiat. 2. 38. vitalium fluxus in somno. 2. 39. defectu & tardiori motu fit somnus. 2. 44. materiae defectu fit somnus. 2. 45. hujus causa. 2. 45. materia ex quo liquore conficitur. 2. 47. ubi colligitur. 2. 47. necessarius ad actiones. 5. 44
- Stertor an probet majorem respirationem. 2. 41
- Stimulus vigiliarum causa. 2. 25. internus. 1. 77
- Stimuli motus explicatio. 1. 76
- Stimuli actio. 5. 33
- Stomachica sitim ex cacochylia leniunt. 4. 23
- Stomachicum specificum non habetur. 3. 33
- Stomachus plenus cur producat somnum. 2. 51
- Stragulorum usus in somno. 2. 59
- Studia quando & quamdiu excolenda. 2. 56
- Suctio meseraicarum an famis causa. 3. 14. meseraicarum non est famis causa. 3. 22
- Succubus dormientium in dorsum. 2. 58
- Succus ventriculi an acidus. 3. 18. acidus lienis an famis causa. 3. 18
- Succi nervosi secretio. 5. 17
- Sudoris egestio. 5. 24
- Sulphuris incola. vid. *vitalis motus*.
- Sylvii sententia de fame examinatur. 3. 17
- Syncope qualem decubitus exigit. 2. 58
- Syncopticus quomodo reconvalescit. 1. 64

T

- T**Empus vigiliae. 2. 28. dormiendi determinatur. 2. 56
- Terrea interdum petuntur in chronicis. 3. 46
- Testium actio. 5. 30
- Torpor discutitur motu musculari. 2. 8. ex longiori somno. 2. 9
- Tubulos minimos ut ingrediatur liquor. 4. 14

V.

Voletudinarii mature lectum petant.
2. 56

Vapor alimentorum ex ventriculo ad-
scendens non est somni causa. 2. 51

Vasa brevia an ferant succum acidum
in ventriculum. 3. 19

Velocitatis inæqualitas in variis ramis
unde dependeat. 1. 47

Vena jugularis compressa apoplexiæ cau-
sa. 2. 52

Venæ sectio quomodo curat inflamma-
tionem. 1. 53. non multum dif-
fert qua in parte instituitur. 1.
53. non educit lentorem pleuritidem
facientem. 1. 54. & 55. detumescunt
somno. 2. 54. portarum circulatio.
1. 57. cur plenæ in cadaveribus. 1. 65.
motus vitalis. 1. 66. implentur motu
aucto. 2. 52. portarum pars in hepa-
te est arteria. 3. 19

Ventriculus vacuus non est sola famis
causa. 3. 13. intercipit somnum. 2.
23. plenus intercipit somnum. 2. 23

Ventriculi laterum contactus an famis
causa. 3. 20. sensus quid monet. 3.
24

Ventriculo pleno urgentur partes adja-
centes. 3. 23

Ventris muscoli elongantur in inspira-
tione. 1. 27

Vestimentorum usus in somno. 2. 59

Vertigo a vigiliis. 2. 19

Vesicula fellea impletur ventriculo va-
cuo. 3. 23. fellea plena etiam duci-

tur bilis in duodenum, licet ventri-
culus sit vacuus. 3. 23

Vesiculæ extensio, vel bilis acrimonia
an aliquid faciat ad famem. 3. 24

Vicissitudinis necessitas. 2. 1. & 8

Vicissitudo somni & vigiliæ. 2. 43. &
66

Vigiliæ definitio. 2. 4

Vinosa promte absorbentur. 2. 51
quali modo somnum faciant. 2. 51

Vires augentur somno. 2. 54

Viscera ventris aliquomodo mutantur in
inspiratione. 1. 27

Viscerum circulatio exponitur. 1. 56

Viscidum augetur somno. 2. 47

Visus est sensus distinctus a tactu. 4. 2

Visum quid faciat. 4. 2

Vita dia sine cibo persistere potest. 3.
21

Vitalis motus definitur. 1. 8. in plan-
tis. 1. 9. est causa ascensus liquoris in
arboribus & vegetabilibus. 1. 10. de-
nominationes variæ. 1. 11. filet ali-
quamdiu in seminibus vegetabilium
& insectis. 1. 12. videtur dispersus
per totam plantam. 1. 13. an existat.
1. 14. an ab anima. 1. 15. non ser-
vat leges generales. 1. 1

Viventium motus differt a motu mecha-
nico. 1. 7

Vomitoriorum cautela. 3. 34

Urina qualis in erysipelate. 4. 7

Urinæ egestio. 5. 23

Uteri orbicularis musculus quando dete-
gitur. 1. 41

Uteri actio. 5. 29

NOI RIFORMATORI

Dello Studio di Padova.

A Vendo veduto per la Fede di Revisione, ed Approvazione del *P. F. Paolo Tommaso Manuelli* Inquisitor Generale del Santo Ufficio di Padova nel Libro intitolato: *Joannis de Gorter de Secretione Humororum, e Sanguine &c. Exercitationes Medicæ Quinque* Non v'esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi, concediamo Licenza a *Gio: Manfrè Stampatore di Venezia*, che possa essere stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padova.

Dat. li 18. Luglio 1750.

(Gio: Alvise Mocenigo II. Rifor.
(Daniel Bragadin Cav. Proc. Rifor.
(

Registrato in Libro a Carte 28. al num. 291.

Michel Angelo Marino Segr.

Adi 31. Luglio 1750.

Registrato nel Magistr. Eccellentissimo degli Esecutori contro la Bestemmia.

Alvise Legrenzi Segr.

JOAN.

...

...

...

...

...

...

...

...

...

...

...

...

...

...

...

...

...

...

...

...

...

...

...

...

SECRETIONIS ANALYSIS PARS PRIMA.

1 **D**efinitio.

2 Ad secretionis cognitionem requiritur explicatio

A. Fluidorum.

3 a. Quas proprietates sanguis communes habet cum aliis liquoribus.

4 α. Quales deteguntur inter liquores.

1 Duæ gutullæ solo attactu uniuntur & sphæricam induunt figuram.

2 Partes liquidi inter se facilius moventur quam separantur.

3 Cohæsiō major & minor potest fieri in eodem liquido.

4 ----- & quibusdam tantum particulis.

5 Vehiculi abundantia & penuria impedit & favet concretioni.

6 Omnes particulæ non eandem exigunt vehiculi quantitatem ut separatæ maneant.

7 Vehiculum copiosum valet separare partes.

8 Fluida gravia vel solida soluta leviori mista non semper descendunt.

9 ----- nec separantur motu.

10 Gravia fluido leviori non intime mista, minus ascendunt, si projiciantur.

11 ----- adaugent tamen totius massæ impetum.

12 Liquores confusi in corpus solidum possunt converti.

13 Confusorum alter sphærulas format, si non misceantur.

β. Quales reperiuntur inter solida & fluida.

1 Unum liquidum tenacius, aliud laxius adhæret solido.

2 Motus parallelus cum solido facilior omni alio.

3 Non omnia solida æque facile juxta solidi superficiem patiuntur duci.

4 Tubuli minimi allevant liquores.

5 Quo tubulus angustior, eo altior liquoris ascensus.

6 Ex tali tubulo inverso non exstillabit liquidum; sed ad alteram descendet extremitatem.

γ. Quales in fluidis per vasa motis.

1 Liquor concrescibilis, si per canalem moveatur, concreescere potest.

2 Motus liquidi circa canalis axim celerrimus.

3 Lævissimæ partes circa axim, aliæ ad latera canalisi feruntur.

4 Velocitas liquidi respondet canalium quadratis inverse.

b. Sanguinis specificæ qualitates.

1 Sanguinis indoles secretionibus favet.

2 Constat partibus magnitudinis variæ.

3 Partes microscopio visibiles in sanguine sunt sphæricæ.

4 Sanguis ubique concrescit stagnans.

5 Circulatio conservat fluorem.

6 Motu accelerato & retardato densatur sanguis.

7 Concrescit calore nimio & frigore.

8 Pars rubra in arteriis venis & cellulis intermediis tantum circulatur.

9 In corde exacte mistus, constat tamen particulis variis.

10 Ibidem omnes possidet liquores, vel eorum materiem.

11 Omnes humores corrumpuntur stagnantes, & quisque pro sua natura aliam exhibet corrupti humoris speciem.

38 B. Solidorum

1 Vascularum perpendiculares sectiones ad axim sunt circulares.

2 Orificia vascularum multum differunt amplitudine.

3 Quadrata diametrorum ramorum superant quadratum diametri trunci.

4 Vasa circulatoria semper premunt contentum.

5 Cursus arteriarum varius ad diversa organa.



JOANNIS DE GORTER

DE SECRETIONE

HUMORUM E SANGUINE

PARS PRIMA.

I



Quando in aliqua parte nostri corporis e massa sanguinea, vel inde derivatis humoribus, separatur liquor aliquis, qui quibusdam proprietatibus ab illo liquido, ex quo depromptus est, differt, vocatur hæc actio Secretio, & liquor separatus humor secretus.

Hæc separatio si fiat extra nostrum corpus, vel sponte ut in omnibus plantis, quæ varios ex eodem solo segregant liquores & quidem diversos in ejusdem plantæ radice, trunco, foliis, floribus, seminibus & fructu; vel arte ut in plurimis Chemicorum operationibus, ad hoc non pertinet negotium, in parte enim debet fieri nostri corporis. Hæc licet in aliis quoque fiat animalibus, in hac tamen nolimus admittere definitione, quod animus est eas tantum, quæ in nobis sunt, exponere Secretiones, ne multitudine magis obscura redderetur hæc pertractatio. Ex massa sanguinea non tantum est opus, ut segregetur liquor, serum etiam & tenuissimam sanguinis partem, per pellucida vectam ab arteriis orta vasa, plures credo, quam immediate ex arteriarum finibus suppeditare liquores. Liquor etiam si divaricatione vasorum in multas dividatur partes, quæ nihil inter se & a priore differunt humore, pro Secretionis negotio minime est habenda hæc operatio.

2. *Hujus ut clarior fiat doctrina, humorum, ex quibus fiet secretio, & organorum, per quæ peragetur hæc separatio, est exponenda indoles & fabrica.* Omnes fere, qui de hac liquorum separatione scripserunt, statim aggressi sunt ipsum exponere secretionis modum: prudentiores vero glandularum accuratam præmisere explanationem. Quum autem sanguinis natura & reliquorum liquidorum non minus faciat, quam organorum intima notitia ad Secretiones explicandas, secretionis disciplina obscura & intricata hucusque mansit; nulla enim potest actio, cujus altera pars relinquitur inculta, exponi clara.

3. *Sanguis, generales omnibus liquoribus communes, & alias sibi tantum proprias*
A pos.

²
possidet qualitates. Sanguinis hic vocabulo omnes complector in nostro corpore humores, ex quibus aliqua fit, in quacumque corporis parte, Secretio. Est utique fluidum, qua definitionis parte sola patet multa in sanguine inveniri, quæ in generali liquidorum idea requiruntur: hoc est in sanguine quædam reperimus, quæ in plurimis quoque aliis reperiuntur fluidis. Sed in eo ipso sanguine alia deteguntur, quæ in nullo alio fluido conspiciuntur, quibus possumus hunc liquorem dicere sanguinem esse, & non aliud fluidum. Hæc duo genera examinata ad secretionis intelligentiam multum accendere lucis postea videbimus.

4. *Sanguini reliquisque humoribus homogeneis vel exacte permistis proprium est, duas guttulas immediate sese mutuo tangentes uniri, sphericamque, si nihil impediat externe, induere figuram*. Primo proponam veritates, quæ in quovis liquido cum alio sibi simili deteguntur, & eas, quæ cum liquore alterius indolis manifestantur; 2. quæ ex applicatione fluidi ad solidum prodeunt; 3. quæ ex motu fluidi deduci possunt. Præpositam veritatem ut omnes Medici & Physici affirmant, ita quam maxime dissentiant in alleganda hujus phænomeni causa. Hic a causa pellente externa, ille vero ex insita vi attractrice explicare conatur. Utut sit, nemo negat hanc unionem naturalem omnibus non modo liquidis, sed etiam corporibus solidis liquefactis; infinitis alias enim experimentis evinci posset ad-versarius. Nonne aquæ guttula in aere congelata sphæram, & aeris bullula, sub aqua ascendente glacie firmata, globosam cavitatem præbet? ipsa etiam metalla in fluorem redacta, ponderosissimumque argentum vivum, & oleosa quævis post nudum contactum sphæram quantitati Materiæ respondentem exhibent? certe non novi ullum fluidum aut solidum in fluorem redactum, quod ab hac generali posset excipi regula. Sed vero, si supra corpus solidum vel fluidum talis hæreat guttula, inferius, quod ibidem magis quam alibi comprimatur, complanatur, & quo major ejusdem liquoris est quantitas, eo minorem continebit sphære segmentum. Vidimus in omnibus guttulis majoribus, minoribus, & exilissimis ad hanc sphericam inducendam figuram esse potentiam, & unam arripere alteram; quid ergo eam negabimus in minimis particulis? Certe nulla mihi remanere dubitandi videtur ratio. Hoc concesso, omnibus particulis adesse vim congregandi, illa vis erit major, ubi major harum particularum reperitur copia sese mutuo tangentium: quum vero nulla potest excogitari linea longior, quæque plures possidet particulas tales, quam linea per centra & contactus punctum transiens, illa ergo reliquas omnes superabit congregandi potentia, & accedent partes remotissimæ, donec omnes inter se sint æquales: hoc est, quando duæ guttulæ unam sphæram constituerint. An inde non judicabitis patere, quod globuli sanguinis in nostro corpore exacte debeant esse rotundi, ut & serosi, quod in alio natant fluido? utique, licet insuper non sit negandum, circulationis efficacia eandem eos adipisci figuram.

5. *Partes cujuscumque liquidi homogenei, vel exacte misti, facilius inter se moveri possunt, quam separari*. Tentate quæso partem guttulæ olei innatantis aquæ ab ea separare motu non admodum valido, potius integra subsequetur gutta, quam ut aliquam ejus amittat partem: imo satis magna quantitas olei libere innatans aquæ exiguo instrumento, tentante minimam ab oleo separare portiunculam, per totam aquæ superficiem patietur duci. Quo docemur, minorem ad motum intestinum liquoribus inducendum requiri vim, quam ad eorum dissolutionem: & insuper scimus, quare suctione principia canalium depleta protinus quoque impleantur, quod scilicet præcedens liquor secum ducat sequentem. Hujus rei veritas manifestatur, si habeatur vas aliquod aqua vel alio liquore plenum, in cujus fundo hæret canalis apertus, transitum præbens liquori. Notetur accurate tempus, quo per hunc canalem vas potest depleri. Impleatur idem vas iterum eodem liquore, & applicetur tunc fistula ejusdem amplitudinis, ut est canalis
in

in fundo vasis, canali, per quem transibit liquor, tunc major quantitas eodem temporis spatio fluet per idem foramen seu canalem vasis, quam antea fistula non applicata, & vas citius depletum erit, quod præcedens liquor in fistula secum ducat vel trahat sequentem, ejusque motum acceleret.

6. *Hæc cohærendi potestas major potest fieri in eodem liquido & minor.* Oleosa enim quævis & gelatinosa in frigore magis cohærent quam in calore, ut & omnes nostri corporis humores: dicat quis, frigus minuit particularum in fluido motum, & ideo tenacius cohærent. Concedo, non enim rogamus, unde illa major provenit cohæsiō, sed dicimus tantum id fieri posse. Multæ forsan sunt causæ nos latentes, quod hæc doctrina non satis fuerit exulta, quæ partibus fluidis majorem coadunandi conciliare possent vim: in solidis res est clarior, chalybs enim sola affrictione magnetis aliud ferrum potenter allicit. Ipsum quoque ferrum & chalybs aliaque metalla magis minusve reperiuntur tenacia, prout vario pertractata fuerint modo. Quidni ergo hoc quoque in fluidis? nonne sanguis stipticorum attactu vehementer concrescit, & ejus serum in massam scissilem? quam maxime, ne quidem ejus tenuissima lympa dimittitur, sed una cum reliquis in corpus convertitur solidum.

Ut potest augeri, ita e contrario non parum potest de hac amittere potestate: sic sanguis & pus in abscessu, maceratione & putredine, crassissimi sane liquores in foetentem & tenuem convertuntur ichorem. Ita visceri quoque in corpore stagnantes humores, in tenuem acerrimam omnia perrodentem convertuntur faniem. Nonne observatum fuit Practicis, aeris infectionem pestilentialem brevi totam dissolvit sanguinis massam, uteducta ejus portio ne quidem in frigore concrederet stagnans? quid agit fermentatio in vegetabilium partem oleosam? nonne illa in spiritum inflammabilem mutata multo minus cohæret? intelligimus ex his, non opus esse ad Secretionem humoris alicujus crassioris vel tenuioris, ut talis existat prius; peracta enim Secretione fieri potest hoc modo crassior magisque cohærens, vel tenuior & magis fluidus, & aliam omnino ratione consistentiæ adipisci indolem, Secretione peracta.

7. *Et in humore, licet accuratissime permixto, idem (6) potest quibusdam tantum conciliari partibus, reliquis intactis.* Multo pauciores, quam vulgus judicat, reperiuntur simplices non permixti liquores, & forsan nullus purus potest exhiberi in universo: aqua enim purissima sponte putrescit sensim & in diversa abit corpora: quis unquam oleum nullo alio permixtum elemento collegit seorsim? sed vero liquor in omni parte sensibili sibi similis homogeneous ut plurimum statuitur humor. Sic muria salium ex omni parte pellucida & æqualis, & sanguis veniens ex pulmonum officina, oculo examinata nudo homogenea videntur liquida: quid aliud lac recens ex uberibus deductum? ita quoque solutiones omnes metallorum ponderosissimæ, & mineralium atque vegetabilium eductæ in convenienti menstruo tincturæ, quibus chemicorum passim scatent libri. Horum omnium, licet videantur homogenea, partibus tamen quibusdam possumus augere & minuere cohæsiōnem. Quid aliud coagulum in lacte? quid præcipitantes affusi solutionibus metallorum liquores, atque mineralium ac vegetabilium tincturis, aliud agunt, quam certis partibus in isto liquido conciliare majorem congregandi facultatem, qua sese mutuo arripiunt, & a reliquo liberant humoris conjugio? Non fit ut salium crystallizatio, aut particularum proximior adductio, quod dematur vehiculum, quod partes retinebat segregatas: imo augebitur affusione coaguli vehiculi quantitas, & tamen concrescunt. Ita etiam acida mineralia & spirituosissima fermentata pura, nonne fortius sanguinem concrecere faciunt illi mista, quam ex sua propria indole? quæ tamen propter copiosius vehiculum separatas retinere debuissent partes. An ergo impossibile unam sistere tantum Secretionem exhibito Medicamine, & reliquas non attingere? quum ipse sanguis ad oculum in tot

varias separetur partes, & peculiaris liquor secernendus ex suo speciali est petendus cum reliqua massa permisto humore. Videmus hinc facile, cur adstringentia quædam incrassare valeant sanguinem, chylum vero & lympham in intestinis & Mesenterio nihil inde mutari.

Non minus valet ars in quarundam specialium partium cujusdam fluidi attractione privanda. Percurrite multos Chemicorum processus, & miras videbitis hujusmodi operationes; sales etenim alcalini sponte liquecunt aqua, quos tamen alcohol penetrantissimum resinosis Menstruum ne quidem attingit; nonne alias ex eadem planta spiritu vini, alcohole, aut aqua educæ tincturæ possident vires? quare Cantharides renibus, Mercurius ori, & purgantia intestinis infesta? certe non quod mutant tantum illa organa, aut totam solvant sanguinis miscellam, sed unam præ aliis sanguinis per illa loca derivandam dissolvant partem. Multa enim purgantium infusa animalium injecta venis sollicitant non minus intestina, ac si per os fuissent assumpta: nec refert cuicumque parti corporis Mercurius aut Cantharides fuerint applicatæ, absorpta venis eorum vis salivæ & urinæ aggreditur organa, & copiosam educunt ex illis partibus quantitatem liquoris.

8. *Copiosum vehiculum valet partes concrescibiles separatas tenere, & minor quantitas concretioni favet.* Quid salium impedit conversionem in crystallos? aquæ certe abundantia eorum retinet partes sejunctas, quod longius distant quam ut possent insita sua concrescendi vi ab aquæ consortio sese liberare, sed demta aliqua vehiculi quantitate tot coeant partes, donec iterum vehiculi quantitas vim superat concrescendi; nova deinceps instituitur evaporatio, donec iterum pellicula appareat in superficie liquoris, novæ in quiete prodibunt salium crystalli, sic aquæ abundantia potest omne urinæ auferre sedimentum; cujus vero penuria copiosum exhibet & crassum. An inde non patet, quare sanguis ruber debet in arteriis tantum contineri & venis? ut liquor secernendus magna liberaretur vehiculi quantitate, quo partes ejusdem naturæ minus distarent, & promptius coirent.

9. *Quædam non nisi copioso, alia quam minimo separata tenentur vehiculo.* Saccharum & salia alcalia minima liquoris quantitate fluida servantur, at tartari cremor magnam quantitatem aquæ ad salis pondus requirit, ut maneat fluidus. Alia minorem, alia majorem exigunt quantitatem, ut chemica experimenta certissime evincunt. Sanguinis ipsa portio rubra valde concrescibilis, aquæ abundantia diluta, a concretionem servatur; at serum minore, & lymphæ nullo permista liquido remanet fluida. An ergo mirum, sanguinis globulos tantum in arteriis retineri & venis, quum potius similibus quam aliis sanguinis uniantur partibus, & persequantur priores, quam ut in lateralia, quorum priora orificia admittere possent globulos, intrarent? hoc quoque multum facit ad sanguinis rubri resorptionem e vasis alias pellucidis, cessante impulsu validiore a tergo: vasorum enim contractio sola pellit contentum æque ante ac retro in ramis arteriosis valvulis destitutis: minima ergo pressio, quæ semper viget in corpore vivente, a corde per truncum arteriæ ad ramos, valet impulsu sanguinem in minoribus ab arteriis derivatis vasculis retinere impactum, & recursu præpedire. Sed vero hæc uniendi cum similibus potentia, simul ac minuitur propellendi vigor, allicit ex istis vasculis, quæ validiori motu a tergo hanc superante vim tenebantur seclusa: quod attactu globulorum sanguineorum in arteriis a tergo, non vero alibi, urgeantur retrorsum fluere. Quid judicabimus de sero? Nonne illud, globulis liberatum rubris, per propria postea ductum vascula, motu magis placido, idem posset efficere, ut sanguinis in arteriis pars rubra? Sic enim magis unitæ hærent in sero particule minus concrescibiles quam globuli rubri, quæ insuper liberatæ parte aquosa tenuissima ad concretionem disponuntur. An lymphæ iterum in alios separetur liquores distinctos, haud possumus determinare. Ex his tamen constat certissime, particulas parti serosæ tantum aut lymphæ miscibi-

les propius ad sese invicem accedere; & eadem ex causa, sic demto vehiculo, urini & a reliqua separari massa, quod erat iis ob nimiam particularum distantiam impossibile: atque sic varios secretos producere liquores. Sic alii ex sanguine, alii ex sero, alii ex lymphæ sequestrantur liquores, & eo tantum nomine, quod non æqualis requiratur vehiculi in omnibus quantitas, cum sanguini majore, sero minore, & lymphæ exigua est opus quantitate qua eorum particulæ in fluore conservantur.

10. *Copiosum vehiculum valet partes permisti liquoris separare.* Resinosa permista alcohole ab aquæ affusione separantur; sic in omnibus menstuis, quæ duobus diversis possunt misceri corporibus, ut spiritus inflammabiles cum aqua & oleo, sola dilutione tertii, quod alteri non potest conjungi, perficitur separatio. An ideo tot nervi ad glandulas, quæ vix sensu gaudent aut motu, ut affusione succi nervosi in tali organo peculiaris liquoris fieret secretio? An inde non patet, a morbis staminis nervosi miras prodire & insolitas secretiones? Illasque quoque fisti augerique posse & perturbari ab animi pathematibus, quæ vehementer in nervis operantur? & multa alia obscura, alias non intelligibilia, nunc facillime exponi?

11. *Fluidum gravius permistum leviori non semper fundum petit vasis.* Omnia fluida non ejusdem esse ponderis quis ignorat? Eorum quædam verbi gratia misceri possunt aquæ, alia vero ejus refugiunt consortium: quæ non miscentur, in fundo vasis aquam continentis, si graviora sunt, inveniuntur; alia vero aquæ miscibilia, ut salium solutiones omnes seu muriæ, & spiritus ponderosi acidi ex sale marino, nitro, & vitriolo; atque multa alia, tam exacte per omnes distribuuntur aquæ partes, ut nulla inveniatur in superiore vel inferiore parte liquoris permisti differentia: hoc quoque in aliis fieri liquoribus confusis, non est opus demonstrare: imo ponderosissima solida, ut est aurum & plumbum, in suo speciali distributa menstuo, æque copiosa in superficie, quam circa fundum reperiuntur, nec ponderosissimus liquidorum Mercurius menstui relinquit claustra. patet ergo clarissime, si in nostro sanguine esset fluidum vel solidum quodvis gravissimum, quod accuratissime posset illi permisceri, specifica sua gravitate superiorem vel inferiorem non servare canalium locum. Quænam vero sit causa, quare gravissima sustineantur levioribus, videbimus paucis. Innatat aquæ aurum, aliudque omne ponderosissimorum genus in bracteam tenuissimam malleis extensum; verum cum aqua vel alio fluido leviori mistum, vasis solet petere fundum tardissime, & quo magis divisum, eo languidior descensus; si ergo ejus extensio augeretur in infinitum, metallum hæreret in medio fluidi sustentum, quod specifica gravitas in minutissimis particulis non valeat cohesionem fluidi, sua proportionem superficiem ad contentam materiem divisione nimis adaucta, superare; sed præter hanc divisionem aliud præterea requiritur ad intimam perficiendam miscelam, naturalis quædam scilicet convenientia inter partes permistas, qua una alteram adducat in consortium. Nonne aqua solvit salem? Nonne spiritus nitri ponderosissima metalla, & allicit fursum? Si hoc penderet ab aucta partium superficie ad materiæ quantitatem in volumine contentæ, certe non magis fursum quam deorsum in quiescente fluido fererentur; at tenacissime in una eademque parte hærerent liquoris: sed vero naturalis congregandi potentia, permiscendo conveniens, partes graviores allicit fursum, qua vero (6) sublata, ut vidimus in omnibus præcipitationibus chemicorum, per affusionem liquoris, vel immersionem alicujus solidi, quod menstui destruit vim, vel per dilutionem, quæ menstui ita disjungit partes, ut paucissimæ junctæ maneant partes menstui metallorum partibus, graviora petent inferiora vasis. Notum est ergo, partes graviores in sanguine, quamdiu earum cum reliqua massa habeatur accuratissima permistio, sua specifica gravitate sese non posse liberare, & huc usque specialem non producere secretionem; sed tum demum, quando per aliquam causam intimam unionem cum reliquo liquore exuerint.

12. *Fluidum permixtum ex graviore & leviori liquore intime, in altum vel horizontaliter projectum, non separat graviora a levioribus, sed permixtum manet, ac si quiesceret fluidum.* Corpora gravia eadem velocitate mota diutius continuare motum, & ad rectam magis quam leviora accedere lineam, res est notissima, a nemine refutanda; id obtinet in corporibus solidis per idem medium motis: hoc autem a fluidis exactissime permixtis fieri posse non satis intelligo. Quid eveniet, muria salium, vel metallorum quævis si profiliat sursum solutio, nonne partes menstrui eandem ac salium aut metallorum attingent altitudinem? Certe hoc comprobant experimenta. Sed vero corpora solida, gravitatis diversæ, eadem velocitate sursum per aerem pulsa, quo sunt graviora, eo altius ascendent, quod eorum superficies, ratione molis, ad superandam medii resistantiam sit minor, & corpora leviora in superficie proportionaliter majorem patiantur resistantiam; quod demto aere resistente in vacuo Boyleano nequaquam contigisset. Quid fiet insuper, talis liquor si profiliat horizontaliter vel alia directione quadam? num movebuntur partes salinæ vel metallicæ magis quam menstrui, directione magis ad lineam rectam accedente? nequaquam, experimenta non suffragantur. Potest ergo ex gravitate partium in sanguine, celeritate earum, aut motus directione, nulla fieri secretionis differentia, si concipiatur sanguis tanquam fluidum intime permixtum.

13. *Liquidum, constans partibus diversæ gravitatis, profiliat verticaliter vel horizontaliter, ejus partes, quæ in quiete fundum vasis petivissent, minus alte ascendent, & inferiorem partem servabunt parabolæ.* Sumatur aqua cum arena vel aliis corpusculis exilissimis aqua gravioribus mista, & instar fontis profiliat sursum adeo, ut liquidi directio aliquantulum inclinetur, (alias enim a subsequente liquido iterum evehetur arena, & erit in superficie columnæ motus perturbatus,) arena tunc eandem, ut aqua, non attinget altitudinem, & in parabola ejus inferiorem retinebit arena partem: dum enim aqua ita profilit, partes juxta se quiescunt, quæ in his graviora, specifica gravitate interim descendunt (23), dum tota massa moveatur verticaliter, vel horizontaliter. Quod adhuc clarius patet, si talis columna profiliens coerceatur canali, arena retinebitur in canali, & supra effluet aqua pura: quare in fontium canalibus tanta colligitur sordium copia. Patet ergo partes sanguinis graviores, & in quiete descendentes, minus ferri ad cerebrum, si feratur sanguis sursum e sinistro cordis ventriculo per incurvatam aortam in superiore curvaturæ parte carotides emittentem, quando statuitur motus ibidem placidus; si perturbatus fuerit, vix aliqua erit statuenda differentia. Concedamus, principio propulsionis graviora celeritate prævenire alia leviora; tam exigua hæc esset differentia, ut vix notabilis. Arena vi projecta in aquam quo usque penetrabit? statim cessabit motus impressus, & descendet propria tantum gravitate: hic habemus maximam tamen differentiam gravitatis & motus. Quid fieret, si siphonis ope una cum aqua in aliam stagnantem impelleretur oblique? Certe tam parva esset discrepantia progressus, ut observari vix posset. Quare non video aliquam posse statui fieri secretionem peculiarem gravitate partium productam, quam illam, quæ contingit descensu gravitatis specificæ, cui etiam parum habendum est fidei: quippe non semper in eodem situ, quoad horizontem, nostrum sese habet corpus; sanguis fertur in arteriis motu ita perturbato aut inæquali, ut vix detur sat temporis gravioribus partibus ad descendendum; & denique inter partes sanguinem constituentes nulla fere invenitur gravitatis differentia.

14. *Graviora tamen mista liquido leviori, totius massæ impetum in obstaculum resistens adaugent.* Ex hac permissione massa fluidi fit specificè gravior, & cum impetus duorum corporum eadem velocitate latorum in obstaculum sint ut quantitates materiæ, itaque massa ab admitione gravior facta vehementius fertur in obstaculum, potest ab hac causa obstaculum removeri, aut si resistere nequeat, rumpi. An ideo aquosa sanguine leviora refrigerant corpus, & ingesta graviora ca-

lesaciunt idem, quod sanguis gravitate majore validiorem inducat attritum, hoc fieret semper, si non simul aliud quid ageretur in corpore hunc effectum præpediens. Nonne ex tali massa sanguinea copiosior erat deducenda secretio, quod majore impetu dilatet secretoria? Hæ partes graviores si unico tantum speciali liquorum generi possint uniri (7); nonne illa secretio sola adaugebitur reliquis intactis quandoque? Sic Mercurius salivoso mistus liquori ductus aperit, & salivam fundere facit.

15. *Duo liquores confusi in corpus veluti solidum possunt converti, sola permistione.* Sic spiritus alcalinus purissimus cum alcohole in massam albam solidam convertitur, quæ ossa dicitur Helmontiana. Sic acetum lithargyrii cum oleo conteritur in unguentum nutritum, & multa alia hoc modo coeunt sine separatione tenuioris: nemo tamen judicet, nos velle in nostro corpore id quoque fieri a liquoribus hujusmodi, sed demonstrare volumus, id esse possibile & forsan in corpore observari. Nonne serum sanguinis ab alcohole & acidis mineralibus coit? Nonne ad unam secretionem vel liquorem alicubi conficiendum duo confunduntur humores? ut fit ad oblinienda ossium extrema. Sic liquor seminalis e testibus, & alius ex prostaticis, confunduntur ante ejaculationem; an vero, ex hac mistura quosdam crassescere in loculis post secretionem humores, absurdum esset credere?

16. *Aut alter eorum multas format, in reliquo liquido natantes, spherulas, quod minori sit copia, vel congregandi prævaleat potentia.* Hoc naturale esse & insitum omnibus liquoribus, ut superius (4) demonstravimus, in alio fluido natantibus vel submersis, nemo non novit: sed observare id genus liquidorum, cujus partes tenacius coherant in alio fluido, etiamsi ejusdem quantitatis, in globum formari, ad conformationem globulorum in sanguine egregia præstat: sic enim facile ex lege naturali, omnibus insita fluidis, cognoscimus, sponte fluida ejusdem indolis in globulos uniri, quæ formatio circumrotatione partium in fluidis, allisione ad se invicem & ad solida, atque compressione vasorum cylindricorum, ad perfectionem deducitur; ita revera partes formantur in sanguine magnitudine appropriata certo cuidam generi vasorum, non per alia secernendæ. Tanta observatur in hoc casu uniendi potentia, ut major hujus etiam quantitas hanc attamen induat figuram, reliquo liquore relicta inter spherulas spatia replente; quare non semper opus, ut feri quantitas superet globulorum rubrorum quantitatem.

17. *Quaedam fluida facile, alia autem difficile idem arripiunt solidum.* Hæc est altera pars proprietatum (4). Quis nunquam observavit abaculos, scandulas, aut vitra illinita prius pinguedine vel oleo, & iterum deterfa, nec aquam nec atramentum suscipere, sed respuere illa; pingua vero tunc omnia tenacissime adhærere: Nonne charta aut calamus pinguedine perfrieta scribendo redduntur inepta? Sic anseres, olores, & anates, pulchro sane spectaculo, splendentium gemmarum instar, aquam pellucidam per dorsum dejiciunt, eorum plumas non madefacientem; nec tubuli vitrei exigui & sicci, licet submergantur, recipiunt aquam: nonne Mercurius auro avidissime sese adjungit, qui omnium fere reliquorum refugit consortium? Talia plurima dantur hujusmodi exempla: quidni idem contingere posset in corpore humano, aquosa minus adhærere cellulis pinguedinosi, quibus tamen pars oleosa arripitur promptissime? & vasis lymphaticis vix applicari posse, ut hæreat, pingue? Revera cuicumque solido specialis tribuenda est indoles, qua hoc præ illo eligit fluidi genus, cui facilius sese unit, & quod difficiliter dimittit. Hoc potest ergo etiam inter constantissimas secretionum recitari causas, quod faciat ad sibi specialem in reliqua sanguinis massa eliciendam partem, quam arripit solidum, & separat ab aliis huic generi solidorum minus adhærentibus.

18. *Motus parallelus fluidi cum solido conveniente facilius omni modo alio.* Tam diu descendet gutta liquoris per solidi superficiem, donec superficiei reflexione subsistere cogatur; potius hærebit ibidem contra naturalem gravitatem, quam remitte-

teret solidum: at vero alio inferius si tangatur corpore, prius relinquet corpus, & jungetur alteri inferius tangenti, atque suam consequetur gravitatem. An ergo mirum, liquores ad cutaneos poros, licet satis patulos, detrusos facilius subsequi circulantibus quam expelli; quod in circulatione sit continuatio vasorum?

19. *Quidam liquores facilius aliis juxta solida moventur.* Quædam fluida tenacissime ita adhærent solidis, ut juxta solidi superficiem non nisi vi se patiantur moveri parallele; alia quidem facillime: & liquida multum inter se differunt sola hac cohæſionis differentia. Sic oleosa promptius solida arripiunt aquosis, & aquosa facilius derelinquunt solida. Quare ergo in liquido fluente, quod constat aqua & oleo, per minutissimos canales, retinebitur oleosum ad latera canalium & perfluet aqua. An ob hanc causam ubique per totum corpus, sine glandulosa machina, in vasculis lateralibus pinguedinosus colligitur oleum? Hoc statuere non videtur absurdum. Colligitur enim pinguedo in carne: & medulla in ossibus, vita otiosa, quæ iterum absumuntur nimis exercitato corpore; quod motu placidissimo circulationis prævaleat cohæſio oleosi cum solidis impetui separationis: in motu autem validiore superat impetus momentum cohæſionis. Nonne hinc intelligitur, quare post morbos, in quibus validus fuit pulsus, tanta oritur corporis extenuatio, sola pinguedinis absumptione? Cur animalibus paulo ante mactationem exercitatis parum in ossibus medullæ? Ad hoc investigandum, tubulos minimos vitreos immisi oleo & aquæ, vidi semper celerrime ascendere aquam, tardius vero oleum: hoc ex olei cohæſione majore ad internam canalis superficiem evenire quis dubitaret credere?

20. *Tubuli vitrei minimi, intus madidi, & utraque extremitate aperti, liquori altera extremitate immersi, eum intus recipiunt, & ascendere faciunt supra reliquam liquoris superficiem.* Sumatur tubulus pellucidus, & liquor aliquis coloratus, ut per tubuli substantiam coloratum conspiciere valeamus liquorem, si ascendat; ducatur tunc suctione vel efflatione talis liquor, cui immergendus est tubulus, per tubulum, ut madescat intus, expulso iterum liquore, & humectatus ac depletus tubus committatur altera extremitate liquori, pulchro sane spectaculo videbis subito ascendere, si tubulus sit valde exiguus seu tenuis, liquorem plus quam ad altitudinem duorum pollicum supra liquoris superficiem: si talis eximatur impletus; liquor non exstillabit, sed hærebit a tubo detentus: & quod magis est, si exprimatur flatu liquidum ut gutta pendeat ex inferiore tubi extremitate, statim ac cessaverit pressura, recipietur gutta in tubulum, & sursum feretur. Hujus ascensus causa contra naturalem gravitatem oritur ex inæquali pressione vel alia causa. Inæqualis pressio debet nasci, quod eodem momento, ac immitatur tubulus tantum in eo loco superficiem, minor fiat pressio, verum quum tubulus sit apertus & non præcludatur accessus aeris, nulla ergo potest liquori differentia pressionis a tubulo induci. Non est ergo differentia pressionis sed alia causa, quæ in tubulum ducit sursum liquorem. Nullam aliam possum assignare, quam naturalem congregandi inter similes liquores, & solidorum cum fluidis, potentiam, quæ mihi non magis quam gravitas est nota: eam negare si quis vellet, eodem quoque jure ipsam omnibus notam gravitatem in dubium posset vocare. Negant: concedamus; non esse vim attractricem; ipsa vero experimenta non poterunt refutare; quare ex iis ad secretionem explicandas deducemus conclusiones. Constat ergo, si ex canali secretorio vel excretorio, cujus altera extremitas attingit liquidum circulans, educatur liquor, statim a fluido circulante, sine pressione a tergo cordis, impletum iri. Nonne ergo intelligitur, quomodo canales minimi excretorii pressione, suctione, vel alia causa depleti, sponte iterum impleantur? Ex dictis etiam est evidens, cur, aliquis sudore madidus si corripiatur frigore febrili, statim dispereat omnis sudor: non avolat certe tam subito, sed, cessante motu sudorem propellente, sudor recipitur intus, ut fieri vidimus in præcedenti

experimento tubuli guttulam ab inferna extremitate etiam sursum ducentis . Sic absorptio quoque fit ex cavitatibus corporis , quam , infausto successu , per pressionem externam multi explicare sunt conati .

21. *Quo tubulus angustior , eo altior liquoris ascensus .* Vidi semper in præcedenti experimento altitudinem liquoris ascendentis respondere amplitudini canalis : hoc est , quo plures partes liquidi contenti tangunt superficiem internam tubuli , eo altior ascensus . In cylindro angustissimo plus esse superficiei ad contentum , quam in aliò quovis ampliore , nemo , nisi hospes in solidorum dimensione , ignorat : quo itaque est superficies major , eo quoque plures tangunt ejusdem liquoris partes vas continens : ex hoc attactu oriri ascensum superius demonstravimus , & hoc etiam experimento certissime evincitur . Intelligitur hinc facile ad implendos canaliculos secretorios tanta non opus esse vi a corde , ut multi egregii viri putarunt ; at sponte , quod possint facilius quam majora impleri vasa . Non debemus ergo inquire vim ingentem in corde , & in trunco venæ portarum , quæ pelleret sanguinem per ultima vasa tenuissima ; quum motus fluidorum ab hac potentia quam maxime promoveatur .

22. *Tales tubuli exigui liquore semipleni si invertantur , liquor in iis descendet , non vero exstillabit .* Dum invertatur tubulus , descendere debet liquor , quod æqualis maneat in utroque canalis extremo partium attactus , hic ergo non impedit descensum liquoris . Quare gravitate propria descendit deorsum ; non vero exstillat , quoniam motus fluidi facilius ad latera solidorum , quam ejus separatio , ut superius (18.) demonstratum . Requiritur ergo vis major ad propellendum liquidum , ut deferat canalem , quam per canalem continuum . An ideo non manifestum , nervorum tubulos exilissimos , & tenuissima lymphaticorum & excretoriorum vasa , licet abscindantur , non exstillare contentum per ea integra continuo rivo circulans ? utique fere omnibus pedunculis fructuum abscissis nullus exstillabit succus , qui tamen abundanti copia perfluebat integros .

23. *Liquor concrecibilis motu non perturbato fluens per canalem , æque facile fere , ac si quiesceret , concrecere potest .* In hoc liquido nullus supponitur motus intestinalis , seu partium perturbatio , adeoque tanquam corpus quiescens potest considerari , juxta cujus exteriorem superficiem aliud movetur corpus : nihil ergo aliud patitur hoc fluidum nisi affricus in ejus superficie , & hanc ob causam tantummodo impediretur concretio partium , sed vero partes interiores ab hoc attritu non agitatae æque facile , ac si quiescerent , concrecere possunt . Quo ergo canales ampliores cæteris paribus , eo pauciores liquidi a vase continguntur partes , quare ibidem facilius , quam in minoribus , fieri potest concretio ; hinc toties in arteriis & venis polyposæ concrectiones . An ideo tot plexus operosi arteriarum , ut concretus quodammodo sanguis iterum dissolveretur , antequam ex eo fiat secretio ? qui concursus varius , prout magis minusve iterum ejus ope dissolvatur sanguis , & intimius permisceatur , diversas nonne posset exhibere secretiones ? Hoc sane fieri videtur ex mirabili & vario arteriarum discursu , a Cl. Ruyschio in omnibus fere visceribus secretoriis demonstrato .

24. *Motus liquidi circa axin canalis est celerrimus .* Cum fluidum aliquod moveatur per canalem , una pars fluidi non impediret alterius progressionem , sed simul procederent eadem velocitate , si nulla exterius esset remora ; verum partes fluidi latera canalis tangentes , ab iis in motu retardantur : in partibus ergo fluidi exterioribus erit motus tardior ; hæ iterum interiores particulas fluidi remorantur tangentes , minus tamen quam latera canalis partes exteriores ; illæ rursus eodem modo alias interiores , usque ad partes maxime a lateribus distantes , hoc est in axi canalis : quare hæ partes , quod omnium minime remoram patiantur , velociores omnibus promoventur : per illa ergo vasa , quæ directe fluidum excipiunt a medio canalis , velocitas debet esse major , quam per illa , quæ ex lateribus prodeunt

canalis. Quum vero propter hanc rationem omnes partes fluidi non procedant eadem velocitate, motus suscitatur intestinus & circumrotatio partium; nam omnes particulæ exterius versus latera canalıs remoram patiuntur, quarum simul altera pars interius propellitur; ex quibus duobus oppositis motibus circumrotantur particulæ. Conservatur fluiditas, & impeditur hac actione concretio quodammodo in magnis vasis, quæ alias esset inevitabilis ex naturali sanguinis concretione; & partes majores in sphaericam formantur, ut postea patebit (29), figuram: hæc differentia cessat in minimis canalibus, quorum diametri respondent diametris partium magnitudine. Haberi ergo possunt variæ secretiones prout vasa secretoria ex majoribus aut minoribus oriantur canalibus.

25. *Partes liquidi fluentis per canalem tenuissimæ, mobilissimæ, lævissimæ axin petunt canalıs, glutinosæ vero, tenaces, & minus mobiles lambunt latera canalıs.* Si liquor sit homogeneus, indifferenter omnes partes circa axin celerius moventur (24), verum si sit liquor permixtus, glutinosæ partes tenacius adhærent lateribus, & juxta canalıs latera movebuntur; majore enim est opus vi, quæ glutinosas semel applicatas separat, & juxta latera mover, quam ad separandas & propellendas lævissimas & mobilissimas; hæ ergo circa canalıs axin movebuntur. Sic vidimus in fluviis fordes ad latera colligi & cryptas. Hinc iterum nova distinctio secretionis ex vario vasorum ortu.

26. *Velocitates liquidi per canalem ubique non ejusdem amplitudinis fluentis sunt inter se, ut inverse quadrata diametrorum hujus canalıs.* Notum est, si duo cylindri ejusdem longitudinis, non vero amplitudinis ejusdem, liquido implentur eodem, hæc liquida quantitate tantum inter se differre, quantum differunt quadrata diametrorum: Si ergo eadem quantitas, eodem temporis spatio, per hos diversos cylindros transire debeat, tunc tanto tardior debet esse motus in cylindro ampliore, quanto majorem possidet copiam, & quantitates differunt inter se ut quadrata diametrorum, ergo velocitates liquidi sunt inter se ut inverse quadrata diametrorum. Si ergo omnes diametri ramorum, quod a multis accurata instituta dimensione est comprobatum, simul sumtæ superant quadratum trunci arteriæ, in ramis tardior erit, quam in trunco motus sanguinis. Observatum præterea est, in omnibus ramis eandem non servari proportionem ad truncum, habetur ergo ubique non ejusdem in corpore velocitatis ratio: & possunt ex hac causa diversi sequestrari liquores, qui determinatam ad eorum secretionem requirunt velocitatem.

27. *Sanguinis propria indoles secretionibus favet.* Absoluto examine omnium, quas sanguis communes habet cum cæteris humoribus, proprietates, (3) hucusque, quatenus aliquid tribuant secretioni, restat in hoc articulo reliqua perscrutemur, quas sanguis solus fere possidet. Pronunciamus primo generaliter sanguinem in se peculiares quasdam habere dotes, quibus quam maxime favet plurimis secretionibus, nulla imitandis arte ex alio liquore. Quis unquam paravit liquorem ex tot diversis magnitudine constantem globulis sphaericis, tali potentia concrescendi ditatis, in liquore minus concrescibili, qui etiam in omni sua parte non est sibi similis, natantibus, & debita magnitudine vasculis minimis respondentibus? nulla fane ars hoc æmulari potuit, nequidem corpora animalia suis organis illum perficere potuere omni dote eundem. Nonne hoc satis evincunt sanguinis transfusiones vanis successibus institutæ? imo hominis sani sanguis in corpore receptus ægroto ipsi non restituit sanitatem, nec corpori senectæ aut languido a sanguine juvenili vires unquam fuere restitutæ; sed unicuique propria & specialis est sanguinis indoles, ex quo tantum possunt sequestrari, non vero ex alieno, humores.

28. *Sanguis constat partibus magnitudinis variæ.* Sanguis calefcens e corpore vivo receptus tubulo tenuissimo vitreo & applicatus microscopio, statim exhibebit con-

conspicui liquorem rubrum ex variæ magnitudinis particulis constantem ; maximæ earum rubro colore sunt imbutæ , minores vero dilutioris sunt coloris & magis perspicuæ , quæ iterum natant in liquore pellucido , cuius partes propter tenuitatem & pelluciditatem non conspiciuntur microscopio . An vero lymphæ hæc tenuis diaphana iterum ex aliis majoribus & minoribus constet , visu detegere non potui ; ratio tamen suadet , credamus . Possumus ex hoc summo jure concludere , si talis sanguis tranare debeat per vas arteriosum aliquod , ex quo oriuntur rami laterales , cuius diametri sunt minores diametris globulorum rubrorum , in eos tantum intrare serum & lympham , & reliquam partem rubram contineri in arteriis ipsis : & iterum , si dentur adhuc minora orificia , per illa tantummodo intrare lympham , seclusis ceteris . Talia inveniri vascula & orificia inferius (39) probabitur ; possunt itaque sola magnitudine particularum per poros varios quædam fieri secretiones .

29. *Partes visibiles in sanguine sphericam habent figuram* . Mirum est observare Microscopio sanguinis in tali tubulo recepti partes visibiles exacte apparere rotundas , verum si conspiciantur globuli in anguilla , & alis vespertilionum , aliisque animalibus , circulantes per vasa minutissima , a lateribus illorum vasculorum cylindricam adipiscuntur figuram ; liberatæ vero a compressione iterum fiunt sphericæ . An vero partes lymphæ etiam ut sanguinis rubri & feri sint globulosæ , haud definire possumus : dictat tamen ratio , ut ex dicendis patebit . Omnis sanguis noster fertur per canales , in majoribus est motus celerrimus circa axin (24) , ergo circumrotatio partium , & inde figuram omnes obtinent sphericam . Excogitate figuratum quodlibet corpus , non vero sphericum , circumrotari in medio resistente , nonne semper eminentibus angulis fortius feriet resistens , quam qualibet parte alia ? distant enim partes in mucrone eminente longius a centro , circum quod rotatur corpus , quam quævis aliæ : celeriores itaque progrediuntur omnibus aliis , & majore impetu in obstaculum incurrunt : generale est insuper dogma , actionem omnem reactioni esse æqualem , plus ergo patiuntur partes in mucrone quam in ullis aliis , quare mucro sensim deteritur , aut complanatur , donec in omni parte istius corpusculi sit eminentia æqualis , hoc est , quando in sphaeram fuerit commutatum corpusculum . Quæ ingesta , aut in corpore nostro nata , sunt duriora , quam ut possint in sphaerulas conformari , nobis erunt venena vasa nostra perforantia . Juvatur insuper formatio in sphaerulas a concava interna vasorum superficie cylindrica : ideo in vasis minoribus , per quæ una tantum simul particula potest transire , quam maxime perficitur globulorum configuratio , nam aliqua particula in tali vasculo jam hoc , jam vero illo modo compressa , ex quavis alia figura in sphericam debet commutari ; accedit insuper naturalis indoles duorum diversorum permistorum , quorum alter sponte semper in guttulas sphaericas colligitur , in alio natans fluido (Δ) . Sanguinem vero non esse liquidum homogeneum ipsius spontanea satis evincit separatio in quiete . Cum ergo & conspectu & naturali actione motus sanguinis globuli sanguinei & serosi fieri debeant sphaerici , quare non statuere liceret , reliquum etiam liquorem diaphanum ex ejusdem figuræ particulis constare ? ab eadem veniunt origine , idem quoque patiuntur in circulatione . Utique probabilior est hæc sententia omni alia , quæ aliam adscriberet figuram particulis ; quippe nec hi , nec nos figuram earum probare possumus visu , verum analogia cum aliis partibus sanguinis habita pro nostra pugnat sententia . Tamen fatendum , nova ingesta statim non suppeditare ex sphaerulis constantem liquorem . Quisquis ex his intelligit facile , quid faceret varia particularum figura per figurata foramina cribri ad varias exhibendas secretiones , quum nec ipsa cribra nullibi in corpore sint inventa . Hanc hypothesin , ut & multas alias non lubet ulterius persequi , ne multum teratur tempus , & tædium creetur lectoribus . Animus est illa pro-

ponere, quæ mihi vera videntur, quid alii sentiant non examinabo, tantum veritatem proponendo palmam auferre tentandum, non vero calumniis, convitiis aut refutationibus Medicam retardantibus scientiam; ad solum enim Lydium lapidem, seu veritatem examinanda sunt omnia.

30. *Sanguis sanus intra vel extra corpus nostrum stagnans in majoribus & etiam exilissimis vasculis sponte concrescit.* Lippis & tonsoribus etiam est notum, sanguinem e vena vel arteria, vase quodam receptum sponte concrescere; hoc quoque in minimis fieri tubulis experimentis iteratis comprobatum vidi: nec fluidus manet in arteriis & venis mortui animalis, verum in polypos vel grumos concretus invenitur. Constat ergo sanguinem rubrum, si alicubi moveatur per canalem sine motu intestino, ibidem coagulari, (23) seseque a reliquo sponte separare liquore; hocque magis minusve peragere pro varia vasorum directione & concursu, quare hac etiam ex causa, aliqua in corporis parte fieri potest secretio, nulli aliis peragenda. Quare ab anatomicis ultima arteriarum, ex quibus proveniunt secretoria, accuratissime perscrutanda.

31. *Sola circulatio in corpore vivente sanguinis conservat fluiditatem.* Pertentato omnes modos cum vel sine motu, in calore, tepore, vel frigore sanguinem reservandi fluidum extra corpus, semper aliqua ejus concrescet pars: magis & citius in quiete & frigore, tardius in moderato calore, tardissime in tepore si simul moveatur. Hinc itaque docemur, quod fluidus maneat in corpore, circulationem illius conservare fluiditatem, & quidem peculiari actione, quæ non fit extra corpus animale. Quum vero examinemus vasa magna, in illis talem non possumus assignare causam, ut patet ex dictis (23), neque in minoribus, si conferantur, quæ superius (23. 30.) explicavimus. Sed vero reticularis vasorum complexus dividit, confundit, in oppositos motus agit, separat, permiscet, quod nulla imitandum arte. Prout hæc actio major, aut minor ante secretionem, varii ex eodem sanguine possunt separari liquores. Ut ex hac operatione clarior fiat doctrina, sciendum est, sanguinis partes omnes non æque cito concrescere, sed sanguis ruber citissime, serum tardius, & pars aquosa diutissime conservat fluiditatem. Si ergo talis liquor mistus feratur per canalem satis amplum, ut est aorta descendens, inchoamentum habetur hujusmodi concretionis (23): Sic delatus sanguis ad renes promptissime suppeditabit secretioni aquosum, quum ibidem vermiculari arteriarum reptatu minus quam alibi permisceatur sanguis, & partes concrescibiles persequantur arteriarum & venarum cursus, facile deponentes aquosam minus concrescibilem. Contrarium vero venit, quando inextricabili & miro vasorum concursu prius dissolvatur & permisceatur sanguis secretioni obeundæ destinatus. Hinc forsan cerebrum parum distat a corde, ut reciperet sanguinem optime in pulmonibus præparatum, parum in itinere concretum, quem tamen in arteriis piæ Matris infinitis anastomosibus, concussionibus & divaricationibus, ita præparat, ut pars sanguinis præstantissima ex eo possit separari, quæ in renibus reliquo permista manebat sanguini. Hinc etiam intelligitur, cur ex eodem trunco arteriæ varii possunt separari liquores, scilicet ex varia præparatione sanguinis in organo, antequam ex eo instituat secretio.

32. *Accelerata & retardata circulatio sanguinem incrassat.* Hoc paradoxum videtur, observatur tamen in nostro corpore. Ponamus hominis perfecte sani cursu vel labore sanguinis circulationem adaugeri, hujus certe sanguis ita condensabitur ac si morbo laborasset phlogistico. De quibus etiam videri potest Tract. noster: *de insensibili perspiratione* Cap. x. §. 3. Objiciat quis, eadem actione tenuissimum per insensibilem perspirationem exhalare, & ideo fieri crassiolem, sed sanguinem specificè non fieri crassiolem: hoc concedimus, & id etiam postea sumus comprobaturi; verum præterea ipse sanguis, licet æquali copia humoris aquosi fuisset dilutus, ac si fuerit excretionem detracta, is tamen erit crassior quam antea, ut

demonstravimus in *Dissertatione Nostra de motu & corporis exercitiis* §. 24. Ex tali itaque sanguine parciores procedunt tenuioris secretionis, quod liquor deficiat. Intelligimus ex his, lympham valida circulatione exuere suam fluiditatem, & fieri glutinosam: omnem motum circulatorium adauctum non semper augere secretionis: augmentum & defectum secretionis continuo non pendere a varia sanguinis velocitate, ut etiam observavimus in *dissertatione de urina* §. 15.

Ut motus acceleratus condensat, ita languidiore circulatione in viscidum abeunt humores. Superius demonstravimus (31) sola circulatione sanguinem fluidum permanere: hæc ergo si nimis languida sit, sanguis magis accedit ad ea, quæ pateretur in quiete (30), hoc est in viscidum abit, quo irretitur pars aquosa, per insensibilem perspirationem, aut urinam vix evacuanda. Prior crassitudo quiete, hæc vero visciditas motu adaucto, & putredine spontanea attenuatur. Nonne ergo satis constat, quandoque motum auctum suppressere perspirationem, sudorem & urinam, viresque prostrernere defectu spirituum, unica venæ sectione omnia restitui posse & quiete? alias vero ambulatione & corporis exercitiis erigi vires & promoveri secretiones? Tandem eadem manente quiete, sudore, urina aut diarrhæa colliquativa emaciari, qui prius visciditatibus scatebat & suppressis secretionibus laborabat? Certe hæc omnia tanti in Medicina sunt momenti, ut nulla horum habita ratione, vix possimus ex arte præscribere evacuantia. Multum ergo interest omnes perscrutari secretionum causas, & non nimis addictos esse in una generali omnium eruenda causa.

33. *Nimius calor & nimium frigus condensat sanguinem.* Sanguinem ad ignis nimium calorem coagulari, ut ovi albumen, qui negat, ipsis evincetur experimentis: hoc quoque verum est a nimio frigore, quare non opus dicta ulteriore sermone extendamus: sed ea tantummodo proponamus, quæ inde severa ratione possent deduci. Ergo in moderato tepore sanguis tenuissimus. Secretiones, quæ a tenuitate sanguinis dependent, tunc copiosissimæ. Secretiones minui possunt nimio calore & frigore; potest calor adurens condensando sanguinem in morbis acutis & inflammatoriis sistere perspirationem, sudorem, urinam, salivam, alvum: & medicamenta refrigerantia, ut venæ sectio, & minuentia calorem in his morbis sudorem provocare, alvum laxare, ciere urinam, atque os humectare. Nonne hæc omnia miraculi instar a quibusdam in morbis fuere observata? possem sane hæc omnia practicis confirmare exemplis, sed vetat hujus dissertationis brevitatis. Præterea asserere possumus illum caloris gradum, qui coagulationi est proximus, omnium maxime favere secretionibus, ut est ille gallinæ incubantis tepor. Hinc viscera animalium tepentia, aut ipsa animalia viventia dissecta nostris visceribus applicata tantum præstant ad stagnantes humores & concretos a frigore iterum fluidos reddendos, & obstructions frigidas referandas.

34. *Sanguis ruber in arteriis, venis, vasculis intermediis & cellulis circulatur tantum, tempore sanitatis.* Superius vidimus (28) particulas rubras, omnes alias magnitudine excedere; & has colorem rubrum præbere sanguini. Novimus insuper, colorem rubrum alicujus partis tantum a sanguine rubro fluente vel retento provenire. Hic liquor ruber continuo debet circulare; si enim stagnat, morbus dicitur; sed vero illa circulatio fieri debet per vasa, (quippe credere sanguinem in parenchymata effundi, quod veteres & nonnulli quoque seculi elapsi statuere, nullis potest firmari experimentis aut ratione.) Hæc vasa vehunt liquidum a trunco versus ramos, vel a ramis versus truncum, quum alia non detur in corpore circulatio, sunt ergo arteriæ vel venæ, & quod hic liquor sit ruber, vocantur sanguiferæ. Ultra quas propter magnitudinem globulorum non moventur, nisi in cellulis: in morbis tamen per vasa quoque serifera, aut lymphatica moventur, aut in iis stagnant, sed tunc in debito non reperiuntur loco. Est ergo in statu sano sanguis crassissimus in ultimis arteriarum extremis, quum ibidem nil nisi hi reperiuntur globuli rubri

reliqua omnia magnitudine excedentes, quod alia per orificia vasculorum minora a globulis sanguineis sint separata, postea iterum in venas infundenda.

35. *Sanguis in sinistro ventriculo cordis omnium optime permistus, qui licet videatur liquor homogeneous, ex multis tamen diversis constat partibus.* Hoc præcipuum est pulmonum munus, sanguinem ex dextro ventriculo cordis receptum, per sua vasa ita agitare, dividere, conquassare, reciproce premere & relaxare, permiscere & confundere iterum in vena pulmonali, ut ibidem exactissima habeatur miscella, qualis mistura, & præparatio nullibi habetur in corpore totius massæ sanguineæ sine secretionem. Hic sanguis sic præparatus recipitur a sinistro ventriculo cordis: statim vero ac projectus fuerit in aortam, sensim sese magis magisque incipit separare (23 & 31) & ex eo quidam separantur humores. Ex quibus prior propositi patet pars. Nam præparatio sanguinis in liene & plexibus arteriarum (23) non tanti momenti est habenda, ac est illa in pulmonibus, neque hoc toti tribuitur sanguinis massæ, ut actio pulmonum. Hinc, quamvis appareat sanguis fluidum homogeneous, ex multis tamen constat diversæ naturæ partibus. Examine sanguinis primo originem ex chylo, quot sunt ciborum potulentorumque varia genera, quæ conficiunt chylum, suam propriam indolem utcunque servantia. Hic chylus constans materie varia e ductu thoracico a vena subclavia receptus, per dextram auriculam, & ventriculum cordis, atque arteriam pulmonalem, in omnem pulmonis partem vectus, hic permiscetur sanguini accuratissime statim in cordis ventriculum sinistrum deducendo: ille ergo sanguis ibidem multum possidet de alimentorum natura postea subigenda vel immutanda. Vel si consideres sanguinem in vena cava, nonne omnes secreti humores, qui non ejiciuntur, illi ibidem permisti inveniuntur? quis numerare valet omnes humores secretos natura diversos, qui tamen iterum permiscuntur circulanti? certe multi numerantur, qui forsan singuli ex plurimis aliis confusis conficiuntur. Examine denique sanguinis spontaneam separationem (28) aut per experimenta chemica, nonne optimo jure debemus concludere sanguinem ex variis constare partibus? Sed hoc non sufficit scire tantum, verum exinde possunt regulæ pro secretionem illustranda deduci plurimæ. Quis est, qui non intelligit ex liquore permisto varia posse separari, si reperiat in corpore nostro actio, modus vel organum huic separationi aptum? Nonne aquosa ingesta per renes eliminantur copiosissime, & secreti humores confusi in venis sanguini, nonne per eadem organa iterum possunt a reliqua separari massa? Hoc si non fieret, verendum esset ne nostrum corpus brevi, bilis, spirituum aliorumque humorum defectu periret, sed valde necesse est, ut multi liquores functi munere redeant, & de novo iterum suis organis secernantur eidem operi inservituri.

36. *Sanguis in sinistro ventriculo cordis contentus omnes tales continet liquores, qui in toto secernuntur vel excernuntur corpore, vel talia possidet, ex quibus postea secretorii vel excretorii humores confici possunt.* Nullibi in nostro corpore fit secretio nisi ex extremitatibus arteriarum vel venæ portæ: hoc omnes concedunt & confirmant Anatomici, aut sine ullo interveniente organo glanduloso, aut ope alicujus glandulæ, peragitur. Sed omnes arteriæ sanguinem accipiunt ex aorta, seu omnes rami arteriosi ex aorta proveniunt, præterquam sola arteria pulmonalis prodiens e dextro ventriculo cordis, & ex hac arteria hucusque non fuit demonstratum fieri secretionem; adeoque aorta omne adducet liquidum, ex quo futura est secretio, si non adesset vena portarum, quæ bilis secretioni prospiceret, verum hæc ipsa vena portarum ex arteriis accipit sanguinem, adeoque liquor in ea contentus prius fuit in arteria aorta, hæc iterum a sinistro cordis oritur ventriculo; omnis ergo sanguis, ex quo futura est secretio, prius fuit in cordis ventriculo sinistro: objiciat quis bilem semel confectam non redire ad cor, verum fusam ex ductu cholidochio in duodenum a venis Meseraicis absorberi, sicque iterum per venam portæ duci versus he-

hepar, atque ita peculiarem sibi fervare circulationem. Hoc multis firmissimisque comprobant experimentis & rationibus, quæ hic non sunt loci examinanda. At quis crederet nihil bilis intrare lactea, & ideo nullam quoque ejus portionem per cor circulari? Nonne ex assumtis alimentis præparanda est in pulmonibus materia, quæ restituit, quod de bile fuerit deperditum? an sentirem, venam portarum & ipsum lienem & hepar satis valere ex chylo conficere bilis materiem; aut crederem in ipso chylo a venis Meseraicis absorpto hæere biliosam novam materiem? mihi saltem videtur materiam bilis novam prius in pulmonibus elaborari, antequam ad venam portarum perveniat: & ideo statuo, ipsam quoque bilis materiam in sinistro ventriculo fuisse cordis. Duplici modo possumus considerare liquores secernendos, vel quod existant in sanguine permisti, quales postea feceruntur propter reliquorum liquidorum permissionem non conspicui, ut sales soluti in aqua non conspiciuntur optimis microscopiis, quum tamen revera in isto sint liquore, separatione postea producendi: vel quod materia reperiatur in sanguine talis, ex qua fieri potest liquor, qui est secernendus, uti ex vegetabilibus mineralibusque multa educuntur fermentatione, putrefactione, combustionem, aliove modo, quæ revera talia non præexistebant in iis. Quis unquam alcohol, non prægressa fermentatione, eduxit ex vegetabilibus? aut salem volatilem sine putrefactione, ex frumentaceis & vegetabilibus mitissimis? vel salem alkalinum fixum absque ignis tortura? Sane hæc omnia non erant talia præexistentia in plantis, sed erat præsens in iis materia, quæ arte potuerit ita commutari. Verum omnia ex omnibus non possunt præparari, sed requiritur præexistentia materiæ huic mutationi aptæ. Hoc quoque volumus in nostro corpore, quod scilicet debeat talis liquor adesse, qualis separatur per organa secretoria, aut talis, ex quo organi ope confici potest secretorius humor.

37. *Omnis sanguis & inde secreti humores in aliquo detenti corporis loco corrumpuntur, & unusquisque, pro varia sua indole, aliam producit omnino corruptionis speciem.* Non est mihi notum in toto corpore nostro liquidum, quod si retineatur aliquamdiu in tali tepore, ut est nostri corporis viventis, quin corrumpatur, de sæce alvina, urina, saliva, res est notissima, illa ingentem tandem emitte nidorem. Quid? totum corpus emortuum in putrilaginem foetentem commutatur: & laudabilissimus mitissimusque liquorum in tali tepore, venenatam adipiscitur indolem sana viventia rodentem. Constat ergo, quum hoc etiam fiat in omni parte corporis viventis, si liquor stagnet, circulationem prævenire hanc corruptionem, ablegare corrupta, & ex alimentis ingestis conficere nova. Absurdum est ergo statuere liquores in cellulis, vesiculis, aut cavitatibus contentos esse ad finem vitæ a nativitate perpetuos eosdem: ipsi ne quidem humores oculorum purissimi, corruptionis immunes: debent ergo omnes in nostro corpore humores communicare circulantibus, ut eorum portio saltem inutilis aut corrupta absumatur, & alia in deperditi liquoris locum surrogetur nova. Quid itaque statuendum sit de fermento connato, aut sanguine materno, quisque facile perspiciet. Sed præterea raro duo liquores diversi si corrumpantur, post corruptionem eandem adipiscuntur indolem; sic saliva alium, urina, sanguis, chylus, bilis, pus vel ichor in abscessu alium proferunt foetorem. Nonne possumus ex ichoris colore & nidore detegere ossis cariem? Nonne ex natura puris vel ichoris possumus de ulcerum malignitate ferre judicium? Nonne ex varia natura liquoris in aliqua glandula contenti, alia omnino prodeunt corruptionis phænomena? Hæc omnia observare in praxi accuratissime magni esse momenti confido. Ut ita ex specialibus signis detegamus, quinam non modo corrumpantur humores, & ita detegamus fomitem & morbi causam, sed ut tandem etiam medicamenti specialibus usu comprobatis possimus superare hæc mala: nam iisdem medicamenti diversa corruptionum curare genera quis auderet statuere? utique in praxi contrarium experiretur. Hinc

toties inutilis & vana redditur medicina ; non quod nos fefellit experientia in corrigendis liquidorum corruptionibus, sed quod nobis non satis constet, qualis fuerit depravatus humor, & quantus ejus sit corruptionis gradus, ut ita ad minimam varietatem nostra dirigatur indicatio.

38. *Orificia vasorum perpendicularia ad axim sunt circularia*. Diximus (2) ad secretionis cognitionem duo requiri, liquidorum scilicet cognitio & solidorum: de prima huc usque egimus, quam tamen ab altera non potuimus ita distinguere, ut de solidis nullus haberetur sermo. Quæ ergo de solidis supra exposuimus, hic tanquam veritates assumemus, & exponemus reliqua ad solida ulterius spectantia, quæ secretioni inservire poterunt. Docent mechanici, omnes canales flexiles liquore impletos esse cylindricos, quod pressio fluidi in omni parte sit æqualis, hoc est in æquali distantia a centro, quod fieri nequit, quin superficies fiat circularis: præterea ex natura fluidi id fieri quoque debet (4): quum autem hoc fiat per omnem longitudinem canalıs, orificium ad canalıs diametrum perpendicularare debet esse circulare: quare partes fluidi per tales fluentis canales fieri debent sphæricæ (29), & vasculorum origo ex majore trunco, licet oblique ex eo proveniant, & eorum orificia ideo appareant, propter sectionem obliquam ad axim, majora, non potest tamen globulus sphæricus fluidi major intrare tam commode, ac si id orificium esset circulare. Nostri corporis vasa circulatoria & secretoria flexibilia esse non est opus probetur, sunt ergo omnia cylindrica, & eorum sectiones ad axim perpendiculares sunt circulares. Id ergo, quod agunt varia orificia vasorum ad secretiones, ab eorum tantum dependet magnitudine, nec ulla figurarum est habenda ratio, quare ab iis tota, ut plurimi asserunt, non dependet secretio omnis.

39. *Orificia vasorum multum inter se differunt amplitudine*. Omnes ramos suo trunco semper esse minores ipsa confirmat ocularis inspectio, in arteriis & venis. Hæc autem differentia amplitudinis nihil fere facit ad varias producendas secretiones, nisi hæc subdivisio eo usque pervenerit, donec orificia vasorum tam angusta fiant, ut non amplius omnes in sanguine hærentes possint admittere partes, tum vero omnes majores ex iis vasculis secludentur, & solæ, quarum diameter non superat orificii diametrum, admittentur. Hic autem non subsistere ulteriorem ramorum divaricationem artificiosa injectio & partium ab inflammatione distensio clarissime ostendit: quo usque vero procedat a nemine fuit traditum: constat tamen sola hac varia orificiorum amplitudine diversas a reliqua massa posse separari partes.

40. *Quadrata diametrorum ramorum arteriæ simul sumpta superant quadratum trunci ubique in corporis quacumque parte*. Hanc veritatem hodierni anatomici accurata habita dimensione comprobant: verum in una parte major, in alia vero minor inter ramos & truncum invenitur differentia. Docemur inde, motum esse tardiozem in ramis quam trunco (26). Quum vero non æqualis ubique sit differentia, in iis locis separetur liquor, qui ad ejus secretionem tardissimum requirit motum, ubi diametri ramorum multum superent diametrum trunci, & alius liquor, qui majorem requirit velocitatem, ubi minor detur inter quadrata diametrorum differentia: quare ex eodem trunco ex hac sola ratione varii possunt secerni liquores.

41. *Arteriæ & venæ semper premunt contentum liquidum*. Arteriæ & venæ omnes habent fibras longitudinales & circulares, arteriæ circulares fibras habent in interiore sui parte, quæ vero exterius in venis deteguntur: & contrario situ longitudinales. Actio fibrarum omnium consistit in abbreviatione: hoc fieri nequit in canale cylindrico vel conico, ut sunt arteriæ & venæ, quin ejus cavitas minor fieri debeat, seu, quod idem est, liquidum in eo contentum prematur. Hoc quoque docent abscissæ arteriæ, si intromittatur digitus, qui tum valide premi-

tur,

tur, & educto ex arteria vel vena cruore extenuantur. Sunt ergo in statu sano fibræ in statu violento, & urgent semper contentum liquidum. Ex natura liquidi est manifestum, si prematur, qua data apertura effluere, omnis ergo liquor urgetur in ea orificia, quæ ex arteria proveniunt, & intrant, si modo partium diametri non superent diametros aperturæ vel vasorum lateralium.

42. *Cursus arteriarum versus organa secretoria variant inter se, prout alius in tali organo secernendus est liquor.* Prima differentia habetur in ramorum ad aliquod viscus destinatorum origine: alii angulo acuto, ut fere omnes, alii angulo recto, & alii denique obtuso proveniunt ex trunco. Vel secundo non omnia ramorum orificia eandem servant proportionem magnitudinis ad truncum. Tertio quædam arteriæ deponunt prius sanguinem rubrum, antequam attingunt organum secretorium, aliæ vero pleno agmine intrant viscus. Denique quædam arteriæ ex suis lateribus sine multa ambage dimittunt secretoria, aliæ prius contorquentur, penicillorum instar disponuntur, aut serpentium instar proserpunt, imo tot varias fere inveniunt anatomici arteriarum texturas, quot reperiuntur in corpore secretiones diversorum humorum. Constat ex his, quum Deus nihil creavit frustra, has varias texturas sua propria quoque obire munera. Vel quod ex sanguine per hanc fabricam conficiatur liquor aliquis nullo alibi præparandus organo, aut quod per eam certo modo disponatur sanguis, ut deponat quendam liquorem. Hæc erant, quæ habebamus dicenda, antequam ipsum aggredieremur secretionis negotium, ut ita possimus iis uti tanquam datis, quibus res incognitas eruere valeamus. Quæ supersunt in explicanda glandularum fabrica sciens omitto, quum nuper a Cl. Boerhaave & Celeberrimo Ruyschio non minus eleganter quam accurate hæc fuerint descripta.

P A R S A L T E R A

DE SECRETIONE HUMORUM E SANGUINE.

43. **P**ER arterias ad omnia organa secretoria fertur liquor, ubique fere ejusdem indolis, ex quo peculiaris futura est secretio. Hucusque nihil nisi data seu veritates concessas proposuimus, ex quibus totum secretionis negotium est explicandum. Quod ut ordine pertractetur, considerabimus 1. differentiam, quæ potest detegi inter liquores seu sanguinis partes antequam ad aliquod perveniant organum, & simul quænam citari possint causæ humores eo ducentes: 2. causas solitarias seu abstractas, quibus peragitur secretio, ex quarum multifaria compositione infinitæ fere possunt fieri secretiones variæ: 3. eas, quibus aliquis specialis producitur liquor: 4. illas, quæ varios non consuetos, vel qualitate vel quantitate, producant humores: 5. ea tandem examinanda venient, quæ humores secretionem peracta possunt pati, quomodo inde eorum possit mutari indoles.

Quum per arteriam aortam feratur motu perturbato sanguis e sinistro receptus ventriculo cordis (35, 36) propter arteriæ inflexionem, & motum inæquabilem cordis, per ramos ex hoc trunco ortos sanguis derivatus parum differt indole, nisi quod in arteriis a corde longius dissitis sanguis paulo magis sit concretus (23, 24, 31). Hoc quoque verum in ramusculis minoribus, quamdiu orificia sunt tam ampla, ut omnes tranare queant sanguinis partes. Et quoniam omnia organa secretoria accipiunt ex aorta sanguinem permixtum (35, 36) nullam hucusque secretionem passum, hæret ergo secretionis causa in eo ipso organo, qua varii a simili massa sanguinea ubique possunt separari liquores. Si quis excipere velit bilis secretionem, per me licet, quod non ex arteria, sed vena portarum ejus fiat secretio (36).

44. *Sanguis deducitur ad minutissima vasa secretoria pressione cordis a tergo urgente; compressione continua vasorum & partium circumjacentium; Motu vermiculari vasculorum; & eorum propria recipiendi potentia.* Cor valida vi urgere in contentum sanguinem, eum in aortam projicere maximo impetu, omnes norunt; sed quanta sit illa potentia, & cui comparanda, dissentiunt quam maxime, ut videre licet inter calculum Borellianum & Keillianum, & plurimorum aliorum Auctorum: quanta autem sit, nolo hic determinare, sufficiet scire, si modo cognoscamus rude tantum momentum motus ad aliquam partem, v. g. in pede vel brachio alterutro. Hoc erit facile determinare, si arteria vadens ad illam partem abscindatur, & libere exilire permittatur sanguis: nam cognita curvatura parabolæ, vel altitudine columnæ sanguinis verticaliter profilientis, cognitum etiam erit momentum pressionis a tergo, quod ex hydraulicis est petendum. Si eodem impetu liquor ope siphonis injiciatur in abscissam arteriam, nequaquam liquor omnia pervadet vascula partis emortuæ, ut sanguis per arterias integras. Præter motum ergo cordis, alia quoque requiritur causa; scilicet compressio vasorum & partium circumjacentium: ita enim leni compressione simul dum instituatur per siphonem injectio, liquor penetrabit altius & in tenuiora sese insinuabit vascula: sed quod magis est, motus vermicularis multum facit ad propellendos humores, quem in injectionibus anatomicis frictione, compressione alterna, agitatione, conquassatione, aliisque modis, quantum fieri potest, æmulamur, nunquam tamen possumus ad ultima perducere vascula injectum liquidum, quod ille motus deficiat, vel quod non injiciatur liquor respondens vasculis (17) minimis: quare alias cera liquefacta vel oleum quodvis tenue minus sese insinuaret, quam aqua tepida in injectionibus anatomicis; & alcohol promptissime, aqua sensim, & oleosa tardissime corporis parti siccæ applicatæ abriperentur, si non requireretur inter fluida & solida quædam convenientia; nam tubuli minutissimi promptissime in se recipiunt sibi convenientem liquorem (20, 21, 22). Aut hæc forsitan erit causa, quare oleosa non intrant, quod tenacius adhæreant lateribus (19) adeo ut ad propellendum nimia sit opus vi, & majore, quam possunt latera pati vasorum.

45. *Generalis secretionis causa potest esse partis similis in sanguine coadunatio spontanea, & separatio a reliqua Miscela.* Omnes humores sphæricas formant sponte (4) præprimis in alterius naturæ hærentes liquido, (16) quamvis moveantur per canales (23) motu non perturbato: qualem spontaneam concretionem quoque possidet sanguis humanus (27, 29, 30), ex quo futura est secretio. Hæc ipsa spontanea separatio primaria est secretionis causa, in secretionem enim tantum requiritur specialis cujusdam liquoris, ex liquore permixto, segregatio (1); possumus sic sine ulla arte sanguinem rubrum separare ab aliis; ita etiam sponte secedunt oleosa ab aquosis: requiritur ergo tantummodo organum, quod separatum recipit humorem. Duplex ex hac causa fieri potest secretio. 1. Quando secernitur liquor tenax, glutinosus, viscidus, a fluidiore, mobiliore & minus concrescibili. Probavimus (9, 31) omnes partes sanguinis non æquali coalescendi potentia esse donatas. Si ergo partes maxime concrescibiles, quæ sponte congregantur, intrant vas secretorium, dimittentes reliquum liquorem, secernetur liquor tenax, & fluidior perget circulare. 2. Secernitur tenuis, fluidus, & vix cohærens liquor, quando, post separationem hanc spontaneam, hic humor recipiatur a vasculis secretoriis. Potest ergo concrescendi potentia in sanguine separari ex eo liquor tenuis, si continuo absumentur tenaciores magis concrescibiles, relicto tenuiore, qui tandem vas ingreditur secretorium. Et quod varii gradus cohæsionis reperiantur inter sanguinis partes, multa genera humorum ab hac causa possunt separari: ad quam separationem peragendam multum facit diversa magnitudo orificiorum vasorum (39), quum partes concretæ tanquam globuli certæ magnitudinis possint considerari. Omnes autem statuere fieri in nostro corpore secretionem ab hac sola causa

SECRETIONIS PARS ALTERA.

- 43 **D**ivisio secretionis generalis.
- 1 Differentia liquoris ad organa secretoria ducti, & causæ eo ducentes.
- 44 1 Sanguis ubique fere ejusdem est indolis.
- 2 Sanguis ad organa ducitur præprimis a quatuor causis.
- 2 Causæ abstractæ seu solitariae secretionum.
- 45 1 Coadunatio spontanea partium similium & a reliqua massa separatio.
- 46 2 Cohæsiō partium firmior.
- 47 3 Cohæsiō firmior aut debilior cum solidis.
- 48 4 Proportionalis magnitudo globulorum ad orificia.
- 49 5 Vehiculi major & minor quantitas.
- 50 6 Varia velocitas sanguinis in organo.
- 51 7 Specialis vasorum cursus in organo.
- 3 Speciales secretiones partium exponuntur.
- 52 1 Partes majores possunt separari.
- 53 2 --- tenaciores & glutinosiores, relicto fluidiore.
- 54 3 --- minores, relictis majoribus.
- 55 4 --- mobilissimæ, lævissimæ, & fluidiores, relictis aliis.
- 56 5 Combinationes harum causarum exponuntur particulares.
- A. Spirituum secretio.
- B. Bilis confectio.
- C. Urinæ separatio.
- D. Seminis elaboratio.
- E. Pinguedinis secretio & mucilaginis.
- F. Maligni & morborum humoris evacuatio.
- 57 4 Mutata causarum secretionis aliqua, ipsa secretio etiam mutatur.
- 58 1 Aucta velocitate sanguinis quomodo mutari possunt secretiones.
- 59 2 Minuta velocitate sanguinis &c.
- 60 3 Mutata cohæsiōne naturali &c.
- 61 4 Magnitudo globulorum & amplitudo pororum mutata &c.
- 62 5 Mutata vehiculi quantitate aut gravitate partium.
- 63 5 Quæ secretis humoribus accidunt, secretionem peracta.
- 1 Crassus fieri potest tenuis, & contra.
- 64 2 Glutinosus fit fluidus, & contra.
- 65 3 Variam indolem acquirunt.

fa nihil absurdius. Multa præterea alia occurrunt ad varios producendos humores, verum hæc tanquam simplicissima primum sibi locum vindicare judicavimus.

46. *Particularum similium cohesio firmiter, quam cum aliis, altera potest esse secretionis causa.* Sanguis noster, ad organum vadens secretorium, in continuo est motu, quo oritur in ipsa sanguinis massa motus intestinus (24) & separatio particularum (31): eæ vero partes, quæ tenacius cohærent, ab hoc motu minus solvuntur aliis, quod ad earum separationem plus virium requiratur: quare tandem sensim languescendo motu (26, 40) in ultimis vasis concretæ permanent, atque sic (45) specialem præbent liquorem.

47. *Major & minor cujusdam liquoris cum solidis cohesio tertiam proponit secretionis causam.* Omnes partes in sanguine non ejusdem esse indolis, sed alias tenacius adhærere solidis, alias vero laxius, superius (17, 18, 19) vidimus: quare partes tenacissime adhærentes, eodem impetu protrusæ, tardius procedunt, & latera lambunt vasorum (25), & hærent, aut in lateralibus vasculis vel cellulis pelluntur, dum reliquæ pergant continuare viam.

48. *Magnitudo particularum in sanguine varia per vas arteriosum inequali orificiorum amplitudine donatum, truso, causam exhibet diversorum liquidorum secretionis.* Confer, quæ adduximus (28, 39). Sed utut videatur per tale organum tenuissima semper ex sanguine separari, quod multi statuunt, quoniam per orificia majora particulæ etiam minores possint tranare, & ideo per minutissima tantum liquor posset separari qui ex minutissimis constaret particulis, rem sane ipsam, non ut fit in vasis ramosis, sed ut fieret in cribris, sunt contemplati: imo per varia cribra possumus separare partes & seorsim colligere; nam si tot habeamus cribra, quot partes sunt sphæricæ, ut sunt sanguinis globuli magnitudine differentes in pulvere permisto; quorum primum transmittit omnes partes pulveris exceptis maximis, in eo eadem habebuntur seorsim; cribratus pulvis si per aliud cribrum iterum cribratur, cujus foramina paulo sunt angustiora, iterum ex hoc pulvere separabuntur partes foramina magnitudine excedentes; hoc si instituat per alia cribra successive minora habentia foramina, colligentur partes ejusdem magnitudinis seorsim; & ex permissione pulverum ex diversis cribris collectorum infiniti fere varii possunt confici pulveres. Hujus rei ut clarior habeatur idea, ponamus vasa nostra per multas progredi divisiones sensim angustiores (39), quod obtinet in nostro corpore; & sanguinis massam possidere varios magnitudine globulos (28), quod etiam fuit comprobatum: si habeantur quinque diversa vasorum genera, & totidem globulorum in sanguine, 31. varii liquores possunt produci. vide quæ descripsimus in nostro tractatu de *insensibili perspiratione* Cap. 12. §. 3. pag. 95. nam si per vas ramosum (1, 2, 3, 4, 5,) moveatur fluidum ex globulis variis (a, b, c, d, e,) constans, non intrabunt globuli diametro vasis (1) majores, & transibunt per aliud extremum omnes globuli A, diametro vasis respondentes, & minores (b, c, d, e) per ramum (2), verum soli globuli (b) iterum pergent, & reliqui (c, d, e) ad alia perducuntur vasa, novam separationem subitura, si eadem methodo procedatur usque ad canalem (5) quinque diversi habentur liquores (a, b, c, d, e). Si post hanc separationem quædam vasa coeunt (ut 12, 13, 14, 15, aut 23, 24, 25.) & sic porro, permisti erunt liquores varii (a b, a c, a d, a e, & b c, b d, b e, & ita de reliquis). Et hoc modo per talem divaricationem ramorum poterunt 31 diversi produci liquores ex humore, qui ex quinque variis magnitudine generibus constat. Non quis judicet me putare globulos tantum (a) tranare per extremitatem vasculi (1); & (b) per vasculi, (2), & sic porro? verum sentio minores quoque quosdam globulos per ampliora duci orificia, & ideo adhuc plures liquidorum possumus statuere differentias, prout plures paucioresve possideant ex minoribus globulis humores prius secreti. Et tandem poterit adaugeri seu multiplicari differentia secretorum humorum, prout affusio tenuioris cum crassioribus

Fig. 1.

majorem minoremve habeat proportionem. Adeoque possunt infinita fere genera liquorum per tale organum separari e sanguine.

49. *Major & minor vehiculi quantitas inter partes secernendas, diversas producere potest secretiones.* Quinta hæc generalis causa ex iis, quæ proposuimus (8, 9, 10, 34,) facile intelligitur, quare non opus ut repetatur. Restat observare ubique in corpore, vel magnitudine globulorum ad determinata orificia (48), vel concretionem propria quarundam partium sanguinis, aut alia separationis quadam causa (45, 46, 47, 50, 51), partes similes a reliqua massa separatas facere, ut partes, quæ propter vehiculi quantitatem non concrevisset, nunc vero coeant, & in diversos tandem abeant liquores.

50. *Varia velocitas in sanguine, ex quo secretio est peragenda, sextam potest exhibere secretionis causam generalem.* Demonstravimus primo (24, 25) in omni parte canalis motum non esse æqualem, & aliud genus particularum ferri in medio canalis, quam ad latera: potest ergo alia fieri secretio ex isto ramo, qui respondet axi canalis, quam per eos, qui ex ejus proveniunt lateribus; transibit mobilissimum, levissimum, & minime adhærens solidis per eum canalem, qui axi respondet trunci; & reliquæ partes per lateralia vasa. 2. Quum in omnibus canalibus non æqualis observetur humorum celeritas (26) (40) & sanguis magis concreascit a motu retardato (32), poterit a tali motu in quodam viscere fieri secretio, quæ alibi in corpore, ubi talis tardus non habetur motus, nequaquam fiet: hinc in quibusdam morbis, quando mutatio fiat in circulatione, in aliquo loco quædam peragitur secretio, quæ quoque cessat motu solito restituto.

51. *Vasorum arteriosorum cursus specialis in viscere quodam potest exhibere secretionem peculiarem, quæ in alia fieri nequit parte.* Varius arteriolarum cursus, vel disponit sanguinem; ut causæ superius citatæ (45) hucusque; sed tunc per easdem fieri quoque potuisset, & frustra fuisset a sapientissimo Creatore hic mirabilis discursus vasorum natus: verum hanc ipsam structuram variam (42) elaborare, configurare, præparare, & componere partes advectas, ut novus inde prodeat liquor alibi non conficiendus, credo. Atque ita absolvimus omnes causas generales & constantes, quibus variæ secretiones in corpore sano peraguntur: transibimus ad illas, quæ sunt magis speciales.

52. *Potest e sanguine secerni liquor, qui majoribus constat particulis, quam reliquus humor circulans.* Incipimus nunc tertiam partem generalis divisionis (43) exponere, in qua meretur, propter ventilatas de ea quæstiones, primum locum secretio humoris crassioris ex tenuiori liquido. Distinguere statim debemus humorem crassiores in eum, qui constat ex majoribus proportionaliter partibus, quam constat liquor, ex quo instituitur secretio; & in alterum, qui post secretionem est tenacior magis cohærens, quam est liquor, e quo fuit separatus hic crassus humor. De priore tantum hoc loco acturi, de alio autem deinceps. Constat ex præcedentibus (34) sanguinis globulos rubros non ingredi vasa secretoria, sed redire per venas; de iis ergo non est quæstio. Verum de liquore remanente ex variis magnitudine constante partibus datur dissensio, an possint partes majores ejus secerni, & minores circulantibus iterum permisceri. Responsio utique est in promptu; nam si ponamus per vasculum (2) moveri globulos serosos (b) & reliquos omnes (c, d, e); & vasculum (2) abire in vas excretorium, reliqua vero contentos liquores affundere sanguini in venis, aut lymphæ in vasis lymphaticis venosis, nonne tunc secretus liquor ex majoribus constabit particulis, quam ille, qui circulatur? Credo, neminem fore, qui dubitabit. Hæc demonstratio quoque valebit in reliquis instituta vasculis & humoribus (48) & ita poterunt multi crassiores humores secerni, quam sunt illi, qui circulatione circumducuntur. Præterea possunt partes quoque minores in ipsis vasculis secretoriis in majores conformari globulos (6, 7) & ita quoque exhibebitur liquor secretus reliquo humore crassior: quippe diligenter est observandum, partes sanguinis non esse solidissimas & immu-

Fig. 1.

tabiles, at vero in majores & minores posse abire globulos, prout vario modo agitantur a solidis: nonne ipsi sanguinis globuli rubri a nostro corpore ita formantur? an putaremus tali magnitudine ex vasis recipi lacteis? certe hæc nimis sunt exilia in suis principiis, & ipse chylus microscopio conspectus ne quidem unicum talem continet globulum; sed est nostræ machinæ opus, quæ ex chylo tenuissimo tam magnos format globulos. Quare ergo non possent in aliquo organo majores ex minoribus componi globuli? insuper esset examinandum, an talis fiat in nostro corpore secretio: verum quoniam hic liquor cum alio glutinoso ut plurimum confunditur, hujus examen ad sequentem conferemus.

53. *Tenaciores & glutinosiores humores quandoque secernuntur, quam illi qui remanent circulantes.* Multi egregii viri turpiter fuere decepti, judicantes, omnes humores tenaces, glutinosos, constare partibus majoribus, quam illi, qui apparent fluidiores. Fluor non pendet a magnitudine aut parvitate partium liquidum constituentium, sed quod hæ partes majori minorive cohæreant nisu, & ideo ad earum separationem majore minoreve sit opus potentia. Cujus liquoris partes aliquantulo magis cohærent, ille vocatur crassus ut plurimum humor. Ad separationem talis liquoris requiritur illa causa, quæ facit, ut partes e reliquo humore separatæ tenacius cohæreant, quam ante separationem. Talis potest esse primo tardior motus vasculis secretoriis (32, 26, 30, 31): liquores enim nostri stagnantes concrescunt fere omnes, quod non amplius in fluore servantur actione vasorum. 2. Si plures partes sese invicem attingant: nam cohesionis firmitas respondet contactuum punctis, quare quædam apparent fluidissima, quamdiu cum alio vehiculo fuerint mixta, quæ vero a suo menstruo liberata protinus abeunt in corpus solidum (8, 9) tenacissimum. 3. Quando menstrui destruaturs natura, aut adaugeatur in particulis coadunandi potentia, affusione alterius liquoris, qui una cum eo concrescit (6, 7, 8, 9, 10, 15). 4. Et ultimo, si liquor in vasculis secretoriis majus patiaturs frigus (33). Ex his intelligimus nequaquam procedere, quod secretio visceri proveniat e sanguinis massa talis existentis, sed quod sæpe in organo generetur: & quod non debeamus ex crassitudine concludere magnitudinem partium secreti humoris.

54. *Tenuior humor ex minimis constans particulis secernitur e sanguine, si canalis major desinat in vas circulatorium, & minor vel minores in excretorium.* Fig. 1.

55. *Fluidissimum secernitur, si liquidum ingrediens vas excretorium minorem possideat de natura concrescendi (45) potentiam, quam circulans liquor, & fluidissimum peracta secretionem non dimittat.*

56. *Concursu plurimarum causarum recensitarum quotquot sunt secretiones in corpore possunt exponi.* Nimis longum esset perspicere omnes, quasdam tantum præcipuas ex præcedentibus demonstrare conabimur.

A. præstantissima omnium est *spirituum* in cerebro & cerebello. Ad id fertur sanguis jamjam in pulmonibus confectus & exacte mixtus, vix ullam concretionem passus (23) in itinere: arteriæ carotides sua origine, propter arteriæ aortæ curvaturam, respondent axi canalis (24): & ideo recipiunt mobilissimum, lævissimum (25), quod magis in eo sanguine adhæret & glutinosum est, derivatur ad latera (25), & per carotides externas movetur: valde flexuosa via tendit per canalem osseum cranii ad cerebri basin, ne aliqua fieret concretio, quæ motu perturbato prævenitur per hanc curvaturam motum intestinum in eo sanguine conservantem: arteriæ in cerebro infinitis anastomosibus uniuntur, separantur, sanguis in oppositos cursus agitur magis quam in ulla alia corporis parte; habetur ergo exactissime ibidem permixtio, floris conservatio (31) summum concretioni impedimentum, & spirituum e sanguine confectio. Ita pars sanguinis nobilissima concrescibilis, nutrititia, in reliquo corpore præparata, & præcipue in pulmonibus, in cerebro ulterius elaborata & confecta, per omnes ramos arteriarum cerebri æqualiter distributa, ibidem mirabili concursu vasorum in fluore conservata, perducta ad nervorum prin-

cipia, ea intrat tanquam vascula secretoria; & ibidem propter fibrillarum exilitatem iterum concrefcere nequit; remanens vero sanguis per sinum sagittalem & laterales reducitur. Tot requirebantur causæ in præparandis, conficiendis, & separandis spiritibus, quæ omnes simul nullibi inveniuntur in corpore: quare spiritus, licet videantur tenuissimi, potius massæ sanguineæ manent irretiti, quam ut per organum aliud a sanguine, licet ibidem deducti, segregarentur: statuere enim velle spiritus sanguini in corde mistos, ad alia quoque non pelli loca, absurdum esset, quum rapidissimo fluxu, & admodum perturbato per aortæ curvaturam projiciatur: at reliqua organa non valent spiritus a sanguinis circulantis massa separare, quod omnes non possideant qualitates, quæ ad spirituum requiruntur separationem.

B. Non minus mirabilis est *bilis* confectio in hepate. Sed contemplemur etiam causas, videbimus nulla alia in corporis parte ejus quoque fieri posse secretionem. Ejus præcipua virtus in saponacea natura consistit, constante ex oleo & sale alcalino volatili, ut saponem plurimi artificiales, cujus saponis ope oleosa reddantur miscibilia aquis: utraque hæc principia in sanguine habentur hepar ingressuro: funditur ex omento oleum pingue in venam portarum, & sanguis continet salem alcalinum volatilem hic magis quam alibi, quod stagnatione quasi in lienis cavernulis & ipso venæ portarum trunco levem acquirat putredinem salem alcalinum volatilem producentem; (37) habetur ergo materia bilis in sanguine jecur ingressuro, & forsan bilis quoque ipsa per vasa meseraica ex intestinis huc deducitur: opus est ergo tantum organum separans salem volatilem, & oleosum e sanguine, & ea denuo commiscens. Hinc non absurdum est statuere duplicem secretionem in hepate, & ope glandularum exilissimarum per ejus substantiam dispersarum, atque alteram per extremitates ramorum venæ portarum, quam celeberrimus Ruyschius suis detexit injectionibus. Qui secreti liquores confusi in ductu cholidocho, ipsam exhibent bilem, qualis conspicitur. Intelligitur ex his, quare quoque in alia corporis parte non separaretur bilis, quod præsto non habeatur materia, deficiat tale organum separans & confundens, atque motus ita retardatus, ut est in vena portarum (50).

C. *Urinæ* secretionem paucis quoque exponemus. Urina constat ex aqua & aliis corpusculis in ea contentis. Aqua præcipuam ejus exhibet partem, quæ prout majore minoreve in urina habeatur quantitate, eo magis minusve erit saturata. Hæc pars aquosa per sudorem aut insensibilem quoque eliminatur perspirationem; & quandoque in diarrhæa per alvum: quare iis secretionibus auctis minuitur urinæ quantitas, quæ tunc est magis saturata. Hinc patet, partem aquosam non tantum in renibus a sanguine separari, sed & in aliis quoque locis, & tunc fieri, quando in arteriis partes concrefcibiles sanguinis fuerint unitæ (23) remittentes aquosum, quod per vasa tenuiora, sanguinis & serosos non admittentia globulos (45) auferitur. Sed quia sales intime uniantur promptissime aquoso, hi quoque simul excernuntur, simplicissima vasorum in renibus structura a Ruyschio demonstrata. Præter hoc generale excrementum, aliud peculiare separant renes, ut docet experientia in urinæ suppressione; hoc per corpuscula illa rotunda, parva, intus cava, per renum substantiam dispersa fistulas urinarias attingentia peragi sentio, quæ corpuscula minima glandulosa, sua propria structura advectum sanguinem ita disponunt, ut peculiaris in iis fiat secretio, nullibi alias perficienda.

D. Ex dictis præterea intelligimus, quare ex eodem sanguine ad renes vecto possit separari *semen*. Sanguis ad renes vectus nihil fere differt ab eo, qui fertur per spermaticas arterias: verum sanguis ibidem aliud patitur quam in renibus; deponitur maxime ejus pars in venulas corporis pyramidalis, & progrediens ramus ad epididymidem, atque testem, qui posterior venam non habet comitem, sed contentum in medium testis innumerabilibus osculis deponit, quare hic pars gelatinosa præstantissima omnium humorum, ut diximus superius in spirituum secretionem, deponitur, & tenuissimum avehitur per vascula lymphatica, quæ denso agmine inde

pro-

it. Fit ergo hic secretio materiæ crassioris & tenacioris (52, 53), pars hæc remanens, actione solidorum in testibus & epididymide, & forsan in seminalibus, in semen commutatur. Intelligitur ex eo, quare seminis secretio magis quam urinæ profluvium debilitat, & vires exhaurit. Gravedinis undique in corpore secretio fit manifesta ex iis quæ diximus mucilaginis circa juncturas (25).

paucis judico reliquas omnes posse exponi secretiones naturales, quod cum hic esset elucidare, & multi præterea *maligni humores & morbosæ* secretionem tantum a sanguinis massa possunt separari; ita materiosa & morbillosa per cutim; venerea præprimis per glandulas salivales: & febrilis per urinam; gravedinis & coryza per nares. Quod in praxi observare, quod omnem materiam morbosam non valeamus per cuncta emunctoria; quo enim vergit natura eo ducenda.

aliqua causa secretionis vel auferatur vel immutetur, ipse liquor secretus per eundem, quantitate & qualitate a solito differre potest. (Hæc est quarta pars secretionis) quod per omnia organa speciales secernantur liquores perpetuo, id pendet a causa in hoc organo operatione, quæ actio est causa constans in hoc organo proxima non est solitaria, sed ex multis simul concurrentibus causis nam una si tantum auferatur vel immutetur, tota secretio quoque debet quæ mutatio fit in liquoris quantitate adaugenda vel minuenda, aut ejus indole. Et quoniam plurimæ causæ concurrunt ad unum tantum prode sanguine liquorem, hic ergo liquor multis modis potest immutari, aut illave causa auferatur, vel alia nova accedat ad causam proximam secretionis liquoris constituendam. Ut distinctissima hujus mutationis habeamus rationem, causas concurrentes abstracte considerabimus.

Ita velocitate sanguinis, secretio augeri, minui, & immutari potest. Primo monstrandum, sanguinis auctam velocitatem solam promovere secretionem: major dicitur velocitas in liquore per canalem fluente, si eodem temporis spatio quantitas per eundem canalem feratur: patet ergo, si nihil aliud fit, vasa secretoria majorem derivari humoris quantitatem, seu secretio fit maius hoc fit, a validiore cordis contractione, compressione externa, & moleculari vasculorum (44) hæc ergo actiones adauctæ valent majorem exhibere secretionem. Hinc valida circulatio sudorem prolicit; masticatione, & motu arthrico, agitatione & compressione illarum glandularum copiosior saliva, & maius Haversiana effunditur; & stimulus applicatus vasis ingentem elicere secretionis quantitatem. 2. A motu celeriore, si simul nimis condensetur sanguis, vasa majora ita impleantur, ut lateralia minora comprimantur, suffocantur: uti in morbis acutis plerumque cutis arida, suppressio urinæ, oris siccorum squalor deficiente humore lachrymoso, conspiciuntur, licet validiffima sit circulatio. 3. Dum liquor fluit per vasa dilatabilia, illa a majore impleantur, & intrabunt liquida insolita, atque turbabitur secretio: nam si (a) nimio impetu extendatur ad amplitudinem (2) illæ particulæ (b) intrabunt, qui tunc derivabuntur ad locum sibi non convenientem: hoc potest in aliis canaliculis, & ita plurimæ possunt immutari secretionem motu accelerato. Ita mictus & vomitus cruentus, hæmorrhagia narium, hæmoptysis, præmatura mensium evacuatio, excitata fuere. ipso hoc validiore motu sanguis mire immutatur, & ex eo conficiuntur qui in motu solito nunquam generarentur e sanguine (32); quod variæ in urina post validam circulationem evacuata conspiciamus genera, quæ tales e corpore fuissent evacuata: nonne ipse sanguis in superiori parte particulam densam phlogisticam lardi adinstar post validam circulationem & a motu perturbato innumerabiles varii producuntur liquores, ita in ani-

animi pathematibus faeces alvinæ quandoque subito ejiciuntur coloris nigricantis, virescentis, flavi, aut alterius coloris, consistentia, odore & foetore a naturali recedentes; quæ etiam in melancholicis, & hysteris insultibus obnoxiiis prodeunt, præcipue in iis, quæ quandam commotionem sentiunt in hypochondriis & ventre, vulgo pro incantatis qui habentur, quod insolita ejiciant, motum in ventre sentiant, & mira audiantur murmura, quasi dæmones loquentes, & vix ullis cedat medicamentis hic morbus. Multos tales curavimus homines compescendo anodynis, balsamicis, gummosis atque resinosis hunc motum inordinatum, & dein roborantibus, spiritibus, volatilibus salibus, atque antiscorbuticis restaurando illorum viscerum vires, & ita præstigias fascinationis homini Christiano abominabiles discussimus, & a nomine hoc detestabili liberavimus.

59. *A motu quoque retardato variare possunt secretiones.* Ut a motu majore, ita etiam ab eo retardato, humores fiunt crassiores (32) & ideo tardior procedit secretio, ut & ex minori advecta liquoris quantitate. Sed copiosior tum demum fit, quando ex debiliore circulatione humores colliquescant & putrescant, unde prodeunt liquores, qui in sanitate nunquam conspiciuntur, copiosi putrefacti sæpe & ichorosi.

60. *Ex mutata liquorum cohærendi potentia secretiones augentur, minuuntur, & depravantur.* Quandam concretionem requiri ad secretionem supra (45, 46) probavimus: eamque posse adaugeri & minui. In tota massa & in aliqua ejus parte ex dictis (6, 7) intelligitur. Nihil ergo probandum restat, nisi quod ex vitiata cohæsione etiam commutentur secretiones. In omni secretionem debet fieri separatio, si vero partes firmitus cohæreant, majore opus est ad solvendas partes potentia; si ergo solvendi potentia simul non adaugeatur, quod supponitur, nulla fit separatio, & secretio sistitur. Si vero minuat potestas cohærendi, omnes humores tenues redditi, & a minima causa separabiles, minutissima intrant nimis vascula & effluunt, ut ex enarratis (6, 7) etiam constat. Sed & depravantur, nam minutissima vascula recipiunt ex tali sanguine humores, qui in statu sano non intrarent.

61. *Magnitudo globulorum aut amplitudo pororum mutata, varias producere valet secretiones.* (48) Ponamus globulos fieri majores, aut canales angustiores, ultima vasa nihil liquoris recipient, nam tunc non habetur liquor tam tenuis, qui ea intrare potest; & globuli maximi per ultima vix possunt arteriarum tranare capillaria; unde circulationi impedimentum, & tenuissimi supprimitur secretio. Si hoc tantum fiat in quodam humorum genere (7) sistetur tantummodo illa secretio reliquis intactis. Hinc non est opus tota ut inspissetur sanguinea massa, aut totum constringatur solidorum stamen ad peculiarem supprimendam secretionem. Quare in praxi diligenter notandum, quæ medicamenta specialem hanc illamve sistunt secretionem, ut fuit in secretionibus proritandis peractum. Si in contrarium argumentemur, res evadet clarior, nempe si minuat particularum magnitudo aut augeatur amplitudo orificiorum; perpluent undique liquores, & corpus reddetur exsuccum, atque veram tabis nervosæ a Morthon nominatæ depingit ideam. Hoc non modo sed & vitiantur secretiones, ita diabetes, sudor colliquativus copiosus, ex hac sæpe proveniunt causa. Hoc in unico speciali fieri posse genere humorum, clarissime docent Medicamentorum operationes, quæ evacuandis prospicimus: ita Mercurius tantum salivæ, cantharides urinæ, senna alvi evacuationes excitant: imo observaverunt practici maximam differentiam inter chalagoga, hydragoga, & melanagoga. Multa horum externe applicata, vel venis injecta eosdem sortiuntur effectus: quare quosdam tantum solvunt humores, vel ad peculiare feruntur organum, licet alibi applicata, ut determinati peragatur humoris secretio.

62. *Reliquæ in secretionibus mutationes, quæ pendent a minori vel majori vehiculi quantitate (8, 9, 10) & particularum indebita gravitate (11, 12, 13, 14) ex recensitis facile intelliguntur.*

63. *Crassus humor potest post secretionem fieri tenuis, & vice versa.* Quinta classis (43) exponet mutationes, quæ liquoribus accidunt secretionem peracta, sive contineantur in loculis, sive in vasculis excretoriis, sive in quadam cavitate. Sciendum est, humores tales non secerni e sanguine, quales apparent secretionem peracta, in ipsa sanitate, & adhuc multo minus in morbis; præcipuas has mutationes in hoc articulo examinabimus. Humor ex majoribus partibus constans (52) alicubi stagnans non semper eandem servat indolem, non habemus in nostro corpore liquorem, qui majoribus constet partibus, quam ipse sanguis ruber (28) vascula secretoria non ingrediens. Is tamen in quadam cavitate fusus, aut in quadam corporis parte, sensim ita attenuatur, ut minutissima ingrediatur vascula absorbentia. Ita etiam pus, quod quoque est humor crassus, sensim ita attenuatur, ut ab iisdem recipiatur & misceatur circulanti, postea ut plurimum per urinæ vias deponendum. Quo uno reor satisfactum quæsito, qua via ducatur ex pectore pus ad vesicam, quæ hucusque frustra fuit quæsitæ. Humorem ex minimis constantem particulis post secretionem partium augeri magnitudine posse, ex iis quæ diximus (4, 8, 30) intelligi credo.

64. *Non est ferendum iudicium de crassitudine humoris, quam habuisset tempore secretionis, dum postea alicubi reperiatur.* De huius humoris secretionem egimus (53). Tam crassos autem non secerni, quales apparent post secretionem peractam, paucis evincemus. Semen, cerumen aurium, materia mucosa in tota membrana Schneideriana, faucibus, œsophago, ventriculo, intestinis, trachea arteria, & juncturis, si tam crassa fuissent, per ipsas arteriarum extremitates in venas transire non potuissent, sed stagnarent ubique, multo ergo minus per vasa adhuc arteriis tenuiora, per quæ tamen eunt facillime: verum solæ seorsim si habeantur, partes sese mutuo arripiunt, aut tenuissimum avolat, vel stagnantes coeunt, & crassi apparent & tenaces humores. Hinc tanta viscerum in stomacho & intestinis coarctatio & ejectio, de quo multi mirantur, unde veniat tanta eorum copia, non cogitantes, stagnatione sponte incrassescere fluidissima quædam nostri corporis. Ita tota leucophlegmaticorum corpora visciditatibus scatent, qui tamen humores, si circulatione commoveantur, sunt fluidissimi. Et e contrario viscerum secreti humores suam quandoque exuunt indolem, & in acerrimos, ichorosos, rodentes convertuntur, ut passim inculcavimus: fieri etiam potest, quod duo liquores post secretionem confundantur (6, 15) & ita crassiores tenaciores aut tenuiores & fluidiores fiant.

65. *Liquores secreti in innumerabiles varios humores commutari possunt.* Secretione peracta, humor hæret in quadam cavitate, si ibidem diutius maneat, omnes ipsi accidunt mutationes, quæ ipsi fierent in loco calido reservato, hoc est corrumpitur & putrescet; & quod unusquisque humor suam specialem producat corruptionis speciem (37) varii nasci possunt in nostro corpore maligni humores, qui tales nunquam fuere secreti. Aut secretionem peracta duorum diversorum liquorum, possunt hi humores confundi, ex qua miscela novus tunc generatur liquor omni dote ab omnibus aliis sæpe differens. Ita oleum medullare per ossium capita, & mucilago e glandulis mucilaginosi confunduntur ad obliniendum ossium extrema. Ita etiam bilis & succus pancreaticus in intestinum duodenum, ad promovendam chyli elaborationem & accuratiorem miscelam: imo hanc duplicem in eodem fieri organo secretionem (56: b. 56. c.) Anatomicorum hodiernorum industria comprobavit. Ex his omnibus patet, multos humores a sanguine posse separari propria vasorum structura & humorum indole, sine ulla fingenda secretionis hypothese, quod in hoc tractatu præcipue erat peragendum.

JOANNIS DE GORTER

ORATIO INAUGURALIS

*De dirigendo studio in Medicinæ Praxi, sive de Tabulis
pro disciplina Medica concinnandis.*

NUllam totius Medicinæ partem majoribus implicitam difficultatibus, erroribusque magis obnoxiam, quam Praxeos quæ venit nomine, uno confitentur ore Medici:

Quum infinitas ob morborum causas, quæ sensuum non raro eludunt aciem, obscurissima; & ex ingenti signorum numero, multis in morbis similium imperscrutabilis fere sit habenda.

Hypothesium deinceps luxuries, qua signa morborum & causæ, quatenus istis congruunt conjecturis, aut reticentur, vel non visa apponuntur:

Atque novandi amor, nobilissimam firmissimamque hanc Artem ad infamiam usque redegit, & ejus progressum quam maxime retardavit.

Quare unus idemque morbus, prout vario ducatur genio Medicus, aliis omnino ex causis videtur natus; Et ex dispari exhibito medicamine, facies quandoque morbi ita invenitur mutata, ut Medicus vel peritissimus haud queat ex præsentibus anomalis, quonam æger laboret morbo, divinare signis.

Utinam vero varia hæc Medicinæ fata inter Medicorum mansissent limites, & languescerent ægri, eorum implorantes opem, insontes, misere non fuissent exagitati!

In illos autem faba cuditur omnis, quum mutatas curationis methodos, etiam si morbi genio infestissimas, evitare nequeant; quibus eorum ægritudines curabiles & faciles, in immedicabiles quandoque, si non lethales, convertuntur morbos.

Fugiendæ ergo, ut videtis Auditores, omnes in Museo excogitatæ, & ad ornamentum quasi artis inventæ, ex cerebri commentis deductæ, hypotheses: Præcepta autem certissima praxeos, in purissimorum auctorum descripta libris, aut in ægrotantibus observata; sive canones, quos ipsa dictitavit natura, quibus facilis & certa evadit morbi cognitio, & cita, tuta, jucundaque curatio, acquirendi & excolendi.

Scio equidem nihil præ se ferre hanc artem magnifici, & non tam pulchram esse, quam quæ fallaci ornata est & ficta hypothesi:

Destituimur enim omnibus cerebri figmentis, quibus imperitorum fascinantur oculi, semper aliquid mysterii subesse, captum eorum si superet ratiocinium, suspicantium, & clara perspicuaque despicientium.

Imo ægrorum, explicationem causarum a nobis expetentium desiderio, si prompte nequeamus, verbis ornatis, ex ficta licet provenientibus conjectura, satisfacere, isti nos in arte parum esse versatos crederent.

Qui insuper perpendet animo Medicinam difficile addisci Dogmaticam;

Ne latum quidem unguem a naturali esse decedendum cursu;

Eam esse simplicissimam, minimeque ornata;

Nos tantum Artis esse ministros, alii cum sint Imperatores & Domini;

Hanc non nisi observationibus decumbentium posse promoveri, illam autem per ipsam quidem insomnia magnum adipisci incrementum;

Nonne Dogmaticam repudiabit, & hypotheticam exosculabitur Medicinam? Non. Hæc semper fata debuit veritas subire nuda, vestibis quasi spoliata, & incompta, quum inter splendentia & superbe ornata hypothesium invenitur figmenta.

Dogmaticam tamen ad hominis utilitatem magis, & ad æternam adipiscendam Me-

Medicinæ certitudinem conducere arbitror, impossibile cum sit conjecturis sinceram & inconcussam stabilire Medicinam.

Tamdiu equidem potuit Galenica elementorum doctrina, & plurimarum sectarum, artem Hippocratis Dogmaticam obnubilasse, & suis veluti continuisse vinculis, donec accensa veritatis lucerna omnes has discusserit nebulas.

Medicorum enim principes, quibus hominum vita & sanitas est cordi, illam ab omni liberarunt secta, nil nisi pura proponentes naturæ opera.

Summa itaque laude sunt extollendi, qui hanc fregere glaciem, qua omnia gelu constricta rigescebant: qui ficta & falsa ex Medicina exploserunt: qui tanta in rerum caligine, perque tot viarum anfractus, calcato vix itinere, solam sunt assecuti veritatem:

Et æternum merentur nomen; atque ab ægrotantibus non minus, quam Medicis adamari censentur digni.

Silentio autem præteream hujus seculi qui fuere lumina & principes in arte, licet recitare possem, ne nominando aliis de sua laude aliquid præripere videar.

Artem vero medicam ad eam non pervenisse perfectionem, ut non amplius quid desideraretur in ea, fateri debemus: imo multa non minimi momenti desunt, in quibus eruendis & detegendis, cunctis incumbit hujus artis magistris suos ut impendant labores, donec tandem supremum attigerit perfectionis fastigium.

Munus itaque demandatum a me quoniam exigit publice profiteri hanc artem, nihil aptius illi, inauguralique orationi convenientius autumo, quam tradere methodum, qua ex primis medicinæ fundamentis, in purissimorum descriptis auctorum libris, aut in propria detectis praxi, possimus firmare inventa, eruere huc usque desiderata, obscura elucidare, & praxin non minus quam cæteras medicinæ partes, certam reddere & inconcussam:

Tyronibus porro commonstrare medicinæ viam, quæ indubitate ad impenetrabilia eos deducet artis: ut in primo statim possint comparare studiorum curriculo, quæ in praxi ipsis semper necessaria sunt futura; ne studiorum cum magno temporis dispendio in posterum debeant immutare ordinem.

Minime miremini omnium ordinum Auditores, quod is, qui suo se pede didicit metiri ac modulo, & ab annis complusculis decumbentium lectulis sese unice addixerit, facundissimis vero musis vix dederit operam, nequeat, venusta mellitave eloquentia, Oratoris sustinere vicem.

Quare quoque nobilissimi opima fecunditate argumenti potius, quam excelsis præconiis, res viles & leviuscultas, miro verborum ornatu, extollentibus, vestram flagito attentionem.

Brevi itaque & succincta oratione, stilo vulgari de *Dirigendo studio in medicinæ praxi* summam dicam.

Si judicabitis nostrum laborem in medicinæ incrementum aliquid afferre, lætabor, non quod inanem aucuper gloriam, sed quod ratio id a me postulet mandati muneris.

In dicendo, Auditores, hunc servabimus ordinem.

Primo proponetur collectio omnium, quæ huc usque vera per medicam praxin fuere detecta.

Dein illa quomodo dirigantur in ordinem eum, ut brevi tempore, in priore possint inveniri collectione, & ad omnem applicari usum.

Postremo methodus, quæ ex præcedentibus operationibus magnum conciliabit praxi incrementum, depurabit, firmabitque Medicinæ scientiam.

In prima operatione aphorismi omnes, qui causas, signa, effectus, symptomata, prædictiones, atque medendi methodos continent, ut & omnia, quæ ad praxin spectant, congregandi in seminario seu sylva, & unicuique plantæ hujus quasi sylvæ progressionem arithmetica præfigendus est numerus.

Hocce seminarium, si non nisi veras complecteretur regulas, sufficeret solum ad ea, quibus indiget ars, supplenda.

Prævidendum ergo quam maxime, ne ingrediantur, quæ ab auctoribus aliqua hypothese ductis proponuntur; Sed, qui vera exponunt in morbis observata, sunt audiendi.

Sin vero irrepperint conjecturalia, quod ficta veris non raro intime inveniantur permista, & Tyrones ea separare haud queant, sequentes operationes, similitum comparatio, & ipsa praxis, certissimas depurandis iis ferent suppetias.

Necessarium erat his in adversariis nulla methodi aut ordinis lege perstringere observationes: at quemadmodum nobis suppeditat natura disponere illas, ne minutissima, & ab aliis prætervifa, in ordinem præconceptum si collocari non possent, omitterentur.

Imo, quum tanta rerum multitudo haud permittat protinus ut angustis circumscribatur mentis cancellis, in medicorum potestate non est, quæcumque in perpetuo statim digerere loco; sed multa solutis & facile perituris debet concedere chartulis, quæ postea pigebit in librum transcribere compactum.

Majus ipsis nascitur incommodum & multiplicat labores, aphorismos qui tentant in omni ordinis præmeditati describere parte: Quod pauci occurrunt unico tantum qui possent inservire loco. Quare bis aut ter pluriesve aphorismum erunt coacti transcribere eundem, quod autem in hac methodo, aphorismorum istis in locis picto numero absolvi possit.

Huc usque nullo, ut videtis Auditores, sumus usi artificio, sed omnia, quæ ad medicinam pertinent, in unum congestimus seminarium. Simplicissima certe est & puras exponit morborum operationes hæc methodus, nulla fucata hypotesi, nec ullo abrepta novandi studio, quæ tamen amplissima & certa suggeret arti incrementa.

Contra hanc autem methodum nasuti inanesque cavillatores objicere possent multa:

Eam scilicet a quovis excogitari posse indocto: Nihil artificiosi in se habere:

Per ambages plurimas, quod via debuisset fieri brevissima, attingi metam:

Nimis longum tempus, laboresque immensiores impendi in colligendis iis, quam ut fructus inde manantes pretium operæ possent compensare.

Multa forsitan nobis obtrudi possent alia, at quibus recitandis vestra me abusu-
rum patientia reor, præprimis refutare si aggrederer.

Sic plurimorum est animus, ut simplicia non artificiosa rejiciant; quæ autem obscura, rara, captum hominis superantia, non nisi abstrusissimo comparanda artificio expetant.

Suo ut fruantur genio lubenter largiemur, forsitan & suos quoque habebit usus.

Concedant nos principiis simplicissimis, sed certis, pro modulo nostro, quamvis perpusillo firmare & augere medicinam.

Sciant nos per magis artificiosas quoque, at frustra, metam attingere tentasse; verum in hanc methodum natura veluti duce incidisse: nec ullam paucioribus stipatam invenisse deviis aut certiore.

Hic autem si subsisteret operatio, seminarium tanti in medicina non esset usus, ut laboribus posset satisfacere impensis: At perlectis aliquoties aphorismis, & in genera per Indicem ordinatis, atque postea per Tabulas in species simpliciores & simplicissimas digestis, Sylva copiosissimos suppeditabit fructus.

In secunda itaque operatione proponendum venit primo, quomodo ex adversariis seu sylva aphorismi deferantur in Indicem: dein Tabulas componendi tradendus est ordo.

Antequam vero aggrediar operationis secundæ partem primam exponere, monendum habeo: Indicem compacto non esse credendum libro, sed ex multis exiguis debet constare libellis: Tot enim voces & tam variæ occurrent species rerum, ut impossibile tanta inter singulas relinquere spatia, quæ sequentia cum suis numeris recipere nomina. Sed tali est Index concinnandus ordine semper, alia quot volu-

mus,

mus , ut , servata literarum positione alphabetica , inferi possint commodissime .

Qui tale possidet volumen ex multis quod constat libellis , aggredietur a principio attentus pervolvere seminarii aphorismos , & lineam ducat sub omni in Indicem transferenda voce .

Quæ sublineatæ omnes , ordine alphabetico una cum aphorismorum numeris , prima vice in Indicem digerendæ ; postea vero sufficiet , sub inventis pingere tantum aphorismorum numeros , adeo ut semel idem in toto inveniatur Indice nomen .

Utut hoc videatur facillime , multum tamen pariet operanti laboris , quod morbi plurimi variis describantur nominibus , & species morborum non raro speciali distinguantur titulo , ad quod evitandum magna est opus attentione , ne una eademque res diversis in indice habeatur locis .

In altera parte operationis secundæ formatio Tabularum est exponenda & usus , ut genera in suas pandantur species .

Inquiratur ergo nomen in Indice per Tabulam quod volumus ad examen revocare : perlectis omnibus , qui per subscriptos indicantur numeros , aphorismis , acquiratur aliqua distinguendi scientia .

Paretur etiam novum uti Index ex multis constans libellis volumen , sed quorum numeri in fronte libellorum picti , progressionem sequuntur arithmeticam .

Post nomen examinandum in Indice ponatur numerus istius tabulæ , in qua exponendi est animus hujus nominis aphorismos , & quidem majore charactere , quum numeri aphorismorum minoribus signis sub nomine inveniantur , ut videre statim liceat aphorismos subscriptos in qua fuisse tabula digestos .

Si alicujus nominis aphorismi statim permittant in simplices ordinari species , una sufficiet expositioni Tabula , in qua tunc omnes sunt ponendæ species ordine eo , ut uno intuitu possimus contemplari cunctas .

At plures si contineant aphorismi specierum classes , numeris per classes digestis , quævis earum exponenda venit , ac si ex Indice fieret operatio .

In hac etiam observandum operatione , Classium nomina in Tabula generali , litteris esse pingenda majusculis , sub quibus ponendi aphorismorum numeri .

Et scire ut possimus in Indice an restent in Tabulam deferendi , peracta operatione , omnes numeri in Indice , quorum expositi fuere aphorismi , sunt sublineandi .

Si quis hoc omittat , quum studio & praxi sylva ampliatur perpetuo & index , novis artem augere inventis non valebit , at dubius semper , quousque in conficienda processerit tabula , hærebit .

Verum in Tabula , quæ plurimas recipit Classes , idem ac in Indice servandus est ordo , & numeri Classium per alias digerendi sunt Tabulas .

Post nomina itaque Classium , novarum ponantur tabularum numeri , quæ tot debent esse , quot sunt classes in priore .

Sublineandi sunt etiam numeri in specialiores delati Tabulas .

Et numerus majore pictus charactere post Classis nomen , demonstret tabulam , veluti numerus post nomen in Indice .

Quod si classium alicujus Tabulæ nomen , quod admodum est frequens , in Indice inveniatur , ibidem pingere quoque numerum promovet inventionem :

Nam possumus tunc ex Indice specialiores æque quam simplices aut generales protinus invenire tabulas .

Hic vero esset locus singulorum proponere ordinem , at unumquodque quum sua sit speciali fere pertractandum methodo , tempus non permetteret hos omnes pervolvere casus .

Quare unum tantummodo proponam exemplum , quo dicta superius evadant clariora .

Frequentissimus omnium & tristissimus morborum est Dolor , qui itaque nostro inserviet instituto , quod citissime invocet Medici opem ; quod nulla totius

œconomix animalis pars ab eo sit immunis ; & quod infinitis fere , ex variis partibus , quas obsidet , aut ex causis excitantibus eum , donetur nominibus .

Cujuscunque ergo aphorismi in sylva , ubi hoc invenitur nomen , numeri sub doloris in Indice titulo pingendi : nec excipiendi sunt morbi , qui aliis specialibus donantur vocabulis , ut omnes sic species sub generali Doloris nomine habeantur collectæ .

Specialia vero hæc nomina , aliis in locis Indicis , debita literarum positione , minoribus characteribus , pingenda , cum admonitione Aphorismos eorum nominum omnes in generali comprehendendi dolore .

Aphorismorum autem numeri Dolores continentium particulares , sub nomine partis affectæ & Doloris , utrisque pingendi locis , ut generalis etiam cujuscunque acquiratur pathologia partis .

Et converfis Cephalalgia in capitis , Odontalgia in dentium , & Colica in ventris dolorem , multo planior & uberior fiet doctrina .

Sic multis sub doloris aggregentur titulo numeri , per tabulam postea in ordinem redigendi .

In operatione secunda , hoc ordine est procedendum .

Generalis Tabula Doloris commodissime in sex distinctas distrahitur classes . (non est opus , auditores , simplicis proponere exemplum , quum generalium Tabularum Classes simplices sponte suggerant .)

Prima recipiat Classis cunctos partium dolores , nec ulla pars totius in illa omitteretur corporis , & quidem alphabetico digestos ordine , ad inventionem promovendam & translationem numerorum , hæc omnia doloris nomina majusculis conscribenda literis , atque relinquendo inter nomina amplo satis spatio , ut queant omnes particularium recipi dolorum numeri .

In altera classe congregandi lancinantes , tensivi , pungitivi , noctu tantum gravescentes , reliquæque omnes dolorum differentix , quæ in praxi fuere observatæ , post singula hæc nomina , quæ minoribus sunt scribenda literis , aphorismorum ponendi sunt numeri : quod etiam in sequentibus observandum classibus , ulteriore quum non egeant explanatione per tabulas .

Tertia autem omnes complectatur dolorem inferentes morbos & causas : in qua mirabile est videre tot diversas inducere dolorem posse causas , & iterum ab eadem causa variis in partibus alios omnino excitari dolores . Patetne ergo ex illa quotuplicita esse debeant doloris medicamina ? & nulla dari vera anodina causam quæ curarent Doloris , non vero obstupefaciendo minuenda sensum .

Quartam impleant Classem effectus doloris & symptomata , ut & quæ possunt ex eo præfagiri , multa variant effectus in eadem parte doloris , alia si sit causa lædendi : & eadem causa difficiliorem in internis quam externis corporis partibus exhibet prognosin .

Quinta recipiat methodos curationis medicamentaque omnia . Omnium acquiritur ex hac anodynorum , narcoticorum , & omnium , quæ sedare dolores & curare perhibentur , cognitio accuratissima . Cognoscimus insuper purgantia , venæ sectio , humectantia , calfacientia , refrigerantia , topica , aliave medicamenta , quando exhibenda , & eorum omnium catalogus acquiritur amplissimus .

Ultima sive Classium sexta includat specialia , quæ prioribus inferi haud potuerunt ; videlicet metastasin , cessationem & augmentum doloris , ejusque perceptionem alio in loco ac est causæ fomes , multaque hujus farinæ alia .

Peracta operatione omnes numeri in Indice sub doloris nomine inveniuntur sublineati .

Nunc vero per hoc exemplum demonstrandum venit , quomodo ex generali doloris tabula conficiuntur specialiores : qui operandi modus in simplici tabula , ut antea monuimus , est etiam observandus .

Omnes dolores in prima classe citati particulares , per tabulas sunt exponendi , quæ-

quorum unam tantum proponemus speciem, quod reliquæ omnes ad eandem possint accommodari normam.

Pectoris Dolor inserviet instituto : post nomen hoc in prima Classe generalis tabulæ ponatur numerus istius, per quam volumus tabulam exponere hanc speciem doloris.

Qui numerus etiam si post doloris in pectoris morbis pingatur nomen, una hæc tabula duobus inserviet locis; quod si negligitur, cum ad morbos perventum fuerit, iterum ex istis nova esset doloris pectoris facienda tabula.

Quum multi aphorismorum in hac specie inveniuntur numeri, pervolvendi sunt prius canones omnes istius doloris, ut pateat qua methodo per tabulas digerere permittant. in proposito exemplo commodissime erat sequenti insistere ordini.

In prima Doloris Pectoris columna variæ exhibentur pectoris partes, quas fatigavit hic dolor. Vel circa claviculas, sternum, mammas, latera, nothas, costas, diaphragma, dorsum aut sub scapulis sentitur solitarie, quandoque condolent hypochondria, latera, scrobiculus cordis, venter, aliæve extra pectus consistæ partes: vel plures partes pectoris simul, alii externe percipiuntur, vel interne, aut valde profunde; quidam respiratione motuve corporis exasperantur, cum alii nullam inducant differentiam tactus aut motus. Possumus ergo protinus ad istos, qui illarum memorant partium dolorem, confugere aphorismos, ut inde cognitio comparatur morbi: quippe valde profunde si doleat pectus pulmonum vitium frequens est causa doloris, externo attactu exasperans dolor, integumenta pectoris fomitem continent morbi: hypochondria vero si condoleant raro in pectore latebit causa doloris, at in ventris visceribus est fomes quærendus.

Alter Columna ordine exponit, quæ in pectoris dolore fuere observata symptomata & effectus. ex hac etiam licet naturam detegere morbi; quum causarum quævis characteristica una cum dolore producat signa.

Tertia autem complectitur morbos & causas, qui unquam excitarunt pectoris dolorem. Hos omnes si vellem ex ordine recitare, quos seminarium in hac protulit parte, tempus deficere, & vestra me abusurum patientia reor, quare pauca tantum, ad confirmandam methodum, adducam.

Primariæ sunt causæ doloris Inflammatio pleuræ, pulmonum, mediastini, pericardii musculorum intercostalium, periostii costarum: sterni, aut integumentorum communium: Iisdem quoque in locis erysipelas, scirrhus, abscessus & vulnera: tuberculus & vomica pulmonum: oppletio ab aqua, lympa, fero vel pure, mole premeus, vel rodens acrimonia: materies catarrhosa in has depluens partes; aut humor quivis acris hystericorum, scorbuticorum, lue venerea infectorum, vel arthriticorum; ut & variolosa, morbillosa & cujuscunque morbi materia circulans per corpus expectans expulsionem, aut aliunde retropulsa in has faciens partes metastasin: dolorosa solidorum in his partibus contractio, ultimo Cacochymia, obstructio, aut citati morbi in abdominis visceribus diaphragmati proximis & cum pectore consentientibus: qui iterum infinito fere possunt esse numero.

Ex his paucis, Auditores, intelligitis summam esse cognoscendi & curandi difficultatem; & quam parva laudatis arcanis in pectoris dolore decantatis sit habenda fides: quum harum causa quævis specialem sibi vindicat medelam, attento itaque animo pervolvendæ species morbi si occurrat cum pectoris dolore: verum hac via detectis causis ad Titulos causarum proprios, ut plenaria ex iis petatur doctrina, recurrendum, hoc non modo in hac, sed etiam in omnibus est faciendum & observandum dolorum speciebus.

In Quarta tandem Columna, conferenda methodus medendi & medicamenta huic morbo præscripta.

Hoc in negotio magnum collegi eorum acervum, quem in ordinem redigere vix potui, quod unus enim extollebat, ab altero minimi habebatur momenti, i-

mo interdicebatur, alii vero fusque deque habita doloris causa imperant pectoralia anodyna, hi clamant nihil nisi venæ sectionem & catharticum, illi e contra hæc veneni instar esse affirmant, & quod magis est mirandum, quisque suam confirmat innumeris observationibus sententiam; verum omnis hæc dissensio & discrepantia evanesceret, si recte exploratam haberent causam doloris: nam eadem medicamenta juvare & lædere posse, aliæ si sint causæ doloris, nemo negabit: quare tam necessaria habetur in medicina causarum indago.

In ultima sive quinta Columna, quædam conjiciuntur particularia in pectoris observata dolore.

Absoluta hac secunda operatione, opportunum erit quosdam hujus recitare fructus.

Nullam hucusque dedit hæc methodus ansam erroris; sed certa & perpetua in ordinem exhibet digesta.

Generalem suppeditat rerum cognitarum ideam, dispersarum licet in dissitis etiam sylvæ locis ipsi, qui modo pervolvat numerorum aphorismos inventorum sub morbi nomine aut alicujus causæ, signi, vel symptomatis: singula quum genera propria niteant vexillo, ut & omnia suum tueantur in indice locum.

Sive Viæ parantur Regiæ ubique per Sylvam, ex quibus ad intricatos pervenire licet mæandros.

Incognitæ non minus, aut quæ ab auctoribus sparsim sub variis traduntur morborum titulis, inveniuntur unitæ.

Harum aphorismos quis posset sine summa perlegere oblectatione?

Sic omnes morbi unius collectas conspiciamus causas, atque signa & symptomata cujusvis causæ mali contemplamur cuncta, quæ scriptorum copulata protulit nemo.

Nec veritatis inquisitorem, per auctorum multos, dubio & incerto hærentem animo casum usquam an invenerit similem, libros oberrantem, si numerorum pervolverit aphorismos dimittet incertum.

Neminem esse medicorum credo, omnium tam gnarum, qui ad quodvis exactissime posset & promptissime phænomenon apparens, sine librorum inspectione, respondere, aut præagere futura, vel quæ sunt agenda imperare.

Saltem ego, qui in Arte medendi mediocriter versatus, ab optimis præstantissimisque institutus præceptoribus, fateor, me multis in morbis consuluisse auctores, pervolvisse observationes, antequam potuerim quid certi prædicere, aut agere sim ausus; sed tæduit me sæpe laboris, quum totos non raro dies in libris absumferim pervolvendis, casum priusquam invenerim optatum:

Quippe qui generalem Auctores conscripserunt praxin, omnes causarum, signorumque non proposuere differentias.

Qui vero unico speciali addicti fuere morbo, tam prolixo non raro in sua inveniuntur adornanda & extollenda hypothesi, ut prius nauseam, antequam dimidiati fuerint perlecti, moveant, & in illis licet similis nobis obvenerit casus, figmentis cum & conjecturis tam lepide invenimus permistum, ut potius devium quam rectum commonstraret quærenti iter.

Hac ergo in penuria rerum confugere qui poterit in Sylvam promptissime certissimas suppetias dubitanti præbituram, nonne hujus ambiguo & anxio hærenti animo, jucunda & amœnissima erit contemplatio?

Neque novis inventis hæc methodus præcludit ostium, sed omnia in suo, quæ accedunt, recipit ordine.

Et repudiabit nunquam vel senex in Arte principio studiorum quos sustentavit labores: quum index generalis est firmissima memoria rerum.

Quis esset memoriæ tam firmus, ut eorum omnium, quæ longa acquisiverit lectione, nihil oblivisceretur? manebunt quædam fateor vestigia rerum, at raro tam vivida, ut post longum tempus posset recitare cunctas. Quum itaque velit suæ doctrinæ applicare lecta, innumera deficient, & quæ remanserint non satis habebit

habeat perspecta: nec sola perfectione librorum perfectus evadet in Arte Magister.

Quare hanc methodum, quum nihil in ea omittatur notabile, & quidvis pro lubitu revocetur in mentem, in medicina maximo æstimandam pretio reor.

Nec reticenda est ejus in morborum curationibus præstantia, qui variis ex causis nascuntur nobis, quos tamen quorundam medicorum inscitia, eadem tentavit curare medicina: quippe distinctissime ejusdem morbi varias proponit causas, quæ fideles recte agendorum habentur auctores.

Nihil valebunt equidem arcana quævis magno inventa labore, at incerta & dubia, neglectis disparibus morbi causis, ab iis expectanda curatio.

Utinam Ars nostra, hac semper methodo fuisset exculta; nec conjecturalis olim, nec incerta & vaga sub sectarum imperio; neque tot nugis permixta & tenebris obvoluta nuper fuisset plorata.

Etenim qui animadvertit, quæ ante seculorum aliquot in morbis fuere observata, etiamque hodie sine ulla conspici mutatione, & paucos esse morbos a veteribus non descriptos; nonne hic summo concludet jure, naturam in suis esse constantissimam operationibus?

Hoc si concedatur, quod a nemine sanæ mentis potest negari, magna equidem affulget spes observando naturæ cursum, & redigendo operationes in ordinem, tandem praxin ad illam certitudinem perventuram, qua hodie gloriatur Botanica.

Nec video quid impediret, quare medicinæ praxis per aphorismos certos, hac methodo digestos, minus fieret stabilis, quam Botanica per sua characteristica plantarum signa;

Aphorismi enim certi æque sunt & perpetui, quod Veterum testantur scripta, quam characteristica plantarum.

Præterea Botanici plantas digesserunt in Genera & Classes, quas itidem in Species donec non modo plantæ cognitæ omnes debitam tueantur ordinis partem, ut ex dato generali possint inveniri characterē; Sed etiam incognitæ & huc usque non detectæ, statuto queant, si reperiantur, insinuari ordini.

Hoc non minori in Medicinæ praxi fieri posse certitudine reor: suavit mihi similitudinis id in utrisque ratio, & experientia in quibusdam.

Tandem ad ultimam, sed & difficillimam methodi pervenimus operationem, quæ expertum & sagacem exigit Medicum: inquirere enim debet in id, quod latet in Arte, & obscurissima abstrusissimaque per eam sunt eruenda.

Nemini hanc aggredi partem suadeo, nisi prioribus exercitatus operationibus, medicinæque gnarus, in anatomicis insuper, chemicis & physicis multum & diu versatus.

In hac tertia operatione tres sunt observandi modi:

Quorum primus & simplicissimus est quando unus tantum examinatur aphorismus aliquid an lateat in eo nominibus propriis non expressum, quod tamen certitudine posset deduci mathematica.

Tales aphorismi in Veterum frequenter occurrunt libris, quando ex signis præfagiunt eventum.

Pro exemplo inserviat Hippocratis sectionis quintæ aphorismus vigesimus, cujus hæc sunt verba. *Non febricitantibus si fiat tormen & genuum gravitas, & lumborum dolor, deorsum purgante opus esse indicat.* In hujus margine nonne licet adjicere hæc signa indicare *Cacochymia* cumulum, & prælagire *alvi fluxum* futurum? duobus tunc in locis, sub alvi fluxus titulo & cacochymia in indice hujus pingendus est numerus.

Quæ omnia tali modo deducta, in margine aphorismorum Sylvæ notata, novæ, verissimas, sed nusquam descriptas, suggerent regulas, & seorsim collecta, obscurissima non raro aperient naturæ arcana.

Alter est modus, multos qui aphorismos ejusdem speciei in unam convertit regulam.

Huic inserviunt operationi omnes in tabulis collectæ species, si modo nonnullos pone se habeant numeros.

Severo itaque examine istius speciei pervolvendi aphorismi, videndumque quid generale continent aut singulare; & omnes inter se comparandi, ut falsa & conjecturalia separentur a veris: quibus frequens praxis & auctores fidissimi certissimum ferent adjumentum.

Ex iis depromptus canon in particulari novorum inventorum libro, eodem modo ut aphorismi in Sylva, est pingendus.

In conficienda regula tali non erit inutile adjicere numeros aphorismorum in textu, ut per ipsos, si urgeat necessitas, proprios possimus inspicere aphorismos.

Si sensus aphorismorum omnium cujusdam simplicis speciei in una fuerit receptus regula, eorum numeri omnes sunt sublineandi, videre ut possimus quorum aphorismorum sensus in regula fuerit receptus, alii si accedant hisce deinceps nominibus:

Et novæ regulæ numerus, cum quodam distinctionis signo post numeros aphorismorum simplicis speciei in Tabula est ponendus.

Quum vero simplices hæ species in duabus diversis ut plurimum reperiantur tabulis, cum numeris aphorismorum iisdem, si legitimæ fuerint peractæ operationes, numeri tunc ambobus in locis sublineandi, & novorum inventorum pingendus numerus.

Ut res perspiciatur clarius exempli ductu eam absolvere tentabimus.

In antea Doloris pectoris exemplo vidimus, illum quandoque ex abdomin alium cacochymia viscerum fuisse natum: & etiam si pervolvatur cacochymix Tabula invenietur inter Cacochymix effectus Dolor pectoris, utrisque his locis, iidem comperientur numeri aphorismorum: legitime si fuerit ex indice instituta operatio; nam ut est Cacochymia causa doloris, sic est etiam dolor cacochymix effectus. Numeri eorum omnes utrisque in locis tunc sublineandi, ut scire possimus quos aphorismos in unam convertimus regulam: & insuper iisdem locis novorum inventorum numerus pingendus cum quodam distinctionis signo.

Si vero Pectoris Dolor ex quadam venit causa, quæ huc usque nullum ab auctoribus obtinuit titulum, scribendum est nomen in indice, cui hic supponendus est numerus: Sed altera tantum tabularum si habeatur exposita, numerus, qui alias cum signo distinctionis in tabula erat pingendus, nunc vero in indice sub tali nomine erit scribendus.

Sed hujus deductionis ut intelligatis præstantiam, unam alteramve talem afferemus regulam.

Si Dolor teneat hypochondria vel regionem ventriculi, & nothas costas, qui aliquando ad sternum vel mammas, ut & claviculas extendatur, si vage infestat, jam desinens, paulo post insurgens, inspirationis molestiam inferens, si murmura audiantur in hypochondriis, adsit ventriculi languor, lingua humida, alba, tenui vestita pellicula, urina non multum accensa, at sæpe crassa cum multo sedimento; febris perexigua & erratica, & affectus inflammatorii non multum appareant: eum tunc dolorem ex cacochymia, qui potius alvi ductione quam detractio sanguinis mitesceret, judicamus oriri.

Hoc etiam in medendi methodo habere locum, venæ sectionis exemplo evadet manifestum.

Sanguinis eductio princeps habetur remedium, quæ etiam urgente necessitate est repetenda, magna copia simul ex vulnere lato, in pectoris dolore inflammatorio, qui est punctorius continuus, vehemens, vergens ad claviculas præcipue & mammas cum brachii gravitate, nec fotu lenitur; cum pulsu duro, celeri, calore urente, tussi sicca, incipiens cum horrore, & qui non ultra quatuor duravit dies.

Semel autem est eliciendus sanguis, crusta si solita in superficie non appareat.

san-

sanguinis educti, aut si pectoris dolor a pleuræ vel Pulmonum oriatur erysipellate, aut qui febris intermittens est symptoma.

Sed non est suadenda, nisi vehemens exposcat rosio, phlebotomia, si pectus doleat ex acri lymphæ, humore crudo, materia flatulenta, fluxione a capite, ut loquuntur veteres, primarum cacochylia viarum, scorbutica, podagrica retropulsa materia, catarrhosa colluvie, hypochondriorum obstructione.

Nunquam secunda in pectoris augmento doloris vena, post aliquot dies ab inflammatione, cum tunc puris confectioni est tempus; aut si suppressum fuerit sputum, & dein appareat flavo-rubescens, supprimetur enim protinus ab ea & morietur æger.

Ultimus tertiæ operationis modus integram Classem in unum convertit aphorismum generalem, qui sæpe plurimos recipit specialiores.

In hac quam maxime est attendendum operatione, quum omnium sit difficilissima & artificiosissima, ne aliquis in supputatione committatur error.

Accuratissima ergo indagine omnes cujuscunque classis aut columnæ examinentur species, num possint in quædam redigi capita, seu genera summa: Quod si permittant in unam converti regulam & simplicem, unus sufficit, qui hanc continet regulam, aphorismus.

Sed vero hoc caput generale, si ex multis constat generibus, summa tunc genera uno exponenda aphorismo; reliqua vero per tot alios specialiores, quot sunt genera in eo.

Sic in tradendis alicujus morbi causis, generalis aphorismus proximam continet ex multis aliis concurrentibus causis natam.

Particulares vero, quæ unam constituebant proximam, per totidem traduntur aphorismos, quot reperiuntur causarum genera.

In exponendis effectibus, indicatarum summa genera, generali proponuntur aphorismo: particularia autem per specialiores.

Tali etiam modo prognosis ex causis & effectibus nata per generalem & speciales aphorismos acquiritur certa.

Nec medendi methodus hunc renuet ordinem, sed certissimas proponit medendi regulas, si accuratissime perscrutamur, num laxando, stimulando, sopiendo, evacuando, virtute quadam specifica, aut alio modo sanetur morbus.

Hæc omnia in novorum inventorum describenda libro.

Ut per tabulas possimus scire ubi hi sunt inveniendi in novo libro aphorismi; & ut cognoscatur nova si accesserint:

Sub omnibus numeris post species inventis est linea ducenda: atque post nomen Classis in tabula majore caractere pictus ponatur numerus aphorismi generalis cum distinctionis signo: & particulares aphorismi in Tabula quoque, cum suis numeris distinctis sunt scribendi.

Hæc methodus multo facilius cum intelligatur per exemplum, & ut videatis eam esse universalem, atque morbos etiam animi hanc submittere methodum, selegi ex quadam tabula classem, quæ Delirii continet prognosin.

Generalis prognoseos hujus octuplicia complectitur aphorismus signa. (forsan plura erunt, at nostrum seminarium nobis non suggessit alia.)

Præfagiunt Delirium, quæ notant materiam sphacelatam, atrabilariam, urinosam humoribus circulantibus permixtam versus cerebrum deferri. 2. quæ tam crassum & inspissatum exhibent sanguinis statum, ut per exiguos cerebri tranare vix queat tubulos. 3. aut supponunt magnam ferri versus caput sanguinis copiam. 4. quæ indicant magnam humoris quantitatem in capite colligi, sive ejus refluxum sufflaminari; quæ commonstrant. 5. alia non obscure notant nervosum stamen validissime agitari, ut cerebrum in consortium trahi sit timor. 6. quædam ipsos cerebri & meningum commonstrant morbos. 7. hæc omnia si præcesserint, alia insuper si accedant signa, quæ ipsos indicant agitari spiritus, magis firmatur præsagium. 8. & ulti-

mo jam jam est expectandum delirium, si ipsa anima nonnihil vacillare incipiat.

Hiscæ adjungi possent causæ procatacticæ delirium quandoque inferentes, sed illas nobis placuit ad causarum hujus tituli deferre classem.

Verum hic aphorismus plurimis cum constet partibus, illæ omnes per alios sunt explicandæ aphorismos.

Primus horum contineat omnes materiam urinosam in corpore retinentes causas, ut renum, ureterum, & perinæi inflammationem aut scirrum, tumorem, calculum his in partibus urinæ transitum sufflaminantem, & multa alia. hæc ab autoribus inter signa delirium præfagientia citantur, licet a me in causas sint conversa, ut per alia quoque signa ab iisdem provenientia causis ampliare possem delirii prognosin; & illis, quæ ab auctoribus citantur signa delirium præfagientia, etiam possem causarum illorum morborum augere numerum.

Et ex generalis aphorismi parte alter conficitur aphorismus; qui proponit sphaceli signa, quæ delirium fuere secuta, quemadmodum in morbo inflammatorio acuto subitanea doloris cessatio, cum pulsu debili & intermittente, atque sudore frigido; qui huic addat cetera sphaceli interni signa, plenior proferre posset prognosin: & ipse aphorismus inter signa posset conferri sphaceli.

Tandem ex hac prima parte congreganda sunt ex ictericis aliisque morbis biliosis signa, quæ bilis commotionem versus caput demonstrant, veluti est urina, quæ nigrum habet eneorema, vomitus bilis, & alia hujusmodi.

Ex secundo generalis aphorismi articulo conficitur aphorismus, non modo delirium præfagiens in acutis, sed & commonstrans sanguinis inspissationem sive diathesin phlogisticam, & reliqua hujus dispositionis signa non parum firmant delirii prognosin: inter præfagientia signa numerantur, excreatio frequens, excretiones naturales suppressæ, febris ardentis perduratio, valde urens febris interne, quæ vero vix ullum præbet externe caloris indicium, lingua aspera, nigra, arida; oculi sicci pulverulenti; pulsatio in hypochondriis, circa spinam dorsæ; respiratio suffocativa, calida; sitis intensa; cutis & oris siccitas; stercora rubicunda; sputum biliosum; vox clangosa; urina intense rubra, clara; (hæc omnia aut nonnulla illorum ex probatis didici auctoribus, vel in ipsa vidi praxi) in acutis visa præfagiunt delirium. qui huic adjiciat reliqua diathesis phlogisticæ signa, quod facile potest fieri, inspecto hujus nominis titulo in Indice vel Tabula, infinitis signis posset hanc augere prognosin; sed vero, quæ in hoc proposui, inter signa delirium præfagientia inveni notata.

In tertii articuli elucidationem conferuntur omnia phænomena impediti per inferiora sanguinis trajectus.

Hinc in ventre hypocondriisve pulsatio ex impedito motu sanguinis per hæc viscera observata, frequens præfagit delirium. inde etiam evacuationes sanguinis, præcipue ex hæmorrhoidalibus, aut alterius humoris consuetæ excretiones suppressæ, motui sanguinis per inferiora resistentes non raro delirium excitarunt.

Ad quartum ab Auctoribus conferuntur articulum, aurium tinnitus, susurrus, bombus & surditas in acutis, venæ nimis conspicuæ in oculis, eorum protuberantia & visus audax, aut rubrorum serpentium vel anguillarum quasi conspectus; facies vultuosa; insomnia turbulenta & rerum rubrarum; lacrymarum stillicidium; facies & oculi rubicundi; somnus interruptus, turbulentæque excitationes ex eo; vigiliæ protractæ; inquietudo; narium stillicidium. his si annumerentur phænomena in animalibus, ligata vena jugulari, aut in homine ea compressa a quodam tumore, visa, non modo augetur delirii prognosis, sed etiam multa comparat, omnium morborum a majore sanguinis quantitate in capite collecta provenientium signa: atque titulum novum morborum scilicet a sanguinis in capite nimia quantitate collecta ortorum conficiet; multis ergo in morbis hic potest citari aphorismus.

In quinto articulo vidi ab auctoribus citari dolores inflammatorios, aliosque vehementissimos aurium, cervicis, colli, faucium, lateris, præcordiorum, circa umbilicum & ileum, renes & lumbos: forsan alia loca dolentia delirium præfagire possent, quæ mihi huc usque non occurrere.

Sextus articulus complectitur multos capitis, meningum, & cerebri morbos, contusiones, vulnera, humoris extravasationem, & inflammationes harum partium.

Sed in septimo magis specialia citantur; quum indicant ipsos affici spiritus; unde vox intercepta vel tremula, linguæ inconstantia, oculorum frequens agitatio, hebetudo visus, surditas, respiratio magna rara veluti suffocativa, spiritus his veluti qui strangulantur præ manibus expositus, ut loquitur Hippocrates.

In ultimo articulo annumerantur, quæ ipsius mentis aliquatenus exprimunt inconstantiam. Veluti collectio floccorum & festucarum, venari muscas, manus continuo ante faciem mota, stridere dentibus in insuetis, impudentia, loquacitas subitanea, insolita iracundia, oblivio, in ventrem dormire absque istius partis dolore, sitis abstinencia, cum tamen ratione morbi debuisset esse intensa, dolorem non amplius sentire, non sublata istius causa, & infinita alia.

Qui omnes tali modo pervolverit morbos, & in novum conjecerit librum, nonne is multa habebit nova, certa, nunquam edita aut revelata naturæ arcana? quæ semper poterit ex Indice invenire vel Tabula, & ad usum applicare.

An majus poterit praxi & certius conciliari incrementum?

Minime revera, ita enim omnes morbi, causæ, Symptomata, & curationes, ad summam pervenient perfectionem:

Ita certissime ex specialibus observatis hæc deducuntur generalia sine ulla præconcepta opinione.

Ita revelata conspiciuntur mysteria artis medicinæ amatori egregio dulcique oblectamento.

Obmurmurent isti, qui ambagibus multis futilibusque quæstionibus, aut characteribus insolitis medicinam opprimere conantur:

Sic artis mysteria cuivis revelari indocto: hoc nunquam Chemicorum fecisse Adeptos, sed characteribus, & nominibus barbaris cooperuisse inventa.

Sed videor me illorum subolfecisse invidiæ causam: quod ipsi non sine ingenti labore adepti ab aliis faciliiori opera acquiri omnino non ferendum contendunt.

An hoc humanum est factum invidere aliis, quod molestiis paucioribus attingant metam?

Num docto viro dignum, quæ in Medicina magni habentur momenti, & allevant graves fatis morbos, atque toti sunt humano generi emolumento, abscondere arcana, aut per fictas tantum proponere fabulas?

Medicorum absit ejus rei unquam venire in mentem: Sed decet eorum quemvis candide & fideliter, quorum ægris multum interest, revelare palam, ut languescentes doloreve vexati allevantur promptius.

An ergo praxis hac pertractata methodo est fallax & conjecturalis?

Est equidem firmissima & ars inconcussa, quæ non per se, sed ex inscitia plurimorum redditur quandoque vana & dubia.

Subsistere nunc cogor, non quod materies sit exhausta, sed reverentia ita jubet, quam vobis debeo.

Quare me ad vos, Illustrissimi ac Amplissimi Ducatus Gelriæ & Comitatus Zutphaniæ Procures, Hujus Almæ Academiæ Curatores converto;

Vos qui ingenuæ artis assidui fuistis Cultores, promovendisque studiis delectati, atque huic Academiæ Paterno quodam affectu addicti; pro Vestra consueta prudentia, post obitum Professoris Medicinæ Celeberrimi, ne illa facultas suo egeret doctore, laudabile cepistis consilium.

Quod vero Munus hoc amplissimum simul & gravissimum, hancque stationem,
Ve-

Vestro unanimi suffragio decernere voluistis mihi nunquam ad hoc adspiranti, maximas vobis ago gratias:

Et quod unicum promittere possum, id jam publice polliceor & spondeo, quam voluistis me agere personam, studio & diligentia tueri annitar.

Deus T. O. M. in Reipublicæ, hujus Academiæ, Vestrarum Familiarum, ac bonorum omnium salutem, tutelam & gaudium, Vos secunda valetudine diu servet incolumes.

Nobilissimi ac Celeberrimi Professores Collegæ honoratissimi,

Annus fere est, quo Vos me læto admodum vultu, animoque sincero in vestram accepisse fraternamque amicitiam, summa cum jucunditate recordor, quam auget incredibiliter etiam, quod eadem mihi adhuc dum gloriandi detur occasio.

Promitto me omni ope nifurum eam servare intemeratam.

Vos quoque devota Musis pectora, & hujus Academiæ ornamentum insigne, quibus volupe erit Medica tractare sacra; per illa, quæ hac arte, hac via, quam descriptam audivistis, acquisivi, in penetralia nostræ scientiæ deducere conabor, ut ex tanto & tam vasto Oceano, sine ullo erroris periculo in optatum perveniatis portum. DIXI.



E N C O M I A S T I C U M A D

D. J O A N N E M D E G O R T E R

Apud Enchusanos, in urbe patria, Med. Doct. expertissimum; quum ad
Professionem Harderovici vocatus, ibidem, Munus Oratione
De Medicina in tabulas redigenda
Auspicaretur.

UT bis bini Oratores ex gente Latina,
Tot numero Professores ex gente Monœcæ
Adsunt: Transeo *Tapperum*, inclementia cujus
Sæviit in Christi populum, Te nomino *Van der*
Linden, qui Patre (consimilis mihi) Gymnasiarcha
Ortus; Te effero *Witziadem*, qui, Consule natus,
Franequeram, Trajectum & Leidam condecorasti
Eloquii suada; Te *Gortorum* addere visum:
Qui licet extremus, tamen hæc Tibi gloria danda.
Tolle Enchusa caput, doctis his erige cristas,
Qui laudem Patriæ doctrina & nomine adaugent.
Tolle caput *Gortere* tuum, & nobis procul absit
Orbilii dici; Tibi nunc jus pulpita summa
Professorali titulo conscendere rite.
Magnus honor titulo; major, quia rebus adimples.
Hoc opus aggredieris scite, nam concio tota
Pendet ab ore tuo, Tibi dum Medicina videtur
Arctanda in tabulas; quæ singula & omnia monstrant
Uno luminis obtutu. *Nova & ardua res est.*
Laudo tuos ausus, & mecum turba Sophorum
Exclamat; *Glaciem fregit Gorterus, arenam*
Primus conscendit, pandens incognita nobis.
Roma suas tabulas duodenas efferat; ambas
Theologi laudent tabulas; Jurisque Periti
De tabulis & Pandectis præclara loquantur;
Et cur de tabulis solers Medicina taceret?
Hæc dum Janæ aperis, portas Tibi Janus apertas
Pandit, ut ascendas majorem deinde cathedram;
E Vico Pastoris in urbes, de urbibus ipsam
Urbem intra; ut Tibi fors *Academia* dia futura.
Jova tuis adsit conatibus; Ille secundet
Cœpta tua, ut tandem possis pertingere metam.
Dum mihi cura animæ, Tibi corporis, optime Civis,
Hinc nos conjunctim (horum instar) vivamus amici.

Sexagenarius & Sexennis, Enchusa, currente calamo,
scripsi; nobis Absente a Bibliotheca.

EXERCITATIONES MEDICÆ QUINQUE.

*I. De Motu Vitali. II. De Somno & Vigilia. III. De Fame.
IV. De Siti. V. De Actione Viventium particulari.*

P R Æ F A T I O A U C T O R I S.



Natomiam, Chemiam, & Physicam, multis encomiis, tanquam unicum & præcipuum Medicinæ fundamentum, ornant Medici; omnibusque viribus contendunt sibi harum scientiarum comparare notitiam, quasi sufficeret ad medendum. Inter hos autem non constat, num omnes hæ scientiæ pari necessitate sint excolendæ, & quænam ex his palmam præripiat: unusquisque enim, prout in hac vel illa scientia magis est exercitatus, eam præ ceteris extollit, & eo majori labore arcana ejus perscrutari, atque Medicinæ fundamenta ex ea eruere satagit. Infelici autem successu cuncta hæc sedulo & improbo labore fuere exagitata: est enim in viventibus, in morbis & curationibus aliquid absconditum, non omnino aliarum scientiarum principia sequens, solis experimentis medentium eruendum. Illud autem speciale solum, repudiatis reliquis scientiis, firmam & certam medicinam condere non posse, ex Empiricorum inscitia & incertitudine, qui contendunt solam experientiam, per exercitationem practicam, comparatam sufficere, facile colligitur.

Cum vero alterum sine altero perfectam non faciat Medicinam, utraque jungere oportet Medicum, ut ita communi auxilio ad majorem perfectionem & certitudinem perducatur medendi scientia.

Ad hanc itaque normam has quinque Exercitationes digesti, comparando medicorum inventa aliarum scientiarum principiis, sperans hac methodo Medicinam tandem ad summam perfectionem duci posse. Quid autem in iis præstiterim judicet benevolus Lector. Si experiar placere medentibus, atque aliquid auxilii tulisse decumbentibus ex morbo, plures alias ejusdem argumenti, publici juris facere est animus.

EXERCITATIO

MEDICA DE MOTU VITALI.

§. I. **M**irabile est in rerum naturalium descriptione videre, quæ raro occurrunt, *Vulgaria* & vix aliquem habent usum, nos ea acri studio multoque labore per- *despici-*sequi: quæ vero ubique obvia a multis despici, minusque præstantia æstimari, pa- *untur,*rumque excoli. Non est opus aliis in scientiis exspatiemur, nostra ingentem co- *variora*piam suggerit: qui enim oculum conjicit in medicamentorum selectum, dictorum *excolun-*veritatem videbit, eligunt enim, quæ vel multo labore & industria comparantur, *tur.*vel quæ ex diffitis locis magno pretio emptæ ad nos feruntur, aut quas debemus plantas cultura artificiosissima conservare; quas vero ubique juxta vias crescentes invenimus, calcamus pedibus, & tanquam nullius virtutis rejicimus. Ita quoque multi præclare scripserunt de raris occurrentibus morbis, quos vix licet semel aut bis videre in tota praxi, quasi tota Medicina ab eorum cognitione sua fundamenta deducere deberet. Hi tamen si penitus inspiciantur, nullum inde Medicina acquirit incrementum, neque post tot labores *ulla patuit* curatio. Si vero iidem labores ad morbos frequentius occurrentes applicati fuissent, posteris relicta fuisset faciliior eorum cognitio & certior curatio.

§. II. Si examinemus *Motum vitalem*, dictorum quoque veritas confirmata invenietur; nihil enim frequentius occurrit, magisque obvium, sed ab auctoribus *Motus* rarissime ita agitur, ut nobis pateat, quid intelligi volunt per hunc motum, *vitalis* quidque producit in nobis, quam diu vivimus, a quibus causis continuatur, ut ita *raro per-*ex hoc cognito motu certiores simus in cognoscendis & curandis morbis. Constitui igitur pro modulo nostro ea quæ de hac re cogitavimus publici juris facere, ut *tractatus.*forſan labores nostri aliis usui esse possent.

§. III. Antequam hujus *Motus Vitalis* causas, & effectus aggrediar exponere, *Motus* definiendum erit, quid in communi sensu intelligi volumus per motum hunc. Quid *definitur.*autem per *Motum* intelligitur, dudum a Medicis & Physicis expositum fuit; loci scilicet mutatio in rebus corporeis, ut corpus alteri propinquum, reddatur remotius: sed quia tunc nescimus, quid horum dicitur moveri, limitatius definiunt id moveri, quod respectu aliorum ambientium corporum situm & locum mutat.

§. IV. Observarunt rerum naturalium perſcrutatores *Motum* hunc aliquam re- *Motus*quirere ad pellendum ex priori loco quietis, causam moventem motui producto fe- *causa.*re æqualem: nisi corpus potentia seu conatu movendi donatum, sed gravitate, aut sustentaculo alio prohibitum liberetur a suis vinculis coarcentibus; videtur enim tunc moveri corpus nullo acquisito motu externo: ita corpus grave sustentaculo fultum aut filo annexum, descensum ex propria gravitate inhibente, protinus movebitur ablata sustentanti causa.

§. V. Commode ergo possunt producentes motuum causæ ad binas has reduci *Cause*classes, vel *quæ Motum conciliant alteri*, vel *quæ auferunt impedimenta*. Nisi quis *divisio.*has simul junctas pro tertia annumerare vellet. His enim deficientibus in rebus corporeis nullum scimus produci posse Motum.

§. VI. Quas corpora hæc in communicando motu servant *leges*, tot repetitis *Leges mo-*experimentis Mechanici examinarunt, ut ultimos perfectionis limites attingere vi- *tuum.*deantur, in eorum examine toto constitit, omnem motum in corpore quiescente productum motus communicati servare *leges*, quæ autem in explosione, effervescencia & similibus deteguntur, ut reliqui omnes, certis legibus circumscribi minime dubium est.

§. VII. At vero in nobis ceterisque animantibus, imo in vegetantibus *alia Mo-* *Motus in-*
F *tuum*

viventibus. *tuum lex* observatur: omnibus enim constat ex mera voluntate nos posse magnam exercere vim, eamque compescere, sine causa corporea huic motui adæquata, qui *Motus* appellatur Medicis *Animalis*. Præter hunc omnino alius, in omni corpore, quod vocatur vivens, est motus, quem *Vitalem* vocant, cujus expositionem amplio-rem exhibituri sumus.

Motus vitalis definitur. §. VIII. Quamdiu vivere dicitur animal vel planta, quædam in his detegitur potentia, seu vis agens, neque ex voluntate neque ex potentia externa producta, ob quam dicitur animal & planta vivere, & ob cujus absentiam mortua dicuntur. Seu aliquid, quod pono incognitum, in corporibus viventibus detegitur, vel motum ipsum produ- cens, vel quod dein resuscitatur a causa, quæ non valeret tales producere motus, quales ex ea resuscitata causa provenire videmus in viventibus.

In plan- tis. §. IX. Ut a simplicioribus inchoemus hunc *Motum vitalem in plantis* delibabi- mus: hæ neque sensu neque motu locali, ut animalia donatæ, ex simplici hoc Motu Vitali actiones suas persequuntur, qui, etiamsi nihil videtur agere, præsens esse debet & quasi revocandus, si in planta vegetatio exspectatur.

Ascensus liquoris in plan- tis non a vi attra- hente. §. X. Semen committatur terræ, si effectum vetustate, quamvis stamen solidum habeat integrum, nutritium succum non imbibet, ut inde germen producat, at cor- rumpetur in sua terra matre: aliud autem vegetum, etiamsi longo tempore asser- vatum, quasi dormiens, nato pabulo avidè haurit humorem, intumescit, germen sensim emittere incipit, quod tandem in plantam adolescit. Ne quis existimet vi- ribus attractricibus hoc adscribendum esse, quæ manent extincta vita plantæ, aliud in planta vel arbore perfectæ capiat experimentum; hæc enim dum vivit incredibili celeritate, ex radice per truncum usque ad arboris cacumen, ducet absortum e ter- ra liquorem: & quod fidem superaret, nisi iteratis experimentis esset confirmatum, longe supra supremum arboris ramulum pellitur ascendens per truncum tubulo arti- ficiose ramo abscisso vitis annexo coarctus liquor: quippe a viribus attractricibus al- levatus humor nunquam ex altera extremitate effluet; imo vero potius effluxum co- hiberet. Non ergo inepte plantis viventibus quædam vis est adscribenda, qua suc- cos suos movent, qua extincta quieti relinquuntur in tubulis suis plantarum succi, neque mutatum est plantæ organum, neque deficiunt imbibendi humores, cum mo- riatur planta, sed quando hoc principium vitale in motu consistens extincta est.

Nomina motus vi- talis. §. XI. Quid autem istud sit, haud facile est definire, & quia oculis non pa- tet, neque per alios sensus detegi potest, sed solis suis effectibus se prodit, quod producat motum, qui neque ex solida plantarum structura, neque succorum in- dole potest deduci, varia excogitarunt nomina, quibus hoc principium describunt. Ex primario effectû id incognitum huc usque *motum vitalem* vocare soleo: si alii *spiritum rectorem*, *sulphuris incolam*, *filiam solis*, *archæum*, vel *naturam* volunt appellari, modo his vocibus eundem hunc intelligant motum, vel causam eam pro- ducentem, his litem non movebo.

Motus vitalis duplex. §. XII. Duplex genus in his observamus, si respiciamus ad vegetabilia & ani- malia; quibusdam enim, ut plantis & insectis, hic motus diu sine ullo sui indi- cio quiescere potest, & demum ex alia accedente causa revocari & in actum du- ci: ita torpent tota hyeme multa, quæ æstate moventur agilissime. Sed in alte- ro genere, quod complectitur animalia perfectæ, vix minimam moram patitur hic motus vitalis, quin nunquam revocari possit: hujus ergo natura & effectus, quia tali quoque gaudent homines, paulo accuratius examinanda.

Altera differen- tia. §. XIII. Neque in his solis differentiis videtur quiescere natura cum amputati multarum plantarum ramuli, vel pars radice abrupta terræ commissa, radices a- gat, & novam plantam priori similem producat, ac si vellet indicare causam mo- tus vitalis in iis per totam plantæ substantiam esse dispersam, certæque sedi non ita affixam, quemadmodum observatur in animalibus, in quibus tale quid nun- quam contingit, nisi in Polypo.

§. XIV.

§. XIV. Antequam perscrutemur modum & causam, qua in nobis operatur motus vitalis, videndum erit, an tale quid existit ab aliis rebus ita distinctum, ut speciale mereatur nomen. A nemine negatur, Cor alterne contrahi, & arterias pulsare, nos quoque dormientes & non cogitantes animam ducere causa quadam, quæ non dependet a voluntate nostra, vel structura mechanica firmarum partium, qua necessitate organi talis deberet fieri motus: utique quamprimum ac istud adhuc incognitum agens exstinguitur, neque elasticitate firmarum partium, neque mirabili *textura organi*, neque in *fluore* conservatis liquoribus, similis motus in cadavere suscitari potest.

An motus vitalis existat.

§. XV. Ne quis sentiat *animæ nostræ immortalis* separatione a corpore hunc motum exstingui cavendum, ita enim hæc duo confunderet & coactus quoque esset animam omnibus animalibus, imo plantis viventibus adscribere, in quibus similis, si non fortior, observatur motus vitalis: præter hæc alius est in nobis motus, qui animæ imperio obtemperat, hic vero alterna requie fruitur, & nequit tota vita continua esse: at vero hic motus vitalis ad finem vitæ constanti, & non interrupto motu perseverat, minimeque ex animi voluntate dirigitur, nisi in vehementi animi commotione, quod infra examinaturi sumus.

Differt ab anima.

§. XVI. Quum hic motus neque *mentis actione*, neque ex *organi structura* continetur, ita ut teneat leges corporibus motis innatas; potest enim ex parva causa motus ingens produci, minime legibus mechanicis respondens, aliud ergo habet principium agens suis quoque legibus donatum, quod separatim est examinandum, ejusque proprietates variis in partibus nostri corporis viventis perscrutandæ, ut ita clarior multorum in nobis reddatur intellectus, certiorque ex hoc mutato motu pateat curatio, quippe qui phænomena adscribit ab hoc motu producta legibus motus generalibus in rebus physicis; vel horum leges huic motui vitali si vellet comparare, in absurdos incideret errores, non cogitans cuique proprias suas esse leges motuum.

Proprias leges habet.

§. XVII. Ut a notissimo in parte motu ordiamur, quædam de Cordis motu delibanda sunt. Hoc habet organon a principio ad finem vitæ continuum motum, alterna constrictione & requie, qua pellitur receptus ex suis cavis sanguis, in patentes aortam & pulmonalem arterias; recipitque ex cava vena & pulmonali sanguinem ad continuandum sanguinis circuitum: peragitur hic motus spiralem fibrarum cordis constrictione, supra motum, quem similis machina quævis elastica, non a majori causa, quam exercetur in removendis cordis lateribus, producere posset; quare constrictionis vis legibus motus in physicis non est comparanda, & quia non dependet ex mentis imperio, hæc actio motus vitalis est dicenda.

Cordis motus vitalis.

§. XVIII. Hic motus ab omnibus hodiernis vitalis dictus majori spirituum vitalium fluxui adscribitur e cerebello per nervos ad cor; hoc probant quoque experimenta in vivis animalibus capta. Sed quia interpolatis vicibus relaxatur & contrahitur cor, majorem explicando præbuit difficultatem. Quippe non solum influxus spirituum est exponendus, si inde fiat constriction, sed eorum stagnatio, seu impeditus transitus pro tempore est explicandus; dein quomodo hæc duo opposita se invicem tam ordinate sequuntur.

Ab influxu spirituum.

Cur alternus.

§. XIX. Quum experimenta probent in abscisso & ligato nervo cor non amplius moveri, si inter cerebellum & cor interceptus sit fluxus, causa movens altius, quam in ipso corde est quærenda, seu origo motus in cerebello locanda. Ibi vero in principio fibrarum medullarum pulposarum imprimi talem, qualis singulis ictibus exercetur a corde, credere nefas esset; destrueretur enim singulis impressionibus mollissima cerebelli compages: requireretur tamen æqualis potentia, si machina mechanica similis motus esset producendus, qualis omni momento a corde peragitur. Quid? si admittatur, alia resurgit difficultas, nam eodem tunc jure hujus validi motus causa in cerebello esset investiganda: neque hæc sufficeret in cerebello vis, quum in reliquo corpore plures sunt peragendi mo-

An ex cerebello.

Major quam a cerebello datur.

tus vitales ope influentium spirituum e cerebello provenientium . Nisi ergo hic aliquid admittatur incognitum a nobis *motus vitalis* dictum , qui in nobis viventibus multo majorem motum exercere valet , quam est momentum motus impressi , non video , quibus legibus mechanicis adstrui posset cordis motus .

Unde cordis relaxatio .

§. XX. Constat ergo motu vitali ope influentium spirituum e cerebello cor constringi , sed inde neutiquam liquet cordis *Relaxatio* . Id certum est , si aperiatur cor manente eadem constringendi vi , potentiam dilatantem fortiolem esse debere ; at vero invenimus hoc tempore cordis fibras relaxari , carnem molliorem fieri , cor minus premere digitum immissum , inde scimus minui cordis constrictionem . Sed tamen adhuc non patet cor dilatari , nisi quis adstruere vellet ab aliis fibris alternatim constrictis æque dilatari , quam præcedentibus constringitur : verum experimenta docent tale quid in corde non fieri , quare non opus novam cudere hypothesim ad comprobendam actionem , quæ a corde non peragitur .

Cor tunc paralyticum .

§. XXI. Sed , tempore receptionis sanguinis in cordis cavis , cor quasi paralyticum fieri , ut sit musculus ex voluntate constrictus , si eum dimittamus , in eo consentiunt omnes , & omnia experimenta hoc suffragantur : inde quærenda causa sistens spirituum ulteriorem influxum , dum cor est constrictum .

An a nervis compressis per amentes arterias .

§. XXII. In his obscurissimis variæ sunt excogitatae sententiæ , quarum multæ propria sua absurditate corruunt , vel ab aliis abunde refutatae sunt . Una restat , quæ omnium meretur applausum , nempe tempore constrictionis , quando arteria aorta & pulmonalis sanguine turgentes , induratae copia majore sanguinis hoc tempore e corde accepta , interpositum nervum cardiacum comprimunt , fluxumque spirituum in cor intercipiunt . Tale quid si fiat , exposita esset cordis alternæ constrictionis causa ; sed quia hoc idem cordis non fieri potest in reliquis organis motu quoque vitali donatis , neque in auriculis , quæ opposito tempore constringuntur , universalem hæc expositio non præbet cognitionem : atque non absurdum videtur sentire omni in parte Motum Vitalem simili artificio peragi , quare satius foret talem assignare structuram & operandi modum , qui omnibus convenit , quod in sequentibus tentabimus exponere .

Causæ cor dilatantes non a motu vitali .

§. XXIII. Si vero in corde explicatum habeatur , fieri alterne constrictionis remissionem , inde non intelligitur simul cordis impletio , quin debeamus ad ejus intellectum , mechanicas quoque consulere causas , scilicet contractilitatem fibrarum tenfarum , quia cordis insita vis non removet latera . Si ergo examinemus quæ fiunt , dum cor evacuatur , in partibus circumjacentibus , ex iis laterum cordis remotio est exponenda . 1. Tempore constrictionis sistitur sanguinis venarum influxus in cor , turgent inde auriculæ , quæ vel elasticitate vel Motu Vitali , si eo gaudent , pellunt appulsum sanguinem in cor relaxatum , ita accipit interne dilatantem causam .

Sed impletione .

Pulmo dilatat cor .

2. Hærens Cor intra pulmonum lobos compressiles , urgentes continuo in minus spatium colligi , hæc vis externe communicatur cordi , quasi cor externe elatere quodam traheretur extrorsum , quod nunc in corde relaxato facilius peragitur , præprimis quum cor constrictionis tempore in minus spatium redactum , adjacentem loborum pulmonis partem extenderit contra naturalem pulmonis contractilitatem : inde forsitan cor inter binos pulmonis molles & elasticos lobos locatum . Qui hæc serio secum reputat , facile perspicit cordis constrictionem a Motu Vitali produci , sed relaxationem & dilatationem potius a *restitutione elateris* fieri , quod idem in omni Motu Vitali est observandum . Constitit ex antecedentibus cor non relaxari , quia totus nervus per cordis substantiam & ejus auriculas dispersus comprimitur , hæ enim partes omnes opposito tempore relaxantur : sed inde deducitur ipsam constrictionem cordis spirituum influxum impedire , quemadmodum auricularum lacerati faciunt in suos nervos , dum cor constringitur , eo enim tempore relaxantur auriculæ . Si reliquis in corporis partibus , quibus Motum Vitalem adscribimus , simile quid possit demonstrari , ipsas scilicet *fibras constrictas spirituum influ-*

Relaxationis causa .

num intercipere, hæc actio & fabrica totum mysterium Motus Vitalis revelabit.

§. XXIV. Hoc in Respirationis negotio itidem fieri, non erit difficile compro- *Respira-*
bare, modo prius inter *Respirationem Animalem & Vitalem* aliquod ponatur di- *tio visa-*
scrimen: unum quemque sanum pro lubitu augere, minuere, accelerare, retarda- *lis*.
re Respirationem posse, nemo inficias ibit, hocque fieri ope multorum musculo-
rum oppositis viribus agentium, qui ab anatomicis & physiologicis clarissime de-
picti & descripti habentur, nullus dubito: at vero actione horum explicare Res-
pirationem vitalem arduum videtur. Id nos non latet, respirationem animalem
alternam variorum musculorum constrictione peragi posse, uti motus membrorum
omnium, at talis actio non exponit vitalem Respirationem, quæ in somno nobis
non cogitantibus peragitur; hæc enim non requirit muscularem actionem alter-
nam, ut respiratio animalis, sed ad inspirationem musculorum vitalium constri-
ctionem, ad educendum vero spiritum solam restitutionem elateris.

§. XXV. Hoc ut clarius pateat phænomena hominis dormientis, vel de respira- *Inspira-*
tione non cogitantis, ne motu animali hæc vitalis Respiratio turbetur, sunt exa- *tionis*
minanda. Talis si inspirat homo, ejus venter attollitur, in quibusdam etiam su- *phenome-*
perior pectoris pars, attrahitur aer per laryngem, brevi post subsidet venter & an- *na*.
tequam renovatur inspiratio, longius tempus infumitur. Hanc inspirationem sta-
tuimus cum omnibus fieri musculorum constrictione; qui autem huic negotio opi-
tulantur, ab aliis satis fuse pertractati sunt, & quia ad nostram dissertationem
non multum præstare visum est, hoc pro concessio ab omnibus recipiendum.

§. XXVI. Dum vero intenditur venter hoc ex Diaphragmatis constrictione pro- *Ventris*
venire debet, quod ex convexa figura complanatur, reddens pectoris cavum ca- *tumor ab*
pacius, & premendo ventris contenta viscera mobilia, ut cedendo inter se protru- *inflatis*
dant ventris musculos; aer enim per laryngem ingrediens, qui ultra pulmonum *pulmoni-*
bronchia & vesiculas non venit, adimplet quidem ampliata pectoris cavitatem, *bus*.
sed ad ventrem inferiorem non pertingit: quare increscens ventris tumor non ar-
guit majorem molem, ampliusve spatium, sed figuræ externæ mutationem.

§. XXVII. Hæc dum fit *Inspiratio*, complanatur *Diaphragma* constrictione mu- *Reditus*
sculari, sed contra propriam contractilitatem *protenditur Mediastinum* inferius Dia- *partium*
phragmati & superius jugulo accretum: atque *Pulmones*, qui sibi commissi in incre- *in prio-*
dibile parvum spatium colliguntur, nunc vero contra hanc suam insitam potentiam *rem su-*
protenduntur, & aere per laryngem ingrediente adimplentur: *Viscera* quoque *abdomi-*
*nal*ia loco suo aliquantulum removentur & aliam aliquam figuram acquirunt, atque
paulo magis comprimuntur: dein *Musculi ventris* *prolongantur* contra naturalem
contractilitatem, quibus addere possumus aliquam *cartilaginum elasticarum* ad fines
costarum, *flexuram*. Hæc omnia sive fiant a solo diaphragmate, sive etiam actio-
ne aliorum musculorum, id stabiliendum semper erit *Inspirationem fieri a muscu-*
lis Motu Vitali agitatis & constrictis, qui etiam si imperio animali obtemperant
quandoque, non tamen desinunt ex Motu Vitali agere, si alter quiescat motus.

§. XXVIII. Ita facile formaretur conceptus Respirationis, quando Exspiratio ab *Exspiratio*
oppositis musculis agentibus dependeret, uti exspiratio animalis: sed, quia in mori- *vitalis ab*
bundis semper ultima actio est exspirare, & in perinfirmis exspiratio facilis, inspiratio *elaterere*.
autem difficilis, atque mora temporis inter exspirationem & sequentem inspirationem
admodum longa, & semper longior, quam post factam inspirationem ad exspiratio-
nis initium, vix enim inspiratio facta est, quin statim altera incipiat, statuendum
Exspirationem Vitalem non fieri actione musculorum, sed restitutione elateris.

§. XXIX. Omnes quippe partes elasticæ & contractiles ex præcedenti inspiratio- *Causa*.
ne protensæ sunt, conanturque se in pristinum restituere statum, quam primum ac-
cessat tensionis causa: id non solum in viventibus observamus fieri, verum & in
cadaveribus, membrana enim quævis tensa, sive Motu Vitali gaudeat sive nullo,
conatur semper accurtare, si dimittatur; inde cessante causa constringente dia-
phra-

phragma, vel & alii muscoli qui inspirationi famulantur, partesque tensæ sibi commissæ in pristinum redeunt; elevatur itaque a *Mediaſtino*, adducitur a *collabentibus pulmonibus*, protruditur sursum tumentibus visceribus a *musculis ventris compressis*. Sed quia aer pulmonibus receptus acervatim exire nequit, aliquod temporis spatium insumitur, ut aer ille per angustam glottidem exeat, donec omnes hæ partes in summam, qua venire possunt brevitatem, redierint: *tota ergo Exspiratio Vitalis a sola elateris restitutione dependet, nullo egente Motu Vitali.*

Qua cau-
sa dimit-
titur
Dia-
phragma.

§. XXX. Inquirere ergo restat, qua causa constrictum & ita complanatum diaphragma dimittitur, ut fiat Exspiratio vitalis. Ex omnibus sententiis nulla magis veritati consona est, quam quæ perhibet ob defectum sanguinis fluentis versus cerebellum diaphragma paralyticum fieri. Interim tamen gravibus premitur difficultatibus, hoc enim asserendo non solum diaphragma fieret paralyticum, sed & omnes partes Vitali Motu gaudentes, ne quidem cor exceptum, eodem tempore paralyticæ fierent: sed quia harum partium motus Respirationi vitali minime respondet, non potest sanguini minus fluenti causa omnis Motus Vitalis adscribi, imo ne quidem Respirationis Vitalis: si enim ponatur in summa inspiratione per pulmones, quam diu in eo perstat statu, sanguinem non posse trajici, vel minori copia fluere quam requiritur, per arterias carotides & vertebrales *versus cerebellum*, ut continuetur spirituum vitalium secretio, id utique dicitur ratio toties fieri debere ac pulmones minus libere transmittunt sanguinem; experimenta vero testantur, non solum in summa inspiratione, verum etiam in summa expiratione, atque omni statu intermedio, modo non moveantur pulmones, minus libere transfluere sanguinem: inde ergo deducitur, si semel fuisset facta Exspiratio Vitalis, quia collapsi pulmones non transmittunt sanguinem, quod deinceps nulla fieret Vitalis Inspiratio: hoc quoniam a nemine supponitur, tuto hanc possumus amplecti sententiam, neque summam inspirationem, neque expirationem, neque medios status, impediētes sanguinis fluxum per pulmones, aliquid producere, quod alternæ respirationis causa posset statui.

An ab
impedito
fluxu
sanguinis
ad cere-
bellum.

Refuta-
tur.

§. XXXI. Concedendo *in sola inspiratione sanguinis quantitatem minui versus cerebellum*, ut inde fiat in musculis inspiratoriis paralyxis, nondum explicata erit alternæ vitalis Respirationis causa, nisi quis solam Respirationem, pro omni Motu Vitali supponere vult. Sed quia cor, ut demonstratum est, ad minimum ter vel quater constringitur motu peristaltico, dum semel attrahitur aer, utraque hæc organa non possent Motu Vitali agitari a generali causa, ut est sanguis parcius tempore relaxationis circa cerebellum: quippe horum utrorumque motus, si dependerent ab hac causa, æquali tempore peragerentur.

An a me-
ningium
contra-
ctione.

§. XXXII. Qui motu oscillatorio Meningum delectantur, ex *Meningis, præprimis duræ, alternæ constrictione Motum Vitalem derivant*. His autem eadem occurrit difficultas, quod non omnes Motus Vitales eodem ordine & tempore exerceantur, ut pulsus, respiratio & motus vermicularis intestinorum, quod tamen fieri debebat, quum hoc in casu totum cerebellum comprimi debeat. Quando ergo omnia organa Motu Vitali donata fibras nervosas e cerebello deducunt hoc tempore deberent operari. Neque hucusque solidis argumentis & experimentis sancitum est Duram Matrem moveri, ac si *tota in ejus superficie externa libera esset ab ossibus cranii*, ut isti contendunt: si vero dimidiam cranii partem, præprimis in pueris & infantibus, intactam reliquissent, ablata altera dimidia parte, ut ita liceret sine vulsione conspiciere cohæsionem duræ matris cum cranio, nunquam amplexi fuissent hanc sententiam; ubique enim per multa vasa adhæret, quæ cum ætate sensim in ligamentula convertuntur, ex dura matre emissæ, poros cranii perforantia, quæ abrupta conspiciendas relinquunt in duræ matris superficie maculas rubras. Dura mater, præprimis ubi cranii sunt futuræ, arctissime internæ faciei calvariæ adhæret, ut vix ullum concederetur spatium recedendi ab

Ob adhe-
sionem
duræ ma-
tris cum
Cranio.

ossi-

ossibus cranii. Quid si concedatur *Duram Matrem simpliciter attingere ossa cranii*, Neque minime coherere? an inde clare pateret duram matrem constringi posse? Qui modo consulat experimenta similia in rebus mechanicis facile inducetur credere, quod *dura mater constringi potest si cranium continetur* membrana corpori solido cavo applicata, simili modo ut meninx dura adhæret cranio, avelli non posset, nisi aliquis alius liquor accedens repleat ampliatum spatium inter membranam & corpus firmum, iterumque expellatur accedente membrana in pristinum locum. Sed quia inter cranium & duram matrem *vix aliquis liquor*, nisi qui ad humectandam externam superficiem duræ matris, præprimis ex *glandulis citra futuram coronalem confitis*, in vertice capitis, sub ea ossis frontis parte, secretus, & forsan ex ipsis arteriarum meningum extremitatibus transudans, invenitur, nullus autem aer compressilis, per se facile patet, Duram Matrem constringi non posse: requiritur enim in constrictione alterna, quoniam cranium est firmum, poris apertis minime donatum, per quos aer vel alius humor libere ire & redire posset pro necessitate, spatii inter meninges & cranium augmentum; quod fieri nequit, quin in loco dilatato alius accedat liquor iterum expellendus, vel aer alterne compressilis & dilatabilis. Interim tamen qui in sua firmiter persistentes sententia contendunt, actione duræ matris propelli spiritus vel agitari fibras, ut fiat motus vitalis, isti ulterius non persequuntur, quod in hac re est observandum: nam si modo rogantur, qua virtute id agunt? an non hæc actio dependet ab influxu spirituum vitalium per proprios suos nervos delatorum? minime inficias ibunt eandem restare difficultatem, unde scilicet hi nervi alternum quoque motum acquirunt. Si deponant hoc duræ matri esse insitum & naturale: sed & tale quid omnibus organis motu vitali donatis potest appropriari, quare hæc explicatio nihil aliud exhibet, quam tegere ignorantiam: sive enim dixerò ex propria sua natura quævis organa vitalia moveri, quod lubentius facerem, sive dixerò alterne moveri a duræ matris constrictione insita, non pervenimus ad interiorum motus vitalis cognitionem: imo hoc ultimum asserendo plures accumulatur difficultates, uti statim demonstravimus, quam si primam fateri volumus ignorantiam.

§. XXXIII. Sed progrediamur a meningibus ad Cerebellum, (quum Cerebro a *An cerebellum nemine Motus Vitalis adscribitur*) istud quidem suppeditat spiritus, quorum fluxu motus vitalis peragitur, eo enim ablato vel compresso, cessat quoque hic motus; verum si faceret *alternam constrictionem*, in partibus vario modo agitis, ut in *Circulationis & Respirationis organis*, principia fibrarum nervosarum in Cerebello tot varias deberent habere prementes causas, ut sunt motus vitales in diversis partibus varii: quemadmodum observamus fieri in motu animali, quod ex voluntate nostra valeamus producere motum animale pro lubitu imperio mentis. Supponendum ergo esset in Cerebello aliquid mentis nostræ instar, quod ad principia varia fibrarum nervosarum alterne majorem & minorem spirituum propulsionem faceret nobis ignotum. Nam si ponatur Cerebellum quibusdam in fibris aliter, quam in omnibus pellere spiritus ex sua natura, eadem esset cum dura matre superius allegata difficultas & obscuritas. Quæ eo fieret major, cum observemus aliquamdiu post ablatum cerebellum quibusdam in partibus continuari motum vitalem: *Intestina vero ex animali vivente desumpta aliquamdiu continuant peristaltice moveri*, quare hoc ab alterno spirituum influxu e cerebello deduci nequit: nisi quis ulterius insistat, ex semel facta a cerebello alterna spirituum impletione, eam per totum nervum continuare alterne moveri, usque dum omnis consumptus sit spiritus; quam alienum sit hoc asserere, ex sequenti elucescet.

§. XXXIV. Si enim interpolato impetu spiritus per nervorum fibras delati, a cerebello suscepti, moveatur organum vitale, Semel cum compefcatur hic motus non poterit renovari, nisi novum interpolatum motum a cerebello accipiat spiritus: verum pars organica vitalis, e corpore animalis desumpta, vel post ablatum cerebellum ad quietem reducta, redintegrabit motum alternum si irritetur; necesse ergo est, quod vel

vel ipsi nervi, vel eorum spiritus, vel organum ipsum in se contineant causam, quæ ab irritatione, sine cerebello, possit producere motum alternum. Hinc ergo patet *Cerebellum emittendo alterne spiritus non producere motum alterne constringentem in organo vitali*. Sed talia etiam fiunt nervis circa organum vitale amputatis, inde huius phænomeni causa ultra organum non est quærenda in nervis: sive enim supponatur in nervorum capsulis vel fibris alterna constrictio, hoc coincidit cum iis, quæ de dura matre dicta sunt, unde scilicet horum alterna constrictio causa?

An a gangliorum actione.

§. XXXV. Aliis etiam si magis placeat *Ganglia nervorum* hoc munere ornare, nondum tamen potuere allegatis rationibus (XXXII) satisfacere: quam primum enim supponatur Ganglii capsula alterna constrictione pellere in organa vitalia spiritus, scire gestio unde iterum hæ capsulæ hanc potentiam habent: hoc licet demonstraretur, quod hucusque non fuit factum, in memoriam esset revocandum, non solum fibras ad motum vitalem ire per Ganglium, sed & reliquas ad motum animalel destinatas, quare a Ganglii alterna constrictione, tam motus animalis, quam vitalis fieret, quod contrarium experimur: inde quoque omnes nervi Gangliis destituti, ut sunt omnes qui ad proximas feruntur partes in capite, hoc motu carerent. Non tamen his asserere volo Ganglia ad Motum Vitalem nihil facere, sed dumtaxat Gangliorum alterna constrictione non produci motum vitalem alternum in organis iis, quæ ex Gangliis recipiunt nervos; seu Ganglia sua constrictione interpolata, non ita alternis vicibus magis minusque pellere spiritus, ut ab eo spirituum inequali motu fieret motus vitalis. Ab his enim causis tres simul occurrerent difficultates. 1. *Querenda esset in Gangliis huius motus alterni causa*; 2. *Tam spiritus animalis & sensuum, quam vitalis motus moverentur*, quoniam hæ omnes nervosæ fibræ in eodem ganglio continentur, alternis motibus concuterentur, quod neque in motu animali neque sensibus observatur; 3. *Demonstrandum quoque restaret fluxu spirituum interpolato peragi motum vitalem*. Primum si inquiretur, idem esset faciendum, quod in organi cujuscumque motu vitali examinandum præcepimus; quare ad facilitandum intellectum nihil præstat, imo magis obscuram facit doctrinam, quod perspicienti clarum; quo enim plura occurrunt, ut hac in parte, eo difficilior rei cognitio. Alterum per se patet si modo quis in memoriam revocat omnia fibrarum genera nervorum capsula occlusa, pulposa & mollia esse, hæ enim ab externa comprimente causa si urgeantur, sive ad motum, sive ad sensum creatæ fibræ, sive hæreant in ambitu vel meditullio fasciculi fibrarum in Ganglio, compressione capsulæ Ganglii æqualiter urgerentur: quare necesse foret ut per omnia hæc fibrarum nervosarum genera idem produceretur, quod neque in sensibus neque in motu animali observatur. Ultimum quoque non potest admitti ob rationes infra citandas; quum certis rationibus firmari possit spiritus vitales per canaliculos exilissimos nervosos æquabili & satis tardo motu pelli & fluere. Verum motu vitali membranarum, hic multo crassiorum quam alibi in nervis, lacertisque quasi carnosius instructarum, eadem causa & modo ut reliqua organa vitalia agitatarum, pelli blande spiritus vitales per nervos ad diffitas corporis partes videntes, minime dubito; primarius enim Gangliorum usus hic videtur, quam ob rem curtiore nervi, ad proximas partes delati, quod spiritus per breviores canales deducendi minori egent causa pellente, cui sufficere videtur ipsum cerebellum, ut in remotioribus partibus, apponerentur torcularia coadjuvantia propulsionem spirituum, qui alias viarum longitudine & canaliculorum angustia forsan subisterent, non potens cerebellum tantam impendere vim, ut spiritus ad maxime diffitas partes motum posset continuare, maximam equidem patitur liquor per angustissimos canales ductus, ob multitudinem laterum, resistantiam.

An spiritus alterno motu donati.

§. XXXVI. Cum iis, qui motum in nobis & animalibus a Spirituum influxu deducunt, statuimus istos in parte excitare motum, quum fibræ solidæ nervorum tale quid præstare nequeant, quod non est huius loci comprobare. Interim ta-

men

men credibile mihi non videtur, Spiritus in se talem possidere potentiam, ut ex sua indole moverentur alterne, qua actione moveretur organum vitale: Spiritus enim e sanguine secreti a cerebello, sunt liquores tenuissimi, mobilissimi, sequuntur tamen liquorum leges generales, quibus constat nullam liquorem alterne moveri per se, ut fit in motu vitali, sed exigere causam alterne moventem: hoc si admittatur, Spiritus in sua indole moveri, mera esset concessa hypothesis nihil probans; hucusque enim non liquet ob summam subtilitatem spiritus examinare, neque ullum est experimentum, quo constat spiritus alterne moveri; quare hac in re satius est fateri ignorantiam, quam eam futili tegere hypothesis. In hos autem Spiritus æque quam in spiritus animales animam nostram motum producere posse non inficior, sed vero tale quid fieri minime patet: Videmus quidem in animi quibusdam pathematibus motum vitalem turbari, augeri, & minui, at vero istud tali non fieri modo, ut mens agit in motum animale infra paucis videbimus.

§. XXXVII. Debuimus motum cordis & diaphragmatis tanquam principem re- *Diviso*
liquorum omnium præmittere, ut pateret ex inæquali harum partium motu cau- *generalis*
sam horum nondum posse operari in cerebello toto vel meningibus, ut ita quasi *ex organi*
manu duceremur perquirere organum ipsum in quo motus vitalis exercetur & va- *structura.*
rius ex structura organi: adeoque firmiter tenendum, *cerebellum secernere spiritus ad*
motum vitalem, quos ducit per fibrillas suas cavas nervorum ad quævis organa, mo-
tu æquali, & tardo, *sed dein ex organorum structura varia diversos motus proritare:*
quare sequentia probanda & exponenda veniunt. 1. *Ope spirituum influentium in*
nobis fieri motum, sed quia hoc pertineat ad cognitionem generalem omnis motus
in nobis, & hodie a nemine in dubium vocetur, atque hoc satis a nobis peractum
est in *Compendii Medicinæ Tract. de Musculis*, hoc in loco omitti potest. 2. *Spi-*
ritus motu æquali & tardo, alternum producere posse motum vitalem ex structura
organi. 3. *Qualis tunc requiratur organi fabrica.*

§. XXXVIII. Qui considerat cerebelli mirabilem structuram ex segmentis qua- *Spiri-*
si semilunaribus, ut sunt sepimenta fere capita papaveris interna destinguentia in *tuum in*
multa loculamenta, majoribus & minoribus, ut vix ullus finis, coagmentatum, *cerebello*
quæ omnia, ne quidem minutissima, remotione majorum segmentorum conspi- *confectio*
cienda, excipienda, corticali externa & medullari substantia licet exilissima com- *& fluxus.*
ponuntur: atque dein persequitur serio in omni corticali hac substantia dispergi ar-
teriarum extremitates lanuginis instar, post infinitas fere antea factas anastomoses,
dein confectum humorem seu spiritum fundere in fibrillas substantiæ medulloas,
quarum tenuitas tanta, ut vix microscopiis conspici possint, non inficias ibit con-
fiteri, liquorem toties concurrentem & dein per cavum tubulorum vix visibilium,
delatum, ob attactum undequaque cujuscunque particulæ liquoris ad latera quie-
scentium fibrillarum, tardissime fluere & motu æquabilissimo. Neque juvaret hic
supponere cum inæquali sanguinis impletionem per arterias in cerebello, spirituum
vitalium alternum fluxum; valeret quidem ad motum arteriarum explicandum,
sed minime ad respirationis negotium, aliarumque partium motum vitalem, qui
non ita respondet motui cordis.

§. XXXIX. Inde tale requiritur motus vitalis organum, quod ex motu æquali spi- *Quale*
rituum, alternam necessario facere debet contractionem & relaxationem. Si esset pro- *organum*
bandum quo modo motus inæqualis reddatur æqualis, id minimo negotio peragi pos- *debeat*
set, modo enim in itinere ponatur corpus elasticum, quod omnem inæqualitatem in *esse.*
se recipit, exeuns liquor æquali fluxu, perget moveri. Verum ad excogitandum or-
ganum, quod motum æqualem facit alterne agentem, respondentem actioni muscu-
lorum in corpore nostro, pauciora occurrunt organa mechanica. Requisitum hujus-
modi organi est, ut, dum tendatur fibra vitalis motus, sensim ipsa sua tensione vel
intumescencia comprimat eam fibræ nervi, per quam fluit spiritus æquabili motu hanc
fibræ muscularem constringens, adeo ut, cum ponamus primo fibræ muscularem

laxam, ab influxu spiritus vitalis dum incipit constringi vel tumefieri, statim quoque hæc extensio vel constrictio fibræ muscularis incipiat comprimere fibram nervi, donec non sufficientem spirituum copiam transmittat ad constrictam retinendam fibram muscularem: ergo ob defectum hunc dimittitur iterum fibra muscularis, & sic sensim libertas fluendi conceditur spiritibus per fibras nervosas non amplius compressas: inde renovatur fibræ muscularis constrictio: atque ita ex organi structura alterne influunt spiritus, & motus vitalis est alterne constringens & dimittens.

*An tale
organum
inven-
tum.*

*Musculo-
rum fa-
brica.*

§. XL. Si talem Anatomici detexerant in musculis & fibris motus vitalis fabricam, nullum restaret dubium; eoque tantum pervenire, fibras musculares secundum longitudinem totius musculi decurrentes in medio crassiores esse, eas vero inter se necti filamentis tenuissimis, hocque constanti lege observari ad minutissimos fasciculos usque: quare minime dubium est, quin hæ longitudinales tandem in simplicissimas resolutæ arteriis debeant originem vel cruentis vel lymphaticis, ut semper hæ fibræ musculares intus cavæ, plenæ essent liquoribus: atque transversales vel obliquas tenuissimas fibras esse nervosas, quæ impletæ suis spiritibus, comprimentes nonnullis in locis fibras longitudinales, eas commutarent ex figura cylindrica in aliam, ex multis quasi vesiculis constantem, quod latius in generali musculorum fabrica exposuimus. Si ergo ab intumescencia harum fibrarum longitudinalium vesiculosa ipse comprimatur nervus, satisfactum esset quæsito: hic autem subsistere debemus, quum Anatomica demonstratione talis organi fabrica comprobari nequeat. Hoc tamen inde emolumentum habemus, nos debere motus vitalis causam in ipsa organi structura inquirere: & inde constare fluxu æquabili spirituum alternum motum posse fieri: denique ex parum mutato organo citiorem & tardiorum motum produci posse in diversis partibus: neque opus esse, ut partes æquali velocitate commoveantur omnes: ultimo admodum verosimile esse, organum, cujus intima fabrica adhuc absconditissima est, tali fere, si non simili modo, fabricatum esse.

*Quæ par-
tes motu
vitali do-
natæ.*

*An fibræ
albæ ca-
reant mo-
tu vitali.*

§. XLI. Videndum nunc superest quæ partes hoc motu vitali donatæ sint; an solæ fibræ rubræ carneæ, an & etiam pellucidæ, albæ, membranarum & vasorum hoc quoque motu agitari possint. Si fides sit habenda quibusdam auctoribus, magnam inter fibras seu lacertos pellucidos, nullo colore rubro tinctos, & inter fibras musculares carneas, statuentibus, credibile foret solos musculos moveri; sed colore solo rubro decepti, qui facile addi & auferri potest, hanc uti putant, posuere distinctionem. Verum facile est hæc inter se commutare; si enim pars musculi rubra injectione tepidæ cruore suo rubro privetur, instar omnium membranarum pallet; nondum tamen amittit movendi actionem, neque aliquid de ejus structura perit, modo tubuli ex arteriis provenientes æque ut antea sanguine, vel aliquo liquore, etiam si pellucido, pleni maneant: globuli enim rubri sanguinis ad musculorum motum nihil præstare omnibus confirmatur experimentis, atque infecta sanguine rubro carentia æque ac alia perfectiora animalia sanguine rubro donata, sua corpora movere possunt, & membra actione musculari agitare. Ita etiam partes pellucidæ, in quibus nulla, ne quidem microscopiis, deteguntur vasa, vel ex morbo inflammatorio vexatæ, vel a paulo fortiori injectione materiæ rubræ in arteriam istius partis, impletæ, totæ videntur carnosæ, quod earum arteriæ lymphaticæ ex cruentis provenientes, nunc materia rubra magis turgentes, totam membranam rubore perfundant. Nemo ergo hæc observans judicabit rubedinem vel pallorem aliquid facere ad probandum, pars quædam an gaudeat motu musculari vel nullo: quum id duntaxat dependeat a paulo majoribus & minoribus vasis, globulos rubros non admittentibus, dum vero reliqua eorum structura maneat æqualis. Ex quibus constat musculus orbicularem uteri solummodo inveniri paulo ante vel post partum, quando uteri vasa arteriosa lymphatica sanguine turgentia, veras arterias simulant; has vero fibras antea nullum habere ex sua fabrica motum muscularem quis crederet, nisi autumat globulos rubros his potentiam mo-

*Uteri
musculus
orbicula-
ris.*

ven-

vendi conciliaſſe, quod diu exploſum eſt? Tuto itaque concludere poſſumus, *fabricam eandem in lacertis ſolidis, ſive pallean, ſive rubeant, habere potentiam movendi*: quare quoad motum muſcularem fibras pellucas non licebit excipere: quippe cum arteriæ lymphaticæ in fibras muſculares æque, ut olim in muſculorum motu diximus de arteriis cruentis, abeant, quæ a fibris nervoſis obliquis poſſunt comprimi, & ex cylindricis configurari in veſiculares, ab influxu ſpirituum vitalium non minus, quam lacerti rubri motu vitali poſſunt moveri.

§. XLII. Remoto hoc, quod maximum fuit obſtaculum, multasque ceteroquin in functionibus œconomix animalis explicandis acutiſſimos viros in præpoſteras abduxit ſententias, reliquas examinaturi partes, quas judicamus vitali motu agitari, ſine ullo ad coloris diverſitatem habito reſpectu. Poſt *Cor & Respirationis organum* ſequuntur *Arteriæ*, in quibus perſcrutanda primo ab anatomicis detecta fabrica, deinceps videndum, an omnino quieſcant, vel conſtringantur elatiſcitatis virtute, vel eodem hoc motu.

§. XLIII. Quamvis veteres *Arteriis* duplicem & venis ſimplicem adſcripſerunt tunicam, hodie vero plures detexit anatomica induſtria; *extimam* cum adjacentibus partibus, quemadmodum reliqua organa noſtri corporis, ad conducenda vaſa communem vocant, ex laxis quibuſdam fibris veſiculisque cellulosis, in quibus ſæpe pinguedo, conſtare perhibent; hancque in *celluloſam* a priori diſtinctam ſubdividunt; huic ſubjacet alia ſtamine nervoſo facta vaſis cruentis in majoribus, lymphaticis arteriis & venis in minoribus, ornata, in quorum interſitiis inveniuntur multæ exiliſſimæ glandulæ, quare ex potiori parte pro auctorum lubitu *vaſculoſa, nervoſa, & glanduloſa* dicta fuit, non quod eſſent tot laminæ diſtinctæ in hac membrana, ſed alius anatomicus magis ad glandulas, alius magis ad vaſa conamina ſua direxit: dein ſubſequitur alia craſſior ex *lacertis multis ſupra ſe invicem locatis, circularibus* maximam partem arteriæ conſtituentibus, hujus craſſitudo incredibilis, multasque in lamellas diſiſibilis in magnis, tenuior in minoribus, ubi etiam *pellucidi* ſunt, dum in majoribus ſæpe *carnei* inveniuntur: inter hanc & priorem aliam quoque detegunt *cellularem a priori cellulosa deſtinctam*, ut hæ fibræ muſculares ſine impedimento alterne poſſent moveri, præſtoque eſſet pinguedo fibras obliniens: dein interna arteriæ facies *tenuiſſima tegitur membrana* ex fibris ſecundum longitudinem arteriæ locatis, hæ in minoribus arteriis tam graciles, ut vix mereantur fibrarum nomen; quare a multis præterviſæ.

§. XLIV. Quamdiu vivimus continuo curſu ducitur ſanguis per has arterias, quod hodie a nemine negatur: ſed ſi quæramus cauſas hujus fluxus, variæ de his ſententiæ; quidam *ſoli cordi*, alii etiam *elatiſcitati fibrarum circularium*, alii iterum *preſſioni externæ*, eum adſcribunt: ego vero his omnibus aliquid concedo, ſed *maximam vim in motu fibrarum* ponere ſoleo. Aliorum ſententias ponderare minus, quam meam adſtruere annitar: an recte vel ſecus ſentiam, aliorum judicio relinquam: nemini meam obtrudo, pondere enim argumentorum, non vero auctoritate eſt diſputandum. Sed quia in theoria medica, imo & praxi, multi momenti eſt recte de arteriarum actione & ſanguinis circulatione ſentire, operæ erit pretium paulo penitius hanc inſpicere & examinare functionem, utpote omnibus in corporis partibus occurrit, generalemque cauſam multorum exponit.

§. XLV. Cordis vis in pellendo ſanguinem infinita non eſt, & quam exercet in quendam arteriæ ramum, accurate inveniri poteſt: ſi enim cuidam ramo arteriæ tranſverſæ abſciſſo verſus cor ita adaptetur canalis vitreus, ut nihil ſanguinis exſtillare poſſit, hic canalis perpendiculariter erectus vim pellentem cordis in hunc ramum determinabit; quippe altitudo ſanguinis in canali perpendiculari æqualis erit cauſæ prementi cordis ſupra hunc ramum: hoc docent omnes canales incurvati, ſive cauſa agens ſit gravitas liquoris, ſive alia quævis cauſa premens, ut ſiphon; nam tam diu in altero crure canalis aſcendet liquor, donec cum cauſa premente veniat in æquilibrio. Arteria nunc vero cum adjuncto canali, canalem incurvatum omni dote exprimit, quare *premens cordis vis æqualis eſt alti-*

tudini sanguinis in affixo canali. Adeoque ex cognita sanguinis altitudine in hoc canali, cognoscitur quoque vis cordis. Si ergo hæc esset infinita, liquor quoque ad infinitam altitudinem assurgeret; verum ut plurimum ad altitudinem sex pedum, raro ad octo pedes elevatur, si experimentum in animalibus instituitur, quibus non minor, quam nobis est cordis potentia: ergo *tota vis cordis in dictum ramum æqualis gravitati sanguinis in annexo canali*. Hæc autem vis per arteriam integram potuit continuare circulationem in ea parte; sed vis huic pressioni æqualis in alteram partem arteriæ abscissæ applicata ope siphonis, quam primum ac mortuum est animal, ne quidem valet injectum liquorem trajicere in sociam venam, quod tamen facile fiebat in animali vivente, ut olim docuit ars transfusoria. Sed debemus siphonis ope multo majorem potentiam exercere, ut ducatur liquor per arteriam injectus in venam; & ne tunc quidem subit istius partis minutissima vasa, nisi alterna simul conquassatio externa, quæ loco motus vitalis adhibetur.

Ex inæ-
quali mo-
tu in
quodam
ramo ar-
teriæ.

§. XLVI. Si hoc non satis evincit, quod forsan sentiat aliquis sanguinem in vasis concretis resistere, alterum est magis stringens ex inæquali circulatione quibusdam in partibus deducendum. Omnibus est notum quibusdam in morbis, si instat delirium, vel narium hæmorrhagia, sanguinem versus caput tendere majori impetu, ut oculi inde & nares rubeant faciesque inflata sit: ita in vulneribus arteriarum, si exspectamus hæmorrhagiæ recidivam, præmonemur pulsatione in parte tali antecedente; inde pulsationes in lumbis inter mensium futurum fluxum censentur, atque valemus quavis in parte solo stimulo accelerare circulationem, manente eadem in reliquo corpore. Datur ergo *in canali ramoso per eundem truncum ducente sanguinem, ut est aorta cum omnibus inde natis arteriis, motus in uno ramo celerior, quam in reliquis omnibus*. Nemo inficias ibit, si talis ramosus canalis sit immobilis vel æqualiter ubique elasticus, *hunc inæqualem fluxum produci non posse a generali causa premente, ut agit Cor in aortam*: derivaretur enim tunc per omnia emissaria liquor æquabiliter, si ad exitum nullam inveniatur resistantiam: si autem major ponatur ad exitum resistantia, retardabitur fluxus in eodem hoc ramo, sed intendetur ad latera canalis nixus. Si vero solita resistantia minuatur, celerius eo versus ruet liquor, sed minus urgebit ejus rami latera: ergo non possumus per ramum ex communi trunco venientem accelerare motum, quin debeamus minuere resistantiam, sed tunc simul minuitur nixus liquoris ad latera. Si vero velimus applicationem reddere fortiolem, major simul ponenda est resistantia. Quare nunquam velocitatem & applicationem majorem efficere possumus in singulari ramo, nisi per totum corpus id idem præstemus. Verum tale quid in nostro corpore observatur, pars enim irritata majori potentia ex aperta arteria ejicit sanguinem.

An ex
obstru-
ctione a-
licujus
rami ar-
teriæ.

§. XLVII. Non ignoro *ex obstructione alicujus rami nonnullos deducere hunc majorem impetum & velocitatem*: Sed si ponetur similis canalis arteriæ vel iners vel elasticus, impletus ex communi trunco, in quodam ejus ramo obstrui, manente eadem vi implente, 1. Tota velocitas simul sumpta minuetur, sunt enim velocitates ab æqualibus causis pressæ, ut sunt resistantiæ: sed quia in obturato ramo augetur resistantia, ergo tota velocitas erit minor. 2. Augebitur tamen velocitas per reliquos apertos canales, sed æqualiter per omnes: si enim ex communi fonte multa emissaria emittunt aquam, ex uno obturato, hoc vel istud emissarium non emittet aquam, rapidiore saltu, sed per omnia aperta emissaria simul, ut ita quantitas per oclusum emissarium suppleatur velocitate per reliqua aperta. Quum hoc in omni experimento verum inveniatur, siue trajiciatur liquor per canalem ramosum inertem vel elasticum, siue liquoris velocitas comparetur gravitate incumbentis aquæ, vel alia causa premente, perpetua & constanti naturæ lege cogimur fateri, *aliquid aliud in arteriis inveniri, producens hanc inæqualitatem & velociorem fluxum in unico dumtaxat ramo, quod non invenitur in ulla machina hydraulica, neque fieri potest in cadavere*. Hoc distinctum, quia obtinet quamdiu vivit animal, *ex motu vitali deducendum esse autumo.*

§. XLVIII.

§. XLVIII. Quare recurrendum ad arteriarum structuram: hæc nos docuit ar- *Arteria*
terias constare fibris circularibus: in his si possimus invenire Motum Vitalem, huic *motu vi-*
difficultati satisfactum erit, multaque alia ceteroquin obscura elucescent: primo *tali do-*
nata. *omnia requisita ad muscularem motum adsunt*, nisi quis dicat in minimis arteriis la-
certos carneos non inveniri, sed hoc superius demonstravimus nihil derogare, ad-
sunt enim *fibræ circulares*, quæ more omnium sphincterum angustare possunt arte-
riarum cavitatem; quare sanguis eo in spatio ab hac constrictione magis urgetur,
quam est actio premens cordis. Sunt etiam *fibræ longitudinales*, licet numero paucae
& exiles sint, tamen accurtando arteriam conantur curtiozem reddere: sed quia
talis actio parum conducit ad urgendum contentum liquorem, tam parvo numero
harum donatae sunt arteriae: has vero omnino denegare velle, ut nonnulli conten-
dunt ob exilitatem vel diaphanum colorem, nimis durum mihi videtur, cum
transverse dissecta arteria, retrahendo abscissa extrema, earum praesentiam &
contractilitatem omnino comprobet; hoc autem adscribere fibris circularibus, non
eget refutatione. *Adest etiam sanguis, uti in aliis musculis & nervis*, ex tunica
vasculosa seu nervosa ipsius arteriae. Aorta enim ex coronariis cordis copiosissimis
arteriis ornata est; sed in itinere & paulo magis a corde remota arteria, ex vi-
cinis arteriis minoribus admittit ramulos per tunicas majoris arteriae dispersos.
Hic uno verbo annotare debeo, *motum arteriarum ex impletione arteriolarum in suis* *An ab*
lateribus deduci non posse, etiam si hoc omnino arteriis coronariis congruere videa- *impletio-*
tur; tunc enim totus arteriarum tractus e coronariis in suis lateribus accipere de- *ne in va-*
beret arterias, quæ per omnes arteriarum tunicas dispergerentur, ut hæ impleren- *sis late-*
tur, dum a summa dilatatione arteriarum ad maximam constrictionem impleren- *ralibus.*
tur, quemadmodum tempore relaxationis cor ab iisdem arteriis in suis lateribus seu
substantia impletur. At vero anatomica demonstratione constat, diffitas arterias in
lateribus suis alias minores ex vicinis recipere, quæ eodem tempore cum ipsa ar-
teria majore intumescunt & concidunt. *Neque quidquam juvaret his minimis ar-*
teriis adscribere hunc motum, inquirendum enim restaret itidem harum causam mo-
ventem. Adeoque nihil aliud fuisset praestitum, quam ut nunc minimarum arte-
riolarum in lateribus majoris esset inquirenda causa alterna implens & evacuans,
loco ejusdem actionis in arteria majore. Facile quidem esset conceptu tale inve-
nire, si omnes arteriae in suis lateribus e coronariis vasa haberent, sed quia Ana-
tomia contraria docet, ex hac vasorum structura motus pulsationis deduci nequit.

§. XLIX. Qui nobiscum statuunt *Elasticitatem vocari reactionem in fibris illam*, *An ade-*
qua conantur in pristinum redire statum, inde ex causa externa deductis, quæque *lasticita-*
tam in viventibus, quam rebus mortuis, ut Chalybe, Ebore, Chordis & similibus *te.*
observatur agere; his consentire non possumus, si statuunt hanc causam circulatio-
nem per arterias continuare: qui vero elasticitatem confundunt cum vitali motu,
qui in solis viventibus observatur, aliasque leges motus tenet, quam corpora ela-
stica, his assentior, quum duas diversas res eodem nomine complectuntur: quare
lis esset de nomine, non verò de re diversa, quia isti quoque elasticitatis nomine
eundem intelligi volunt motum vitalem. Ut pateat ratio, ob quam rem *non ad-*
scribemus elasticitati proprie dictæ hunc motum, est primo, quod in solis venti-
bus sit, & elasticitas etiam in rebus mortuis; quare injectiones loco impulsio-
nis cordis ob remanentem elasticitatem eundem sortirentur effectum, quem naturalis
circulatio in viventibus, quod minime succedit. Alterum est, quod canales ex
membranis elasticis facti non faciunt liquores injectos majori velocitate pelli, quam
si essent ex metallo rigido fabricati, & quod ad propellendum liquorem per ejusdem
amplitudinis canalem rigidum non requiratur major vis pellens, ut eadem quan-
titas eodem temporis spatio transeat, quam per canalem quemvis elasticum. Inde
si ex corde æqualis in arteriam aortam fieret sanguinis propulsio, hæc ab arteria-
rum elasticitate non adjuvaretur: sed quia cordis alterna est impletio, inde im-
pul-

pulsione tempore augetur aortæ amplitudo, si rura ponatur elastica, sed temporibus intermediis inter duas impletiones, arteria contractilitate sua elastica angustatur, & hoc quoque tempore urgens contentum sanguinem continuabit ejus fluxum. *Sed vero omnis motus simul sumptus non erit major quam si canalis esset rigidus, hoc enim projectiones liquorum per canales rigidos & elasticos docent.*

Arteria-
rum pul-
sus elasti-
citate ex-
tingui-
tur.

§. L. Aliud autem quid ex canalium elasticitate potest deduci, quod scilicet motus inæqualis brevi tempore reddatur æqualis: Inde mechanici in Antliis ad ignem extinguendum excogitarunt vas aere elastico plenum; qui inæqualem Antliarum impressionem in se susciperet, ut ita aqua æquali fluxu ex emissario exiliret. Aut si sumatur vesica dilatabilis, quod magis congruit fabricæ & actioni cordis & arteriarum, huic vesicæ alteri parti alligetur emissarium siphonis vel antliæ, quæ alternis vicibus vesicam implet; alteri parti vero vesicæ addatur emissarium; ex eo multo minori inæqualitate saliet aqua, quam immittitur: si iterum hoc emissarium se exonerat in alteram vesicam, emissarium quoque alium habentem, hoc ultimum, ambabus vesicis aqua plenis, emittet aquam fere sine ulla inæqualitate, quia elasticitate vesicarum inæqualitas sublata est: quod autem in prima vesica non statim extinguatur inæqualitas impulsione antliæ, id defectui elasticitatis est adscribendum: nam si antequam cum una vesica instituatur experimentum, ea impleta ita sit aere, ut vas æneum in antlia ad incendia extinguenda, aer tunc in superiori vesicæ parte contentus sua elasticitate protinus omnem tollet inæqualitatem, ita ut aqua ex emissario parti inferiori vesicæ annexo effluat æquabili fluxu, etiam si alternis vicibus impleatur. Hoc ergo & similia experimenta destruere videntur totam pulsum theoriam, in quibus hucusque conati sumus alternam arteriarum constrictionem elasticitati adscribere; quippe vas elasticum ramosum, ut est arteria, alterne impletum sua elasticitate sola inæqualem exstingeret in ramis minoribus alternam dilatationem; &, quod contrarium hucusque positum est, quo majori elasticitate arteriæ sunt præditæ, eo citius periret inæqualitas motus. In his conquirere possemus, si animus esset aliorum refutare sententias, lectoremque relinquere dubium: sed quia magis conandum semper duxi, phænomena ex veris deducere principiis, ut promoveatur scientia, quam aliorum labores frustra habere, hæc & similia argumenta non refutandi animo adduxi, sed ut ex his ipsa veritas magis elucesceret. Si autem aliquis mavult receptam sententiam amplecti, & meam repudiare, mihi minime invisus erit: quam mihi metipso libertatem præscripsi, aliis quoque relinquo: nam non est opus, ut omnes eandem de eadem re foveamus sententiam, aut omnes curramus eandem viam, neque ita addictus meis, ut nollem aliorum magis probabilem amplecti sententiam.

Pulsus a
motu vi-
tali arte-
riæ.

§. LI. Ex iisdem his adductis experimentis clarissime patet, si conferantur cum arteriarum pulsu, *aliam causam, quam elasticitatem exigere, ut fiat in nobis pulsus, arterias.* Sed demonstratum est, *neque cor solum, neque elasticitatem vasorum, neque prementia corpora hunc motum in arteriis præstare posse;* verum arterias habere omnia requisita musculorum, atque perpetuo agitari, quam diu vita absque nutu nostro, inde nulla mihi occurrit a priori ratio, *cur fibris arteriarum motum vitalem denegarem.* Maxime cum a posteriori comprobatum invenimus, *arteriam apertam premere alterne immissum digitum, simili modo ut inditus digitus, mucrone abscisso, cordis cavo, alterne constringitur.* Hoc ut magis pateat, observanda sunt, quæ in parte irritata conspiciuntur, *major semper calor & motus hic excitatur, quam in corpore reliquo.* Nemo autem sana ratione contendet, ex legibus mechanicis in parte stimolata, tantum motum concitari posse: sed coactus erit confiteri motum hunc fieri majorem in parte stimolata ex natura motus vitalis: quippe si ex elasticitate deducatur, quæ etiam in cadavere residua est, idem ille motus major a stimulo quoque produceretur, quod experientiæ contrarium est. Inde sine ulla hæsitazione experimentis & rationibus confidens adstruet, maximam cau-

cau-

causam circulationis per arterias esse motui vitali earum adscribendam.

§. LII. Quomodo autem *motu vitali pulsus fiat* arteriarum, nullam obscuritatem *Quomodo involvit, modo talis actio concedatur arteriis uti cordi & ejus auriculis, atque si- ab irrita- tione pul- sus.* nui venæ cavæ, & pulmonaris venæ, in quibus lacertos etiam carneos detexerunt anatomici; hæ enim partes dimittuntur & constringuntur oppositis temporibus cum corde, & a nemine dictum fuit cordis actione sinus & auriculas quoque constringi, sed suo proprio motu vitali, quippe tunc eadem virtute constringuntur arteriæ, quando cor relaxatur, & quia hoc per totum corpus simul, hinc omni in parte continuatur pulsus, pulsui cordis respondens, *non quod solum cor præcipua sit hujus pulsus causa, sed alterna vitalis constrictio & dilatatio arteriarum.* Ex his nunc facile concipitur, quomodo in parte quadam, ubi nulla ob exilitatem & inde debiliorem arteriarum motum, *ab irritatione facta pulsatio percipitur;* motus enim vitalis ex minimo stimulo ingentem commotionem faciens, sensibilem in minima irritata arteria producit motum, qui non necesse est, ut per omnes reliquos ramos arteriarum & in ipso trunco dispergatur. Sin vero motus arteriarum auctus in quadam parte adscribendus esset cordi, necesse ergo foret, ut per omnes ramos simul talis fieret, ut superius demonstratum est.

§. LIII. Quum ex his satis constat *Arterias præprimis in suis fibris motu vitali* *Effectus commoveri,* multa ceteroquin obscura, conceptu facilia fiunt. Hic enim motus, in *motus majoris in ramo arteriæ.* quodam ramo validior factus, majori potentia urget contentum sanguinem; ita ut, si ex eo proveniant emissaria satis patentia, ipse sanguis exprimatur, uti in mensium fluxu ordinario, vel ex vulnere: quare earum partium pulsationes præcedere solent, indicantes majorem motum vitalem tali in ramo arteriarum. Imo *Cur hæc morbi- gias antecedit pulsatio.* ipsæ arteriæ lymphaticæ rubedine tinguntur, uti in inflammationibus; hæc quia dilatabilia, ex tali ramo nata, impetu majori sanguinis ab hoc ramo suscepto dilatantur eousque donec globulos sanguinis rubros concipiant. Non est ergo mirum *Cur a stimulo inflammatorio.* videre *Inflammatam partem a stimulo sine ulla obstructione arteriarum,* nisi quod globuli majores rubri in lateralia lymphatica arteriosa pulsi nequeant per eorum exiles extremitates ire: sed hoc in casu obstructio non est Inflammationis causa, verum motus vitalis in hac arteria major, qui eousque detrusit globulos: si enim compescatur ille motus, brevi post, retrogressis globulis in arterias iterum cruentas, evanescit rubedo. Inde quoque omnes partes a motu hoc validiori rubentes post inductam quietem pallent. Hæc quoque theoria docet, quomodo sanguinis missiones, omnesque evacuationes, quæ sine stimulo peraguntur, suos in curanda inflammatione præstant effectus: minuta enim subito cujusvis liquoris maxime sanguinis quantitas semper quoque minuit motum omnem vitalem, præprimis ea in parte, ubi evacuatur, eo autem minuto, minuitur deinceps inflammatio. Neque *Ubi vena secanda.* tot ambagibus quærendus est *venæ sectionis locus, ut aptissime educatur Inflammationis materies;* præstantissima fit educatio ex ipsa vel prope adjacentibus partibus, *An obstruens educatur per venæ sectionem.* ut ita prompte concitatus motus vitalis compescatur: nulla enim habenda ratio de materia phlogistica educenda obstructionem faciente, hæc quia non est istius partis inflammata causa, sed effectus. Si enim poneretur hanc materiem producere sua obstructione particularem Inflammationem, ratio dictitaret nos eam materiam intercipere debere, priusquam in talem veniat partem, atque eam evellendam esse, quæ stagnando inflammationem proritat. Verum hoc in casu primo eligenda esset ea vena, quæ sanguinem ex eodem trunculo cum ramo arteriæ inflammationis accipit, quod sine ullo successu majori hætenus institutum fuit. Et elicere velle materiem obstruentem impossibile est per venam apertam.

§. LIV. Hoc ut evidentius pateat, quidam fingendus est casus: sit *Pleuritis ve- An v. g. in pleuride educat causam.* ra ex membrana pleuræ inflammatione in latere dextro: ad morbum curandum aperiatur in ejusdem lateris brachio vena. Ergo educo sanguinem ex vena subclavia, quæ ex superiori trunco cavæ venæ oritur. Per hanc autem venam animus est obstruentem materiem in arteriis intercostalibus hærentem educere: inde ve-

nire nequit, nisi transeat per extremas earum arteriarum in socias venas intercostales, & ita in inferiorem venæ cavæ truncum; ergo antequam ad arteriam jugularem venit, quæ suppeditat venæ apertæ sanguinem, obambulare debet utrumque cordis ventriculum & pulmones; tandem vero cum reliqua massa sanguinis posset duci in arteriam jugularem, ut iret per factam in vena brachii plagam, superatis etiam omnibus angustiiis arteriarum brachii, antequam in hanc veniat venam. Quis autem crederet tale quid fieri? materia crassa obstruens arterias intercostales pergeret per angustissimos fines ejusdem arteriæ, quos obstruit; tranaret per minutissima pulmonis vasa; dein iterum per capillares arteriarum brachii in venam apertam. Potius credendum, si tam libere possit per hæc omnia vasa tranare, tempore eo, quo instituitur venæ sectio, hanc materiem in arteriis intercostalibus pleuræ nullam fecisse obstructionem, & eo tempore, licet transiret hæc omnia vasa, nimis sero tamen venire, nam totus hic circuitus longius infumeret tempus, quam venæ sectioni impenditur.

Lentor est
effectus
inflam-
mationis.

§. LV. Neque his omnibus concessis probabilis esset ratio, *sanguinis lentorem partis inflammatae duci ex vena*: ipso enim momento dum aperitur vena, si aliquamdiu Inflammatio persistit, sanguis primo exeuns crustam phlogisticam format: hæc ergo non potuit continere Inflammationis causam, quia præexistit in vena brachii. Alterum quod non minus urget, dum ducatur sanguis, si ponatur majorem impetum facere in arteriam obstructam, ut trajiciat obstruentem materiem in venam sociam, magis quoque augeret obstructionem, & altius impingeret; nam si alia causa, puta frictione, major impetus concilietur arteriæ obstructæ, neutiquam inde solvitur inflammatio, verum magis intenditur. Si autem a venæ sectione ponatur minui impetum a tergo urgentem, ut revera fit, recipietur quidem ex arteriis lymphaticis in cruentas, & ex minoribus cruentis in majores trunculos, verum exitus inde non patet; nam antequam in venam brachii veniat, omnes allegatas angustias debuit superare: ex quibus optimo jure concludi potest, *Venæ Sectionem non auferre ex parte Inflammata materiem obstruentem, sed compescere motum rapidiorem vitalem, quem statuimus causam Inflammationis*. Quod autem in hoc sanguine crusta phlogistica inveniatur, id minime demonstrat nos eduxisse causam obstructionis, quod fieri nequit, ut superius disputavimus, sed declarat *totam massam sanguinis majori motu vitali eousque inspissatam esse*, ut, quavis ex parte corporis ducatur sanguis, indicia lentoris exhibeat: *quæ si non appareant in acutis, non plane in principio; quia tunc non satis diu validior motus vitalis invaluit, ut potuerit sanguini inducere talem inspissationem, indicia præbent morbum acutum, vel ruborem & dolorem in parte, non ex Inflammatione, sed potius Erysipelate provenire, quod multa signa communia habet cum Inflammatione, sed nondum in sanguine lentorem producit.*

Quid
crusta
phlogisti-
ca signi-
ficet.

Qua vi
ducantur
humores
per visce-
ra.

§. LVI. Concesso Motu Vitali omnibus arteriis, vi argumentorum adductorum facile erit explicatu, *qua præprimis virtute per intricatissima vasa Viscerum ducitur sanguis*: hucusque physiologici contendunt id cordis pressione perfici; ego vero cordi nihil detraho, sed præprimis motui vitali arteriarum & fibrarum, ex quibus componitur viscus, adscribendum esse autumo. ut hoc pateat, circulationem sanguinis per *Hepar* delibabo.

Circula-
tio per
hepar.

§. LVII. Sanguis superatus angustias extremitatum arteriæ coeliacæ & mesentericarum, atque omnium ex his venientium, quæ chylopoieticis famulantur organis, per venas in his partibus dispersas corrivatur in sinum venæ portarum amplissimum ad *Hepar*: huic, si habuisset ex sola cordis vi propulsionis causam, certe nullus motus restaret, qui tamen sanguis per alteram ejusdem venæ portæ partem, quam ex usu *Arteriam portarum* appellare soleo, ad omnia hepatis puncta, in modum aliarum arteriarum, ducendus est. *Nulla est in tota vena portarum valvula*, quæ posset ad determinatum locum ducere sanguinem, si modo exter-

Venæ por-
tarum
circula-
tio.

ne

ne alternis vicibus premeretur, ut tale quid Motu Musculari in venæ cavæ ra- *circula-*
 mis perficitur valvulis donatis. Contentus ergo in vena portarum sanguis, amif- *tio.*
 fa omni vi pellente cordis, non posset duci per alteram venæ portarum partem
 arteriam dicendam. Si vero aliqua restaret pellens vis in hoc sanguine a corde
 recepta, impleretur tota portarum vena, & intumesceret, ubi minus suffulta est
 membrana: loquor cum iis, qui cordi & elasticitati vasorum circulationis causam
 adscribunt. Itaque ex *venæ portarum structura patet sanguinem nunquam intrare*
posse Hepar, quia ibi novum accipit vena portarum involucrum seu vaginam ab
 inventore *Capsulam Glissonii* dictam: hic ergo magis firmata vena portarum ma-
 jorem exerceret elasticitatem, & ita repelleret sanguinem. Alterum est quod san-
 guis ex ampliori sinu & vasis laxioribus corrivantibus fluere debet in sensim an-
 gustiores ramos, magis sua firma capsula firmatos: quare duabus his causis, si ul-
 tra nihil accederet, sanguis non posset duci per Hepar in venæ cavæ radices. Si
 advocemus *alternam respirationis prementem causam* æquali vi supra totam hanc ve-
 nam, valvulis quæ caret, agentem; hæc actio ergo æque resisteret influxui sangui-
 nis ex arteriis in hanc venam tempore compressionis, quam promoveret fluxum per
 Hepar: & quia tunc simul premuntur radices venæ cavæ in hepate, ita renuentes
 fluentem recipere sanguinem ex arteriæ portarum ramis in has radices, itaque, vel
 nulla vel tantilla restaret a respiratione vis ad propellendum sanguinem, ut haud
 credibile foret sanguinem posse duci per Hepar. Imo vero qui sedulo attendit ad
 structuram totius venæ portarum valvulis carentis, originem ducentis ex arteriis
 nullis itidem valvulis donatis, atque in Hepate magis firmatis, hæc inquam stru-
 ctura vasorum alterne pressa, æque reduceret contentum liquorem in arterias,
 quam in radices venarum, si non omnis inde pelleretur, quum altera pars in
 Hepate præpolleat elasticitate plurimarum fibrarum. Quibus itaque constat, nos
 non posse sana ratione statuere cordis vi pellente & vasorum elasticitate, etiamsi ac-
 cedat vis alterne premens respirationis, sanguinem duci per Hepar, quare coacti
 sumus aliam amplecti causam, quæ hunc facit perennare fluxum.

§. LVIII. Si vero *admittamus omnibus fibris motum vitalem*, excipiuntur for- *A fibris*
 san, ex quibus conficiuntur ossium lamellæ, multo clarior erit hujus circulationis *capsulæ*
 doctrina. Ut enim cera, vel quivis alius liquor in vena portarum injectus trajicia- *Glissonii.*
 tur, donec per radices venæ cavæ redeat Hepatis e cadavere desumpti, certe major
 propellens requiritur vis, quam est tota cordis vis agens in arterias omnes, hæc enim
 non superat pondo unius, nam experimenta docent ultra octo pedes non elevari in
 tubulo arteriæ annexo sanguinem, quum talis tubulus, cujus diameter æqualis est
 diametro arteriæ aortæ, non capit uncias sexdecim sanguinis, cujus tamen gravi-
 tas æqualis est viribus prementibus cordis. Verum si admittatur omnibus fibris vi-
 scerum & arteriarum motus vitalis æqualiter in iis omnibus agens, quod tuto fie-
 ri potest, actio ergo propellens augebitur cum copia fibrarum: quare viscera &
 vasa plures habentia fibras ad pellendos intus coercitos humores, majorem quo-
 que exercent vim. Hinc nunc patet cur vagina seu *capsula Glissonii data est ar-*
teriæ portarum, ut fibris suis copiosioribus motu vitali instructis duceret sanguinem
ex sinu venæ portæ per Hepar, quod a causis præcedentibus fieri non potuit.

§. LIX. Quia vero hic loci omnium maximus requirebatur motus vitalis, & *Hepatis*
 minimus vero ex contractilitate agens, *Hepatis vasa*, quod non ita in aliis obser- *vasa non*
 vatur visceribus, etiamsi evacuata sunt, *non collabuntur, aut contractilitate vel ela-* *collabun-*
sticitate constringuntur: hoc autem si fieret, attollenda forent ab interna implen- *tur.*
 te causa, quæ in vena portarum debilissima est. Hinc *arteria portarum constrictio-*
ne vitali si propulserit sanguinem, ex propria sua fabrica aperitur, & ita quasi trahit
 sanguinem, concesso spatio, in se minus compresso, ex inferiori venæ portæ ra-
 mo, eumque ducit per hepar in radices venæ cavæ, facta bilis secretionem.

§. LX. Ad hanc comprobendam circulationem solummodo restat adstruere fi- *Partes al-*
 bras *bicantes*

vasculo-
sæ.
Fibræ vi-
scerum
motu vi-
tali dona-
tæ.

bras viscerum & vasorum Motu Vitali agitari: quippe hoc si verum sit, copia fibra-
rum major in arteria portarum promovebit circulationem per Hepar, ut inde quo-
que cognoscamus, cur huic arteriæ nova vagina data sit: Quia vero color albus,
ut dictum est, fibris non derogat motum, sed quia in his fibris nullas detexerunt
cavitates anatomici, quæ tamen ad motum requiruntur, hoc motui huic maxime
obstare videtur. Si concedatur fibras ligamentosas, uti vocant, nulla cavitate præ-
ditas esse secundum anatomicos, multa sane absurda inde profluerent. Nonne Ruy-
schius & alii in Hepatis ligamento lato & lateralibus, atque rotundo, ex vena
umbilicali post nativitatem concreta facta, quæ olim pro meris ligamentis sine ulla
vasorum structura sunt habita, detexere artificiosis injectionibus arteriis scatere?
Item aliis quoque in partibus membranosis & ligamentosis hodierna anatomica in-
dustria & sedulitas vasa detegit, quæ latuere seniores anatomicos: quare non ita
confidere possumus partes vasis destitutas ab anatomicis pronunciatas, eas revera
tales esse: quum vascula tenuissima liquore pellucido plena, vel & inanita dein-
ceps transverse conspecta, etiamsi satis amplas contineant cavitates, nullum earum
præbeant indicium. Quam ergo rem relinquit dubiam anatomica inventio, eam ra-
tionibus ulterius persequi licitum est. Si enim ponatur, omnem partem, in qua
dissectio anatomica nulla detexit vasa, iis carere, rogare merito jure possumus, quo-
modo hæc creata sunt, & an nutriantur vel nullo egeant nutrimento. Qui admit-
tit incrementum, simul quoque tali in parte admittit vasa, quum incrementum de-
beatur affluentibus liquoribus, suis propriis vasis coarctis; nunquam enim in nobis,
uti lapides per externam incrustationem, increfcit, sed ab allatis per vasa liquori-
bus: quia vero hæc pars omni in puncto increvit, per totam substantiam quoque
crescendi tempore vasa habuit. Hæc quidem fateor abire posse in corpora densa
& intus nullis cavitatulis donata, verum quam diu vita, hæc quoque partes sunt
nutriendæ, hoc est omni in parte, uti dictum est in incremento, renovandus est
nutriens humor, nisi statuamus ligamenta nihil humoris corruptibilis in se conti-
nere: hoc autem nos contrarium doceret talis pars si exsiccetur, multum amittet
de pondere, qui liquor, in porulis suis vel vasis hærens, exhalaverit. Hinc ratio-
nibus patet omnes partes in nostro corpore, tam ligamentosas, quam membrana-
ceas, multis cavitatibus pervias esse, liquorem nutritivum transmittentibus; quod
autem non detegantur oculo, id tenuitati & pelluciditati adscribendum. Ex qui-
bus itaque patet *soliditatem membranarum nihil derogare motui vitali*, qui vascula
exigit cava, quum hæ partes dictæ solidæ etiam vasculosæ sint.

Calor &
frigus vi-
scerum.

§. LXI. Si ulterius viscerum examinemus morbos, hi certo indicio adstruent
fibras & vasa viscerum motu vitali donatas esse; ex multis eligamus *Frigoris*, &
Caloris perceptionem in visceribus. Quam diu sanitas, neque caloris, neque fri-
goris perceptio ulla, sed, si motu vitali cujusdam visceris arteria validius agita-
tur, ingens caloris perceptio; si autem languidior est in visceribus motus vitalis,
statim quoque frigus percipitur. Calorem vero naturalem in nobis ab attritu par-
tium solidarum supra se invicem provenire, qui fit a motu vitali, in *Compendio*
Nostro Titulo Caloris comprobavimus: hujus autem motus defectum frigus excita-
re ex eodem intelligitur. Sed quia istud in unica dumtaxat fieri potest parte in-
tactis reliquis, hoc phænomenon actioni cordis, aut generali influxui sanguinis
adscribi nequit, sed speciali motui vitali istius partis. His ergo puto satis com-
probatum esse, *liquores præprimis moveri per arterias omnes & viscera motu vitali*
fibrarum, tam arteriarum, quam viscerum. Quem motum iterum excitari statui-
mus ab influxu spirituum vitalium in cerebello secretorum.

Cur per-
git mo-
tus abla-
to cere-
bello?

§. LXII. Huic tamen sententiæ videtur obstare, ablato cerebello, vel ligato ner-
vo, omnem spirituum influxum intercipientem, pergere partes vitali motu commoveri
aliquamdiu; ita intestina corpori exempta vermiculari motu agitantur. Verum qui
considerat nervorum involucra multis constare fibris, non solum motu vitali, verum

et-

etiam contractilitate donatis, facile poterit hoc extricare. Capsulæ nervorum ex dura piaque matre provenientes, arteriis venis & fibris constantes, ex communi lege motu vitali moventur: quod necessarium videtur, *ut spiritus a cerebello secreti per fibras nervosas exilissimas fluentes, blanda hac constrictione propellerentur, æquabili motu, usque ad organum, ubi motum vitalem exercere debent spiritus vitales*: inde forsan diffitis nervis ganglia multa concessa sunt, novas recipientia arterias & fibras nervosas in suis involucris, & dimittentia venas, ne longitudine viarum spiritus vitales per canaliculos exilissimos, in quibus ob multitudinem laterum tangentium ad contentum liquorem, fluentes, tandem plane subsisterent ante quam ad longe distantiam partem motu quoque vitali commovendam venirent: alterna enim constrictione vaginæ nervi & lacertorum in tunicis gangliorum hic continuatur spirituum fluxus per proprias suas fibras, capsula hac coercitas, & alterne compressas.

Motu vitali capsulæ nervi.

§. LXIII. Præter vero hunc motum, fibræ in involucris nervorum non carent elasticitate seu contractilitate; quando ergo ligetur nervus vitalis, vel auferatur cerebellum, moritur quidem animal, cessatque inde nova infusio spirituum vitalium in fibras nervosas motui vitali destinatas: verum hæ fibræ seu canaliculi protinus non destituti sunt suis spiritibus, sed iis hoc tempore adhuc turgent, inter partem ligatam nervi & organum vitale: hinc elasticitas seu contractilitas fibrarum in capsulis, quæ non exstinguitur cum morte animalis, vel cum ligato nervo, urget intus contentas fibras spiritibus plenas versus organum vitale, ut continuetur horum spirituum fluxus, tam diu ac in istis fibris quædam restat copia. Sive ergo in naturali fluxu e cerebello usque ad organum in aperto nervo fluant spiritus, uti in viventibus sanis, sive ab hac contractilitate contenti in fibris pellantur spiritus, *organum vitale pergere potest moveri tam diu, donec omnes spiritus ex fibris ligatis versus organum vitale deducti fuerint*: vel donec contractilitas capsularum non amplius valet hos contentos propellere spiritus. Quia supra demonstratum est organum vitale tali modo esse fabricatum, ut ab influxu æquabili spirituum alterne constringatur, hinc quoque eam deduximus causam motus vitalis alterni, neque in cerebello, neque ejus involucris, neque in ipso nervo, neque in alterno spirituum fluxu, esse quærendam, sed fieri debere ex ipsa organi vitalis fabrica, quæ ab æquali influxu spirituum alterne constringitur & dimittitur.

Elasticitate capsulæ.

§. LXIV. Hæ eadem doctrina contractilitatis non minus potest in arteriis: hæ enim quoque & motu vitali & contractilitate angustantur, dilatantur vero ab im-
 plente sanguine. Si ergo ut in syncope plane cessat omnis motus vitalis, *restans contractilitas valet novum motum excitare*. Quia arteriæ fortioribus lacertis & copiosioribus ornatae quam venæ, atque quamdiu continuatur sanguinis impulsio e corde, magis distentæ, inde in syncope, cessante motu vitali, arteriæ contractilitate sua sanguinem urgentes, qui in cor, ob valvulas cohibentes, refluere nequit, eum itaque pro parte urgent versus extrema atque cerebellum: ex qua tunc massa sanguinis contractilitate nunc artetiarum eo pulsa novi secernuntur spiritus vitales: quibus accedit tunicarum nervorum contractilitas, pellens quoque in organum vitale contentos spiritus; atque ex duplici hac causa tandem syncopiticus quasi reviviscit.

Arteriæ Elasticæ.

Ex syncope reviviscere.

§. LXV. Quibus intellectis commode exponitur phænomenon, quod multos in admiratione abripuit, quod scilicet *in cadaveribus inveniamus venas plenas, arterias vero vacuas*: nam in viventi animali, quia continua impulsione cordis impleantur arteriæ, per quarum extremitates ob angustiam, sanguis majori cum resistentia transit: venæ autem paucioribus lacertis instructæ, facilem exitum in ventriculum cordis dextrum habentes, multo minus distentæ sunt: hoc quoque docet sanguinis eruptio; multo enim majori impetu ex arteria quam vena aperta ruit sanguis: quare arteriarum latera quamdiu vivimus, multo magis sunt tensa, quam venarum. Post mortem autem, cessante motu vitali omni, nihil amplius cor mittit sanguinis in arteriam, sed hæc per anastomoses communicans venis, tam diu per

Cur venæ plene, arteriæ vacue in cadavere.

has ducit sanguinem, donec vis contractilitatis arteriarum & venarum æqualis fiat. Antequam hoc obtinetur, quia arteria fortissime distenta erat, multis lacertis instructa, vena vero laxa & paucis fibris firmata, vena debet quam maxime turgere, & arteria angustari, ut reddatur inter arteriæ & venæ contractilitatis æquilibrium. Ergo a morte turgent venæ, & arteriæ fere inanes inveniuntur, quod sine motu vitali & contractilitate horum vasorum exponi non potuit.

*Venæ
motu vi-
tali do-
natæ.*

*Lymphaticorum
motus vi-
talis.*

§. LXVI. Si in *Venis* quoque ut arteriis & nervis motum vitalem adstruere valeamus, omnia tunc vasa per totum corpus motu vitali moventur: in venis autem majoribus, præprimis circa cor, ne quidem fibras motrices, sed & veros lacertos rubros detexit hodierna anatomica industria, qui in minoribus venis ob vasorum angustiam globulos rubros non admittentibus, pallent: constant enim venæ ex eodem quoque genere fibrarum, sed paucioribus, quam arteriæ, motu vitali & contractilitate donatis: neque *Venæ Lymphaticæ*, quamvis pellucidæ, ex tenuissimis membranis conflatae, hoc motu privantur: si enim ligetur tale vas etiam post mortem sub ligatura, hoc est versus ramosum principium, intumescit, detumescit supra ligaturam. Hoc artificio multa detexerunt lymphatica, quæ alias latuissent: motu enim vitali, aliquantulum a morte in fibris restans, ducit ex tenerrimis lymphaticorum ramulis laticem versus truncum arte compressum, atque ita omnes rami lymphaticorum in hunc trunculum corrivantes latice turgent.

*Lacteorum
motus vi-
talis.*

§. LXVII. Neque *Lactea Vasa* huic famulari experimento denegant, quia compresso ductu thoracico, in bene pasto animali sensim magis liquore lacteo turgere incipiunt, indeque eorum in visibilibus principiis ex intestinis originem commonstrant; horum autem orificia, vel quia nimis exilia, vel quia oblique, ut uteretur in vesicam, vel ductum pancreaticum in cava intestinorum, hiant, omnino oculos latuere, ea vero ex intestinis haurire chylum nullus dubitat.

*Intestinorum
motus.*

§. LXVIII. Ductu lacteorum ad *Intestina* devenimus, ut paucis quoque horum perscrutemur actionem. Constant, uti de arteriis & venis dictum est, ex variis membranarum generibus, de quibus anatomici consulendi. Ex quibus confirmatur tunicam muscularem dictam ex fibris circularibus & longitudinalibus constantem, ab utraque facie tegi membrana cellulosa, ut liber esset villorum motus in musculari tunica; atque tunicam eorum glandulosam vel vasculosam cavam partem tunicæ muscularis occupare, ordine contrario quam in arteriis, in quibus hæc tunica convexam faciem tunicæ muscularis ambit. Ex hac autem deducere velle glandulas suis emissariis posse in cavum intestinorum fundere secretum humorem, sed tale quid in arteriis inde fieri non posse, nulla mihi probabilis videtur ratio, quasi non possent glandularum emissaria, per interstitia fibrarum muscularium ire, quod tamen in ductu choledocho, & pancreatico in intestina, ureterum in vesicam, ductus salivæ ex parotide per buccinatorem muscolum in os, contrarium docet; atque lacteorum origo ex intestinis; necesse enim est hæc transeant totum intestinorum latus, ut receptum chylum ex intestinorum cavo in lactea vasa mesenterii ferant.

*Quomodo
Chylum
propellis.*

§. LXIX. Non est disputandum de *fibris intestinorum*, quæ peristaltice moventur, non solum visibiliter in viventis animalis ventre aperto, sed etiam aliquandiu post mortem, postquam exempta fuere viscera, an motum vitalem obtineant; unusquisque enim hoc admittet, tam intestinis, quam ventriculo: verum est operæ pretium mente assequi, *qualem hic in chylum pellendum exerceant vim*. Maxime recepta est sententia, constrictione fibrarum chylum urgeri in vasa lactea; sed vero si similis pressio, vel etiam major adhibeatur, urgens internam intestinorum superficiem mortui animalis, ne gutta liquoris intrabit lactea; quare neque absorptioni vasorum lacteorum; neque pressioni elasticitatis fibrarum; neque motui vitali, quatenus comprimeret in cavo contentum liquorem, adscribenda est propulsio chyli in vasa lactea; hæc enim omnia si maneant, vel arte imitentur, cum motum non producant in chylo. Verum motus vitalis in intestinis certo modo

agens.

agens hoc præstat. Hunc autem introitum adjuvari, si simul operatur motus vitalis, contractilitate fibrarum, & natura absorptionis vasorum, omnino concedendum & tenendum. Quare videndum, quid faciat motus vitalis in fibris circularibus & longitudinalibus, ut inde recipiatur chylus, & reliquæ adjunctæ causæ examinandæ, quæ adjuvare possunt chyli motum. Ex motu muscutorum tam vitalium quam animalium scimus, tempore constrictionis, ventres eorum intumescere & indurari, tendines vero gracilescere & elongari: hoc itaque tempore, multæ fibræ musculares serie laterali, uti fibræ circulares intestinorum, locatæ, loca inter ventres comprimunt, sed spatiosa inter tendines ampliant; quæ ergo locata sunt oscula inter ventres comprimuntur, vascula eorum osculorum, si liquorem habuerint, eum ad loca minus pressa ducunt, seu fertur hic liquor ex osculis & vasculis his extra peripheriam intestinorum in lactea mesenterii: oscula autem inter tendines aucto ibidem spatio dilatantur, atque patent ingredientibus liquoribus in cavo intestinorum contentis: adjuvatur vero hoc tempore ingressus compressione fibrarum circularium supra contentum liquorem, atque insita vi attractili vasculorum minimorum inanitorum. Ergo hoc tempore principia lacteorum & eorum orificia plena sunt inter fibrarum tendines; sed compressa & evacuata inter fibrarum ventres. Si hic perduraret status ulterius non duceretur chylus per lactea, & nihil novi ex cavo intestinorum reciperetur, simili fere modo uti sanguis per pulmones non transit in quovis positos statu. Sed vero brevi post ex motu vitali dimittuntur fibræ contractæ, quando ventres relaxantur & minus tument, tendines autem incrassescunt & accurtantur: in hoc itaque statu oscula lacteorum, & eorum principia inter tendines, comprimuntur, minuitur enim inter hos spatium, atque inde receptus in vasculis his liquor versus lactea ducitur, uti in opposito statu disputavimus de vasculis inter muscutorum ventres: in eodem hoc tempore relaxationis oscula inter ventres compressa relaxantur, aperiuntur & dilatantur; sed quia ob crebras valvulas in vasis lacteis semel receptus liquor regurgitare nequit, hæc oscula redduntur iterum inania, & ita ex intestinis recipiunt liquorem, sequenti opposito statu propellendum. Hoc ergo alterno motu vitali recipitur chylus & propellitur, aperiuntur lactea & clauduntur, quare eo deficiente, nulla fieri possit chyli receptio. Quibus animadversis facile est conceptu, homines frigiditate intestinorum, id est debiliore motu vitali in intestinis, laborantes, copiosiora deponere debere excrementa, quia absorptio in his languidior.

§. LXX. Contenti huc usque fuimus *circulationem per pulmones ex respirationis Pulmo- actione deducere*, tanquam esset sufficiens causa ad trajiciendum sanguinem: non inficior respirationem alternam requiri, sed inde non negandum puto pulmones *num motus vitalis.* motu vitali donatos esse, quum sæpe duæ, pluresve causæ concurrant, ut una fiat ex combinatis causis functio: quale in motu muscutorum passim occurrit, quum raro musculus unicus, qui membrum movet. Si contemplerur pulmones vivi animalis in pectore aperto, non omnino quietus jacet, quod tamen fieri debuisset, si sola pulmonis operatio esset passiva, dependens a majori & minori pectoris dilatatione: imo vulnera testantur pectoris, portionem pulmonis per ea trusam fuisse. Neque pulmonum fabrica abhorret motum vitalem adstruere, quum tunica interior bronchiorum multis lacertis quoque instructa sit, arteriis venis & nervis, uti aliæ partes musculares, donata. Si adducere liceret morbos, ut probent functionem partis, quod sæpe multum lucis præbuit, hi certe motum vitalem in pulmonibus probarent a respiratione vitali distinguendum. Ita *Asthmaticis explicatio.* Asthmatici, etiamsi animali respiratione conantur animam ducere, multoque majorem vim adhibent, quam in vitali respiratione fieri consuevit, percipiunt tamen per pulmones difficilem sanguinis trajectum, ut inde tota sæpe facies liveat. Si vero ad trajiciendum sanguinem per pulmones sufficeret aeris sola attractio &eductio sufficiens, una alterave majori respiratione animali liberarentur

tur ab omni anxietate; sed vero persistat pectoris oppressio, quamvis frequentissime & profundissime motu animali respiraverint: imo percipiunt quasi impedimentum, quo vix possunt sufficientem aeris quantitatem adducere. Ne quis putet horum vesiculas & bronchia liquore impleta esse, consulere debet cadavera eorum, in quibus nihil sæpe liquoris in his partibus detegitur, qui asthmatici perierunt: hunc autem motum vitalem in bronchiis ad facilitandam respirationem & in vasis pulmonaribus ad promovendam per pulmones circulationem maxime conducere arbitror.

Ossium
motus.

§. LXXI. Quod hucusque variis in corporis partibus consecuti sumus, id quoque aliis partibus facile posset applicari, sed hæc pauca reor sufficere ad probandum omnibus in partibus esse motum vitalem, eumque multa præstare, quæ perperam aliis rebus adscripta sunt. Quia vero aliquis putaret ossa ob duritiem eo carere, pauca adjicere statui. Qualis ossium est structura & vasorum per ea cursus, nuper in *Chirurgia* nostra exposuimus: ex qua descriptione constat multa vasa sanguinea arteriosa ex periosteio provenientia, ossis substantiam permeare, pauca vero peculiari foramine ossi insculpto intrare: venas simili modo ex ossis substantia emergere, sanguinem corrivare in periosteii venas; in concursu horum vasorum ex arteriarum extremis deponi medullam oleosam, quæ peculiari cellulosa sua membrana coarctata, vel una cum venali sanguine, vel per poros manifestos circa ossium capita seu articulos transfudare, ad facilitandum articulorum motum. Si nunc quis serio perpendat tot vasorum mæandros, & medullæ labyrinthum, facile confitetur, liquores omnes has resistantias superare non posse exiguo tali impetu, qualis in arteriis periosteii observatur, sed adjuvari debere motu vitali ipsius ossis & membranarum medullæ: inde non incongruum est partem videre ossis mortuam, si alicubi motu vitali privetur, ut frequens videre est in durissimis arborum truncis: equidem si injectio institueretur in arteria periosteii ossis, ex aliquo cadavere desumpti, tanta vi vel majori, quæ ab tali arteria in vivo animali exercetur, neutiquam injectus liquor omnes permearet omnium illorum vasorum mæandros.

Motus
vitalis a
quibus
differt.

§. LXXII. Quum hic *motus vitalis* omnibus in his partibus imperio mentis non obtemperet, ab animali ergo distinctus; & una cum vita in animalibus vel paulo post cessat, cujus ratio tradita est, ab elasticitate & contractione distinctus sit, inde non necesse est, ut quoque iisdem legibus circumscribatur, etsi quasdam proprietates obtineat: non erit itaque inutile nonnullas speciales operationes ejus delibare, plures alius in eo forsan detegat, eum si accuratissime perscrutetur.

Motus
vitalis
arteria-
rum cum
corde con-
sensus.

§. LXXIII. *Motus omnium arteriarum vitalis certam affinitatem cum corde habet*, ut semper crebriori & tardiori cordis agitationi respondeat, est enim semper omni in corporis parte arteriarum pulsus *σύγχρονος* contractioni cordis: verum valor constrictionis non ubique æqualis semper; si enim quadam in parte vellicetur arteria fortius, non vero frequentius arteria istius partis commovetur: quod perceptibiliores vibrationes faciat, sine ulla in corde vel reliquis arteriis mutatione, docet pulsus in variis corporis partibus exploratus. Si autem diu durat, vel pars sit major, tandem quoque & cor & reliquæ arteriæ validius agitantur. Verum si cor vel truncus arteriæ majori vigore constringi incipit, reliqui quoque rami eandem subeunt mutationem.

Turba-
tur ani-
mi pa-
thematē.

§. LXXIV. Nullum dixi mentem nostram in motu vitali exercere dominium, quandoque tamen in animi pathematibus, ira, profuso gaudio, terrore, timore aliisque, miris modis perturbatur hic *motus vitalis*, tam in corde & arteriis, quam in visceribus cunctis, ut miremur sæpe, tot tumultus, contorsiones, pulsus incitados & perturbatos ex animi affectu produci posse in locis, ubi alias nullam motus mutationem excitare valemus voluntate nostra; ita quidem ut aliquis putaret mentem nostram quoque agere in motum vitalem: verum si serio perpendimus nos sanos nulla voluntate tale quid efficere posse, facile concipitur in mentis commotione validiore motum vitalem turbari ex alia qua-
dam

dam causa. Quantum mentis acie attingere valeam, sentirem in animi pathematibus, quando impetuose per fibras nervorum ad sensum & motum animale destinatas, ferantur spiritus, *ab hoc impetu majori, adjacentes quoque fibras nervosas vitales ejusdem nervi commoveri*, (omnia enim hæc genera fibrarum nervosarum eodem sæpe involucro nervi coercentur,) atque ita quasi ex consensu vel vicinitate istis in partibus vitalibus quibus hæ fibræ vitales prospiciunt, ab adjacentibus fibris animalibus, motum fieri turbatum, majorem vel minorem, prout mutatio inducta est fibris vitalibus a vicinis animalibus.

§. LXXV. Observamus quoque semper *cum validiori animali motu, vitalem quoque intendi*: an vero hoc etiam ex mentis voluntate dependeat dubitarem. Malem hoc ex majori sanguinis propulsione deducere, quæ alterna musculorum animalium constrictione & relaxatione promovetur; unde ad cor copiosior deductus sanguis, istud frequentius constringi & majori potentia, facit: alias enim dicerem respirationem quoque ab eadem causa provenire. Sed ita est cor & respirationis organum constitutum, quod semper ex majori sanguinis copia eo delata, majores & crebriores faciant motus, ut inde copia sanguinis major per pulmones & cor trajiciatur. Hæc convenientia ob quendam videtur nata usum, quia in motu musculari celerius ex arteriis in venas ducitur sanguis: si ergo tunc simul non impleretur magis arteria, omnis sanguis colligeretur in venis, defectus esset in arteriis ad implendas fibras longitudinales musculorum, quare defectus brevi haberetur motus. Atque, quia hoc tempore animi voluntate plures consumuntur spiritus, eodem quoque tempore copiosiori sanguinis derivatione eget cerebrum, ut novos ex allato sanguine secernat.

§. LXXVI. Videtur eodem modo, ut animalis motus, obtemperare stimulo; nam etiam si ab imperio nostro dependeat hic motus, a stimulo tamen contra nostram voluntatem constringuntur muscoli motus animalis: hoc in omni genere convulsionis patet, & reluctante animo tamen fiunt: nemo enim post illapsum pulvisculum in oculo palpebras apertas fervare potest; & omnes insipientes solem oculos claudere debent. Laryngis titillatio omnes intendit musculos animales tussi famulantes. Neque nauseosus constrictionem musculorum ventris cohibere potest, ne vomat; aut ventris compressionem impedire tenesmo laborans. Hoc non miramur observare, sed similia si proferantur in motu vitali, paradoxum videtur; miras enim in ventre ex acrimonia vellicante percipere commotiones motus vitalis viscerum incantamenti adscribitur. Motus & caloris quoque productio in quadam parte ex applicato epispastico mira videtur, nisi quum hujus phænomeni tradetur causa. Videtur autem mihi, tam vitalem, quam animale motum a vellicantibus miris modis turbari posse. Magnum vero in his videtur latere arcanum; scilicet quomodo stimulus potest talem motum multo majorem, quam in corporibus elasticis fieri potest, excitare? quod mysterium si possit explicari, putant doctrinam motus vitalis nullius momenti habendam. Ego vero fateor, me in hoc, uti in motu animali, quam ob rem is quoque stimulo obtemperat & voluntati mentis nostræ, quam maxime cœcutire: sentio tamen ex ignorantia horum totam doctrinam motus vitalis non esse inutilem, ceteroquin cuncta hæc, quia fruuntur eodem jure, rejicienda forent, nos scilicet nullum dominium exercere in motum animale, quia explicari nequit, quo modo anima nostra in hoc motu operatur. Videtur mihi potius motum animale & vitalem tali lege creatum esse, ut, si quid noxium, quale est stimulus, applicatur his partibus, insita vis quasi conspirans conetur istud excutere. Si vero opprimatur motus vitalis, subsistit veluti, & nobis anxietatis perceptionem exhibet. Hoc præprimis in morbis detegitur, vel quando ingruit febris, vel quando acre in extremis dolores excitans intropellatur, ut nervos motui vitali destinatos obsideat, loco doloris summæ sæpe anxietates, quæ tunc relevantur, quando materia inde priora loca externa petit: non est ergo mirandum *anxietatem præ dolore majorem incutere timorem*, quum affectio-

*A stimu-
lo inter-
no.*

fectionem motus vitalis indicet, cujus interitu homo quoque moritur.

§. LXXVII. Quum *stimulus externus* motum hunc turbare valeat, *idem quoque internus præstabit*. Si enim mucilaginosus humor interna obliniens arteriarum latera, ne a perpetuo sanguinis transfluxu detererentur, secretus in propriis arteriarum glandulis, vel extremis arteriolarum in lateribus arteriæ majoris, ad internam cavam arteriæ superficiem effusus, fidem facit immissus digitus mucilagine hac obductus si extrahatur. Hic inquam humor per omnes vel multas arterias simul acrimonia stimulante infectus, totam circulationem sanguinis concitabit: quæ si validissima fiat ex tali causa, Febris vocabitur *Ardens*, seu *Inflammatoria*: si vero in singulari dumtaxat ramo operatur, istius partis arteria magis agitata producet particularem *Inflammationem* ex causa interna productam. Plura potuissent ex motu hoc vitali deduci, at speciminis limites excederent, quare his impono *Finem*.

EXERCITATIO MEDICA SECUNDA.

DE SOMNO ET VIGILIA.

*Rerum
vicissitu-
do.*

§. I. **V**idetur omnibus in rebus Summum Creatorem alternam actionem & quietem creare voluisse, quod, etiam si hujus necessitas hominibus parum perspecta, tam constans & inevitabile observatur, ut eo deficiente multa corruant: inter has mutationes nonnulla perpetuas sequuntur leges, nihilque ab iis recedunt, uti solis lunæque ortus & occasus phasæque variæ; alia autem minus constantia deteguntur, ut breviori longiorive temporis intervallo se invicem excipiant, pauloque magis prolongari patiantur; verum omnino intermitteri nequeant. In his motus & quietis, atque *Somni & Vigiliæ* vicissitudo excellit: Quamobrem qui dubius est, an aliqua in hac variatione sit ponenda necessitas, multis quoque in rebus hallucinabitur, non animadvertens finem creationis plerumque homines latere. Quare multa, quæ nobis videntur frustra, sæpe ob summum usum sunt nata, quem non nisi fero ex defectu perspicere datum est; vel postquam multa in hac re facta sunt experimenta, naturam hujus vicissitudinis revelantia, quam si detexerint, demum summam Dei in ea mirantur providentiam.

*Somnus
& vigi-
lia seor-
sim exa-
minan-
da.*

§. II. Priusquam vero hujus vicissitudinis usus in Somno & Vigilia pateat, duplex hic status separatim est examinandus, deinceps quid alter alteri tribuit: Sed quia utrumque in secunda & adversa valetudine occurrit, ad Morborum examen his paucis complecti nequit, ea proponemus præcipue, quæ in sanis & valetudinariis deteguntur, pauca vero, quæ in ægrotis observantur.

*Defini-
tionis
proprie-
tas.*

§. III. Vigiliæ primo tradenda est definitio, quum ad Somnum definiendum quam plurimum facit absentia eorum, quæ in Vigilia manifesta sunt: quæ quamvis notissima omnibus, multo tamen facilius mente quam verbis concipi potest. Ad definiendum enim tot notiones, quæ a quovis perspicui possunt, sunt citandæ, ut quoties conjunctæ proferantur, nulla sit alia res præter definitam, cui hæ omnes notiones competunt: debentque ab ignotis intelligi posse, quum ex incognitis rebus cognitio rei deduci nequeat: atque cavendum, ne plura congerantur, quam res definienda exigit; præstantius tamen est uti abundantia, quæ a lectore abjici potest, quam ut defectu notionum laboremus, qui, ab ignoto cum suppleri nequeat, totam sæpe rem vel obscuram, vel incognitam relinquit.

§. IV. Quum Vigilia tam in morbo quam sanitate est definienda, ex istis est cognoscenda notionibus, quæ in utroque statu observantur. In sanis autem, quorum motus animalis omnis exercetur vel exerceri potest ex voluntate, sensusque externi & interni prompti ad percipiendum, si vero in ægroto defectu organi, vel

vel ex alia mala causa, hæc omnia vel non fiunt, vel non fieri possunt, dum modo multa adsunt, talis homo præsumitur vigilare.

§. V. Ex absentia aut minori promptitudine horum in sanis, quia judicamus hominem dormire, differentia itaque Vigiliæ & Somni in iis quærenda, quæ sensum & motum animale in nobis faciunt perennare. Sensum vero & motum exerceri a spiritibus in cerebro secretis, per nervos delatis, alibi demonstravimus: atque tunc fieri motum animale, si paulo majori velocitate spiritus ferantur e cerebro per nervos ad nonnullos musculos; & tunc fieri sensum, si a causa vel externa vel interna perturbetur æquabilis spirituum fluxus a cerebro per nervum sensui dicatum.

§. VI. In vigilanti itaque homine, non solum requiritur æquabilis spirituum per nervos sensus & motus fluxus, quem credimus quoque fieri in Somno, ut & in nervis motorii si homo quiescat; sed & videtur in vigilantibus abundare spiritus, ut data occasione majori copia ferri posset ad motum muscularem præstandum: aut si velimus attentius exercere, organum nervos magis implere; quemadmodum promptius & accuratius percipimus sensum si attendamus, quam dum nihil de ea sensatione cogitemus, vel aliis rebus intenti simus.

§. VII. Hæc dum fiunt in nobis, tam in motu animali, quam sensibus exercendis, & quam maxime in studiis severioribus, aut animi affectibus, usu deteruntur & inutiles, communi lege omnium in orbe terrarum, fiunt spiritus, novaque ex aliis requiritur restitutio: Sed quoniam ex aliis in nobis liquoribus actione circulationis sunt conficiendi novi spiritus, corporis motus muscularis, quia simul coadjuvat ex humoribus spirituum elaborationem, suscitata celeriori circulatione, minus comparative consumit spiritus, quam studia severiora, hæc quia simul actione musculari & circulatoria non præparant humores, ut fit in motu musculari. At vero & corporis & animi quies, si excipiamus somnum, omnium minime spiritus consumit. Hoc dum fit, major videtur fieri spirituum consumptio, quam per circulationem eorum fit restitutio, cum omnes & sensus & motus animales non ita sunt feriati, ut omnino nihil de spiritibus consumant: ipsa quoque vigilia majorem spirituum fluxum, quam fit in somno, arguit, quo plus aufertur, quam motus vitalis potis est restituere, tam ad suam, quam ad animales operationes peragendas.

§. VIII. Ad spirituum autem productionem duplex statuenda est præparatio: prima quæ consistit in confectioe humoris, cum ex alimentis, tum ex reliquis nostri corporis humoribus, quæ materiam spiritibus præbet: Altera quæ ex bono hoc succo ipsos conficit spiritus: ex quibus conceptis clarius patet, homines vigilando sæpius alacriores fieri & agiliores, dum præparata in circulantibus spirituum materies majori motu est extricanda, inde torporem discutit motus muscularis a somno vel quiete: quæ si perdurassent, hæc ipsa confecta materia aliis ita irretita fit, ut deinceps extricari nequeat.

§. IX. Ad duplicem hanc præparandam materiem Auctor naturæ videtur quoque uti voluisse statu corporis duplici, ut somno generaretur materia quædam gelatinosa bona, quæ in cerebrum delata, ejus actione vigiliarum tempore, in spiritus commutaretur, ducereturque per nervos: quare tandem, si diutius continuatur vigiliæ, in quibus sensim consumuntur spiritus, ita privatur hoc succo gelatinoso quoque, ut somni necessitas incumbat, quo solo restituitur. Non multum ab hoc abluunt temporum vices, dum nocte & hyemali tempore, quando plantæ quasi dormiunt, alibilem in se conficiunt succum, æstate & die per totam plantam distribuendum: vernali enim tempore radices succis turgent, autumno autem exarescunt, atque nocte in se conficiunt, quæ accedente solis calore per plantam sunt digerenda. Quare non minor in vigiliis quam somno locanda est necessitas, cum vigilans e succo a præcedenti somno confecto spiritus prolicit, qui succus alias, dum nimis longe continuetur somnus, ita mutatur, ut producendis spiritibus ineptus fiat: torpet ita somno deditus, non ex spiritibus consumtis, sed alienata

materia, ex qua spiritus sunt generandi. Talem semper ordinem in rebus naturalibus observamus vicissitudinis: dum enim calor vegetationis causa in plantas climatis nostræ continuo agere pergit, ipsæ plantæ exarescunt: si vero continue-
tur frigus, non propullulant, sed requiruntur causæ alternatim agentes, uti in nobis cunctisque animalibus somnus & vigilia. nescio ullum animal diu vivens, cui nunquam dormiendi incumbit necessitas.

*Somnus
differt a
quiete.*

§. X. Qui putat quietem vigilantis id idem præstare posse, quod somnus, vim inferret naturæ, quæ docet vigilantes omnes, sive laborant, sive quiescunt, dormire debere: atque non satis perspexit differentiam somni & quietis. Quies quidem minus consumit spiritus, quam corporis exercitia; quare quiescentes breviori somno contenti esse possunt, quam laborantes; sed nunquam totus ita quiescit homo, ut per sensuum organa nulli consumantur spiritus: & vigiliarum tempore, cum pleni maneant nervi suis spiritibus, corpus minus videtur aptum ad conficiendum succum gelatinosum, sed magis evacuat spiritus, minuitque materiam gelatinosam, de quibus infra largius disputabimus.

*Vigilia
confu-
munt spi-
ritus, im-
pediunt
gelatinis
confectio-
nem.*

§. XI. Ex paucis his unumquemque facile colligere posse autumo, a *Vigiliis auferri spiritus animales*; atque *confectionem succi gelatinosi præpediri*, ad suppeditandam spiritibus materiem: sive ergo protrahantur vigiliæ ex voluntate, vel necessitate, sive ex causa morbofa, hæc tamen duo semper fieri, cum iis quæ ex his tanquam causis profluunt. Quibus alia adjunguntur, si morbi causa somnum inhibet; ea enim tunc simul accedunt, quæ non ita ex protractis vigiliis nascuntur, quam ex ipsa morbi causa: Sed quoniam una cum vigiliarum symptomatibus conspiciuntur, a multis quoque ad vigilias referuntur, ac si ab iis provenirent.

*Spiritus
animales
vitales &
sensus an
differant.*

§. XII. Qui sentiunt Vitalem motum alio spirituum genere peragi, quam motus animalis & sensus, ipsis patadoxum erit, adstruere vigiliis protractis debilitari motum vitalem, quum in quiescente & vigilante videantur spiritus vitales non multo magis consumi, quam in dormientibus; præprimis qui contendunt vitalem functionem fortiolem esse in dormiente quam vigilante. Quia vero hucusque non licuit spiritus animales & vitales ad examen revocare, utpote omnem ludentes sensum, quidquid itaque ad distinguendum assumitur, ex secretionis modo & effectibus diversis est petendum. Detexerunt quidem anatomici Cerebrum intus ventriculis seu cavitatibus esse donatum, Cerebellum autem intus solidum: atque in his aliquam annotant discrepantiam, quoad vasorum per ea reptatum, priusquam spiritus confectos fibris nervosis infundant. An vero hæc pauca, & tam parum distantia, sufficientem suggerant rationem, spiritus animales indole diversos esse, dubio non caret. Neque majus argumenti pondus in usu horum diverso invenimus, quum in priori *Exercitatione de Motu Vitali* demonstratum sit, ex organorum fabrica diversa, non vero ex varia natura spirituum, nonnullas partes ad voluntatem moveri, alias a continuo spirituum influxu. Motum autem vitalem vigiliis diuturnioribus debilitari, non pauca sunt quæ adstruunt; horrent enim & frigent post nocturnas vigilias, languetque pulsus, & alimenta ingesta diutius in corpore manent cruda. Neque contrariatur rationibus, quum idem succus gelatinosus, qui parcius in vigiliis generatur quam est ejus consumptio, dum ex eo & spiritus animales & vitales desumendi sunt in vigilantibus, tandem ita deficere incipit, ut vix præsto sit pro spiritibus vitalibus materia: quare aperte dicendo in vigiliis non magis consumuntur spiritus vitales, quam forsan in somno, sed quia ejus detrahatur materia, sive succus gelatinosus, ipsorum quoque spirituum vitalium copia minui debet.

*Motus
vitales
debilitan-
tur vigi-
liis.*

*Perspira-
tur magis
in vigi-
liis quam
somno.*

§. XIII. Mirabundus sæpe vidi multos a Sanctorio ita deceptos fuisse, ut non animadverterint insensibilem difflationem, eodem temporis termino vigiliarum, multo majorem esse quam somni: si enim quis redarguit paucis esse datum, ipsa pertentare experimenta, quæ me docuerunt semper somni tempore parciorem fuisse

fuisse perspirationem quam vigiliæ; at vero ipsa ratio hoc idem confirmat. Si experimenta contraria statuant, uti nostra & Sanctorii, ratione est decidendum quis veritatem dixerit, si alii noluerint id idem pertentare. Nemo inficias ibit, hominem vigilantem magis quam dormientem macie consumi, servata eadem ingerendi quantitate; hominesque diu dormientes sine victu manere posse superstites, quod vigilantibus minime competit; atque vigiliarum excessu toto corpore extenuari, dormientes magis pinguescere & mole increfcere. Si ergo quis sentiat in somno largiorem fieri diffilationem, seu quod idem est plus auferri de humoribus, non intelligo, quomodo major ablatio posset augere corporis molem, ut in dormientibus, & vigilans cum pariori evacuatione posset extenuari; quisque enim sine experimentis colligeret contrarium fieri, nisi autumat dormientem plus ingerere, vel largiorem habere evacuationem sensibilem vel per urinam vel alvum. Quoad primum vigilantes semper alimentis copiosioribus utuntur si sani sint, quam dormientes; quamobrem quasi in proverbium est apud mulieres, Infantes æque somno quam alimentis nutriri. Quare mea sententia non aberremus si vigilantibus majorem, quam nimis dormientibus concedamus alimentorum copiam. Quoad alterum, si admittatur vigilantes leviores fieri ad stateram majori sensibili evacuatione, istud non probat, sed potius improbat largiorem perspirationem. His adjungere possumus in dormientibus humores circumduci & expelli solo motu vitali, cum in somno perfecto omnis motus animalis quiescat; verum in vigilantibus quoque fieri motum animale, & sensuum actionem, aut ad hæc peragenda majorem adesse promptitudinem, quæ liberiores & copiosiores spirituum influxum exigit. Hæc autem dum fiunt, circulationem promoveri, alterna scilicet actione constrictionis musculorum in vasa circulatoria, neminem inficias ire reor: verum si admittatur evacuationem parem circulationis velocitati, uti omnes sentiunt physiologi, minime est dubium, quin idem secundum hanc generalem regulam sit statuendum. Quod autem Sanctorius & alii in contrariam sint lapsi sententiam, non caret ratione: post somnum enim placidum semper sentitur corpus levius, alacrius, agilius; post vigiliis vero lassum, pigrum, ignavum, ponderosum. Hoc sensu decepti existimarunt, gravitatem corporis perceptam majori humorum accumulatione natam esse, cum vero a diminutis viribus proveniat; nam ponderato corpore post vigiliis, comparative semper levius, quam post somnum placidum. Imo somnus turbatus, inquietus, cum multis insomniis, qui est quasi species vigiliæ, corpora reddit leviora, sed cum virium detrimento quam somnus tranquillius, quia motus muscularis in implacido somno extrudit perspirabile, & confectionem spirituum intercipit.

§. XIV. Qui contemplatur phænomena diversa hominis vigilantis, in quo vigent omnes sensus, motusque adest promptitudo, vigorque in omnibus membris; atque dormientis, vel in somnum lapsi, cui omnia membra laxa inertia, sensuum torpor, pleno ore confiteri cogetur, si motus animalis & sensuum promptitudo aliquid faciat ad promovendam circulationem, eam in vigiliis celeriores esse debere, quam in somno: contrariam tamen sovent sententiam multi, quam credo ex copiosiori influxu spirituum e cerebello, dum cerebri actio hoc tempore feriatur, deducunt: an vero in hoc tantum sit argumenti vis, ut reliqua infringeret, aliis dejudicandum relinquo. Si vero certa ratione evinci potest, actionem muscularem & sensuum exercitia promovere circulationem, minime dubium erit, quin validior est in vigilia circulatio, quam in somno. Hoc ut probetur repetendum est, quod amplius in motu vitali disputavimus, solo motu cordis non absolvi circulationem, sed & adjuvari actione vasorum. Quia vero dormientes ab eadem aeris frigiditate magis refrigerantur, faciesque pallet in somnum lapsi, & omnia laxa & pendula sunt, hæc puto satis evincere, in dormientibus debiliorem esse motum vitalem: calor enim nobis par est actioni vitali, parique passu cum motus vitalis vigore increfcit; pallet quoque facies minori appulsu sanguinis; atque solida laxa minorem actionem in

*Major
circulatio
in vigi-
liis quam
somno.*

contentos liquores exercent. Quod autem nonnulli ex pulsus frequentia, quam fateor in dormientibus me detegere non potuisse, sed potius tarditatem, celerio-rem deducant circulationem, non firmo stat talo, quum frequentior pulsus in ægris frequentissime minorem arguit circulationem, uti fidem facit perinfirmorum pulsus frequens, qualis etiam non raro in moribundis observatur. Ad majorem certitudinem adducere possumus, vigilantes, qui raro ex toto quiescunt, actione alterna musculari per venas adjuvare sanguinis fluxum: quare chirurgi imperant, si nimis tarde ex inflicta plaga fluit sanguis, ut moveatur membrum, quo facto liberius & majori impetu salire incipit sanguis. In vigilia insuper cum & animales & vitales spiritus sunt secernendi, major quoque appulsus sanguinis versus caput requiritur, quam in dormientibus, ut copia sit præsto sufficiens ad utramque secretionem, quanta non requiritur in dormientibus, dum parva quantitas spirituum sit secernenda: videtur itaque celerio-rem circulationem fieri in vigilia quam somno.

*Corpus
emacia-
tur vigi-
liis.*

§. XV. Motu hoc velociori sanguinis per vasa, atque validiori attritu partium solidarum in vigiliis, cum copiosiori distillatione, corpus extenuari debet; minuitur enim abundantiori evacuatione humorum pondus, atque actione majore fibrarum vix aliqua quies conceditur pinguedini, ut colligatur in suis cellulis, & quæ collecta fuit, expellitur, vel consumitur; atque ex alimentis assumptis promptior quidem habetur chyli confectio, at cum assimilando in bonos conversus est chylus succos, ejus collectio quemadmodum in somno non conceditur, sed motu hoc validiore loca nutrienda præterlabitur, & nimis cito actione corporis consumitur. Quare alimenta, quamvis majori copia assumpta, minus nutriunt, quam parcius ingesta in magis dormientibus. Scimus quoque omnes, nutritionem parem non esse ingestis, sed nostrum corpus certam dumtaxat quantitatem in nutrimentum convertere posse, si autem plus ingeratur, quod abundat in corruptelam converti. Non est ergo mirandum infantes æque somno quam alimentis nutriri, atque vigiliis diuturnioribus emaciari, horum & adultorum corpora siccare.

*An vigi-
liæ auge-
ant vel
minuant
coctio-
nem.*

§. XVI. Non omnibus certe constat medicis vigiliæ an promoveant Coctionem vel prohibeant, alter affirmat, alter negat, atque ita potest secundum mentem nonnullorum in utramque partem ventilari. Ego vero puto sine distinctione hanc litem derimi non posse. Si per Coctionem intelligere velint alimentorum subactionem in chylum, ejusque digestionem in sanguinem, sentirem coctionem promoveri vigiliis; si mavelint per coctionem concipere ulteriorem chyli conversionem in bonos humores nostri corporis, qui dein in suis receptaculis sunt asservandi, ut ita habeatur major copia succi nutritivi in nobis, putarem vigilias coctioni obesse. Nisi dicta hæc certis firmarentur rationibus, æque de his, quam prioribus quisque dubitare posset. Utrumque ergo est exponendum, ut dictorum constet veritas. Assumo itaque, quæ superius demonstrata sunt, motum tam animale, quam vitalem vividio-rem esse, liquores intus hac actione agitari: si ergo succorum ad alimentorum coctionem eadem maneat indoles, eademque copia confluant, etsi verisimile sit in vigiliis copiosius affluere, ut reliqui secreti humores, actione validiore nostri corporis citius dissolvi debent, & per corpus dispergi alimenta: duabus enim causis convertuntur alimenta in chylum, saponacitate, seu solvente virtute humorum, & actione viscerum chylopoieticorum. Si ergo actio horum organorum sit fortior, atque adjuncta motu animali, confectio seu subactio ingestorum promptior esse debet. Quare vigilantes majori indigent alimentorum copia, quam dormientes, quia hæc prima coctio celerius absolvitur. Alteram vero coctionem in vigiliis turbare paucis videbimus: per hanc intelligunt auctores chyli ulteriorem elaborationem in sanguinem, pinguedinem, reliquosque succos nutritivos, inter quos sentio primum locum vindicare humorem gelatinosum instar albuminis ovi, ex alimentis in chylum primo conversis confectum, in robustis & sanis copiosorem, in valetudinariis, & debilibus parciorem, ita quidem ut sanguis ex perinfirmis stagnans vix concre-scat, ipsaque ca-
da-

da vera longe a morte vix rigeant. Hunc credo succum, gelatinosum dicendum, spiritibus præbere materiem, quod alibi probare conabor, cum magis ad nutritionis negotium pertineat. Videndum ergo est, an hic succus atque pinguedo, vel & sanguis ipse bonus, vigiliis copiosius generentur & colligantur in nobis. Quia vero moderata circulatione sola in nobis is conficitur succus, uti in somno placido post vigilias, sed in majori motu, majori spirituum dispendio, potius consumitur; in vigiliis enim copiosiores consumuntur spiritus quam in somno: qua propter quamvis corporis vis ex alimentis eandem gelatinosi humoris conficeret quantitatem, ob maiorem tamen ablationem parum restat. De pinguedine autem eodem modo disputare possumus, at non eget probatione, cum vigiliis nunquam, sed somno semper, pinguescant animalia. Hæc qui mente assequitur eum minime dubitare posse reor, quin vigiliis coctionem alteram turbare statuet.

§. XVII. Dum ita in vigiliis magis consumuntur spiritus cerebri & cerebelli, minusque restituitur succus gelatinosus, ex quo spiritus sunt conficiendi, tandem ad spiritus reficiendos somni incumbit necessitas; in quo soli spiritus ad motum vitalem operationem suam exequuntur. Sed vero omnino statuere, in solis vigiliis fluere spiritus cerebri, atque perfecte quiescere tempore somni, alienus sum: verum credibile mihi videtur, somni tempore blande & placidissime spiritus cerebri fluere per fibras nervosas, sed tam parva quantitate, ut inde vix ulla sit suspicanda consumptio: in vigiliis autem copiosius derivari, maxime si vel motu animali, vel studiis severioribus eorum intendatur motus. Quare post longiores vigilias corpus spiritibus quasi exhaustum sentimus solo somno sequenti reparandum. Ita caduca nostra natura est facta, ut alterna requie indigeat, sine qua omnia brevi collaberentur.

§. XVIII. Cum ex dictis quisque facile intelligit, non solum longioribus vigiliis consumi spiritus animales sed & vitales, quorum defectu actiones vitales in visceribus, quæ in sanis blandum concitant ibi calorem, languent & hebescent. Sentimus ergo in interioribus frigus fieri ex debiliore attritu partium, horroresque vagos per totum corpus oberrantes in nimis vigilantibus, quæ facile ex iis, quæ in motu vitali dicta sunt, desumi possunt.

§. XIX. Quam legem qui violare conatur vicissitudinis, vel ex necessitate somno destituitur, multa promte ipsi oboriuntur mala: hebescit enim caput, vertigine tentatur, vel gravitate nutat, ab humoribus in capite congestis, circulationi per minima cerebri vasa ineptis: pedes vacillant, lassum & defatigatum est corpus defectu spirituum, & in pueris rachitidis ponit primordia, tremunt artus & centena alia, quod nimis longum enarrare.

§. XX. Vigilat tam diu homo sanus, ac tanta copia e cerebro spirituum fertur per fibras nervosas motui animali & sensibus dicatas, ut sensus externi interni que, atque motus animales exerceri possint: tandem vero, si ipsi spiritus his actionibus nimis consumpti sunt, vel succus gelatinosus spiritibus præbens materiem, nimis abalienatus, dormiendi incumbit necessitas, spiritibus parcens, & gelatinam regenerans.

§. XXI. Hæc autem somni necessitas multis causis, tam in sanitate quam morbis, vel intercipitur vel eluditur, ut totas noctes pervigilet sæpe homo cum magna virium jactura. Sed quia post varias causas somnum interrumpentes non semper oriuntur eadem mala, paucas causas horum attingam, ex quibus reliqua symptomata facile deduci poterunt.

§. XXII. Qui ex voluntate, vel quod usus vigilias exigit, pervigilat, in multos superius citatos incidet morbos; qui vero largiori assumptione potus aquosi, protrahere conantur vigilias, solidorum laxitatem & inertiam, atque primordia hydropis sibi pariunt. *Ventriculus* vero multitudine, maxime variorum vel difficilis digestionis eduliorum, *onustus*, somnum intercipientes, noctem facit molestam & inquietam, atque homo anxius se continuo in lecto jactitat; mane autem resur-

furgens ponderosior erit & ad sensum & ad stateram, sentietque ventriculum multa cruditate plenum, caput ponderosum, sæpeque coactus vomitu hanc sarcinam excutere, vel superveniente alvi fluxu quandoque liberatur. Hoc quamvis ventrigulæque dediti sæpe experiuntur, genio malunt indulgere cum maximo virium damno, quam parcius vivendo conservare sanitatem, & vitam protrahere: ne tamen ipsis deesset ratio, venditant majorem alimentorum copiam nostrum corpus quoque magis nutrire, non reminiscetes nostri corporis virtutem in certa quantitate ingestorum subigenda, quæ nutritioni sufficit, limitatam esse; quod vero abundat, defectu virium in nobis corrumpi, atque inde multorum malorum esse originem, quod in nutritione accuratius persequendum.

*Ab ali-
menti de-
fectu.* §. XXIII. Neque placidum promittit somnum *Ventriculus* omnino *vacuus*: Si enim chylo blando non demulcentur humores, vel quod minus justo ingeratur, vel magis detrahatur per aliquas evacuationes alimonia, qui frequentius fuere circumducti, usuque inutiles facti, simulque aliquomodo acres, blandum spirituum motum in somno perturbant, irritationeque sua magis valent commovere nervorum organa, ut continuent vigilias, quam spiritus deficiens ex inedia ad somnum inducendum exoptulat: tandem vero, exhaustis omnibus fere spiritibus, sopore tentatur æger. Non hic est opus omnes perscrutari modos, quibus defectus fit alimenti in nobis, quum hoc aptius in nutritionis titulo est persequendum.

*A stimu-
lo.* §. XXIV. In morbis autem vigiliarum causas enumerare vix finis esset dicendi; quare præcipuas attingemus. Si ea, quæ in somno naturali fiunt, conferantur cum stimuli effectibus, ipsa contemplatio explanabit stimulum arcere somnum, & continuare vigilias, etiamsi spirituum defectus somnum exoptularet: ut enim somnus obrepat placide agitandi sunt humores; at ita est nostrum fabricatum corpus, quod ab omni irritatione, sive sit humor acris, sive alia quævis doloris causa, quemadmodum disputavimus in *Motu Vitali*, tantum commoveatur, ut ad quietem vel motum placidum reduci vix possit. Hoc in podagricis, arthriticis, dentientibus, aliisque continuo urgentibus doloribus, experimur, ut sæpe hypnotica adhibere coacti simus, ne vigiliæ protractæ nimis exhaurirent vires.

*Ab hu-
more acri
& tenui.* §. XXV. Qui quoque humoribus tenuibus utcumque acris scatent, etiamsi vehementia doloris facile pateretur hominem obdormire, uti in morbis biliosis, erysipelatosi, febre leipyria, hemitritæa, scorbuticis, cacochymicis, hæcticis, putredine laborantibus, longo tempore tamen perpetuis vexantur vigiliis, quibus omnes fere exhauriuntur vires, atque regeneratio materiæ gelatinosæ pervertitur.

*A circu-
latione
aucta.* §. XXVI. Neque motus circulatorius major, præprimis si impetum faciat ad caput, dormire permittit hominem; quare cum pulsu frequentiori & duro sæpe vexant vigilie, & in quibus delirium, parotides, aut hæmorrhagiam exspectamus, vigilie diuturniores præcedere solent. Hæc ut intelligantur duo planius exponenda sunt; primum est ad caput solum majori velocitate sanguinem posse ferri; alterum est hunc acceleratum motum, sive sit ad caput tantum major, sive etiam per totum reliquum corpus, vigilias continuare. In ipsis arteriis actionem esse ad propellendum sanguinem, ab actione cordis pellente distinctam, nemo inficiabitur, si observet in morbis faciem sæpe sanguine turgere, oculos inflari, venulisque rubris seu potius arteriis scatere, tempora pulsare, & reliqua omnia, quæ validam circulationem in parte, indicant, conspici, dum vero in corde & reliquis corporis arteriis sæpe modica observetur circulatio. Sed hunc acceleratum motum protrahere vigilias minime dubium est; requiritur enim, ut somnus obrepat, spirituum animalium motus blandus, qui non conceditur cum sanguis tanto impetu ad nervorum principia feratur. Quare ipse motus animalis & sensuum exercitatio somnum intercipit, augendo circulationem, & in morbis cum aucto sanguinis motu semper vigilie urgent, nisi copia sanguinis major cerebrum opprimat, inferens soporem, qui igitur ægro nihil levaminis adfert, verum in statum deteriorem deducit.

ducit. Quare somnus in acutis si levat, bonum; qui vero non levat, malum, quia ex cerebri oppressione producit, non vero ex quietiori humorum motu, vel alia bona somni causa. *Vigiliae* autem *perdurantes*, quamvis ad finem videatur tendere morbus, prava indicia præbent, vel metastasin ad caput, vel recidivam portentunt. Si vero fiant ex perturbatione critica non debent diu durare, & sequi debet evacuatio critica, post quam obrepit somnus cum virium levamine.

§. XXVII. Quæ ex animi motu protrahuntur *vigiliae*, semper nocent, siue id fiat studiis acrioribus, siue cogitationibus profundioribus, siue alio animi pathemate ad tristitiam inclinante; imo ipsa lætitia, gaudium, pericharia, etiamsi salubria habentur, multum inutile e corpore evacuant; promovent quidem perspirationem & coctionem, sed si longiores *vigiliae* inducunt, hominem debilitant: plus enim de spiritibus consumitur in vigiliis protractis, & minus præparatur materia gelatinosa, quam lætitia, aliufve animi motus placidus, restituere valet. In animi autem pathematibus hoc interest, quod, quæ ad Lætitiam accedunt, adjuvent spirituum confectionem, si *vigiliae* longiores non plus consumerent: verum ad Mœstitiam accedentes, sua natura non promovent spirituum confectionem, dum interim vigiliis multi absumuntur, ut ita ex duplici causa patiatur homo. Animi vero affectus, & experimentis & ratione constat, somnum interrumpere: qui enim mœstus multis negotiis obrutus cubitum petit, plus solito vigilat. Neque caret ratione: Animi enim actio magis exagitat spiritus, quam ut possint ad tam placidum redigi motum, qui in dormientibus requiritur.

§. XXVIII. Tot & adhuc multo plura mala ex vigiliis protractis nascuntur, quod nimis longum foret persequi: quare videndum restat, an non ex opposito parciore *vigiliae*, seu somnus longior, nihil mali faciunt. Hoc autem intelligi nequit, nisi præcesserit somni descriptio, quam deinceps tradituri sumus, postquam sit explicatum, quid boni præstant *vigiliae* proportionatæ. Ut autem *vigiliarum* definia-
tur tempus, magna est ponenda differentia ætatis; infantes, pueri & senes, minus ferunt *vigiliae*, & qui ex morbo reconvalere, quam constans ætas, & homo perfecte sanus & robustus: definitum itaque *vigiliarum* tempus est, quod cuicunque competit, ut maneat sanus, sit longius, sitve brevius, quod infra in somno amplius est persequendum. *Vigiliarum* necessitas, quatenus refertur ad conservandam sanitatem, tunc demum incumbit, si somnus satis longus antecesserit, ut actione majori in vigiliis ea, quæ præparata sunt, in præcedenti somno, & quæ protracto somno inviscarentur, ut infra demonstrabitur, extricarentur & in actum ducerentur. Quare multi nimio somno dediti, dum surgunt, corpus sentiunt impletum, iners, quia spiritus in somno confecti, humoribus viscidis minusque agitati, intricati hærent: sed majore actione *vigiliarum*, maxime si simul agitantur muscoli motus animalis, uti in pandiculatione & oscitatione, extricantur spiritus, atque dissolvitur nimia humorum visciditas, in somno præcedenti longiore nata. Non solum ergo *Vigiliae* ad negotia peragenda requiruntur, sed & etiam ad conservandam sanitatem conducunt.

§. XXIX. Ut amplius pateat, infantes, pueros, senes & debiles, minus vigilare debere ad sanitatis conservationem, repetendum est, *vigiliae* spiritus consumere, qui motu vitali, somni tempore, fuere confecti. Hic autem motus æquabilis sola est somni tempore causa, qua ex humoribus elaboratur spiritibus materia; ipse vero somnus non conficit spiritus, sed motus placidus vitalis, qui hoc tempore continuatur, dum per actionem animaleam & *vigiliae* minor est consumptio, quam est generatio spirituum hoc tempore. Quibus itaque motus vitalis est debilis, hi debent minus vigilare, quia tardior fit spirituum generatio. Ut ergo comprobetur, infantes & senes longius dormire debere, dumtaxat, demonstrandum est, in his motum vitalem esse debiliorem. Quia vero nemo contrarium statuit, probatio hujus omitti potest, ne nimis protrahatur hæc dissertatio.

§. XXX. Si *vigiliae* modum excedant, quia demonstratum est iis hominem de-

Ac ani-
mi pathe-
mate.

*Vigilia-
rum &
somnia
proportio.*

*Qui mi-
nus vigi-
lare de-
bent.*

*Vigiliae
exceden-*

de-
bilitari, Medici requiritur auxilium, quod in medicamentis somnum concilian-
tibus est persequendum: in quibus attendendum, vigilias distingui debere, in volun-
tarias seu naturales, & necessarias ex morbosa causa, pervigilium, seu ἀγρυπνία
dicenda: Hæc sola postulat medicorum opem, qui tunc duplici modo vigilias co-
nantur curare, vel tollendo vigiliarum causas superius recensitas, vel exhibendo
aut applicando νάρκητιὰ & ὑπνωτικά. His vero, etiamsi somnus inductus minus
salutaris, quam qui ex bona fit causa, sæpe tamen in morbis est conciliandus,
ne vigiliis protractis adhuc magis exhauriantur vires.

Somni
definitio.

§. XXXI. Ut autem eo magis pateat, quid in ἀγρυπνία sit agendum, causæ so-
mni penitus inspiciendæ, ejusque effectus, si moderatus sit, vel protrahatur, sunt
persequendi. hæc ut clarius describantur & concipiantur, somni definitio prægredi
debet. Quamvis ex statu contrario vigiliarum (IV) facile defumi posse videatur,
quomodo verbis exprimi debet somni status, multo tamen difficilius, quam vigiliæ
fieri potest; hoc variæ de somno sententiæ comprobant. Cum in homine vivente
& vigilia & somnus fiat, ex diversis in his actionibus, definire licet, si tradita
sit vigilia, quando homo dormire dicitur. Perfecto dicitur frui hominem sanum so-
mno, si nullum exercet muscularem motum, ut quiescens & vigilans; nullamque
sensuum externorum & internorum commotionem percipit; neque recordatur vel
reminiscitur, quæ eo tempore acta sunt. Qui vero in somno obambulat, loquitur,
insomniis vexatur, aut recordatur, quæ somni tempore acta sunt, non habetur per-
fecte dormivisse. In placido itaque somno non multa fiunt, quæ non observantur
in homine omnino otioso nocturno tempore decumbente, nisi quod sensuum in-
ternorum nullam perceptionem habeat; quare Somnus definiri potest ex phænome-
nis perfecte quiescentis hominis sani, sine perceptione sensuum internorum; atque
in dormiente nulla est promptitudo ad exercendum motum animale & sensus
externos, quod tamen in vigilantibus adest, etiamsi nihil operatur.

Quæ in
somno ob-
servan-
tur.

§. XXXII. Reliqua vero, quæ in dormientibus observantur, ut clausura oculo-
rum, pulsus major, respiratio profundior, stertor, membrorum laxitas, calor corpo-
ris externus minor, internus vero major, largior perspiratio, perfectior coctio, vel
non semper quia adsunt, vel quia ab aliis contrarium detegitur, ad definitionem non
pertinere autumo. Neque ad causam proximam somni eruendam tantum valere
sentio, ut iis contenti esse possimus; sed conducere ad majorem certitudinem ad-
struendam, si causa proxima detecta fuit. Videndum itaque in sequentibus, cum
in allegatis non consentiant Observatores, quid veritati magis respondeat.

In somno
minus
quam in
quiete
consum-
untur
spiritus.

§. XXXIII. Nemo inficitur, in quiescentibus tardiores esse circulationem, quam
in laborantibus: rarioremque & minus profundam fieri respirationem: spiritus tar-
dius fluere in musculos, minusque consumi musculorum actione & exercitatione sen-
suum, qui in perfecte otiosis non exercentur: atque omnia fieri, quæ ex minori spi-
rituum consumptione & tardiori motu circulatorio provenire solent. Hoc idem quo-
que in somno fieri debet, sed perfectius, quia ad sensum extremum & motum ani-
male in dormientibus adhuc multo minor est promptitudo. Et quoniam insuper
in dormientibus sensuum internorum nulla observatur actio, somni tempore omnium
minima spirituum consumptio esse debet, si dictæ actiones a spiritibus peraguntur.
Motum vero animale, sensusque externos & internos, spirituum varia modulatio-
ne perfici, non est hujus loci adstruere, utpote alias satis fuscè ita disputatum, ut sine
scrupulo hanc sententiam possimus amplecti. Quare probare restaret, hos spiritus
consumi motu animali & sensibus; at lex est generalis agendo omnia deteri & perire,
novumque requirere, ut maneat actus: hoc tam generale est in omnibus agentibus li-
quoribus, ut nulla mihi videatur restare ratio, quæ spiritus liberaret ab interitu in mo-
tu & sensibus exercendis. Constat ergo in dormientibus, quia dictæ non fiunt actio-
nes, internique sensus sopiti sunt, spiritus minus consumi quam in vigilantibus, etiamsi
omnino otiose decumbunt, quia dormiens ne quidem sensu interno spiritus deterit.

§. XXXIV.

§. XXXIV. Non solum dormientes, sed & somnolenti, ut & qui in somnum sunt lapsuri, omnia præbent indicia, spiritus per nervos tardius fluere: sensus enim hebescent, motus animales omnes languent, stantes vel sedentes, quasi fulmine essent tacti, collabuntur, vox deficit, palpebræ concidunt, & præ gravitate vix elevari possunt, caput nutat, pedes vacillant, enervantur omnia membra, caro musculorum flaccida, in sphincteribus constrictio videtur manere, facies pallet. Hæc vero in somno evidentiora sunt, adeo ut omnes muscoli quasi paralytici sint, & externi sensus, non nisi violentiori actione, commoveri possint. Quia vero alias demonstratum est, spirituum influxum musculos agitare, eo deficiente flaccescere, nullum restat dubium, quin in somno tardius, quam in vigiliis fluant spiritus per nervos ad sensum & motum animale: sed inquirere est operæ pretium, qua causa in sanis & morbo laborantibus hi spiritus tardius fluunt; & an id idem quoque in motu vitali contingat, uti fere omnes statuunt.

§. XXXV. Ut autem hoc demonstretur, tardius vel celerius peragi motum vitalem, ratione, non vero observationibus, est disputandum, quia alii dicunt Pulsum in somno & Respirationem pleniorē & frequentiorē fieri: alii autem contrarium se observasse contendunt: cui ergo habenda est fides, si observatio seu experimenta contrariantur? Qui in somno admittunt velociorem sanguinis motum, non carent rationibus; sed & adversarii iis quoque non sunt destituti: videbimus ergo quorum ratio prævalet.

§. XXXVI. Probant majorem motum vitalem in somno ex perfectiori coctione hoc tempore, quam quæ fit in vigiliis. Hoc minime dubium est, quin alimenta in somno placido nocturno plus nutriunt, quam si homo vigilaverit: idem in coctione materiæ morbi observatur; quare somnus placidus tam multum præstat ad *πεπασµὸν* & ad bonam crisin, ut sine eo vix unquam contingat. Inde vero deducere velle, motum vitalem esse validiorem in somno, nulla mihi occurrit probabilis ratio: imo in contrarium potius tenderem; quia motus vitalis major, maxime si simul motus animalis & sensuum exercitatio accedit, alimenta potius consumit. Aliud enim intelligitur per nutritionem hanc, quando intelligimus majorem pinguedinis cumulum; aliud vero per ingestorum alimentorum subactionem. Si primum statuitur, tunc concedendum est, in somno majorem fieri nutritionem, seu in hoc sensu coctionem, quia minori motu minus absimitur, quare in somno ob minorem, non vero majorem motum vitalem fit coctio. Sed in somno alimenta citius subigi & converti, quam in vigiliis, contrarium patet, quia vigilantes plus alimentorum consumunt, quam dormientes: imo in nimio somno diu vivunt animalia sine alimentis, quia tunc minor fit alimentorum detritus; & si velimus cibum digerere, motum muscularem imperamus, ut actione superaddita citius subigerentur ingesta alimenta. Quoniam ergo vigilans plus alimenti requirit, quam dormiens, & motu majori, ut dictum est, concoqui seu consumi, mihi videtur patere, in vigiliis majorem quam in somno vigere vitalem motum. Quod ad *πεπασµὸν* attinet eadem videtur esse ratio: in quibus enim morbis antecesserit motus vitalis major, quam in sanitate, uti febribus ardentibus & Inflammatoriis, somnus summopere promovet coctionem. In morbis autem Chronicis, nunquam longiori somno, si ex tardiori motu crudus humor fuit natus, morbi materies ad coctionem perducitur, nisi nimix vigilix præcesserint; sed potius crudorum fit cumulus. In acutis autem vehementia circulationis humores compacti quietem exigunt ut solvantur, vel in pus convertantur; ita Inflammata parti adhibentur tepida, mollia, humida, ut temperetur nimius in ea parte motus, reducaturque ad motum magis placidum; nunquam vero stimulantia, calefacientia, motum vitalem istius partis exagitantia. Quare somnus in acutis præstantissimus, & coctioni conducit, quia motu blandiore & æquabiliore compactos humores, per præcedentem majorem motum, laxat & ita concoquit: quamdiu enim in acutis

perstat motus major, nullam exspectamus crisin, sed si temperatur. Dum vero ad talem crisin, coctionem, & resolutionem, somnus omnium optime conducit, minime dubium est, quin somnus faciat minorem motum vitalem, quam fit in vigiliis. In morbis autem Chronicis ex motus defectu, exercitiis ad coctionem deducimus cruda; si ergo in somno fieret motus vitalis major, is imperandus esset, sed quia debilior est, somno longiore in his accumulatur cruda.

An spirituum
parciori
consumptione in
somno fiat
motus vitalis
maior.

§. XXXVII. Alterum subtilius, & quod magis stringere videtur argumentum, ex parciori copia spirituum motus animalis & sensuum desumtum est: Quia scilicet somni tempore, hi spiritus minori copia secernuntur ope cerebri, inde putant cerebellum debere majorem sanguinis accipere quantitatem, cerebro flaccescente, atque inde fieri copiosorem spirituum vitalium secretionem, & derivationem ad sua organa. In hoc vero bina supponuntur; alterum est, in somno & vigilia, eandem versus caput ferri sanguinis quantitatem; alterum, per cerebellum majorem fieri secretionem, quia cerebrum difficilius transmittit sanguinem in somno. Si vero unum ex his corruat, tota quoque hæc ratio non procedit. Videamus ergo primum. Generalem in nostro corpore invenimus legem, ut, quoties motus animalis fiat major, toties quoque acceleretur circulatio, & respiratio fiat citatior, ob duas distinctas rationes. Prima est, quia motu musculari validiore venæ valvulis instructæ, alterne pressæ, copiosorem sanguinem corrivant versus cor; id ex majori assumpta quantitate magis dilatatum, plus pellit in aortam. Si ergo continuetur aliquamdiu sanguinis propulsio per venas, tota circulatio celerior fit, & ob dictam rationem, quia venæ hac actione exoneratæ, minus resistunt fluxuro sanguini ex arteriis in venas. Altera est, quia ad motum muscularem majorem & ad sensuum exercitia, major spirituum requiritur quantitas, quam dum hæc non fiunt: voluit enim Omnipotens Deus talem in nobis condere legem, ut, quoties major fit in nobis actio, non deficerent protinus spiritus ad eum peragendum motum: quia vero, neque in cerebro, neque in cerebello receptacula condita sunt, ex quibus usus tempore spiritus depromi possunt, sed continuo ex sanguinis allata massa sunt secernendi; major in motu musculari, & sensuum, exercitationis tempore, requiritur quantitas affluentis sanguinis, quam dum omnia quiescunt, veluti in somno: inde non obscure patet in vigiliis, quando major vel peragitur vel peragendus est motus & sensus, versus caput copiosius ferri sanguinem, quam in somno. Neque alterum assumptum majorem adstruit probabilitatem: ex defectu exercitationis motus voluntarii & sensus statuere velle, sanguinis fluxum per cerebrum inhiberi, nulla valet ratio: hæc quidem arguunt, parcius fluere spiritus per nervos, sed non probant minori quantitate sanguinem per cerebrum transmitti; nemo enim statuit, exempli causa, si in renibus urina minori copia secernatur, quod inde per renes minuatur vel sistatur sanguinis fluxus: quale quoque eadem evidentia argumentum aliis potest organis secretoriis applicari. Qui ex nostra vero *Exercitatione de Motu Vitali* deduci putat, posse motum ad aliquam partem fieri rapidiorem, nulla aliis in locis corporis facta mutatione; atque ita somni tempore arguere velle, sanguinem versus Cerebellum majorem facere impetum, quam in vigiliis, instabili puto niti hunc talo. Si enim conspiciat faciem pallescere, totum corpus laxari, magisque externa frigesce, quandoque sudoribus diffluere, relaxatis cutaneis poris, in contrariam relaberetur sententiam: faciei enim pallor, minorem versus caput, ut rubedo majorem, indicat impetum; refrigeratio promptior minorem indicaret motum vitalem; atque relaxatio fibrarum in cute & toto corpore, quæ solo vitali motu commoventur, abunde testarentur, sanguinem non solum minori copia ferri versus cerebellum, sed & in somno blandiorem spirituum vitalium fieri motum.

Sententia
non solum
refutanda.

§. XXXVIII. Ut autem manifestum fiat, quid nos sentiamus de spirituum animalium & vitalium fluxu, nostra sententia est proponenda, ne persistamus semper in aliorum placitis refutandis, remque ipsam relinquamus dubiam, quod ma-

gis

gis remoratur scientiam, quam si omnino nihil fuisset actum: scopus enim non debet esse aliorum invertere inventa, nihilque deinceps adstruere: talis enim mihi videtur nihilo plus agere quam ut operam det in civitate omnia destruere ædificia, quia non fatis commoda vel nitida constructa, & nulla nova ædificaret; præstantius fuisset eum nihil egisse, quum ejus dumtaxat fuit animus aliena carpere & præterea nihil agere, nisi quod ad detrimentum scientiarum tendit. At in aliorum sententiis difficultates movere, decorum servare, propria sua proponere, nihil obtrudere, rationibus contendere, ut quisque possit eligere, quod ipsi veritati convenire visum est, omnem decere scriptorem autumo. Si vero hinc inde hanc non servavi regulam, ex imprudentia, vel minori attentione, non vero lædendi animo, vel dolo malo fuisse factum, obtestor. Nostra itaque sententia de hoc spirituum vitalium & animalium fluxu est, spiritus animales cerebri in somno, tam blando æquabili & tardo motu fluere per nervos ad motus & sensus organa, ut non sufficiant ad eas functiones peragendas: omnino vero stagnare, vel non influere, nimis arduum videtur, etiam si in corpore dormientis nulla hujus motus pateant indicia: in corpore autem vigilante & quiescente, paulo majori copia fluere, major quum sit ad agendum promptitudo, atque adeo hos spiritus quoque magis consumi, quam in somno quieto; vel æquali fere quantitate quam in insomniis; quamobrem quoque insomniis fatigatus mane surgens, corpus suum sentit defatigatum magis, ac si quietus decumbens insomnem transegisset noctem: In motu autem & sensuum exercitatione, tam internorum, quam externorum, spiritus animales rapidiori fluxu duci versus organa, magisque consumi; hoc non minus in sensuum exercitatione patere, quam motu animali, confido, licet nonnulli putant, spirituum refluxu exerceri sensus, cum in sensuum descriptione multis rationibus firmavi, tam motum animale, quam sensus requirere spirituum fluxum a cerebro versus organum; nos quoque attenta mente accuratius sentire, videre, audire, quasi hæc indicarent actione mentis copiosiores duci spiritus versus ea organa. Quo modo autem id a mente perfici potest, non est hic inquirere, contenti esse possumus experimentis videre, animæ imperio hæc fieri promptiora; alius magis opportunus erit locus hæc perscrutari.

*Spiri-
tuum a-
nima-
lium &
vitalium
fluxus in
somno.*

§. XXXIX. Spiritus vero vitales an in somno tardius vel celerius fluant, quam vigilia, non consentiunt auctores. Cum in utroque statu pergat motus vitalis, spirituum horum fluxum omnino nullum esse quis statueret? Sed qui velociorem motum in somno admittunt, hoc ex pulsu pleniore, respiratione frequentiore & profundiore, largiori perspiratione, & perfectiori coctione deducunt. Sed si verum fatear, cuncta hæc sedulo in dormientibus sanis perscrutatus sum, at pulsum semper inveni paulo tardiolem, respirationem rariorem & minus profundam, perspirationem duplo minorem, quam eodem tempore in vigiliis matutino tempore; qualis fiat coctio supra demonstratum est. Quid ergo certi ex oppositis est deducendum ad spirituum vitalium majorem vel minorem fluxum in somno quam vigilia? Sane nihil. Quamobrem non erit inutile, antequam causa somni examinetur, videre, quid de pulsu, respiratione & perspiratione in somno sit sentiendum. Si possimus ex aliis comprobare, spirituum vitalium motum esse tardiolem in somno, ipse quoque pulsus & respiratio motui huic tardiori respondere debent.

*Spiri-
tuum vi-
tali-
um
fluxus in
somno.*

§. XL. Ex iis, quæ disputavimus supra, constitit motum vitalem in somno minus fortem esse, circulationemque sanguinis tardiolem, seu parcius corrivari sanguinem per venas ad cor, solida omnia laxata, faciem pallere, corpus citius refrigerari: tali ergo nunc in statu, sine actu, si vellem judicium ferre de pulsu, (nam in experimentis est dissidium) nemo inficias ibit in medicina versatus, quin tali in statu judicabit, pulsum esse debere tardum, & æquabilem, cum pulsus agitatio dependeat a motu vitali, semperque minor fiat, si sanguis minori copia fertur ad cor, quod in somno fieri demonstratum est: & quia cum majori sanguinis velocitate semper quoque minuitur corporis calor, in dormientibus nul-

*Motus
vitalis
minor in
somno.*

*Pulsus
minor &
tardior
in somno.*

lum est dubium, quin sanguis tardius moveatur, id probat citior refrigeratio & pallor faciei. Sed plenior & frequentior statuere velle pulsum cum minori sanguinis fluxu & debiliore motu vitali, nullus admitteret. Quare ex ratione patere videtur, eum recte explorasse *pulsum in dormientibus*, qui eum *tardior, molliorem & aequabiliorem* invenit. Nos vero in soporosis & apoplecticis quandoque contrarium experiri, non ignoro: verum in his non est naturalis somni causa: potest enim cerebrum in morbis esse obsessum, ut nullos fere demittat spiritus, dum tamen & in capite & reliquo corpore velocissimus sit motus vitalis: quare hoc non valet ad pulsus celeritatem comprobendam.

*Respiratio
minor
in somno.*

§. XLI. Ex stertore sonoro, & majori molimine in dormientibus, nonnulli fortior, quam in vigilantibus fieri Respirationem, judicarunt; at relaxatis in somno faucium partibus, liber aeris in pulmones transitus non conceditur, minime vero probat, plus aeris attrahi, quod cum sono intret: neque frequentior respiratio in dormientibus probat, majorem fieri Respirationem; Asthmatici enim & Orthopnoici cuncta hæc agunt cum minori Respiratione. Non est quod quaeritur, an in somno vel vigilia fiat frequentior Respiratio, sed an eodem temporis intervallo plus aeris intret & exeat in dormientibus quam vigilantibus. Quia vero, neque ex stertore, neque ex Respirationis frequentia, hoc desumi potest, quod in frequenti & parva Respiratione minus recipi & emitti potest aeris, quam in rariori & profundiori, alia sunt adducenda, quæ evincere possunt, quoniam in statu majorem dici potest fieri Respirationem. Observatur constanti lege, in sanis quantitati sanguinis fluentis per pulmones respondere Respirationem, si profundius spiremus, rarior fieri potest, sed in minus plena Respiratione frequentia compensanda est. Quare motus muscularis major & frequentior, concitatus pulsus, frequentior quoque & plenior exigit Respirationem: & in tussientibus, vel fortius ex voluntate respirantibus, semper quoque acceleratur circulatio. In morbis autem hæc non semper observatur lex; nam in sanguinis visciditate & lentore, cum tardiori circulatione profundior & frequentior fit respiratio, quia talis sanguis majori molimine per pulmones trajici debet. Nonnulli vero eandem hanc legem ad morbos quoque extendunt, dum ex Respiratione de pulsu, quem non tetigerant, ferre voluerunt iudicium; quod quidem sæpius bene successit, cum nunquam in acutis inveni magnam & frequentem Respirationem sine pulsu duro & frequenti. Sed omittamus morbos, in quibus multa fiunt aliena, quæ ad comprobendam, vel evertendam nostram sententiam non multum valere arbitror: sequamur dumtaxat, quæ in sanis contingunt. In præcedentibus demonstratum est, sanguinis circulationem esse tardior in somno quam vigiliis; ex generali itaque lege allegata, minor quoque debet fieri Respiratio. Hoc solum valere puto ad adstruendum, Respirationem in somno esse minorem, sed ad majorem confirmationem sequens adduci potest. Respiratio in nobis duplici fit causa, Vitali sola in dormientibus, & quoque Animali in vigilantibus; verosimile est ergo, has duas actiones in vigiliis plus valere in vigilantibus, quam unica in somno, præprimis si simul animadvertimus demonstratum esse, actionem vitalem in somno esse languidiorem, quam in vigiliis. Imo, si adducere liceret morbos cum difficili Respiratione, magis evidens esset veritas: qui enim obdormiunt Dyspnoea laborantes, statim suffocari videntur, quia solo motu vitali, qui in somno adhuc minus valet, minor transmittitur sanguinis quantitas per pulmones, quam debet fluere ad sanguinis circulationem continuandam: hanc ut levent molestiam evigilare sunt coacti, ut ita major in vigiliis fiat Respiratio.

*Respiratio
par-
cior.*

§. XLII. Non minor videtur occurrere difficultas, adstruere velle Insensibilem Perspirationem dormientium parcior esse, quam vigilantium, quum *Sanctorius* in Medicina statica toties repetiverit, Perspirationem in somno esse largiorem (vide Aph. 307, 308, 312, 324, 325, 361, 365, 398, in Edit. nostr.). Multi deinceps in Arte Medica Viri, quia non licuit ipsa persequi experimenta,

San-

Sanctorum secuti sunt; quare, si regeo, soli Sanctorio adversor, non vero, qui bona fide Sanctorum imitati sunt. Cum Experimentis staticis darem operam, miratus primo resistebam, me tam parvam habuisse nocturnam Perspirationem: de industria itaque repetivi experimentum, sed nunquam singulis horis tanta erat facta perspiratio in somno placido, quam matutino tempore in vigiliis, etiamsi quiescerem: hinc existimaui, vestimenta forsan noctu tantam imbibisse humiditatem, ut inde forsan essem elusus: ponderavi & vesperi itaque & mane quoque vestimenta seorsim, semper tamen detexi nocturnam Perspirationem fuisse parciorem. Quum vero Nostra & Sanctoriana experimenta idem non testantur, lectorque dubius esse posset, quisnam veritatem dixerit, vel ipse capere debet experimenta, ut litem dirimat, vel rationibus, quod ab omnibus commodius est assequendum, est contendendum. Hoc ut relevem, quæ mihi vera visa sunt, adducam. Major est in vigiliis circulationis vigor, majorque sanguinis pulsus versus cutim: spirituum fluxus ad sensum in cute exercendum copiosior: est enim in dormientibus tam parvus, ut non nisi violentiorem irritationem percipiat. His admissis, quæ superius disputata sunt, admittendum est, largiorem fieri secretionem & excretionem, cum paulo majori humorum affluxu in sanis, quam cum pariori; hoc autem non puto ab ullo regei. Sive ergo statuamus, vel ex extremitatibus arteriarum, vel nervorum in cute, fieri Perspirationem, vel utrisque simul, minime dubium est adstruere, quin eo tempore, dum majori copia ad cutim deriventur liquores, major fiat evacuatio, uti in vigiliis. Qui vero insistat, in somno maiorem fieri humorum coctionem, post quam largior debet fieri evacuatio; is simul facile concipit, tunc matutino tempore, quod quoque verum invenitur, largissimam fieri debere Perspirationem; quia tunc perfecta est coctio, non vero dum in somnum labimur. Imo invenimus corpora ad stateram leviora fieri eadem ingerendi & sensibilibus evacuationum quantitate servata, in vigiliis quam somno longiore: quare manifestum est, somnum quidem præparare liquores ad expulsionem, ut infra exponetur, sed evacuationem augeri vigiliarum tempore. Quod vero nonnulli statim ac somnus obrepit sudoribus diffluant, tales non sunt sani, de quibus nostrum est dissidium: aliquod vitium in humoribus contineri posse, quod magna copia effluit, relaxatis in somno cutis poris, non inficior; hoc autem non probat eo tempore largiorem in sanis fieri Perspirationem.

§. XLIII. Somni & vigiliarum omnibus hominibus vicissitudo inevitabilis, a medicis & physicis frequentissime agitata, tam obscuram & latentem fovet causam, ut hucusque vix duo sint, qui consentiant auctores, quæ sit vera somni causa: maximam præbuit investigationi difficultatem causarum in morbis multitudo, quarum nonnullæ omnino oppositæ videntur. Ut itaque aliquid statuatur certi, naturalis in sanis est inquirenda causa, deinceps reliquæ in morbis sunt attingendæ; sed ne in nimis magnam molem excresceret hæc Exercitatio, & ne simul explicentur morbi omnes soporosi, paucis contenti esse debemus. In hominibus sanis post vigiliis oritur somni necessitas, quam aliquamdiu differre possunt, tandem vero quasi somno obruuntur: ex iis itaque, quæ in vigiliis sunt perfecta, & ex signis, quæ tali in homine conspiciuntur, qui somnolentus est, atque denique ex iis, quæ faciunt in sanis, ut somnus hominem corripiat citius, & quæ in somno ipso contingunt, deducendum, quæ sit vera somni naturalis causa.

§. XLIV. In vigilantibus demonstratum est, (VII. ad XIX.) spiritus magis consumi, quam fiat eodem hoc tempore restitutio eorum. In somnolentis, vel qui in somnum lapsuri sunt, (XIX) omnia signa commonstrant, vel deficere spiritus, vel tam tarde fluere, ut nervi minus impleti vigiliis continuare nequeant. Ita dispositus homo, si agitatione corporis, vel sensuum externorum vel internorum, commoveatur, aliquamdiu somnum differre potest, donec tandem

¶ *perfe-
cta quie-
te.*

*Tardiore
spiri-
tuum
motu.*

*Spiri-
tuum
tardior-
motus ex
defectu
materie.*

dem tanta quies inducatur spiritibus, vel tantus defectus, ut quidem, etiam si re-
luctetur, in somnum prolabatur. Aliis vero quam primum sola inducitur quies,
sine multa spirituum consumptione, somnus alieno quidem tempore eos occupat:
quare non necesse semper, hominem defectu spirituum solo in somnum labi, sed
& placidiori quoque inducto motu sanguini & spiritibus. In ipso autem somno
motum animale & sensus nullos fieri, motum autem vitalem blandiorem esse, ex
dictis (XXXIV. & XXXV.) constat. Est ergo tardior spirituum fluxus per ner-
vos ad sensum & motus animalis organa, somni naturalis causa; sive quod spi-
ritus sint exhausti vigiliis antecedentibus, vel aliis morbosis causis; sive inviscati; sive
tardius moti, quiete sensuum & motus animalis; sive intercepti impedito affluxu san-
guinis, vel nervo aliquomodo compresso a quavis causa. Quia tot variis causis, cum in
sanitate, tum in morbis, produci potest, causas remotiores nonnullas examinaturi
sumus, ut pateat quid boni vel mali præstet somnus ex variis his causis productus.

§. XLV. Tardius fluunt spiritus per nervos, si materia, ex qua spiritus confi-
ciendi sunt, minori quantitate sit in allato sanguine, quam ut spiritus in debita
copia secerni possint, qualis in vigiliis requiritur ad continuandum fluxum: parcius
itaque secreti spiritus tardius per nervos fluunt. Multæ sunt causæ, quibus hoc
producitur: in sanis autem ipsæ vigiliæ, atque quam maxime corporis labor & sen-
suum exercitatio; his enim, ut dictum est, plures consumuntur, quam actio no-
stri corporis valet eodem tempore restituere; inde nobis naturalis dormiendi neces-
sitas, ut feriatis functionibus animalibus, regeneretur materia copiosior spiritibus.
Eousque dum sanguis privatus est spirituum materia, sentimus dormiendi neces-
sitate, ut, si aquosus humor deficiat, siti vexemur, & alimentorum defectu, fa-
me laboremus: nondum tamen statim somnus obrepit; si enim, vel agitatione mu-
sculorum, vel sensuum instigemur, ut non concedatur debita quies fluentibus spi-
ritibus, imo in celeriori circulatione morbosa, homo continuat vigilare, etiam si
causa somni sit præsens, defectus scilicet aliquis spirituum: hoc tamen contingit
semper si sanus maneat, ut diutius protractis vigiliis, contra voluntatem veluti so-
mno corripiatur, quo restituitur spiritibus materies. Qui vero contendunt, spi-
rituum defectu hominem non obdormire, quia spirituosam majorem copia assumpta somnum
seu potius soporem inducunt, non capiunt, inter spiritus fluentes per nervos in no-
bis, & spiritus fermentatos, magnam intercedere differentiam, quod alias fusius dis-
putavimus. In morbis autem, quando valida est irritans causa, vel celerior circula-
tio, vigiliæ protrahuntur cum spirituum materiæ defectu. Non obscure hinc patet,
homines laborantes, quando spiritus magis exhauriuntur, proniores esse in somnum,
quam otiosos, modo post labores corpus suum ad quietem componant: hisque so-
mnum longiorem magis conducere ad regenerationem spirituum, quam otiosis.
Quandoque vero nonnullos, post labores nimios, præprimis si non assueti sunt,
dormire non posse, experimur, quia his ita acres nonnunquam sunt facti humo-
res, ut irritando debitam quietem vel blandum motum non concedant partibus;
vel ita exagitatae partes ad quietem reduci nequeant: inde hoc motu turbato,
cum spirituum materiæ defectu aliquo, continuantur vigiliæ, eodem fere modo ac
continuantur vigiliæ, sensuum & motus exercitatione. Tali ex causa, defectu nem-
pe materiæ spirituum, si somnus fiat, saluberrimus est statuendus, tam in sanita-
te, quam morbo, quia tali somno restituitur, quod in nobis deficit. Recte itaque
ab Hipp. dictum fuit, si somnus in morbis juvat, bonum, si non juvat, malum:
nam si a morbo spiritus consumti sint, & ea tunc ex causa homo obdormiat, re-
stituuntur vires; si vero oppressione cerebri, vel alia causa comprimente, in som-
num seu potius soporem incidat, quia tunc somno non aufertur dormiendi causa,
malum est signum, denotat enim cerebrum esse oppressum, & somno non refera-
ri: utilissimus est ergo somnus post vigiliæ & labores. Quid autem somnus præte-
rea boni vel mali præstet, in sequentibus videndum.

§. XLVI. Si naturalis somni causa in sanis ponatur materia spirituum defectus, *Consue-* ob stare videtur, nonnullos ex consuetudine longius, alios vero brevius dormientes, *tudini* sanos permanere non posse: nam in somno longiori abundarent spiritus, in breviori *obtempe-* ri autem deficerent. Verum ita est aliis quoque in rebus peragendis nostrum creatum corpus, ut sese accommodet tam bonis, quam malis tandem, adeo ut, si contra consuetudinem omittantur, mala corpus inde patiatur. Videtur quidem mihi a Summo Opifice inter somnum & vigiliam certam esse natam proportionem, quæ observata, utilissima est habenda generi humano; verum quæ sine multo detrimento aliquantulum alterari patitur: hoc quoque in victu observandum esse nemo dubitat. Licet tamen aliquem facere excessum, vel aliquid detrahere sine subsequenti morbo. Quamvis præstantius est servare modum, qui quum omnibus hominibus omnique ætati non sit idem, non facile est somno & victui certam præscribere regulam, sed aliquid est concedendum consuetudini. Laboribus assuetus non facile fert otium, & otiosus piger est in laboribus ferendis, statimque fatigatur; ventri gulæque deditus non fert inediam; sanguinis evacuationi assuetus, si subsistat effluxus, in morbum labitur. Nimis longum foret cuncta recitare: somnus vero & vigilia huic consuetudini quoque obtemperant: narrant enim de servo recitare horas horologii assueto, eum tandem e somno toties excitari, ac horæ tempus esset præterlapsum, etiamsi sono horologii deinceps non admoneretur. Et quamvis oblectamur, diutius nos dormire velle, si maturius evigilare vel surgere assueti sumus, somnus tamen finito tempore discussus videtur, & qui solitus est meridiari, non sine multa molestia eum somnum depellere potest: ita quoque vespertino tempore monemur, an sit somni assuetum tempus. In his, etiamsi præstantius fuisset, vel longius dormire, vel longius vigilare, vel omnino intermittere somnum, si recedamus a consuetudine pejore, aliquid inde damni per sentimus. Quare non licet protinus a vitæ consuetudine recedere, si sanitatem conservare velimus.

§. XLVII. Quoniam in cerebro cavitas vel receptaculum nullum, quo accumu- *Somnus* larentur spiritus, ex novo allato sanguine per cerebrum sunt segregandi, tanta co- *defectu* pia, ut pleni maneant nervi ad vigilias continuandas; quoties itaque in allato san- *materia* guine, vel ipsi spiritus, vel materia, ex qua cerebrum spiritus conficere debet, deficere incipit; vel si hæc materies ita sit aliis partibus intricata; vel denique ita alienata, ut ex sanguine allata debitam quantitatem conficere nequeat, homo fit somnolentus, & si nulla alia accedat impediens causa, in somnum labitur. An vero in sanguine allato ipsi confecti & puri sint spiritus, ut cerebrum & cerebellum dumtaxat spiritus a reliqua massa debeant separare? an vero adferatur materies cum reliqua massa sanguinis ad conficiendos spiritus apta, quæ elaboranda primum est a cerebro & cerebello, antequam ipsos constituat spiritus? ambigo. Si statuamus ipsos *An spiri-* spiritus omni dote in allato sanguine existere, similitudine rationis statuendum fo- *tus ipse* ret, urinam ipsam, salivam, bilem, ceterosque secretorios humores in sanguine ex- *in san-* stare, quod mihi nimis arduum videtur adstruere; sed organa secretoria, ex alla- *guine.* ta materia huic mutationi apta, conficere spiritus, tenendum esse puto: nonnihil vero spirituum in sanguine allato contineri, qui, absoluta functione sanguini venoso affusi, redeunt, non inficior: maximam tamen partem ex materia, reliquis organis nostri corporis, præcipue pulmonibus, tanquam officina generali, confecta, & ad transeundum in spiritus, actione Cerebri & Cerebelli, adaptata peti, credibile videtur. Hanc materiam sæpe voco *Gelatinosam* sanam nostrorum humorum, *Spiritus* actione vitæ elaborandam, & Cerebri ope in spiritus commutandam. Si ergo in *ex gelati-* somno mediocris sufficiens hujus materiae sit nata copia, evigilat homo, non am- *na.* plius defectu hujus materiae a somno detinendus: si vero diutius continet quiescere, vel superdormiat, tarda in somno & quiete circulatione hæc adaptata materia inviscatur, vel si ipsi adfuere spiritus, reliquorum humorum inviscatione ita

intricantur, ut Cerebrum & Cerebellum non valeat, ex magis inviscata materia conficere spiritus, vel ipsos spiritus ex massa reliqua expedire. Si ergo aggravatur homo his humoribus impletus diutius obdormit, somno non comparantur vires, sed magis fit lassus, iners, caput oppletur crudis; cum vigilare & movere præstantius fuisset, ut ita motu majore resolveretur viscidum. Id in quibusdam quoque observamus, qui mane surgentes multo onere videntur pressi, sed postquam motu corporis, oscitatione & pandiculatione, paulo majorem concitaverunt circulationem, qua concreta, ex longiori præcedenti somno & quiete, pituita solvitur, alacriores & agiliores se sentiunt.

*Somnus
ab opio
& somni-
fero.*

§. XLVIII. An vero Opiata, aliaque Hypnotica & Narcotica, aliquid huic simile in nobis producant, vel inviscando humores, ut spiritus expediri nequeant, vel immutando hujus materiæ indolem, ut fiat spiritibus producendis inepta, vel ipsos spiritus ita degenerent, ut inepti fiant suis functionibus obeundis, non tam solide explicari posse autumo, ut nullum restet dubium: Id perpetuo verum invenimus in his, motum animale & sensum languescere, demum integre cessare, motumque vitalem reddi languidiorem, tandem vero mori hominem defectu motus vitalis. Puto ex his constare, hæc omnia minuere fluxum spirituum; sive hoc faciant immutando, sive cohibendo, asserere nequeo. Hoc autem inde sequitur, tunc horum usum desiderari, si motu majori humores compacti sunt, exigentes tardiolem motum, ut blandiori motu præparetur spiritibus materies, ne continua majori agitatione nimis exhauriantur vires.

*An so-
mnus a
compressi-
one ar-
teriarum
in cere-
bro vel a
sanguini-
is majore
repleto.*

§. XLIX. Somni naturalis causam, quam nos in spirituum defectu, vel ejus materiæ gelatinosæ, locavimus, alii quæsiwerunt in nervorum compressione per vasa sanguinea sanguine turgescencia: quoniam major arteriarum propago fertur supra tertium cerebri nervorum par, oculos motorium dictum, quod ex internis, postremis & fere imis lateribus crurum medullæ oblongatæ, oritur: & arteriæ cervicalis propago accumbit pari sexto, abducente dicto, quod triplici furculo ex ima protuberantiæ annularis crepidine emergit. Hi nervi una exeunt cranium per idem foramen, atque toti orbitæ oculorum impenduntur. Requiritur itaque ad somnum naturalem inducendum, sanguinis copia major ad cerebrum delata; at quoties eo fertur sanguis majori impetu, vigiliæ infestare solent, blandus autem sanguinis motus per arterias somno conducit, quia celerior motus semper concitatur, majorque in arteriis sanguinis accumulatio, si vigilandum sit. Si hæc ponatur causa, explicatum quidem esset, unde tanta oculorum gravitas, minime vero quamobrem totum corpus amittit sensum & motum, nisi demonstraret anatomicus, omnes nervos ab arteriis accumbentibus comprimi, quod adhuc factum fuisse non intellexi. Non ergo ex his satis sufficiens argumentum deduci posse autumo, ut stabilitam nostram sententiam repudiarem. In morbis autem a violentissimo sanguinis versus caput impetu, post delirium vel phrenitidem, sopore corripì posse hominem, si totum cerebrum nimia copia sanguinis ita sit inundatum, ut fibræ nervosæ copia sanguinis majori compressæ, vix quidquam transmittant, non ignoro; hoc quoque ab aliis liquoribus in cranio contentis fieri, non est mirum in morbis observare; verum tam violentam causam in somno naturali quærere, nimis durum mihi videtur: cum potius invenimus, dum somnus obrepit, motum sanguinis compesci.

*Somnus
ex defe-
ctu san-
guinis.*

§. L. Quare defectu sanguinis appellentis Cerebrum, somnum inchoari credibilius fore reor, cum post magnas evacuationes, nisi remaneat major causa stimulans, toties somnolenti fiunt homines, atque in homine quiescente, sine ulla sensuum agitatione, somnus citius obrepit; quia ad inducendum somnum sanum blanda sanguinis derivatio requiritur ad caput, ut ita pariori copia sanguis ad cerebrum delatus, spirituum tardiolem & æquabilem fluxum concedat, qualis in dormientibus sanis requiritur. Conducit itaque his causis, quæ sine evacuatione quietiorem motum sanguinis inferunt, ad somnum conciliandum imperare, quando spiritus sunt exhau-

*Quæ so-
mnus*

sti,

sti, motu vitali vel animali antecedenti, vel sensuum exercitatione: qualia sunt somnilitudo; quies perfecta musculorum & sensuum; inversio cogitationis levi susurro, grato & moderato cantu, lectione præprimis eorum, ad quæ nulla requiritur attentamens; aquarum lenia murmura; quandoque, ut in pueris, cunarum agitatio.

§. LI. Multi post pleniorē Cœnam vel Prandium videntes hominem somno corripī, in hanc sunt lapsi sententiam, vel evaporatione alimentorum cerebrum obnubilari ex ventriculo assurgente; vel oleositate alimentorum nervorum poros obturari, quominus libere fluere possent spiritus. Sed quia ex anatomicis constat, Œsophagum esse clausum, nihilque sursum transmittere, quin fiat sensibilis eructatio, vel vomitus; & quæ in faucibus veniunt non attingere cerebrum, non erit opus multis hanc invertere sententiam: præprimis cum physiologicis abunde demonstratum sit, alimenta ignis actione non in ventriculo coqui, sed potius macerari: quare non tot halitus & vapores ex ventriculo eleventur, ut veteres putarunt fieri, decenti similitudine aquæ ebullientis. Neque *oleositas Alimentorum* plus valet statim post assumptionem obturare nervos e cerebro natos, quia oleosa, antequam cerebrum attingere possunt, absorberi debent, ut ita una cum reliqua sanguinis massa ad cerebrum ferantur: hanc autem absorptionem tam prompte fieri non posse, probant experimenta in tubulis capillaribus cum oleo vel alia pinguedine institutis; pingua enim, servata sua indole, non intrant minutissimos canaliculos intus humore aquoso humidos, uti sunt oscula venarum absorbentium in nobis; quare, ut pingua intrent lactea vel absorbentia venosa interveniente nostrorum humorum saponacitate, sunt invertenda, quo fiunt aquosis miscibilia: hoc autem tam cito fieri omne post assumptionem, ut homo reddatur somnolentus, nemo credere potest in physiologicis versatus. Sed vinosa aliaque alibilia humoribus nostri corporis miscibilia, quæ statim ac ingesta sunt, absorptioni apta sunt, tale quid præstare posse venosius est, quia experimur vinosa brevi tempore post ingestionem inducere ebrietatem. Quare videtur aliam ob causam induci somnum ingestione alimentorum pinguium, quam vinosorum. Credibile est vinum spirituosum sua virtute, qua gelatina nostri corporis coagulatur, ut fidem facit Alcohol albumini ovi mistum, in principio stimulo suo irritare partes nervosas, quo instigatur circulatio, & vires corporis apparent robustiores factæ; dein vero nimia sua quantitate ita invertere spirituum materiam, ut, etiamsi pergat stimulare, defectu spirituum reddantur inepti ad motum persequendum, sed titubant, tandemque apoplectici fiunt, aut sopore opprimuntur. Ad alimenta vero, magna copia in ventriculo congesta, videtur natura copiosiores ducere spiritus, ut subigantur, quod non infrequens est videre, cum sensus exerceantur, eo versus determinari copiosiores spiritus, aut si motu vitali quadam in corporis parte major sit peragenda actio, quæ est quoque ratio post cibum sumtum parciorem fieri perspirationem, quia a cute versus ventriculum major fit spirituum vitalium directio. Quare mihi videtur in stomacho pleno, cum eo ferantur spiritus vitales majori copia, ad reliqua organa animalia parcius fluere, atque ita tardiori spirituum fluxu ad sensum & motum animale peragendum, hominem ad somnum componi. Si vero statuatur ab absorptis particulis nutritiis aliquantulum spirituum secretionem in cerebro retardari vel impediri, huic quoque assentiri possem sententiæ; forsitan utrumque simul fit. An vero conducat post cibum dormire vel vigilare in sequentibus examinare restat.

§. LII. Præter has ab auctoribus multæ aliæ adferuntur somni causæ, quas omnes examinare haud congruum videtur; ex iis veritati propius accedit, sanguinis reditum per venas somni causam esse, (nam a cerebri collapsu, inhibita caloris innati communicatione somnum produci, non erit operæ pretium exagigari hominem. At alia est in morbis quam sanitate ratio: non inficior in anginosis aliaque suffocatione, si reditus sanguinis e cerebro inhibeatur, soporem fieri;

conci-
liant.Cur a ci-
bo sum-
pto.An ab ab-
undantia
vaporis.An ab
oleositate
alimen-
torum.Cur vi-
nosa so-
mnium
inferant.Ab impe-
dito redi-
tu san-
guinis e
capite.

sed tale quid in sanis & naturali somno contingere nullum mihi patet indicium. Hoc præprimis videtur fieri a ventriculo pleno comprimente venam cavam vel portarum; verum tunc in inferioribus partibus colligeretur sanguis, minime vero in cranio, ubi potius fieret ab hac causa defectus: quamobrem quoque non est credibile, ex majori sanguinis copia in omnibus venis collecta, naturalem fieri somnum, cum in celeriori motu, ut in vigiliis, sanguis magis accumulatur in arteriis, quietis vero & somni tempore in venis & vasis lateralibus; quia sanguis in circulum actus ob majorem ad extrema arteriarum resistantiam, si celerius moveatur, inter motorem generalem cor & hæc extrema colligi debet: tardius vero motus sanguis, quia sat temporis habet ad trasfluendum, comparative minor remanet in arteriis quantitas, quam in venis: inde cum celeriori motu sanguinis partes rubent distentis vasis arteriosis cruentis, ut & Lymphaticis; quæ rubedo evanescit compescito motu.

Somni
Differen-
tia.

§. LIII. Post somni expositas causas, explicandi essent effectus, sed quia hi differunt in somno vario, differentia somni est primo exponenda: Est enim somnus suavis tranquilluss, solitum tempus perdurans, qui moderatus dicitur; recedit ab hoc optabili modo somnus minor, seu qui non perdurat ad debitum tempus, cujus effectus ex vigiliis intelliguntur: oppositus huic dicitur somnus longior. Qui partitis vicibus absolvit integrum suum tempus, vel non satis diu continuatur, ad somnum interruptum, tumultuosum, inquietum, vel turbulentum potest referri. Denique differt quoque somnus diurnus & nocturnus; quo pertinet somnus meridianus.

Somni ef-
fectus.

§. LIV. Ex iis, quæ in somno moderato fiunt, superius recensitis deducendum, quid boni præstat in nobis. Dum solus motus vitalis æquabilis exercetur in somno, isti spiritus, qui actione animali alias in vigiliis absumuntur, colliguntur; quare corporis recuperantur vires, & acuitur ingenium, præprimis si studio severiori fuere consumti spiritus. Et quia motus vitalis est placidior & æquabilior, solidaque minus tensa, humores a præcedentibus vigiliis condensati relaxantur, secretionibus & excretionibus adaptantur, quod veteribus dicitur *Coctio*; quare ad insensibilem perspirationem præparantur, non vero expelluntur copiosius, ut supra disputavimus; sentitur tamen homo levior ob auctas vires, non vero ob minutam humoris quantitatem: ex eadem quoque causa humectantur solida, copiosior fit matutino tempore difflatio, lenitur sitis, colliguntur humores tardius moti in cellulis pinguedinosi vasisque lymphaticis, minuiturque quantitas ita in arteriis & venis majoribus; quare post somnum placidum venæ detumescunt, sed accumulatur pinguedo, quæ quoque blandiori hoc motu minus expellitur ex oculis suis, minusque consumitur: inde multa animalia sine victu diu obdormire possunt, imo pinguescunt. Uniri autem calorem influentium innato per placidum somnum judicarunt veteres, quia homines tunc magis, quam post vigiliis, incalescunt; id vero copię majori spirituum adscribendum esse puto, quorum actione valida in nobis concitatur calor naturalis.

An pro-
moveat
alimen-
torum co-
ctionem.

§. LV. Meretur inquirere, an etiam somno placido promoveatur ciborum in primis viis coctio, cum de eo sæpe medici rogantur sententiam, num post cibum sumtum sit obdormiendum vel vigilandum, quiescendum, vel movendum corpus? Ut alimenta assumpta convertantur in bonum cruorem, reliquosque humores nostri corporis, id actione corporis nostri est perficiendum; spontanea enim alimentorum commutatio semper tendit in corruptelam: igitur nihil aliud quærendum est, nisi quod examinetur, quo tempore vel somni vel vigiliarum major fit in assumpta alimenta actio, ea enim major citius convertit assumpta in nostros humores; debilior vero & minor actio magis prona est ad spontaneam alimentorum corruptelam, minus enim tunc a nostri corporis actione patiuntur ingesta. Sed ex iis, quæ superius recensita sunt, patuit per vigiliis multo majorem fieri in nostro corpore actionem; hoc itaque tempore citius convertuntur alimenta, quam in somno. Quando igitur cita requiritur alimentorum subactio, vigiliæ sunt imperandæ, ad tardiores subactionem somnus. Sed an expediat cito ut subigantur alimenta vel tarde, alia est

ratio: requiritur enim tempus ad maturationem, ut ita bene cocta ingesta deferantur in massam sanguinis; si vero nimis cito actione musculari in vigiliis deferantur alimenta semicruda in sanguinem, ab iis id non potest expectari, quod corpus habuisset ex bene cocto in primis viis cibo. Quare si expedit evacuare ventriculum citius, vigiliæ & motus essent imperanda; si vero mora diuturniori perfectior maturatio desideratur, superdormiendum est: atque hæc maxime a consuetudine dependent, ut certa regula, quid sit agendum omnibus hominibus, præscribi nequeat; si enim tanta est virtus in organis chylopoieticis, ut sine adjumento motus animalis subigant ingesta, somnus post cibum & bene concoquit, & plus nutrit corpus; si vero debilior sit harum partium actio, ex superveniente spontanea corruptela, aggravantur primæ viæ, malæ nascuntur qualitates, & reliquum corpus inde nihil emolumenti habet. Hoc ut cognoscamus, observandum in homine, qui talia exigit, an post somnum se sentiat agiliorem, promptiorem, magisque roboratum, an vero lassum, flaccidum, inertem, oppletum; ex his tunc facile est intelligere, num talis homo superdormire vel vigilare debeat.

§. LVI. Ex his quoque possumus dormiendi definire tempus, quoniam tempore & quamdiu in somno continuandum, ut optima conservetur sanitas. Nox a Deo videtur somno data, quamvis nonnulli eam pergræcando vel lucubrando transigunt, diem vero & auroram somno tradant: hi vero semper, licet assuescunt, tandem experiuntur, sanitati minus conducere, quam dormire noctu. Quare medici in imbecillis & valetudinariis semper suadent mature lectum petant, quia invenimus hoc tempore, si dormiant ægri, citius recuperare vires; id autem a sanis esse quoque faciendum autumo, ut diu servant sua corpora integra. Somnum meridianum post prandium conducere vel nocere non consentiunt physiologi & medici, quisque prout in suo experitur corpore imperat & præcipit, quasi is solus esset regula omnium. Hipp. præcipit, *Confert in æstate somno uti brevi, non multo, ut ne corpus ab anni tempore resiccetur.* Atque Celsus, *Longis diebus meridiari potius ante cibum, sin minus post eum.* Si quis autem meridiari sit solitus, non sine molestia & reluctatione hanc diei partem insomnem transigit: si tamen resistet, reliquam diei partem inertia & capitis gravitate vexatur: huic itaque conducit meridiari ad sanitatem conservandam, præprimis si sit infans, puer, vel senex, quoniam hi longiori somno egent. Inconsueto autem constantis ætatis, si meridiatur, magis delassatum & onustum erit corpus, nisi nocte præcedenti non satis dormiverit. Est itaque meridiatio quibusdam bona, aliis vero non suadenda; hoc ex consuetudine, necessitate, vel ætate varia deducendum, cui proderit vel nocebit ad sanitatem conservandam. Consuetudini autem multa esse concedenda, etiam si mala sunt, non solum in somno & vigiliis, sed & omnibus aliis in rebus non naturalibus experimur: quare assueto concedenda meridiatio, qui vero non assueti sunt, modo nocte satis dormire possunt & sunt sani, non est opus, ut hanc bonam diei partem somno tradant, relinquentes magis necessaria negotia. At infantibus & pueris atque senibus omnino concedendum, ut & imbecillis a morbo reconvalescentibus, quia eorum corpora spiritibus exhausta, vel minus valentia, sufficientem spirituum copiam conficere, longiori somno indigent; quo parcius iterum in vigiliis absumuntur: sed quia somno continuato longiore, ut patebit, tandem inviscantur, quæ somno moderato confecta sunt, non erit inutile post meridiem obdormire, ut interpositis vigiliis intercipiatur liquorum inviscatio. Multum quoque laborant physiologi in definiendo somni longitudinem, alii quinque, alii sex, octo, imo decem horis dormiendum esse definiunt; sed quia non omnibus idem est vitæ genus, roburque corporis, senes atque pueri longiori egent somno, non potest somno certum adscribi tempus, sed observandum, cui sanitas magis quam otium vel desidia est cordi, quo tempore somni magis se sentit levatum, alacrem, agilem & robustum: istud igitur eligat temporis spatium vel longius vel brevius:

Quamdiu somno indulgendum.

Quando dormiendum.

Somnus meridianus.

in genere vero observatur, in constanti ætate ultra octo horas decumbere segne fieri corpus; minus vero, quam sex horas dare somno, corpus enervari. Si quis putat ei, qui somno breviori utitur, plus temporis esse agendi, quo nonnulli gloriantur, sed paucis datum est reliquum tempus omne vel laboribus vel studiis sine interposita quiete dare operam: quod si tamen conantur tam diu studiis incumbere, tandem se ad percipiendum sentient ineptos, corpusque debilitatum. Quare ad excolenda studia literarum, & conservandam sanitatem, quotidie sine ulla intermissione, de die dare operam studiis quamdiu ferunt vires, vel sensus interni non hebescent, magis conducit, quam de die otiosi, noctu vero lucubrare; uno tempore & nocte & die omnes intendere vires, alio vero omnino nihil agere: ita enim non comparatur solida scientia, & magis enervantur vires. Etiam si tales putant se multo plus efficere, quia tam longum impendere studiis tempus, ut quidem omnino fuerint defatigati, quam qui quotidie modo sex horas dant studiis, senique & vegeti vivunt, autumo tamen si agendorum temporum fieret calculus, eum qui nullum transigit diem, quin lineam duxerit, maxime excellere, multoque maiorem fecisse sine virium detrimento progressum, cum magis valeat omne id tempus utiliter impendere; dum vero alter multum deterit sine fructu, quia tandem longiori labore continuato hebescit.

Quid ante
te somnum
facien-
dum.

§. LVII. Quæ ante somnum sint agenda, inquirunt nonnulli, num scilicet comedendum, atque ita ventriculo pleno dormiendum, vel jejunandum, ut in somno ventriculus sit vacuus. In his quoque consuetudo consulenda: qui enim præter consuetudinem omittunt cœnam, vel ea utuntur, utrique somno interrupto vexantur; qui vero consuetudinem sequuntur, placide dormiunt. Si vero nulla sit consuetudo, quid tunc expediat, non consentiunt. Antequam vero aliquid est eligendum, quoniam in corpore sit omittenda cœna, videbimus. Qui in præcedenti prandio excessum fecit, satius est omittat cœnam, ne multitudine alimentorum obruatur, vel parum admodum comedat & levis materiæ. Qui vero impransus negligit cœnam, defectu alimenti nox ipsi erit implacida, corpusque post somnum erit imbecillius: quapropter ante somnum cibum sumere oportet, si sit alimenti in corpore defectus, ceteroquin satius subtrahere, quia alimentorum prima coctio, ob defectum motus animalis in somno tardius peragitur, naturaque plus elaborandum habet in somno, quo minus iusto ad spirituum confectionem hoc tempore impendantur vires; & ingesta alimenta frequentius in ventriculo corrumpuntur, defectu motus in somno, quam vigiliis.

Qualis
decubitus
in somno.
In latus.

§. LVIII. Reliqua quæ restant in somno agenda paucis complectar. Primum est ipse *Decubitus* in latus vel dorsum vel ventrem. Videtur decubitus in *Latus*, corpore, membrisque aliquantulum incurvatis, ceteris præstare, quia tali in statu omnes muscoli in æquali dispositi sunt protensione, dum in reliquis alius præ alio magis sit tensus, quod semper obest æquabili circulationi per omnes partes. In *Dorsum*, quia membra magis porrecta, & ingens cerebri moles cerebello incumbit, decubitus, si fieri possit, evitandus: tunc enim septum duræ matris, inter cerebrum & cerebellum, laxius, non valens totam sustentare cerebri molem, facit ex cerebelli compressionem motum vitalem impediri, inhibito spirituum vitalium effluxu; unde respiratio in somno sæpe molestior; incubus & succubus: in morbis autem, si in *Dorsum* jaceat æger, quandoque malam prognosin exhibet, debilissimi enim semper tali modo decumbunt; quando itaque in latus conversus sponte relabitur in dorsum, manibus pedibusque negligenter disiectis, mentoque elevato vel in pectus depresso, quia hoc ex debilitate maxima oritur, cum muscoli non amplius valent sustentare corpus, summum periculum indicat, non quod talis decubitus ægrotis aliquid adferat mali, sed quia indicat vires exhaustas esse. In *Ventrem* nonnulli ex consuetudine decumbunt: tunc nihil boni vel mali præstatur; præstantius autem est in latus dormire; si vero quis non est

Ventrem.

assue-

affuetus tali modo decumbere, denotabit in morbis cum delirare, vel ventris dolore, aut anxietate laborare, ut ita huiusmodi decubitu premat ventrem ad levandos dolores & anxietates; quod utile est scire in praxi, fidem enim facit, si medicus ex decubitu possit scire ægrum aliquo ventris morbo laborare. Rogamur quoque sæpe quid præstantius *capite vel pedibus magis elevatis decumbere*; hic multum valet consuetudo, sed hæc si non intercesserit, eligerem in sanis decubitum cum capite magis elevato, quia in somno non propelluntur humores actione animali, atque languidius motu vitali; quare propria sua gravitate inferiora loca magis occupant: quando itaque caput declive jacet, sæpe post somnum ita reperitur humoribus oppletum, ut sensus torpeant: quod deterius est, quam ut major humorum copia in ventre inferiore vel pedibus collecta sit: fidem facit observatio in debilibus, qui non sine multa molestia decliviorum decubitum sustentant, imo orthopnoici in lecto coguntur omnino erecto corpore dormire præ suffocationis metu: in syncope autem, ex nimia sanguinis vel aliorum humorum evacuatione, eligimus horizontalem decubitum, ne in capite deficeret sanguis: sed talis corporis positura non probat hominem dormire debere in situ horizontali; nam, quam primum ac ille evanuit timor defectus sanguinis, ipsi ægri deinceps elevatori decubitu levantur.

§. LIX. In somno alterum est quod quærunt: *num stragulis multis, vel paucioribus corpus tegendum?* & an expediat corpore denudato dormire. Æstate & in aere calidiore paucioribus stragulis corpus tegendum esse, quam hyeme & aere frigidioribus, unusquisque intelligit; sed an pro ratione tempestatis plura vel pauciora stragula sint adhibenda, quam fert communis consuetudo, inquirendum: deinceps videndum, quid facit dormitio corpore omnino nudo. Calefacientem causam esse in nobismetipsis, actioneque vitali suscitari, alias demonstravimus; quare plura aggesta stragula sua virtute non excitant calorem, sed quia inhibent externam refrigerantem causam, corpus per se magis incalescit: quando itaque hoc modo in nobis excitatur calor major, quam in sanis requiritur, vel minor, in utrisque male agimus, cum in modico calore omnium optime præparentur humores: itaque tot sunt apponenda stragula, ut homo dormiens in mediocri servetur calore, hyeme & in debili motu vitali, plura; æstate & in valida circulatione, pauciora: si enim febre acuta, variolis, morbillis, aliisque morbis laborantem multis stragulis cooperias, nimis cito ad putredinem disponuntur humores: si in chronicis, debilibus, frigidisque morbis stragula detrahas, ita refrigerabitur homo, ut inviscantur humores, & quandoque in remotioribus partibus stagnent. Sed nudo corpore dormire, etiamsi aer sit calidissimus, semper damnum infert: statica experimenta docent, prohiberi insensibilem perspirationem, forsitan quia aer nudus, auferens humidam atmosphæram, poros cutaneos resiccando constringit, & refrigerando (quia exteriora in somno sponte semper magis frigida sunt quam in vigiliis) incrassat, & stagnare facit humores in cutis porulis.

§. LX. In somno *conducit totum corpus quiescat*, ut restitutio fiat deperditi a præcedenti motu musculari & sensuum exercitatione: quæ quies, si sponte sua obtineri nequit, medicamentis hypnoticis, aliisque auxiliis, non raro est in morbis comparanda, qua virtute Opiata & Papaverina vires sæpe videntur addere; minime credibile est in his, aliquid spiritibus nostris analogum esse, quo restituerentur vires. Hoc qui concipit facile prævidere poterit, non omni in morbo conducere hypnotica: si enim ex motu minori acrimonia sit nata, vellicatione sua somnum intercipientes, post hypnoticorum usum in deterius ruunt; quia per quietem inductam non tollitur id acre, quod ex minori motu fuit natum, imo magis adaugetur: hoc experiuntur illi, qui ad levandum dolorem ex acrimonia frigida, ita tandem opio assuescunt, ut deinceps tota vita eo uti cogantur, morbumque incurabilem reddant. Sed post eductum vel subactum acre, si persistent vigiliæ, somnusque interruptus, quia motus in corpore concitatus, una cum educto acri non semper compescitur, ut docent vulnera, ablata vulnerante causa, ad

Quot stragulis cooperiendum.

Conducit quies.

hypno-

hypnotica frequentissime est confugiendum, quæ tunc egregium adferunt solamen, & sine quibus non raro nulla subsequitur curatio. Si vero ex motu majori versus caput intercipitur somnus, vel quia acre ex majori circulatione natum instigat, cum aliis auxiliis hypnotica, quæ quietem artificialem inducunt conciliatur somnus, & materies irritans, ad concoctionem ducitur, seu materies, majori antecedenti motu compacta, nunc per inductam quietem relaxata, excretionibus adaptatur.

Somnus
inquietus.

§. LXI. Uti *somnus* placidus conducit, ita *interruptus, inquietus, crebraque in lecto agitatio* noxia est sanitati. In his ad duo attendendum. 1. ad naturam somni interrupti; 2. ad motum muscularem tempore somni. Qui somno inquieto agitur, is in corpore suo causam fovet sanitati alienam, quæ placidum somnum non admittit; quare ut signum mali latentis, interruptus & implacidus somnus nihil boni portendit: & quia in somno tali non perficitur naturalis spirituum, eorumque materiæ, præparatio, corpus languet, enervatur, & accumulatur cruda, somno placido subsequente elaboranda. Motus muscularis in crebra agitatione, tempore somni, spiritus consumit; atque materies gelatinosa in corpore quiescente & somno placido conficienda, non præparatur: hinc redditur quidem corpus ad stateram levius, sed & simul amittit vires.

Insomnia.

§. LXII. *Insomniis agitatus, licet corpus aque, ac in somno placido quiescat, somni effectum utili destituitur.* Quibus de causis excitantur in nobis insomnia non est hujus loci inquirere, sufficiet observare in Insomniis menti repræsentari similes fere ideas dormientibus, quæ nobis vigilantibus contingunt, ut plurimum tamen magis confusæ. Observamus quoque, ex terrore in Insomniis totum corpus turbari, tam in motu vitali, quam animali, fieri quandoque ejulatus, exclamationes, agitationes membrorum, fere eodem modo ac in vigilantibus terrore percitis. Ex his inferre licet, quamvis non exposita sit insomniorum causa, Insomnia, quæ in sola cogitatione satis placida versantur, non multum distare in effectum consumendorum spirituum, a cogitatione vigilantium: quæ vehementer vero animum commovent, eadem fere mala producere, quæ ex terrore vigilantium oriuntur. Inde Insomnia, quoad spirituum consumptionem, comparari possunt meditationibus, aliisque vigilantium mentis & corporis exercitiis. Unde Insomniis vexatus magis se debilitatum sentiet, quam placide & sine Insomniis dormiens.

Somnus
post animi affectus.

§. LXIII. *Animi affectu* vexatus, qui ita cubitum, somno brevi & implacido affici solet, & pro varia pathematum natura, diversos patitur effectus: nam *maerentes, timidi, tristes*, quia his fit tardior circulatio, morbis ex cruditate natis afficiuntur: *Iracundi gaudio profuso vel pericharia* agitati, ob majorem circulationem & somnum interceptum, defectu spirituum & humorum laborant, atque emaciantur: mediocris vero *latitia* & coctioni & somno conducit.

Somnus
inquietus
quid faciat.

§. LXIV. Ex iis, quæ dicta sunt, facile erit deducere, quid mali facit *Somnus interruptus, tumultuosus, inquietus, turbulentus*; talis enim fit semper a mala causa, naturalem vicissitudinem somni & vigiliæ perturbante, atque omnes effectus bonos, a placido somno expectandos, intercipit: quare, siue respiciamus ad causas, siue ad effectum hujus somni, nihil boni promittere possumus; nam *in acutis delirium portendere solet*, quia in his indicat tanto impetu sanguinem ferri ad cerebrum, ut debita quies, vel moderatus motus, qui ad somnum capescendum requiritur, non conceditur; inde tandem, perdurante hoc motu majore, æquabilis in cerebro circulatio turbatur, quo delirat homo: vel proveniunt vigiliæ hæc ex morborum acutorum materia versus cerebrum delata, aut levi inflammatione vel erysipellate meningum: quæ utraque frequentissime delirium concitant. *In debilibus mortem prælagit*, quia homines ex defectu spirituum debiles sunt, qui si non restituuntur, maxime in acutis, per somnum placidum, verendum est, ne tandem ex majori spirituum defectu succumbat homo: etenim in debilitatis ex acuto morbo adest somni causa, defectus scilicet spirituum; si tamen somnus non fit,

de-

denotat malam irritantem latitare causam, quæ, & per se, & quia non conceditur somnus, omnem spirituum confectionem intercipit. *In robustioribus morbi longitudo, coctionis & crisis perturbationem*: cum morbi acuti materies vi vitæ est superanda & eliminanda, hæc vis somno interrupto debilitata, minus efficax erit ad ea præstanda, seu longius infumitur tempus, antequam materia est subacta & expulsa. In quibusdam *Convulsionem* prælagit, quia ex eadem causa, quæ somnum cohibet, hic quoque morbus concitatur, atque ex somno perturbato, neque humorum elaboratio est expectanda, & magna virium jactura.

§. LXV. Neque *somnus nimius* laudandus semper, nisi fiat ex bona causa, ad restituendos spiritus vigiliis vel laboribus consumptos; nam si cogatur homo diutius dormire, quando cerebrum multa pituita vel lymphæ in ventriculis cerebri hærente, ita sit oppressum, ut homo fere semper sopitus jaceat, timor est, ne in apoplexiam vel lethargum transeat, & interimat hominem: si vero ex voluntate somno nimio indulgeat aliquis, quia tunc tardior est circulatio, omnia insuper accedunt, quæ ex minori motu sanguinis & corporis quiete nimia provenire solent, pituitæ nempe generatio & accumulatio, insensibilis evacuatio parcius, sensuum hebetudo, functiones languidæ, morbi catarrhosi frigidi, capitis gravitas, corporis oppletio, frigus, solidorum laxitas, sed vita diu sine cibo sustentari potest, quia parum consumitur. Quibus vero medicamentis nimius inducitur, ut opio, papavere & similibus, & a quibus causis morbosus generatur nimius somnus, non est huius loci inquirere.

§. LXVI. Quæ hucusque tradita sunt de somno & vigilia, demonstrant non solum corpus ita creatum esse, ut alterna somni & vigiliæ requiratur vicissitudo; non omnibus hominibus esse æqualem; vigiliis spiritus consumi & eorum materiem, somno vero restitui: hominem paulo longioribus vigiliis magis debilitari, quam somno prolongato; somnum autem & vigilias modum excedentes obesse sanitati; somni causam in cerebro quærendam; sanguinem non accendi ut multi contendunt, sed potius temperari; somnum hominibus aliisque animalibus esse utilem; in vigiliis perspirationem esse largiorem quam in somno; oculos lachrymosos, carnes frigidas, lassitudines, brachia defatigata, sudorem frigidiusculum post somnum, denotare, in præcedenti somno spiritus non sufficienter fuisse regeneratos; pulsum frequentiores esse, seu sanguinem velocius fluere in vigiliis quam somno; effectus nimii somni quieti, vigiliarum autem motui majori corporis comparari utcumque posse.

EXERCITATIO MEDICA TERTIA.

D E F A M E.

§. Q Uum actione perpetua vitali nostrum corpus, tam quoad fluida, quam firma, se ipsum destruat, inevitabili necessitate devincti sumus, ne pereamus, nutrimentum quærere, quo suppletur istud amissum vel alienatum: eo etiam si fruatur homo, morte tamen senili exstinguitur, sed in prole sua quasi reviviscit; hoc nisi fieret, unica ætate totum genus humanum esset deletum, quasi nunquam exstitisset: huic itaque Dei benignitas prospexit proles generatione, ut longa annorum serie, in hoc mundo, essent homines, qui miranda ejus opera contemplantur.

§. II. Nutrimentum, quo utitur homo, quamdiu vivit, ad tria genera referri posse censeo, ad *aerem* scilicet, *aquam*, & *cibum*. Hæc, ut ordine sequantur, majorem minoremque ad vitam conservandam necessitatem habent: vix enim pro momento aere carere, diutius autem potum differre; sed longissime supervivere potest

potest omni destituto cibo solido. His quoque adjicere possumus, ad vitam conservandam, certum caloris seu frigoris gradum. Non autem omnibus his ita addicti sumus, ut ne latum unguem recedere liceat, quin periculum immineat, quum in paulo majori & minori calore, atque paulo pleniori & pariori victu, homo tamen sanus vivat: sed aeris magnam non fert differentiam.

Aer præbet nutrimentum.

§. III. Aerem cedere in nutrimentum multa sunt & varia experimenta, quæ comprobant; quippe urinatores, vel animalia perfecta vase quodam inclusa, ita ut omnis externi aeris commercium sit interclusum, non solum moriuntur; sed & magnam aeris elastici quantitatem consumunt, ut docet barometrum tali in vase simul artificiose locatum: post mortem autem sensim redditur aer elasticus, atque barometrum iterum ascendit. In dubium ergo vocari nequit ab animali vivente aerem elasticum & gravem consumi; an vero cedat in nutrimentum, alia res est, quæ in hac exercitatione non est disputanda; contenti erimus asserendo, hanc consumptionem requiri quamdiu vivit animal, quæ si fieri nequit ulterius, moritur omne animal perfectum & homo. Antequam vero perit, quandam molestiam intolerabilem, vel anxietatem vix explicandam, percipit, quam omni nisu conatur evitare. Talem Providens omnium rerum Creator fidelem nobis dedit monitorem, qui quasi lætatur, & nostris sensibus suaviter blanditur, dum capimus a rebus externis emolumentum; sed molestissimam sæpe, vel intolerabilem ingratitudinem nobis adfert, cum res externæ, quibus uti debemus ad conservandam vitam, interitum minantur.

Quas aeris mutationes facile & difficile est.

§. IV. In Aeris usu magna est observanda differentia; nam brevi admonemur in non renovato aere de instanti interitu; sed diutius ferre possumus majorem & minorem aeris aperti pressionem, ut fidem faciunt experimenta barometrica; sed adhuc omnium facillime caloris in aere mutationem; caloris autem & frigoris excessus non sine molestia tolerari potest; certum autem gradum utriusque limitare non caret dubio, cum sensim inducti caloris & frigoris excessus tolerabilior sit, quam subito inductus: consuetudini quoque multum cedendum, cum septentrionalis populus majus fert frigus sine molestia, quam qui in regionibus fervidioribus nati sunt; & mutatio climatis utrisque damnosa.

Sitis cur data.

§. V. Post aerem, quem omni momento haurimus, sequitur aquæ usus, sub qua omne genus potionis complector: multo enim longiori tempore fert homo aquarum penuriam, quam aeris: sed tamen tam diu nequit sine potione vivere, quam sine cibo solidiore. Ne sine perceptione defectus aquæ periret homo, *sitis* data est, quæ admonet ea egere corpus, quam si non placamus potionis ingestione, tandem fit intolerabilis: sed si fruimur aquis, o! quam blanda & grata titillatione perfundimur! vix majus enim est homini concessum oblectamentum, quam sitienti potus aquæ. Ita benignus est Naturæ Conditor, ut non solum nos impellat ad ea capienda, quæ ad vitæ conservationem pertinent, sed & iis frui voluit cum grata perceptione, & ut satiemur oblectatione animi.

Aquæ necessitas.

§. VI. Hæc duo alimentorum genera o! quam larga manu Deus nobis porrigit! ne in his necessariis unquam esset defectus: hæc & pauperibus & divitibus largitur, nisi quod quibusdam in locis aquarum quandoque sit penuria: prospiciunt itaque iter facientes, vel longam navigationem meditantes, ne aquæ fiat penuria in itinere; ex his patet, aquam, quæ ob majorem copiam nobis concessam vilissima a multis habetur, ut ne quidem grates agant potantes, magis esse æstimandam ad vitæ conservationem & nutritionem, quam reliqua alimenta, quæ ciborum nomine veniunt, quia diutius sine cibo quam potu vitam agere possumus: non tamen eo omnino carere potest; nisi sub potu alimenta simul ingerantur; nam cibus admissione aquæ in cerevisiam, jus, decoctum, lac, vel aliud genus liquoris conversus, hic sub potus nomine venit. Ad hunc cibum ingerendum quodam sensu move-mur, qui *Fames* & quandoque *Appetitus* dicitur; & ut grata hæc esset ingestio, linguæ

linguæ gustandi potentia donata est. Gustus hic quia æque in potionibus, quam ci- Fames
cur data.
bis assumendis exercetur, non est sensus qui ad solum cibum referri potest: sed
Fames tunc dicitur, si homo esuriat, sitis autem, si sitiat; quare *fames* sensus
est, quo homo instigatur, ut cibos capiat.

§. VII. In *Fame* ante omnia exponendum, num ad sensus referenda; & dein, num Fames
num spe-
cies sen-
sus.
sit sensus specialis, uti visus & auditus; an vero generalis ad tactum pertinens. Nemo
dubitatur, quin quævis res nervis nostri corporis ita applicata, ut mens eam mutationem
in nervis productam percipiat, dicet se eam rem sentire: quali modo autem hoc fiat, a-
libi latius explicavi: & nos eodem organo sentiente non percipere cuncta, ut auribus
sonum, oculis lucem, lingua saporem, naribus odorem, non vero auribus lucem, o-
culis sonum, &c. omnes confitentur. In fame itaque probandum restaret, nos ali-
quid percipere in corpore. Si quis dubitat, esuritores fidem facient, si rogat: aut
si laute opipareve vivens, qui semper ante famem corpus multo opplet cibo, & o-
mni tempore satur est, nesciat quid sit fame urgeri, expectet modo uno alterove
die, in se certe concitabitur sensus appetendi alimenta talis, ut non amplius fidem
huic sensui denegaturus sit. Quare tuto possumus famem ad sensum referre.

§. VIII. In dictis his non multum dissentiunt auctores; sed an *fames* ad tactum Num
sensus
specialis.
sit referenda, an vero ut sensus specialis sit accipienda, non conveniunt. Maxima
pars Auctorum contendunt, famem pertinere ad tactum: ego vero puto magis con-
ducere eam pro sensu speciali, ut est gustus & olfactus, habere. Hoc ut evincam,
sensus Tactus paulo limitatius est exponendus: si enim quis vult omnem affectio-
nem nervorum a mente perceptam, Tactum vocare, utique huic concedo famem
quoque Tactum esse, eo jure, ut simul reliquos quatuor sensus ad Tactum referat; si
autem hos dicit a Tactu esse distinguendos, sentio quoque *famem* ab eodem tactu esse
distinguendam. Quippe si inspiciamus rationem, qua gustum, odoratum, auditum,
& visum, a generali Tactus sensu avellunt, ea non minus erit in fame obvia. O-
mnibus commune est percipere rem aliquam corpori applicatam: sed quoniam uni-
ca in parte corporis solis oculis v. g. percipio lucem, quam nullo alio organo sen-
tiente percipere potuissem, proferunt oculos esse aliud organum sentiens & distin-
ctum; id quoque in reliquis tribus statuunt. Itaque duæ sunt rationes quæ propo-
nuntur, ut sensus quatuor separentur a Tactu. Istæ rationes si quoque obtineant
in fame, eodem quoque jure ea a Tactu est distinguenda. Hæc tamen potest po-
ni differentia, omnes quinque sensus a causa externa concitari, famem vero a cau-
sa interna, quapropter non pertineret ad sensus externos: verum ea re ad tactum
quoque referri nequit, qui ab externa causa excitatur; seu *fames* non sentitur, cui
fane esuritor nullus suffragaretur. Quamobrem malo famem ad sensum referre a
causa quadam interna concitatam, quam quod, contra manifestissimam esurien-
tium perceptionem, contenderem eos omnino nihil sentire. Quia vero *fames* a
causa interna concitatur, eo ipso a reliquis sensibus se distinctam facit, & quidem
magis distat a tactu, quam reliqui quatuor sensus externi; hi enim requirunt
causam externam, *fames* vero internam; & in fame specialis quidam a tactu di-
stinctus sensus percipitur, uti in gustu, olfactu & reliquis.

§. IX. Alteram rationem, quam adferunt, ad distinguendos sensus quatuor a In parte
distincta.
Tactu, in fame non minorem esse paucis videbimus. Uno quodam in loco no-
stri corporis interno aliquid sentimus, quo instigemur ad capienda alimenta,
qui sensus quandoque validissimus est; accurate autem definire partem vel orga-
num sentiens internum, non tam promte fieri potest, quam in organis exter-
nis, de quibus distincta experimenta capi possunt, quod minus in partibus inter-
nis fieri potest: in genere tamen in ventre latitare dudum receptum fuit, quum
veteres dixerint esurientium ventrem latrare. In eo autem ventriculum istud
esse organum infra probaturi sumus; sufficiat hic indicare organum sentiens fa-
mem, distinctum esse locum vel partem in nostro corpore. Quamvis opponitur,

ventriculo sensum sitis adscribi posse, & nos in eo sentire dolorem, propterea ventriculum vario modo affectum, solum tactum varium exercere, quo calida, frigida, aspera; lævia, dura, mollia, quæ omnia sunt variæ perceptiones ejusdem tactus, distinguamus, quamobrem famis perceptio species est tactus: hoc quoque non est infrequens in alio organo sentiente observare; Lingua enim, si ei sapidum aliquod applicetur, sentit quoque hæc omnia calida & frigida &c. & dolore afficitur, non solum in tactus, sed & gustus organo; saporem autem, quem percipimus, inepte referret quis ad generalem tactum, cum talis sensatio, nullibi nisi in lingua, reliquisque oris partibus, exerceri possit. Eodem jure de ventriculo, vel parte quavis infra explicanda, ad famem percipiendam sentiendum erit. Est ergo famis sensus distinctus tam quoad perceptionem, quam organum distinctum.

Tria genera sensuum.

§. X. Quamvis communis sensuum numerus in duo dispescitur genera, in externos quinque, & internos, qui ut plurimum tres numerantur, perceptio, memoria & ratiocinium, alii vero plures species commemorant; his puto tertium genus esse adjiciendum, quod a causa interna sanitatis concitatur. Primum genus complectitur sensus quinque a causa externa excitandos corporea; alterum, internos vocant seu mentales; hoc vero tertium ad conservationem sui magis pertinet: quippe nulla est horum omnium sensuum actio, qua ad capiendum nutrimentum instigemur, nisi recordatio gratitudinis prioris ingesti. *Fames* autem nos quasi urget, ut nobis alimentis prospiciamus, ne corpus inedia pereat. Quia vero præstantius est cibo sustentare corpus, quam aliis voluptatibus, per sensus externos perceptis, frui, ipsa famis pluris videtur æstimanda, quam sensus reliqui: illa enim ad vivendum, hi ad bene vivendum magis conferunt.

Animales & naturales sensus.

§. XI. Alio modo multi sensus in *naturales* & *animales* distinguunt: qui a causa externa afficiuntur & concitantur, naturales vocant; qui vero a mente excitantur, animales vocandos esse contendunt. Uterque in *Fame* observatur, cum sæpe sine ulla admonitione vel cogitatione fame dirissima urgeantur multi; alii vero ad aspectum vel recitationem alimenti grati, cibo inhiant, ut sæpe saliva copiose in os confluat. Hoc tamen ad famem ex numero sensuum expungendam aliquid conferre haud puto; sed magis pertinere ad hujus sensus præstantiam, quia nobis maxime necessaria, Deus videtur voluisse, ut magis sensibus internis consentiat, quam reliqui sensus externi: quod enim aspectu cibi famis quasi provocetur, id non excludit, causam internam corpoream producere famem, sed probat mente magis quam reliqui externi sensus excitari posse. Imo, nisi causa interna corporea simul adsit famem excitans, frustra conamur aspectu, olfactu, vel gustu famem intendere.

Fames aucta.

§. XII. Uti sensus reliqui externi non solum ab externa corporea causa concitantur, sed & quandoque a causa quoque morbofa interna; ita quoque famis sine naturali sanitatis causa sæpe intenditur, quemadmodum in *Κυνροξία* & *Βελιμία*. Sed, quod audiant susurrum, aliumve sonitum, auribus, sine ullo in aere excitato sono; vel videant scintillas, colores varios, & vel alia insolita, oculis in meris tenebris, vel palpebris clausis, inepte quis judicaret propterea visum vel auditum non esse sensum a Tactu distinctum. Ita quoque appetitus a causis morbofis variis in nobis concitatus non probat speciem esse tactus; sed quemadmodum reliqui sensus a causa quoque morbofa moveri posse. Ita etiam causæ morbosæ non demonstrant veram causam sanitatis Appetitum excitantem, quum id non infrequens est in aliis quoque sensibus externis observare.

Famis causa.

§. XIII. Ut rite persequatur causa sanitatis appetitum seu famem excitans, statuenda sunt ea, quæ in hominibus sanis contingunt, dum famis generatur: postquam homo sanus cibo fuit satiatus, non prius fit famelicus vel esuriens, quam cum ejus ventriculus fere depletus, & chylus in sanguine fere consumtus. Sed solus ventriculus vacuus cum multo chylo in sanguine; & ventriculus cibo plenus, cum chylo in sanguine consumto, non facit in sanis famem; quare hæ cau-
sæ

sæ binæ concurrere debent ad famem concitandam : inde forsitan tot lites inter Auctores, qui unicam appetentiæ causam statuere voluerunt.

§. XIV. Qui, ut veteres, ex alimenti defectu solo in sanguine appetitum deducere conati sunt, existimarunt venas meseraicas inanitas sugere alimentum ex intestinis, quod si non adesset, nos tunc percipere vehementiorem eam suctionem. Huic sententiæ se maxime & multis argumentis opposuerunt *Bohnius & Moebius*, adducentes observationes practicas famis auctæ, in quibus nulla suctio esset admit-
 tendæ, uti esuritores in fame canina cum ventriculo & intestinis plenis, atque alias, ut in hæmorrhagiis, alvi fluxu cum inappetentia & fastidio. At si duæ vel tres causæ simul concurrere debent ad unum excitandum sensum, facile est omnes causas seorsim examinatas refutare; quod in exemplo visus clare patet: in eo enim requiritur radiorum lucis introitus per oculum usque ad nervum opticum, qui imagines in fundo oculi pictas ad sensorium deferat. Statuere autem velle, in meris tenebris, neque oculum, neque nervum opticum visus esse organum, vel in leucomate, illæso nervo optico, neque radios luminis visus esse causam, vel nervum opticum non esse visus organum; vel denique in amaurosi, obstructo nervo optico, radios luminis & pelluciditatem humorum & membranarum oculi ad visum pertinere, quid insulsius? Ita etiam de famis perceptione censendum: nam solus defectus Chyli in sanguine cum ventriculo pleno, vel nervo ventriculi inutili factæ ad percipiendum, non facit famem: neque solus ventriculus vacuus, aut sola aptitudo nervorum ventriculi ad percipiendum, valet famem concitare in ægrotis; sed omnes hæ causæ simul in sanis concurrere debent; in ægrotis autem appetitus a quadam morbosa causa intendi potest, ut multi ægrotantes palpebris clausis putant se varia videre corpora. Quamobrem Veteres non ita sunt insimulandi erroris, nisi quod partem causarum posuerint, reliquas vero partes ad totam causam proximam conficiendam concurrentes, intactas reliquerint. Non ita absurdum est per suctionem exponere, sensum famis percipere ex defectu chyli in sanguine, qui sensus nos facit ut non solum avidius cupiamus alimenta, sed & facit ut nos ea quoque citius deglutiamus, quasi potentia quadam trahente citius intrarent nostrum corpus, quo sensu deficiente, vix, ac ne vix deglutiri possunt. Venas meseraicas sugere omnino negatum fuit a Neotericis, statuentibus chylum dumtaxat ferri per vasa lactea; sed quia hodie multis experimentis demonstratur, venas meseraicas etiam, more omnium aliarum venarum, in se recipere ex intestinis liquorem, quem versus hepar conducunt, cum quadam limitatione & emendatione anatomica, admitti potest veterum sententia.

§. XV. Qui multis modis veterum sententiam enervare conati sunt, ejusque loco ponere acre vellicans ventriculum, non in minorem ceciderunt errorem; & sibi non constant, alii aliam statuentes hujus rosionis causam, vel in *Lympha Digestrice* stomachi; vel *acore succi pancreatici*; vel *acido succo in liene secreto* versus ventriculum delato; vel *acido grato exhalante vapore*, ex relictis in stomacho alimentis fermentantibus os ventriculi titillante; vel ex *humoris fermentalis acrimonia*, quærentes famis causam: isti omnes in solo mechanico stimulo locarunt appetitus causam, cum aspectus solus rei nauseosæ, vel motus insolitus in nave, vel corpus in gyrum ductum, urgentem famem in fastidium brevi tempore convertit; in quibus omnibus nequidem ulla suspicio esse potest, acre stimulans fuisse subactum: quemadmodum ex aspectu quoque vel commemoratione cibi gratioris non raro languens appetitus erigitur.

§. XVI. Ne quidem in his solis præbent erroris ansam, sed novam aliam hypothesein non satis demonstratam adjiciunt, *Lympham* scilicet *Digestricem*, quam plerumque statuunt acidam esse, cujus defectu fit inappetentia: immemores utique sunt, nos sæpius salibus alcalinis, & stomachicis amaris alcalescentibus languentem appetitum erigere, quam acidis; quandoque tamen acidis majori successu utimur,

ut infra demonstrabitur : sed eo contendere volo , appetitus causam semper non esse acidum , quia tunc alcalia semper destruerent appetitus causam . Imo post longam inediam in esuritoribus animalibus , ventriculi liquor nullum acidi indicium præbet , sed subsalsus est instar salivæ , cujus etiam naturæ est succus Pancreaticus , interim tamen maxime esuriunt : quare acidum tanquam causa generalis appetitus assignari nequit .

An ab a-
cidis ci-
borum
reliquiis.

§. XVII. Multi vaporem blandum , acidum , exhalantem quesiverunt in fermentantibus reliquiis alimentorum , inter ventriculi plicas asservatis : sæpe inter ventriculi plicas inveniri acidas reliquias fateor ; sed si animal farinosa aliave vegetabilia acscentia comederit ; post longum autem esum carnis & potionem aquæ puræ , ut in animalibus carnivoris , reliquiæ nunquam inveniuntur acidæ , sed subputridæ ; atque post longam inediam , sed frequentiore potum aquæ , si ventriculus intus ab omnibus reliquiis depuratus fuit , ne vestigium quidem acidi detegitur . Hoc ergo tempore fames esse deberet nulla , dum tamen maxime esuriunt . Etiam si in hac versatur sententia *Sylvius* , non tamen dubitat alcalia in inappetentia præscribere ; sed mirum est videre quot modis se torqueat in rationibus reddendis . Ex his tamen id boni colligere possumus , Clarissimum hunc Virum magis indulisse experientiæ praxeos , quam rationibus , & nos tuto in medicamentis præscribendis ei fidere posse .

An ab a-
cido Lie-
nis .

§. XVIII. Alii autem multo graviores contra anatomiam commiserunt errorem , statuentes acidum succum in Liene confici , vel per vasa brevia , vel vias incognitas in ventriculi cavum fundi , ut famem concitaret . Succum ventriculi post longam inediam in valde esuriente non esse acidum , iteratis experimentis confirmatum est , tam gustu , quam admistione cum alcalicis vel aliis , quibus acidi præsentia dignoscitur : Sed & in Liene confici , atque in ventriculum ferri , contrariatur observationibus anatomicis , quibus fides habenda . Lien enim , si ullum in nostro corpore sit viscus , quod ab accuratissimis est examinatum , ab anatomicis hodiernis quam maxime fuit agitated , injiciendo in ejus vasa , siccando , exenterando , & omni alio artificio ; nunquam tamen succi acidi confectionem in eo detegere potuerunt , sed præcipuam ejus actionem in præparando sanguinem consistere . Qui suspicati sunt se rudimenta quædam vasis secretorii vel excretorii vidisse , decepti fuere magnitudine vasis lymphaticorum , in superficie Lienis ludentium : quorum originem iterum alii non altius quærere sunt ausi , quam in Lienis superficie , ne forsitan huic hypothese de vase secretorio vel excretorio daretur ansa . Verisimile tamen est ex omni fere puncto substantiæ Lienis hæc vasa lymphatica venosa originem ducere , etiam si anatomicorum oculi non ita lyncei sint , ut ea usque ad eorum prima principia assequi possint : pelluciditas enim eorum & tenuitas omnium oculis se subducit ; & principiorum exilitas omnem injectionem materiæ coloratæ eludit ; atque a trunco valvularum multitudo impletionem impedit . Ratio autem suadet ubique esse lymphaticorum initia , tam in internis , quam externis Lienis partibus ; cum vasa Lienis arteriosa tandem desinant in tam exilia lymphatica arteriosa , quæ multis accuratissimis anatomicis ne quidem fuere detecta , sed istis ruptis vel siccatis , putarunt Lienem constare cellulis & fibris solidis : hodierna autem anatomica industria detexit , totam Lienis substantiam constare vasculis , majoribus cruentis & minoribus lymphaticis arteriosis & venosis , quæ olim fibræ solidæ sunt habitæ . Cum ergo tota Lienis compages hujusmodi vasis cruentis & lymphaticis , adjectis quibusdam nervulis , constet , origo lymphaticorum venosorum hic quemadmodum in corpore reliquo , ab omni lienis parte petenda . Ea autem pro excretoriis vel secretoriis habere alienum est in anatomicis statuere ; nam vascula hæc venosa lymphatica , lympham in majores trunculos corripantia , desinentia in adjacentes venulas cruentas , ut sanguinem crassorem ex extremis arteriarum receptum diluant , meabilemque faciant , vel in trunculos majores coadunata in Lienis superficie , si liquore turgent , visibilia proferunt lymphatica vasa , in ductum thoracicum vel cisternam lumbarem desinentia ; quæ lymphatica hæc adveniunt , ex ventriculo quoque asportant lympham , neutiquam vero ex Liene in ventri-

Lienis
limpha-
tica .

culum per lymphatica ducitur liquor: quam ob rem ventriculus hac via ex liene nihil accipere potest, etiamsi his ferretur succus acidus in Liene confectus: id docet intumescencia vasorum horum sub parte compressa, atque valvularum positura in his.

§. XIX. Neque venæ Lienis, vel *Vasa brevia*, inter Lienem & ventriculum, plus præstare possunt; ex utroque enim viscere coeuntia hæc vasa, sanguinem receptum conducunt in venam portarum, neque quidquam ex Liene hac via in ventriculum fertur. Arridet tamen brevitās harum venarum, & quia valvulis carent, ut statuant aliquid per eas in ventriculum ferri posse; sed hoc statuendo vis inferitur ordini naturæ, & cæco impetu ferimur ad aliquam fingendam hypothesein, sine ulla rationis probabilitate. Quippe nunquam extremitates venarum secretionis vel excretionis subeunt negotium, quod tamen hic fieri debuisset, quia vasa brevia venosa sunt: non obstat tamen Bilis secretionem ex venis fieri; verum ea pars portarum venæ, quæ huic negotio inservit, non est vena, sed arteria dicenda, quia non corrivat, sed derivat sanguinem, more aliarum arteriarum; vasa vero ventriculi brevia, omni dote venæ manent. Etiamsi concederetur, probandum restaret, succi acidi confectiōnem certis experimentis in Liene; atque acidum succum in ventriculum delatum, famis & digestionis esse causam, quod superius evicimus.

§. XX. Hanc omnem ut superarent difficultatem alii, tenentes tamen contactum superficiei internæ ventriculi sensum famis concitare, solum contactum unius lateris ad alterum oppositum esse famis vel appetitus causam: quia detexerunt esuriem in ventriculo vacuo concitari, quando opposita latera se mutuo tangere possunt. Hæc sententia aliquam veritatis probabilitatem includit, & satis subtiliter fuit excogitata: quia vero æque potu aquæ, quam ingestione alimentorum, dimoventur ea latera, cessaret ab utriusque ingestione appetitus causa, contactus nempe laterum; & in Cynorexia nequiquam fames quoque posset generari ventriculo pleno, quod tamen frequens est observare: quis quoque esuritor famis molestiam aquæ puræ haustu placaret? Ob quam rem ab hac quoque sententia decedere coacti sumus, & aliam quærere, quæ omnibus satisfacit phænomenis, sive sit causa simplex sive composita, seu ex multis congregata.

§. XXI. Capiunt animalia & homo cibum, ut restituatur id, quod inevitabili actione deperditum fuit: potest quidem homo vel animal per aliquod tempus sine cibo solido vivere: sed ut sanus maneat, alimenta sunt ingerenda. Multas historias longæ inediae collegit *Sennertus. Tom. 2. pag. 809.* nullus eorum diu reliqua solita negotia obire potuit; multasque historias fidem superare, & non carere dubio, ipse auctor fatetur: nostro quoque tempore Rusticum fuisse dormientem, qui diu sine omni cibo vixit, omnibus notum est; atque mulierem cardialgia laborantem ultra viginti dies vixisse sine ullo cibo, oculatus testis fui. Verum hæc omnia non probant homines sanos sine omni cibo vivere diu posse. Diutius tamen sine cibo quam potu, & omnium brevissime sine aeris acceptione, omnes observationes medicæ & physicæ adstipulantur. Nobis sufficit indicare, Deum corpus nostrum ita creasse, ut cibo indigeat ad sustentandam vitam: ne auxilio hoc privaretur homo, vel ob alias res minus necessarias deficiat ciborum assumptio, simul creavit sensum, quem *famem* vocamus, qui nos impellit, eo tempore, quando corpus alimento egere incipit, ad cibum capiendum, ut anxietas ad hauriendum aerem, sitis ad potum petendum. Ex Dei autem benignitate non solum impellimur, sed dum ingerimus cibum, gratum simul percipimus sensum, & corpus lætatur se frui hoc novo vivendi auxilio, facitque hic sensus ut avidissime cibum ingeramus. Quasi hoc non sufficeret, gustus adjecit gratam perceptionem, dum masticantur alimenta, quæ eo suaviora, quo magis fames urget. Fames fidelis est ille monitor corpus egere alimento, gustus autem magis eligit varium edulium genus: quare famis perceptio præstantior, quam gustus, ad vitæ conservationem videtur.

§. XXII. Famelicum aliquid sentire, nemo amplius dubitare poterit; sed qua cau-

*Famis
causa.*

causa, ubi, a quo organo, non consentiunt auctores: ut autem nostram quoque proferamus sententiam, ne res pertractanda semper relinquatur incerta, ante omnia examinandum est tempus in homine sano, quo fames sentitur. Sanus quivis in se experitur famem concitari, dum cibus antecedens fere consumtus est, paulo citius, si corpus exerceat quam si in otio torpeat. In hoc tamen multum consuetudo valet, uti aliis in rebus, quibus assueti sumus; sed si nulla intercedat longa consuetudo, tunc excitatur fames si egere incipit corpus nutrimento. Est itaque ipse *chyli aut cibi defectus*, vel *productum ex hoc defectu*, vel *denique aliquid aliud, quod simul cum hoc defectu nascitur*, famem concitans causa. Veteres putarunt nos sentire ex inanitis vasis meseraicis sugentibus; sed quoniam æque potu quam cibo impleri potuissent, ut ita cessaret inanis suctio, eorum sententia diu repudiata fuit, præprimis cum post istud tempus chyli maximam partem vasis lacteis recipi demonstratum sit: quare, si chylus aliquid ageret ad famem excitandam, id magis sua qualitate quam quantitate præstare deberet, quod scilicet vasa illa tunc meseraica, nunc lactea, alibili succo privata, meram aquam vel alios humores nostri corporis ferentia sensum famis nobis concitarent: verum in perfecte sanis fames ab ingesto cibo citius deleta est, quam ut ad hæc vasa adimplenda potuisset pervenire chylus, hæc vasa implens. Neque firmiori stat talo productum ex chyli defectu, quod vigor motus vitalis fatiscens defectu chyli in sanguine, ut *Bohnius*, famem excitaret, cum vigor deficiens motus vitalis sensum debilitatis inducat, minime vero appetitum; imo post longam inediam, quando summa est nata debilitas in motu vitali, homines Anorexia vel Dyforexia laborant; & ægrotantes, quo magis sunt debilitati, eo minus appetunt, donec tandem aliquantulum recuperatis viribus cibum poscere incipiunt. Si vero ex duobus his aliquid esset admittendum, mallem a priori stare, quo statuitur ex chyli in sanguine blandi & suavis attactus defectu, nos sentire famem, cum intensa fames utcunque lenitur vapore grato exhalante ex elementis dum coquuntur vel assantur; qui vapor diu mistus humoribus nostris brevi tempore lenit famem. Ex experimento hoc deduci potest, nostrum corpus sentire chyli defectum, quoad ejus qualitatem, quæ utcunque vapore exhalante cum aere attracto naribus suppletur; sed quia partes hæc alibiles brevi evanescunt, cito eadem redit fames: quare non inepte statuitur, mutationem defectu chyli inductam, a nervis nostri corporis perceptam, inter famis causas esse numerandam: quæ perceptio mutationis si deficiat, sæpe causa est in morbis, quod reliquæ causæ non valeant appetitum suscitare. Hoc autem an fiat, quod alii humores in chyli locum veniant, an vero ex mutatione aliis humoribus inducta, determinare hucusque non valeo.

*Vesica fellea quid
pariatur
ventriculo pleno.
Bilis circulatorio.*

*Quid in
ventriculo
evacuato
relinquitur.*

§. XXIII. Dum ventriculus cibo est plenus (ut ab hoc tempore fiat exordium) magis distentus est: urget itaque partes adjacentes magis, inter quas præprimis bilis vesicula, jam bile turgida, inter ponderosum superius incumbens hepar, & ventriculum nunc magis distentum, sita; hæc compressa per tortuosum suum ductum definens in choledochum communem, & quandoque, sed raro, altero ductu exiguo in ventriculi fundum, exstillat guttatim in Duodenum intestinum bilem in se collectam, ut transeunti chylo per Duodenum partitis vicibus permisceretur, ad meliorem chyli confectionem, & accuratiorem mixturam oleosorum, pinguium & glutinosorum cum aquosis: una ergo cum chylo ex ventriculo ducitur bilis continuo per tractum intestinorum, neque unquam in ventriculum regurgitare potest, quamdiu ventriculus plenus, quia ita distentus magis resistit influxuro liquori ex duodeno per pylorum in ejus cavum. Tandem vero sensim magis depletus stomachus, motu peristaltico, succi pancreatici & bilis portionem admittit, quæ brevi post cum reliquis alimentis maceratis iterum per pylorum exit. Cum autem fere depletus est ventriculus, inter plicas dumtaxat quædam præcedentis cibi recrementa, ulterius maceranda, continens, non amplius premit extensione sua adjacentem vesiculam felleam; quare hæc quoque cessat effundere bilem in Duodenum, sed la-

xatum

xatum concedit locum ad recipiendam in hepate secretam bilem, quæ satis commodè ex choledochò communi per ductum cisticum in hanc vesiculam influere potest. Non obstat hic motus veluti retrogradus ex ductu hepatico in ductum vesiculæ felleæ, modo enim majorem versus duodenum invenit bilis hepatica resistantiam, quam versus bilis vesiculam, eo feretur, cum liquor fere stagnans, vel tarde motus, uti fit in bile per ductum communem ducenda, semper eo fertur, ubi minor est resistantia. Quoniam depleto ventriculo, bilis vesicula minus est compressa, & suis fibris non admodum validis, debilius constricta, quam est intestinum Duodenum, sensim ea impletur ab adfluente hepatis bile: quod magis confirmatur ex ipsius colli hujus vesiculæ structura, facile admittentis liquoris injectionem, ex ductu communi versus vesiculæ fundum. Bilis sensim tali modo vesiculam implens, eam tandem ad summam extensionem diducit, ita ut nihil amplius admitrat. Hic dum continetur & fovetur, summam acquirit amaritudinem, sive stagnando, sive admistu alterius liquoris in exiguis glandulis membranæ internæ vesiculæ secretus, sive radicibus felleis allatus, si adsint, acquirat, ad hanc functionem intelligendam parum lucis adfert. Sufficit bilem vesiculæ felleæ intensiorem possidere amaritudinem & acrimoniam, quam quæ ex ductu hepatico colligitur. Quippe bilis vesicula jam plena, nunc aliquid incipit emittere, jam vero dimittere, & forsan, quemadmodum in aliis fit diversiculis, se exonerare incipit, contractis suis fibris, nunc acriori bile agitata. Ducitur ergo hoc tempore, manente ventriculo vacuo, major bilis copia in intestinum, quam statim post ventriculum evacuatum, tunc enim laxata bilis vesicula recipiebat bilem, quam nunc incipit evacuare. Bilis nunc necessitate hujus organi, majori copia in duodenum lata, non ita ut prius in intestina omnis descendit, quia vix amplius ex ventriculo exit chylus, qui secum duceret; sed ventriculus laxior per pylorum facilem bili concedit viam. Hæc majori copia sensim per pylorum in ventriculi cavitatem delata, reliquias alimentorum sua saponacitate resolvit, quædamque portio iterum exit. Tandem vero, quia sensim acrior adducitur bilis, magisque saponacea, ipsam ventriculi mucilaginem, ad illinienda latera destinatam, solvere incipit; & si continetur hæc bilis regurgitatio, denudata latera rosionem bilis suis nervis, per ventriculi substantiam dispersis, sentire incipiunt.

§. XXIV. Hæc omnia fiunt eo tempore, quo chylus in nostro corpore consumitur: nam nisi aliquamdiu evacuatus fuit ventriculus, bilis vesicula turgere nequit, & suam evacuare bilem in statu sano; simulque bilis vesicaria fit acrior & magis amara & saponacea, promptior ad abstergendum ventriculi mucum, & irritatione sua sensum famis inducendum nervis ventriculi. Hoc dum fit, ventriculi sensus monet omnia parata esse ad novum accipiendum cibum; ventriculus enim est exoneratus, bilis non solum est præsens in ventriculo, quæ admiscetur ingestis, sed & bilis vesicula turget, ut possit transeunti chylo per duodenum, sufficientem bilis copiam affundere. An non forsan vesicæ extensio aliquid faciat, vel bilis acrimonia vesiculam interne vellicans, ad sensum famis excitandum, non ita statim rejici potest. Si autem vesiculæ major extensio hunc sensum excitaret, is non esset minor post ciborum ingestionem, 1. Quia ventriculus iterum plenus vesiculam ex pyriformi in aliam magis planam urget, in qua compressionem non minus patiuntur ab extensione liquoris interni latera vesiculæ, quam ante ingestionem cibi. 2. Neque bilis acrimonia, in vesicula contenta, ab assumptis temperatur, quia ex ventriculo in vesicam nulla datur via. Quare si quis sensus, ab hac naturali mutatione post ultimum cibum sumtum inducta, fiat, is ventriculi nervis a bile commotis est adscribendus.

§. XXV. Hæc omnia dum fiunt, in nostro etiam corpore chylus sensim convertitur in alium liquorem, vel apponitur partibus firmis, ut eas nutriat, vel incrementum præbeat; tota itaque massa chylo privata, ad cerebrum nequit partes

*Quid fit
dum Chy-
lus consu-
mitur in
corpore.*

*Sensus in
corpore ex
Chyli de-
fectu.*

du-

ducere alibiles: quia vero ex hoc allato sanguine secernendi sunt spiritus ad omnes exercendos sensus, videtur Deus tali modo creasse hominem, ut anima percipere valeat, alibiles hæ partes an ibi deficient; quamobrem partes tenuissimæ alimentariæ, sive cum vapore haustæ, sive per vascula minima absorbenda receptæ, & eo delatæ, hunc defectum supplentes, cessare faciunt in cerebro sensum famis. Hæc perceptio aliis in sensibus externis non requiritur, quia dumtaxat sunt ad bene vivendum, cum fames creata sit ad eum percipiendum defectum, qui vitæ interitum minatur: & ita, quia magis necessaria ad vitam sustentandam, duobus veluti in locis sensum hunc locare voluit Deus, ut scilicet cerebrum vel ejus nervi perciperent chyli in sanguine defectum; & ventriculus indicaret eo in loco omnia esse parata ad alimenta accipienda & subigenda.

*Fames a
binis sen-
sibus.*

§. XXVI. Quamdiu duo hi sensus valent, unus indicans defectum chyli, alter locum & humores ad recipiendum cibum esse paratos, semper in nobis concitatur fames, seu desiderium capiendi alimenta; sed si alter horum deficiat, ipsa quoque fames perit. Videtur quandoque Chyli defectus perceptio plus valere, quam perceptio loci parati, & humorum ad recipienda alimenta, cum animi pathema, ductio in gyrum, aspectus rei horrendæ blandum hunc sensum, majori cerebri agitatione extinguens, omnem appetitum unico momento extinguere valeat, manente eadem bilis rosione in ventriculo; sed sæpe appetunt homines, nondum vel parum vellicatis organis, ad recipiendum alimentum destinatis. Quandoque vero prævalere videtur ventriculi sensus ad excitandam famem, cum in fame morbosa aucta, etiam si multus est chylus in sanguine, homines tamen esuriant: atque confluentes putridi humores in ventriculum, omnem tollant appetitum, manente Chyli defectu in sanguine. Talis autem famis excitatio & extinctio neutiquam sana habetur. Inde non est difficile intelligere, cur tantus in omni morbo inter cerebrum & stomachum consensus a practicis observetur; quia utræque hæ partes cooperantur in eundem sensum producendum in nobis. Tantus sæpe est, ut dubitemus, morbus an hæreat in capite vel ventriculo.

*Fames cessat
accep-
to cibo.*

§. XXVII. Neque fames ab accepto cibo cessans denegat utrumque hunc sensum leniri debere: dum enim comedimus, non solum ventriculus impletur alimentis, quæ bilem latera ventriculi agitantem in se recipiunt, tollentia excitationem hujus sensus; sed & etiam per vasa absorbentia venosa oris, œsophagi & ventriculi, promte recipientia partes tenues alimentarias ex cibo masticato & deglutito, miscent sanguini circulanti, quæ partes ad cerebrum delatæ, hunc defectum suppleant, & sensum hujus sopiunt: hoc videtur indicare quod alimenta nonnulla citius inducant satietatem, antequam potuere in ventriculo tollere famis causam, uti sunt jura spissa multi nutrimenti, præprimis calide sumta.

*Famis
examen in
morbis.*

§. XXVIII. Quoniam utrique hi sensus, in eundem tamen scopum tendentes, ut nempe homo assumat cibum, in nobismet ipsis exercentur, & non pro lubitu rebus externis, veluti reliqui sensus externi, moveri possunt, accuratiori indagatione opus, ne præcipites ruamus in multos errores; ob quam rem hic sensus in sanitate non solum, sed & in morbis simul examinandus. In quibus observandum, qui magis in hanc vel illam partem agunt, qui in utramque; ut simul constet causam, in unam agentem partem, utriusque perceptionem extinguere vel mutare posse. In morbis vero observatur triplici modo appetitum vitiari; 1. si minor fiat aut omnino nullus; 2. si major sit quam in sanitate; 3. quando sit alienatus in fastidio, pica, malacia. De abolito & minuto appetitu pauca primum delibabimus.

*Famis
minoris
causa.
Ex Chylo
in san-
guine.*

§. XXIX. Inappetentiæ causa vel in ventriculum, vel cerebrum, vel in utrumque simul agere potest: omnes autem hæ non tam distincte agunt, ut determinare valeamus, num solum in hanc vel illam partem agant. Inappetentiæ naturalis causa est chyli præsentia sufficiens in sanguine: quamobrem exercitium intermissum, otium, quies corporis, somnus longior, quia motu minori cor-
poris

poris & circulationis, tardius consumitur chylus, quam in vigilantibus & exercitatis, non tam cito redit appetitus, seu desiderium capiendi alimenta: ita etiam in ablatione, hæmorrhagiis, hæmorrhoidibus, mensibusque parcius fluentibus vel suppressis, ob chyli retentionem in corpore, tardius redit fames. Ad quam tunc excitandam frustra moliuntur stomachicis erigere appetitum; cum corpus nullo indigeat nutrimento.

§. XXX. In animi autem pathemate, præprimis terrore, mœstitia & tristitia, *Ex animi aspectu vel auditu rei nauseosæ, ex mentis perturbatione tantus in cerebro concitatur motus, ut mens non valeat levio- rem attactum ex chyli defectu percipere: ita etiam alii sensus externi, licet satis valide a causa externa moveantur, vix percipiuntur, quamobrem istud sensu famis non est speciali.*

§. XXXI. Uti a mentis actione hic sensus obscuratur, ita quoque ex consensu aliarum partium totus fere deleri potest, quemadmodum in gravidis, menstruantibus, vertiginosis, dolore ingenti, ingruente paroxysmo morbi, spirituumque motu perturbato, & aliis multis, quæ blandam chyli perceptionem turbare vel obscurare valent: ita quoque dolor major alterum minorem lenire videtur; & unius sensus exercitatio, alterius vividam perceptionem demit.

§. XXXII. Prioribus vero semper fere peiores sunt causæ appetitum minuentes & delentes, quæ maligna sua indole totam fere famis perceptionem tollunt; hæc quoque simul perturbare solent famis perceptionem in ventriculo. Ita fere omnes mor- bosi humores chronicorum & acutorum morborum, cum bono sanguine ad nervos delati, longam inappetentiam sæpe inducunt, quasi obscurarent hunc sensum, quem- admodum oculorum humores vitiiati, in mera luce, visum tamen obscurant, vel caligine suffundunt: hoc quam maxime in humorum visciditate & corruptione tam spontanea, quam inducta observatur. Ex quibus intelligimus, febre hæctica, mali- gna, putrida laborantes toties insuperabili apostitia laborare; & tabidos, cum summo chyli defectu, nunquam tamen esurire. Et quoniam majori evacuatione cujusvis humoris, reliqua massa in spontaneam quoque tendit corruptelam, salivantes, alvi fluxu laborantes, lactantes, gravidæ, sanguinem nimium fundentes, gonorrhœa, leu- corea, diabete laborantes, pus aliosque humores morbosos emittentes, toties inedia vexantur; quo referri potest solito longior abstinencia a cibo, cum post longiorem chyli defectum humores a solita stasi degenerant. Neque multum ab hac causa ab- ludit retentio eorum, quæ erant evacuanda, uti in prohibita perspiratione, urinæ suppressione, & alvo adstricta, quando excrementa hæc sanguini mista, idem fere patrant, quod supra diximus fieri ex corrupto. Istud quoque fieri in malignorum, morbosorum inhibita evacuatione nullus dubito: sed hoc observari in retentione ma- jori boni humoris, qui consuetus erat evacuari, paradoxum videtur, cum hujus re- tentio ob chyli conservationem solam videtur minuere appetitum, ut innuimus: sed quia corpus nostrum alicui rei diu assuetum non permittit subito sine damno ab ea depelli, siue corpori fuerit bona vel mala, postquam ergo vel hæmorrha- giis, vel lactationi, vel menstruationi corpus fuit assuetum, suppressio hujus eva- cuationis morbum in nobis creat, destructo æquilibrio ex abundantia humorum, quibuscum non satis corporis actio possit moderari, in spontaneam quoque dege- nerant corruptelam, quæ nata simili modo, ut aliæ corruptiones, sensum famis obscurat vel extinguit. Ante corruptelam itaque ex bona causa fiebat inappeten- tia, nunc vero ex mala causa famem delet boni humoris retentio.

§. XXXIII. Allegati quoque morborum liquores, circulantibus misti, non solum in cerebro vel nervis turbant famis necessariæ sensum, verum etiam non inta- ctum relinquunt ventriculum, ejusque humores & bilem, quandoque simul ali- mentorum fastidium, vel appetitum depravatum inducunt; saliva enim, ventricu- li succus vel pancreatis lympa, maligno hoc humore inquinata, impediunt, quod ventriculus possit bilis debitam percipere actionem; vel quod bilis his mista exuat suam indolem, vel quod vitiiati hi humores, sensum a bile concitatum obscurent;

N

vel

vel tanta copia viscerum obducant ventriculi latera, ut bilis ea attingere nequeat: hoc eo magis fit, si bilis simul ab hoc humore vitiata fuit. Hi omnes humores in ventriculum confluentes, nisi emendentur vel evacuentur, longam inedia[m] producunt. Quoniam vero eorum indoles varia, nullum potest excogitari specificum stomachicum, appetitum naturalem restituens, sed quandoque saponaceis, adstringentibus, solventibus, stimulantibus, acidis, alcalicis, terreis, & multis aliis sibi invicem oppositis, in tali inappetentia, morbus auscultat. Quare minime mirandum, Auctores practicos in contrariam sæpe abire de stomachicis sententiam, & observationibus munitam. Nisi simul acrimoniæ vel corruptionis variæ per phænomena reliqua petatur notitia a priori, quod tamen ante ingestum medicamentum debet fieri, ne aliena porrigantur ægris, arte restitui nequit appetitus.

*A motu
insolito
ventricu-
li.*

§. XXXIV. Neque semper opus vitiosa ut confluant in ventriculum, ad Anorexiam vel Dyforexiam generandam: multa quoque ventriculo insunt, quæ hoc præstare possunt, imo motus aliquis insolitus ventriculo inductus, uti motus oscillans navis vel rhedæ in non consuetis, primo tollit famem, dein fit nausea, ut & vomitus ipse; vel si aliquod corpus in ventriculo hærens moveatur, esurientibus omnem delet appetitum: quare ventriculi inflammatio, erysipelas, ulcus insuperabilem generant inappetentiam; aut si thrombus sanguinis, vel calculus aut aliud quid heterogeneum in ventriculi cavo coarctetur, non cessat inappetentia, nisi vomitu aliena ea educta fuerint: hoc est istud inappetentiæ genus, quod unico sæpe vomitorio dato curatur; si autem una ex prioribus causis in lateribus ventriculi latitans fuisset, non parum emeticum exasperaret malum; quare in his propinandis cauti admodum esse debemus, ne unquam dentur, nisi certo sciamus ab alienis, in cavo ventriculi contentis, natam esse inappetentiam.

*A bile
morbi.*

*Bile pu-
trifecta.*

§. XXXV. Quia bonæ bilis requiritur affluxus, ut demonstratum est, ad naturalem excitandam famem, duplici modo hac in re aberrare potest natura: vel 1. quod bilis confectio sit vitiata, uti in bile nimis viscida, inertis, vix amara, vel saponacea, quemadmodum in morbis pituitosis, cachecticis, cacochymicis aciditate primarum viarum laborantibus, qua bilis saponacitas extinguatur, quod frequens in pueris, sceminis, otiosis, laxis corporibus: his præstantissima sunt stomachica, quæ sunt calida stimulantia, aromatica, amara, saponacea alcalina; quia frequens hæc est inappetentiæ causa, dicta a medicis inter præstantissima appetitum erigentia medicamenta citantur. Si vero 2. Bilis fuit putrefacta, tenuis & acer, uti in Ictero, morbis erysipelatosis, putridis, febre Leipturia & similibus, non solum ægri nihil appetunt, sed & abominantur omne genus alimentorum, præprimis pingua, vel quæ ex partibus animalium, vel ovis petuntur: & quod tunc mirum est observare, acida & acescentia petunt ægri; quæ si dentur sensim ad solitum appetitum redeunt: ex hac curatione multi conati sunt demonstrare, succum digesticem stomachi acidum esse debere; sed quoniam æque alcalicis amaris in præcedenti casu, quam in hoc acidis restitimus appetitum, asserere non possumus, vel acidum, vel alcali famis naturalis esse causam: hoc tamen observatur, putrida alcalina magis extinguere appetitum, sæpius in fastidium omnium alimentorum convertere, quam acidum in ventriculo prædominans, quod quandoque appetentiam caninam morbosam inducit.

*A bilis
defectu.*

*Evacu-
tione.*

§. XXXVI. Alterum causarum genus ad bilis defectum pertinet, cujus præsentia requiritur; ea deficit 1. ob denegatam viam per ductum Choledochum in duodenum, uti sæpe fit in ictericis; quare hi quoque non solum ob vitiatam bilis indolem apositia vexantur, sed & defectu bilis influentis. Vel 2. ob aliquem morbum, licet bilis in Duodenum effusa, in ventriculum regurgitare nequit, quales sunt *Diarrhœa, Dysenteria, Lienteria, Cholera, fluxus hepaticus*, continuo ducentes omnes humores intestinorum deorsum, integre prosternitur appetitus, cum ex ratione, per defectum chyli, homo quam maxime esurire deberet. Hæc dum fiunt & perdurant ex defectu elaborationis in bonum chylum, corpus oppletur crudo succo, sensum

sensum appetitus destruyente, & motus insolitus qui simul fit, suam quoque symbolam adfert. Ex his manifestum est, eo pejorem censeretur alvi fluxum, quo majori inappetentia stipatus est; sed si appetitus redeat, spem salutis affulgere: neque inepte quis statueret, bonæ bilis in ventriculum affluxum requiri ad naturalem famem producendam.

§. XXXVII. Hominem itaque non esurire, quamdiu precedentis ingesti cibi memorabilis portio in ventriculo restat, nullus erit dubius, quia egressus hujus, *A relictis in ven- tricula.* Bilis regurgitationem intercipit, si cibi loco multa in ventriculo sit collecta pinguedo, vel viscidum; & ob dictam causam, & quia per eadem simul fit Bilis iners, famis nulla habetur perceptio. Si ex relictis fiat in ventriculo alimentis sola longior a cibo abstinencia appetitum restituit.

§. XXXVIII. Omnes causæ recitatæ, & quæ plures sunt, licet non adsint, cum chyli in ventriculo & in reliquis humoribus defectu, non tamen famies excitatur, quando organum sentiens inutile sit factum ad mutationem, chyli defectu inductam, percipiendam: quare omnia narcotica, & hypnotica, vel morbi *Organi ineptitudo ad percipiendam famem.* soporosi, insensibilitas ventriculi, stupor, apoplexia, delirium, melancholia, toties sunt inappetentiæ causæ.

§. XXXIX. Has omnes ita expositas non ita volo accipi, ac si semper solitariae agerent in appetitum destruendum; cum sæpius multa simul agere observentur: sed quoniam ex simplicium expositione composita debent deduci, quæ variis modis conjungi possunt, operam perdere reor ea si proferrem, & qui hæc cum attentione pervolvit, facile poterit omnes fingere inappetentiæ compositas causas. *Ex causis compositis.*

§. XL. Quæ vero ex inappetentia oriuntur, & qualia prædici possunt, non facile est statuere. 1. Alia sunt, quæ nascuntur ex parviori ingestione ob defectum appetitus. 2. Iterum alia, quæ simul ex causis appetitum delentibus expectamus. Quare omnes morbi huc pertinent, qui longam inedia sequuntur, vel aliquam causam superius memoratam: nunquam, quantum recordor, tam in chronicis, quam acutis, inappetentia partem boni præ sagii exhibuit; sed semper inter mala signa numerata fuit, vel longitudinem vel periculum indicans: oritur enim ex aliqua morbosa causa; & quoniam facit minorem ingeri alimentorum quantitatem, quam ad vitam sanam conservandam requiritur, atque ea, quæ ingeruntur inappetentia laborantibus, minus debito assimulantur, tale corpus, binis veluti morbis pressum, non caret periculo; aut si eluctetur, longum tempus infumit *Post morbos sanatos*, quia corpus exhaustum plus nutrimenti indiget, ut restituatur deperditum ex præcedenti morbo, appetitus valere debet, indicans omnia chylicationis organa recte constituta esse, & bonum chylum sanguini effæcto suppeditari: si autem deficiat, morbus recidivare solet, vel in alium commutari. *In gravidis* longa inedia corpus infantis, defectu boni nutrimenti, disponit ad *Rachitidem & spinam bifidam, hydrocephalum & similes morbos ex solidorum laxitate nascendos.* *In lactantibus* non debet diu durare, quin summam inducet debilitatem; chylus enim defectu famis, & parcius, & male præparatur; quare suctione, sub forma lactis ablatus, tam Matri nimis detrahendo alimentum, quam infanti suppeditando pravum lac, multa mala generat: monendum itaque, si appetitus nutrici deficit, infans a lacte depellatur. *Effectus inappetentiæ.*

§. XLI. Quia pluribus modis destruitur appetitus quam erigitur, frequentius medicorum quærant auxilium inappetentia laborantes, quam nimis esurientes; (De lurconibus, heluonibus, gulosis, aliisque, qui gulæ ventrique dediti sunt, non est sermo,) licet enim defectus est chyli, modo vitium sit in organo chylopoietico, vel homo sensum famis non percipiat, nullus est appetitus: sed hæc omnia parata esse debent & sensu famis affici, antequam esurit homo, & ut major fiat famis, quædam causa ex his magis solito agere debet, sive id ex bona, sive mala causa fiat, hic non quæro: nam quæcunque est magis agens, si tamen reliquæ partes non simul cooperantur, famis non intenditur. *Famis causæ pauciores quam inappetentiæ.*

§. XLII. Appetitus fit major, quoties in nobis ex chyli defectu sensus famis exci- *Famis causa*

Chyli defectus. excitatur, quæ quandoque bona, quandoque mala est censenda: nam in *nutrice* appetitus major laudandus est, & tantum valet, ut ex eo affirmare possimus mulierem, etsi ceteroquin natura sit debilis, lactatione non debilitatam iri. In iis, qui *bona in nutrice.* ex morbis *reconvalescunt*, cum auctis corporis viribus, valde bonum signum est, indicans omnia organa chylopoietica valere, humoresque ibidem operantes naturalem indolem acquisivisse, atque nos sentire chyli defectum: in his tamen observandum, ne nimis appetitui indulgeant, quia corpus ex præcedenti morbo debile, majorem alimentorum copiam ingestam neque concoquere, neque digerere potest; sed onere pressum, relabetur in præcedentem morbum; vel ex superinducta corruptione spontanea alimentorum quandoque in novum, præcedenti pejorem, incidit: cavendum itaque, ne acervatim nimis magna alimentorum quantitas ingeratur reconvalescentibus, sed parum simul alimenti facilis nutrimenti, quamvis fames plura peteret, donec corpus roboratum, copiosiora alimenta, & pluris nutrimenti ferre & subigere potest. Qui vero per aliam viam, uti intestina, quod frequens est in pueris, *Mala in Lienteria.* *Lienteria* laborantibus, vel vesicam, quemadmodum quandoque in Diabete, nimis cito evacuant chylum, insatiabili fame ut plurimum vexantur; hi sive comedant, sive non, nunquam tamen satiari possunt, sed morbo hoc curato brevi *Curatio.* ad naturalem appetentiam redeunt. In tali *Lienteria* observando didici, & non caret ratione, me medicamentis purgantibus, resolventibus stomachicis, *lienteriam* curasse, simulque solitum appetitum restituisse: simplex enim myrrha cum sale lixivioso, tantillo aloes, & quodam oleo stomachico, destillato ex vino, aliquoties de die puero data, brevi tempore sanitatem restituit; venter huic erat infarctus, multa pituita tumens, introitum chyli in lactea vasa inhibens; quare corpus extenuabatur, denegato introitu nutrimenti, & proinde omnia ingesta per alvum emittebantur; quamprimum vero, resolvente hoc referata fuere oscula lacteorum, atrox cessavit appetitus, & absorptus chylus per alvum deponi non potuit, quam *Lienteriam* multi terreis absorbentibus frustra conantur suppressere.

bulimos. §. XLIII. Nemini quoque ignotum est, operarios, omnesque corpus suum multum exercentes, appetitum vegetiorem habere, quam qui otio torpent; huic si accedat aer frigidior, quandoque intolerabilis excitatur fames, quæ, nisi eam ingesto novo alimento placant, homines ita debilitat, ut vix amplius incedere possint, sed *syncope* correpti concidant: *bulimum* hunc morbum vocant. Non est *ex cibi defectu.* opus ex aliis locis septentrionalibus petant observationes, qui pro miraculo habent itinerarios fame brevi tempore fuisse necatos, cum in nostris quoque regionibus, si gelu intense urget, istud continuo experimur in iis, qui supra glaciem incedendo corpus exercent; nisi enim asportant frustum panis, animi deliquio periclitantur. Talem ergo famem majorem cibo curare oportet.

Cynorexia. §. XLIV. Qui vero appetitus major est, & fere insatiabilis, sed brevi post ingestionem alimenta si revomuntur, iterumque ingeruntur nova, *appetitus caninum* vocant: hujus vitium plerumque in ventriculo latitat, ubi humor acrior, simili fere modo, ut in appetitu sano bilis, ventriculum vellicans intolerabilem famem concitat: sed quoniam alienus est humor, ineptus decoctioni ciborum, frustra ingeruntur alimenta, quæ copia ventriculum onerantia vomitum moliantur: ex odore evomitorum alimentorum acido, hic agens liquor morbosus ad acidam indolem accedere videtur, quod etiam curatio adstipulatur, salibus enim lixiviosis, amaris, saponaceis alcalinis curatur.

Pseudo-rexia, §. XLV. Appetitus non solum major & minor fit, sed etiam quandoque nutritioni aliena petit, qui morbi omnes ad tria hæc genera referuntur, *fastidium*, *picam*, & *Malaciam*. Qui abhorrent ab omni esculento, ad deletam famem referri possunt; sed quandoque determinatum fastidium invenimus, uti nonnulli averfantur caseum, lac, butyrum, carnem, pisces, ex nulla manifesta causa, vel, si nimis sordida sint, vel male cesserint alimenta, vomitum, nauseamve

crea-

creaverint, vel diutius istis cibati fuerint; in quibus omnibus vix ulla reddi potest ratio probabilis, nisi quod in quibusdam animi pathemata, horrorem & motum inordinatum inducentia, famis sensum tollant, & in fastidium potius convertant. Animi autem pathemata in ventriculi actionem multum valere nemo inficias ibit, qui novit, multos aspectu vomentis, in similem quoque vomitum urgeri; imo si quid avide comederint, postea cum audiant, aliena & nauseosa esculentis fuere mista, statim ipsis movebitur stomachus, & licet cohibere velint, ingesta omnia revomunt. In tali fastidio quam maxime valere sentio medicamenta narcotica, & acida grata, quæ insolitum hunc motum, ex animi pathemate productum, compescunt; ut & persuasio huic animi commotioni contraria multum valebit. Quomodo autem animi affectiones agant in quasdam commovendas partes, non est hujus loci, quia istud antea in Exerc. I. De *motu vitali* peractum est, & in nostro Tractatu de *Insensibili perspiratione*.

§. XLVI. Tandem in *Pica* omnem appetentiam corruptam complectuntur auctores, quæ in hoc a fastidio distat, quod potius videatur ad auctam & alienam famem pertinere, cum in fastidio fames simul deleta sit. Homines, tam viri, quam foeminae, hoc morbo laborantes insolita quævis appetunt, quæ non sunt esui, cretam, calcem, cespites, arenam: sed non vacat omnia congerere, quæ passim in observationibus occurrunt. Isti sentiunt quandam speciem famis, sed quia humore titillante alieno excitatur, insolita petunt; quamobrem autem selectum faciant, non satis perspectum habeo. Hoc aliquoties tamen in ægris inveni putrido morbo laborantibus, eos petere falsa & acida, quæ olim, quando omnes morbi ab acido deducebantur, toxica sunt habita: cum vero hæc maxime profuisse expertus sum, modo clanculum voti compotes fieri potuere ægri. Ita quoque in chronicis nonnulli exposcunt cretam aliaque terrea, quasi natura indicaret medellam contra acidum in primis viis abundans: quam ob rem talia non sunt negligenda in praxi, ut inde deducamus indicationem curativam. *Malacia* vero solis adscribi solet gravidis, quæ præ ceteris aliquod genus alimenti eligunt, & quamvis minus conducere videtur gravidis, raro aliquid damni inde patiuntur, imo vel majori copia ingestum, si sit ex difficilis digestionis alimento, nihil molestiæ percipiunt, & facile digerunt, quæ ex minori quantitate alimenti, facilis materiæ, quandoque maxime anguntur; si vero non satisfiat desiderio, quædam inveniuntur, quæ inde in abortum aliumve morbum inciderunt: at ad hæc omnia exponenda Œdipo opus est.

§. XLVII. Post differentias has omnes explicatas, restat videre quid indicat *Appetitus restitutus appetitus*, seu qui ex alieno fit bonus, num semper sit inter bona signa censendus. Quæ mulieres *mensibus suppressis* laborantes conqueruntur de inappetentia, vel malacia, his si restituatur appetitus mensibus non redeuntibus, præcipuum est signum eam foeminam esse gravidam. Ex mensibus enim subsistentibus, tam ex morbosa causa, quam ex graviditate, si nascatur depravatus appetitus vel inappetentia, nunquam vel rarissime istud symptoma cessat manente causa; quare talis appetitus in mensibus ex morbo suppressis, sensim magis alienari solet. Verum in *gravidis*, quia foetus sensim crescens, plus nutrimenti a matre capiens, valet sanguinis abundantiam matris in corporis sui incrementum convertere, quare, cessante hac plenitudine, post tertium quartumve mensem solet depravatus appetitus, sine apparentibus mensibus, cessare & in naturalem converti; quod autem in nonnullis usque ad partum continetur, potius majori uteri incremento, quam copiae sanguinis retenti majori est adscribendum.

§. XLVIII. Neque in morbis semper bonum signum præbet *appetitus rediens*: *Rediens* si enim homo ex gravi morbo laborat, multisque doloribus vexatur, quando partes in sphacelum conversæ non amplius sentiunt, sæpe ex improvviso cibum expetunt, quia se sentiunt quasi omni morbo levatos; suspectus propterea semper talis

talis fuit practicus appetitus, cum viderint postridie periisse ægrum: ita sæpe lætamur videre, paulo ante mortem, post obstinatam alvi constipationem, in colico vehementi dolore, alvum laxari multaque egerere excrementa valde olentia: sed superinductus sphacelus hanc relaxationem induxit: ob hanc rem, nisi appetitus redeat in magnis morbis, cum aliis bonis signis, & post factam crisin, huic minime fidendum est: sed si cum dictis simul veniat, admodum laudandus, quia tunc indicat corruptum esse subactum vel expulsum, visceribus vigorem esse restitutum; nervos iterum sentire chyli in corpore defectum, simulque suppeditari posse materiem, ex qua novæ vires possunt peti, & deperditum restitui.

EXERCITATIO MEDICA QUARTA.

D E S I T I.

Sensuum divisio. §. I. **Q**ui nimis sunt addicti sensuum divisioni in internos & externos quinque, famem & sitim, vel nullum esse sensum, vel ad tactum generalem retulerunt: ob quam rem hæ sensationes minus debito a physicis & medicis agitatae fuere. Missa itaque recepta divisione sensuum, quia res non ad præconceptam divisionem est accommodanda, sed ex collectis rebus divisio est formanda, alia adeunda est, quæ tam generales quam speciales sensationes complectitur, ut ita uno alterove verbo sensus omnes a se invicem discerni possint. Mens nostra si aliquid percipit quovis modo, illa perceptio *Sensus* vocatur: in his perceptionibus seu sensibus statim duæ notabiles distinctiones occurrunt. Quippe reminisci, ratio- cinari, similesve actiones mentis puræ ad *sensus internos* seu *spirituales* puros pos- sunt referri, quoniam sine ulla sensibili vel perscrutabili mutatione organica exer- centur, his præ omnibus aliis animalibus gaudet homo: reliqui autem *Sensus orga- nici*, qui ex mutatione corporea excitantur, quandoque in aliis animalibus perfectio- res exercentur; neminem enim latet feles visu, canes olfactu, lepores auditu an- tecellere hominem.

Sensus pari & organici. §. II. Malui sensus omnes in *Puros* & *Organicos* distinguere, quam in *Internos* & *Externos*, quoniam sensus externi appellati multi in nobis concitantur a causa interna. Si quis contendit, præter visum, olfactum, auditum & gustum, omnes sensus reliquos ad tactum referri debere, id sine ratione fieri autumo, quia dicti sensus, etiam tactu, seu causa organica concitantur, & pro diversitate organi, quod a causa mechanica movetur, dumtaxat varias sensationes nobis repræsentant. Non raro audiunt ægri sonum sine ulla aeris commotione sonora; vident lucem & scintillas oculis clausis & in meris tenebris, quoniam organa ea commota fuere ab aliena causa mechanica interna. Ex his itaque constat, Medicos & Physicos vi- sum, exempli gratia, distinctum facere sensum a tactu, quod in oculis solis exer- ceatur, quando nervus opticus in oculi fundo, a radiis lucis agitated, nobis visum præbet: sed quia similis etiam visus, ut dictum est, a morbosa organica causa concitatur, non est ipsum lumen quod penetrat usque ad mentem seu animam percipientem, sed commotio mechanica facta in fundo oculi, quæ ipsa, vel ali- quid aliud inde natum, menti offertur. Quia vero organum distinctum cum spe- ciali tactus perceptione in corpore nostro fecit, pro visu, auditu, gustu, & olfactu, distinctos a tactu sensus, reliquæ perceptiones a corporea causa, quæ similia attribu- ta obtinent, eodem jure gaudere debent. Itaque ad primam classem referri pos- sunt sensus quinque, qui a causa externa concitantur, ut tactus, visus, auditus, olfactus, & gustus: hi sensus si excitantur a causis aliis in nobis, morbosi dicun- tur. Altera classis ex abundantia generatur, & evacuatione facta cessat, ut est e- gestionis & generationis amor: horum sensus si excitatur sine abundantia ex qua-

vis alia causa, itidem ad morbos refertur. Tertia denique ex defectu producitur, ^{Ex defe-} atque ingestione placatur, qualis est respirandi necessitas, perceptio famis & sitis: ^{tu.} hi quoque sensus sine defectu concitati morborum sunt: atque non concitati si defectus sit præsens, ad morbos quoque referuntur. Hos autem sensus esse distinctos a sensibus externis, & eodem jure frui, ut visus & auditus, paucis expediam. ^{Visus sensus & species.} Diximus visum specialem esse sensum: 1. quia fit in speciali organo: 2. quia similis nullus est in toto corpore: 3. & quia a solis radiis lucis in sanitate excitari potest. Hæc tria si valeant visum reliquis a sensibus distinguere, sitis itidem, si quoque hæc tria specialia habet, a reliquis erit separanda sensibus.

§. III. Omnium igitur primum adstruendum venit *Sitim* ad sensum pertinere; ^{Sitis est sensus distinctus.} deinceps videndum, num has tres quoque distinctiones possideat. Si quis hominem sanum, qui intra viginti quatuor horas non degustavit potionem, rogat num quid sentiat, quale expectabit responsum? Nisi ineptissimus, hunc hominem admodum sitire expectabit, seu ingenti cupiditate bibendi flagrare, eumque in se sentire aliquid molestum quod potionis assumptione solebat cum gratitudine levare, eumque instigat ad avidissime bibendum. Qui negat talem hominem non sentire, in semet ipso experimentum capiat, ultro fatebitur se vix unquam majorem molestiam percepisse. Contendere autem velle eam molestiam, seu sitire non pertinere ad sensum, quia non fit a causa externa tangente: hoc est quod quærimus, hunc nempe sensum non pertinere ad quinque sensus externos: causa utique agens externa non semper desideratur ut sensus fiat, quemadmodum in sensibus internis puris sine causa mechanica, qui tamen a sensibus non excluduntur. *Sitim* autem ad sensum referri debere, ex dictis constare reor; eam vero esse sensum distinctum, paucis adstruere conabimur. Superius diximus tria requiri ut sensus separetur aliquis a generali denominatione. Primum *exercetur in speciali corporis loco*; nemo autem ^{In speciali loco.} gustum & sitim idem statuet, quamvis utrumque præprimis exercetur in ore & forsan faucibus, majori equidem jure tactum in lingua, & gustum pro eodem sensu posset capere: nullus equidem est, qui per se nunquam expertus, tactum, gustum, & sitim, diversas esse sensationes; & quoniam nusquam in nostro corpore similis percipitur sensus, ad tactum generalem sitis referri nequit. Alterum ex dictis quoque evidens est, quippe talis perceptio quam sitire vocamus & quæ verbis exprimi nequit, ut omnes reliqui sensus, in speciali corporis loco excitatur: petere autem sine sitis perceptione quid sit sitis, æque absurdum foret, ac si ex cæco nato vellem colorum elegantiam intelligere, vel a surdo quid sit sonus. Tandem specialis requiritur causa in homine perfecte sano, quæ sitim excitat: humiditatis defectus præprimis in ore specialem hunc sensum concitans, qui neque tactu, neque visu, neque auditu, neque aliis sensibus detegitur, probat sitim ad specialem sensum referri debere, qui humiditatis defectum in nobis declarat. Opponi hic posset defectum non posse excitare sensum, sed ut sensus excitetur aliquid præsens esse debere. Tale astutia quadam, non ex vera ratione vel ex animi sententia argumentum inferunt; utique quod non adest, id nequit sensum organicum excitare, sed vero id, quod in sanitate adesse debet, si deficit, non raro statuitur mortis causa; ita ex sanguinis defectu perit homo, non vero sanguis effluens mortem infert, uti tamen dici solet, sed quia post effluxum in corpore deficit sanguis: simili modo post humiditatis consumptionem, reliqui humores spissiores in nobis sensum sitis præbent, quod communi modo loquendi, ex humiditatis defectu oriri dicitur.

§. IV. Quoties in nobis similis sensus excitatur, qualis in homine sano post ^{Sitis non naturalis causa.} longiorem a potione abstinentiam sentitur, ex quavis alia causa, homo sitire dicitur: hæ causæ quia multæ sunt, discernendum, quænam harum sit naturalis, quæ vero non naturalis & morbosa. Corpus hominis ita est creatum, ut suis actionibus semper aliquid deterat, atque expellat; ne autem brevi pereat, no-

va sunt ingerenda quæ suppleant : inter hæc non infimum locum obtinet potus : hic, ut maneat vita & sanitas, tantam debet suppeditare humiditatis quantitatem, quantum inevitabili corporis actione vitali consumitur. At vero consumptio hæc non est omni tempore æqualis ; multum equidem differt in aere humido & sicco, in calido & frigido, in motu corporis & quiete ; quare nemo posset ex quacumque definita quantitate potionis, debitam in corpore nostro servare humiditatis quantitatem. Placuit itaque Deo talem in nobis locare sensum, qui nobis declarat quoties naturali corporis actione consumpta sit humiditas, & ut cum oblectamento suppeditaretur, quod corpori est necessarium, voluit gratitudinis sensum adjicere, quoties sitientes potionem ingerunt ; imo ne nimius fieret defectus, & ita periclitaretur vita, tantam molestam perceptionem in hoc sensu locavit, ut in valide sitibundis sitis fiat intolerabilis.

*Humidi
defectus.*

§. V. Ita patet ex humiditatis defectu naturali concitari sitim, sed non constat adhuc, quid sit id, quod nervos ad sitim faciendam ita afficiat. Nemo ambigit, nervos seu eorum spiritus, istud esse organum, quod sensus defert ad animam nostram : hi nervi in sensibus externis a cognita & manifesta causa commoventur, ut oculus a radiis lucis, aures ab aere tremulo, olfactus ab effluviis odoriferis ; sed sitis sensus ex defectu humiditatis, ut dictum est, excitari nequit, verum ab alia causa in nobis quæ ex hoc defectu nata est. Dum nimis ablata est humiditas, vel tota massa liquoris in corpore relicta est minor, vel alienata, vel partes firmæ nimis privatæ sunt humiditate, omnes hæ causæ ex defectu natæ simul vel quædam harum sensum sitis inducunt. Quia vero invenimus æque in obesis & corporibus plenis sitim generari ac in macilentis, statuendum est sitim non indicare majorem vel minorem copiam humoris totius corporis. Alienam autem humorum indolem sitis perceptione detegimus, non vero omnem, ut infra patebit in siti morbosa. Præcipua & naturalis sitis causa est improporcionata humiditatis quantitas ad reliquas humorum partes, dum evacuatio naturalis humidi spissiore & densiore reliquerit massam. Tales spissiores & humido privati humores ad nervos sitim percipientes delati, possunt in his nervis quendam sensum excitare, qui a nobis *Sitis* vocatur. Sed cum continuo tales adferuntur densiores humores, vascula & reliquæ partes firmæ magis exarescunt, fiuntque bibulæ & magis constrictæ. Ex duobus his concurrentibus, quæ utraque ex humidi defectu nascuntur, sensum sitis naturalem fieri autumo. Has concurrentes causas sensum aliquem excitare posse in tactus organo, evidens est : ablata enim epidermide, ut summa cutis exarescat, concitatur molestus sensus seu dolor ; hoc si fiat, ad nervos siti dicatos fit sitis perceptio.

*Eadem
causa in
omnibus
organis
non eum-
dem sen-
sum exci-
tat.*

*Nervi
sitim per-
cipientes
ubi.*

§. VI. Eadem causa sensum movens variis organis sentientibus applicata, non in omnibus sensum provocat ; nemo enim nisi oculis percipit lucis radios ; nemo sonum ex aere tremulo nisi auribus : & quamvis oculi obtineant sensum veluti omnium subtilissimum & facillime mobilem, non detegunt effluvia odorifera, vel corpora sapida ; imo ne quidem suspicari possemus tales existere particulas odoriferas & sapidas, nisi nervo olfactorio vel gustatorio detegerentur a nobis. A communi itaque sentiendi modo non abludit, statuere a solis nervis siti dicatis percipi sensum sitis, licet eadem causa quæ in his nervis sitim excitat, alibi quoque applicatur nervis. Ubi nam vero hi nervi sint locati inter auctores non constat : nonnulli statuunt in superiori ventriculi orificio ; alii in duodeno ubi succus pancreaticus & bilis commiscuntur. Rectius sentire autumo, qui in ore & faucibus quærunt sitis sensum naturalem, quoniam cum siccitate harum partium semper juncta est sitis, in ceteroquin sanis, & in sitientibus hæ quoque partes inveniuntur aridiores : quia collutione oris, atque applicatione nonnullorum medicamentorum, sitim extinguunt, ad has partes, sitim lenire & fallere valemus. Quod in varias distracti fuere sententias auctores de assignando loco pro sitis perceptione non est mirandum, quia sitibundus magis attendit ad potandum, quam ad ipsam sitis perceptionem.

§. VII.

§. VII. Ex hac assignata sitis causa præstantissima nascitur in diæta regula, quantum debeant fani bibere ad conservandam sanitatem: sitis enim perceptio declarat, num corpus potu indigeat. Quare potio sine sitis admonitione neutiquam sanitati conducit: neque minus bibere debent fani quam sitis exigat, cum æque in defectu, quam excessu, peccandi detur locus. Quia vero statim a potione tanta non suppeditatur his nervis humiditas, ut omnino nulla fieri possit sitis perceptio, cum maxima pars potionis totum corpus permeare debet priusquam per arterias fertur ad oris internas partes, protinus tanta potus quantitate non est onerandum corpus, quantam sitis exposcit, sed partitis vicibus aliquid dandum, ut tempus concedatur humidis assumtis perveniendi, communi lege circulationis, ad dicta loca. Quamvis enim humidum abundat in corpore, modo non fertur ad hæc loca, sitim non minuit: ex qua ratione sæpe homines sitibundi manent post ventriculi impletionem, quamprimum parva in ore humiditas evanuit, quæ ex assumpto potu fuit inducta. Qui contendunt deglutitos liquores diu commorari in ventriculo, antequam ferantur per pylorum in intestina, ut a vasis lacteis absorbeantur; & existimant per nullas alias vias ad hæc pervenire posse loca, his maxima videtur difficultas, quod parvo tempore ab assumtis aquosis in sitibundis nascatur oris humiditas. At evanescit hic scrupulus, si attendamus ad inventa anatomica & physica, non solum per vasa lactea, sed & passim in ore, faucibus & ventriculo, præprimis hæ partes si aridiores sunt, uti in sitibundis, promte absorberi humores tenues his partibus applicatos: ita enim multo citius ad omnia loca corporis feruntur liquores quam inscius judicaret, quia singulis cordis ictibus sanguis per aortam ultra longitudinem unius pedis promovetur, ut alibi demonstravimus. *Comp. T. 31. XXV.*

Sitis declarat quantitatem portionis.

Qua via tam cito humectatur os ab assumptis.

§. VIII. A salubri mediocritate recedentes, vel quod plus ingerant quam exposcat sitis, vel sitim nimis diu tolerant, ad multos morbos exponunt corpus, qui hic tradi non debent, quia non ex siti, sed ex majori vel minori potione dependent, quod in diæta est præcipiendum. Ne autem aliquis existimet nimia potatione sola generari morbos, nullos autem ex nimis diu tolerata siti, quod statuere videntur, qui in morbis acutis sitibundis potum detrahunt, paucis aditruere conabor, ex siti tolerata graviores, quam nimia potatione nasci morbos, sed rarius occurrere. Sive enim ingeratur potus, sive non, causa vitalis tamen pergit sensim corrumpere liquores: hi corrupti expelluntur si novus ingestus accedit liquor, & ex eodem ingesto liquore corpus nostrum bonum succum conficit ad supplendum defectum: si vero novus non accedit, parcius quoque procedit evacuatio, ut docet urina & perspiratio in his hominibus: multum igitur retinetur quod corpori est inutile, & quod erat evacuandum; tandem iterata corporis actione ita degenerant a solita crassi humores, ut vix boni succi retineant vestigium. Debilitatur interim corpus, quia vel deficit, vel degenerata fuit spirituum materia, omnesque humores tenues consumti sunt, massa sanguinis spissior minutissima vasa intrare nequit, quæ sensim exarescunt atque concrescunt. Hoc tempore ingestus potus diluit quidem, sed ob inductam debilitatem, & degeneratos in corpore liquores, non adaptatur, sed crudus manet; quare diu sæpe durat priusquam ad sanitatem reducitur corpus. Frequentiores generari morbos ex intemperantia potionis nemo nescit, sed morbi hi abstinencia facile superantur, nisi quis nimis diu indulserit intemperantiæ.

Sitis tolerata graviores infert morbos, quam potio nimia.

§. IX. Quæ vero sitis ex quavis alia causa generatur, quam quæ est assignata, non naturalis est censenda. Hæ causæ vel inducunt similem siccitatem, seu humiditatis defectum, qualis est in siti naturali; vel per aliam causam hos afficiunt nervos, ut tamen similem sensum præbeant, qualis a naturali sitis causa percipitur; ita sal maris, olea adusta, & in nobis putredo, bilis acrior & similia. Ex alienis causis similem sensum excitari non est infrequens in aliis quoque sensuum organis observare: ut oculi compressio, & retinæ agitatio in morbis acutis, sine radiis lucidis nobis lucem repræsentat; agitatio auris internæ sonum,

Sitis ex aliena causa.

Regule
in morbis
ex variis
causis na-
tae.

susurrum & similia audire facit. In omnibus his causis alienis tria præprimis sunt observanda. 1. Quomodo causæ eæ ad hos nervos pervenire possint ut sensum sitis excitantes. 2. Ex quibus adjunctis signis medicus cognoscat, qualis causa sitim inducat. 3. Specialis addenda est curatio cuicumque causæ singulari. Hoc semper agendum est in omnibus morbis nomen mutuantes ex phænomeno, quia curationes non ad phænomenon, sed ad causas istud phænomenon proferentes, sunt dirigendæ: frequentissime autem hoc a practicis omittitur; hi enim, quamprimum detexerunt morbum, medicamentum adhibent tali morbo dicatum. Non igitur mirandum toties frustra adhiberi medicamina ab aliis cum summo successu adhibita, quia idem morbus ex phænomeno vocatus, non raro contrariam curationem exigit. Laborant multi alii sedulo investigare locum affectum, ut appropriatum inveniant medicamentum, & propterea summa industria perscrutantur anatomiam. Laudo hoc institutum: sæpe enim magni momenti est scire quænam pars sit affecta: majoris autem erit utilitatis perscrutari causas morbosas varias eandem partem afficientes, & idem phænomenon producentes: nam magis est mutanda curatio ejusdem morbi ex phænomeno vocati, quam si eadem morbi causa varias corporis partes occupat. Hoc quoniam in exemplis clarius patet, unum alterumve adducam. Qui laborat inflammatione pleuræ, pulmonis, diaphragmatis, ventriculi, intestinorum, meningum vel aliarum partium, signa quam maxime discrepant, sed curatio in omnibus fere similis est; quare in hujusmodi morbis signa sunt perscrutanda, ut cognoscamus eam partem inflammatione tentari: alter vero laboret capitis dolore, vix valemus omnes assignare causas dolorem capitis inferentes (Conf. Comp. T. 17.), ad quas tamen si non dirigitur medela, incerta expectatur curatio. In hujusmodi morbis ex antecedentibus causis & adjunctis signis detegendum qualisnam generalis morborum causa dolorem infert, ut ita ex causa detecta adhibeatur appropriata curatio. Quemadmodum non omnes morborum causæ generales inferunt dolorem, ita non omnes inferunt sitim; ex generalibus itaque illæ solæ sunt enumerandæ, quæ sitim inferre solent. Has omnes, quas observando vel legendo colligere potui, cum suis signis & speciali curatione proponam.

Siccitatis
causa.

§. X. Humidumiciens in oris partibus inducere sitim superius satis demonstravimus; quare statim ad signa tradenda est descendendum (IX.): verum quoniam hæc morbosa siccitas a variis inducitur causis, præcipuas earum primo delibabimus. Omnes evacuationes humoris tenuioris copiosiores, ut urinæ, & alvi profluvium, sudor copiosior, insensibilis perspiratio largior, & nimia lactatio in mulieribus, detrahunt humiditatem corpori: sensibiles hæc evacuationes conspectu ipso vel revelatione ægri dignosci possunt; largior autem perspiratio ex iis quæ diximus in Perspiratione Cap. XIII. desumi potest. Ad hunc quoque titulum referri potest Hydrops, quatenus lympham colligit in vesiculis & cavitatibus, atque ita circumeunti sanguini detrahit naturalem humiditatem. Medicamenta quoque purgantia, diuretica, sudorifera, & diaphoretica detrahendo humiditatem, sitim inferre neminem latere potest: hæc tamen multo majorem inducere sitim, quam est proportio evacuationis, non raro in praxi observatur; sæpe enim a Cantharidibus exhibitis vel applicatis, vel a purgantibus, sine notabili evacuatione humoris tenuioris, admodum sitiunt homines: hoc igitur a sola humiditatis detractio non oriri nemo inficias ibit; quare in medicamentis his alia quoque virtus est quærenda, quæ sensum sitis excitat: ob quam rem omnia purgantia, diuretica & sudorifera non indifferenter sunt præscribenda, si molienda sit evacuatio in sitibundis, vel in quibus sitis est evitanda, uti in acutis inflammatoriis & in hydrope.

Siccitatis
cognitio.

§. XI. Ut cognoscamus, num sitis fiat ex humidi defectu, debemus attendere primo, num talis evacuatio humoris tenuioris copiosior antecesserit, & adhuc duret: dein reliqua in eo corpore consulere phænomena, siccitatem, seu humidi tenuioris defectum indicantia. Sola evacuatio copiosior non semper sitim generat: ita critica eva-

evacuatio in acutis si sitim sedat bonum est signum; in hydropicis & leucophlegmaticis multum humiditatis egerere sanationem promittit, modo absint siccitatis signa; iis vero simul natis, ad ipsa cum copiosiori evacuatione mali ominis est, quod *Hipp.* his verbis exprimit: *sitis præter rationem soluta in acutis morbis, mala est.* Ut enim in acutis sit critica evacuatio, minui debet morborum acutorum causa, id est vehementior circulatio omne tenue expellens, & reliquum in lentorem compingens, debet sedari, ut ita per blandiorem motum resolvatur compactum: hoc fieri cognoscimus ex evanescentibus signis siccitatis, inter quæ quoque sitis intensa, atque ex minori calore & moderatiori pulsu. Si vero evacuatio fuit facta in acutis, perseverantibus signis siccitatis, certi sumus has evacuationes non sustulisse morbi acuti causam: imo si sitis cum reliquis siccitatis causis tollitur, in summo periculo versatur æger, quia necessario sitire debebat, sed nunc ex insensibilitate organi sitis, non percipit sitim, quod est *præter rationem.* In hydropicis quoque si multum humoris tenuioris emittitur, sine sitis augmento, designatur evacuari collectam lympham, & tamen sanguinem non privari naturali humore tenui: si enim ex sanguinis massa provenit hæc evacuatio, remanens sanguis tenui privatus sitim inducit: atque sitis absentia in hoc casu denotat nullam esse in humoribus corruptelam, quæ in hydropicis non minus, quam defectus humiditatis, sitim generat. His perpensis alter signorum fons est adeuridus, phænomena scilicet sunt perpendenda, quæ siccitatem seu defectum humidi declarant. Os siccum, asperum, vel glabrum quasi exustum, post colutionem statim exarescens; humidi applicati ad corpus prompta absorptio & exsiccatio; oculi squalidi, sordidi, & lemæ in eorum angulis; salivæ defectus, & sputum tenax vel nullum; alvus dura & exsiccata excrementa egerens, aut constipata; urina pauca, acris, rubra, flammea; sudor nullus. Omnia hæc vel multa horum si adsunt, necesse est ut talis quoque homo sitiatur, quia sitis sensus defectum humiditatis declarat. Hi autem homines si non sitiunt, valde malum est, vel mens ægrotat, vel nervus ad sitis sensum destinatus non sentit.

Sitis præter rationem soluta mala.

Siccitatis signa.

§. XII. Quamvis sitis hæc, ut sitis naturalis (VII), videtur tolli debere, majori tamen cautela opus est: quippe qui vellet in hydropicis placare sitim copiosiori ingestione, brevi tempore interimeret hominem, quia suppeditaret id, quod est præcipua morbi causa, nempe humoris abundantia: nam, quamprimum in huiusmodi morbo aliqua est in sanguine humiditas, promte deponitur in cavitatibus vel vesiculis dilatatis, ut vix ad os perveniat ad sitim leniendam. Practici itaque experientia edocti solummodo fallere conantur in hydropicis sitim, ut præcepimus in *Comp. T.* 35. LXII. His medicamentis topicis, ori applicatis, communicatur nervis, ad sitis sensum destinatis, quædam humiditas, qua molestia sitis redditur tolerabilior. Si evacuatio copiosior sitim morbosam facit, vix valemus temperare sitim potu copioso, quia nimis cito egeritur: hoc solum si fieret, concedenda esset potatio largior, verum, quæ egeruntur bona sunt & mala, utilia & inutilia; quæ vero ingeruntur semper sunt cruda, corpori nostro nondum accommodata; quare in his corpus fit debile majori egestionem, & crudis onustum copiosiori portione: in his igitur moderanda est evacuatio, & si nimis urget sitis sæpe fallenda, retinendo talia in ore, quæ sitim supprimunt, donec suppressa evacuatione sufficiens humidi copia manet in corpore. Quandoque vero largius potandum, ut in *Dysenteria*, assumpto pharmaco purgante, vel diuretico, si vis medicamenti, vel morbosum acre, naturam ad exonerandum frequentius intligat. Hoc expertus est *Hipp.* qui in medicamentorum potionibus, dum purgantur non sitiunt, non cessant, nisi sitierint. Hic sensus non ita est capiendus, ac si sitis ipsa sisteret alvi egestionem, sed quia validissima medicamenta alvum ducentia Veterum in intestinis permanentia, sine ablutione per potum copiosiore, faciebant continuare alvi egestionem; si vero per potum copiosiore simul eluerentur, cessante irritamento, alvus sistebatur; hinc per sitim debemus intelligere potionem, quam

Huius sitis curatio.

sitis expostulat. Vehementer ob stare videtur quod *Hipp.* sitim inter mala signa dysenteriae locaverit, cum antea monuimus largiori potione leniri Dysenteriam, quod quoque videre est in *Comp. T. 90, CLVIII*; sed sciendum est, dysenteriam duplici modo sitim excitare, nimis magna scilicet evacuatione, vel materia corrupta corpori communicata; utrumque hoc numquam quidquam boni indicare potest: & potionem copiosiore sine sitis necessitate in Dysenteria & medicamenti assumptione non raro eluere ac re id vellicans, atque ita curare. Quare sensus *Hipp.* est evidens de siti in medicamentorum potionibus, si per eam intelligimus potionem quam avidissime expetit sitibundus.

Sitis ex causa aliena.

Ab Ichore.

A Putrefacto.

§. XIII. Sitis sensus sine defectu humiditatis a multis causis excitatur morbo-
sis, quando liquor alienus his nervis applicatur, eodem modo ut in sensibus aliis, qui non semper ex naturali, sed quoque ex non naturali causa excitantur: non vero omnis corruptus vel alienus humor ad has partes delatus sensum sitis movet. Quare illi humores sunt percurrendi, qui ad os delati sitim faciunt. Inter hos frequentissimus est liquor corruptus, qui *Sanies* vel *Ichor* potest vocari, aut materia colliquefacta a præcedenti putredine. *Putrefacta* ore masticata & deglutita, orisque & faucium ulcera saniem fundentia, nimiam sitim excitare continua experientia ita firmatur, ut nullum relinquatur dubium, quin putrefacta sitim faciant: sed *Putredo* in aliis locis corporis nata, quomodo possit excitare sitim, non omnibus æque constat, præprimis illis, qui vel negant vel ignorant absorptionem putrefacti. Ut sitis hæc intelligatur, & ex arte curetur, tria superius (IX.) citata sunt exponenda.

Aeris absentia cohibet putredinem.

Historia altera.

§. XIV. Quid sit *Putredo*, & quomodo generetur exposuimus (Comp. Tr. 37.) Ex quibus dictis constat, humores crassiores converti in liquamen, solidaque ita mollescere, ut abeant in pulpam, imo quandoque in humorem tenuem. Sit itaque *fœtus* in utero mortuus, vel remaneat ibidem vel *placenta* vel *sanguis* in uteri cavitate confusus: hæc in loco calido & humido putrescunt, ut omnes humores stagnantes, modo concedatur aeri aditus; nam si omnino arcetur aer, diu a putredine servari possunt humores, quemadmodum observavi in quadam puella atreta, quæ per integrum biennium diris cruciatibus, doloribus, convulsionibus, vexata, facta sectione in membrana firma pudenda intus claudente, ultra sexaginta uncias sanguinis spissioris inodori fere, & sine ullo indicio putredinis, evacuavit, qua evacuatione protinus fuit liberata a diris istis symptomatibus & ventris infimi tumore. Nemo erit, credo, quin mecum ibit in eandem sententiam, hunc sanguinem a longo tempore in vagina, uteri cavo, & forsan tubis fallopiæ, quia ad latera quoque ventris erat tumor, fuisse collectum & aggregatum; quod tamen non erat putrefactus ob denegatum aeris aditum contigisse. Eadem quoque videtur ratio in Hydropicis, quibus sæpe magna colluvies laticis per longum tempus sine ulla corruptela. Quamprimum vero admittitur aer, brevi tempore collecti humores in terribilissimam putredinem vel corruptelam erumpunt. Hinc Scirrhus & Cancer clausus diu toleratur, apertus vero maxime sævit. Ita post Partum, dum os uteri est apertum, si vel *placenta* vel *sanguis* in uteri cavo remanet, post paucos dies sanies foetida a pudendis exstillare incipit, accenditur febris colliquativa cum multa siti, quæ nullis auscultat medicamentis, quamdiu putrefactum manet in utero. Neque Sitis in *Alvo adstricta* laborantibus compescitur multa potatione, sed alvi ductione & clysmatis injectione, quod corruptum ex intestinis eluit. Et quoniam lympham corruptam *Hydropicorum* nullis medicamentis novimus emendari, sitis hydropicorum ex putredine nata inter funestissima hydropis signa censetur. Si putrefactum toti massæ mistum est, uti in statim dictis hydropicis, & in febre putrida, nemo mirabitur, istud quoque putrefactum ad os & fauces ferri posse; sed ex quibusdam locis privatis eo quoque duci majoris difficultatis videtur. Ad hoc itaque probandum duntaxat demonstrandum est, putrefactum ex quibusdam cavita-

tibus duci posse in communem massam sanguinis. Experientia constat homines *Cur sitis*
alvo adstricta laborantes siticulosos fieri; sed an illa sitis veniat ex putrefactis & *in alvo*
 corpori communicatis excrementis, disputari potest; forsitan enim ex consensu inte- *adstricta.*
 stini a durioribus excrementis irritati generari sitim, vel ex alia quadam incogni-
 ta causa, contendere potest aliquis, ut non sit necesse putrefactum ex intestino
 colo absorberi; præprimis quia nulla vasa lactea ex hoc intestino provenientia,
 sunt demonstrata. Hoc autem verum esse experientia constat chlysmata nullis pur- *Absorptio*
 gantibus acuata, injecta retineri, liquoremque eum postea per urinam reddi, & *ex intesti-*
 alvum liquidam sensim exsiccare; quamobrem liquor in colo intestino contentus, *no colo.*
 quia non commutatur in nihilum, vel debet absorberi a vasis hujus intestini, vel
 intrare per valvulam Bauhini in tenuia intestina, ut absorbeatur. Hoc autem fieri
 quis crederet, quum valvularum usus est inhibere regurgitationem, quæ hic esset
 continuo peragenda, ut deposita excrementa liquidiora ex tenui intestino in Co-
 lon exsiccarentur? Ex quibus rationibus non erit ineptum statuere; tenue ex pu-
 tredine in Colo natum, vel vasis lacteis, vel meseraicis venis recipi, & corpori
 communicari. Has autem vias non esse ab Anatomicis detectas non derogat huic
 sententiæ, quia multa imperscrutabilia, vel ob parvitatem, vel pelluciditatem,
 Anatomicos latent, quæ tamen certa rationis lege evincuntur. Quis anatomico-
 rum demonstravit porulos in tunica cornea quos penetrant luminis radii? quis
 oscula lacteorum in tenuibus intestinis? nemo tamen inficias ibit hos porulos &
 oscula admittere necessitate rei victus. Non minori quoque certitudine evincimur,
 in intestino colo admittere oscula absorbentia venosa, quæ viam pandunt in ve-
 nas sic dicendas lacteas, quia desinunt in vasa lymphatica & ductum thoracicum,
 vel in venam portarum, per venas dictas meseraicas. Quænam horum vasorum
 hoc fungantur officio, utrum utraque simul, non est hujus loci disputare, quum
 sufficiat admittere viam ex Coli cavitate in communem massam. Eadem vi ar-
 gumenti evinci posset humidum ex uteri cavo absorberi posse a propriis suis ve-
 nulis: ne autem actum agamus, suppono ex dictis satis intelligi posse & tan-
 quam veritatem demonstratam admissam. Graviter obstare tamen videtur, si pa- *Abjectio.*
 tula talis ex his cavis admittatur via, cur liquor non semper ducatur per eam.
 Ex observatis in tubis amplioribus, qui cujuscumque generis liquorem eadem ve-
 luti facilitate transmittunt, hoc dubium natum; at tubuli exilissimi, certum ge-
 nus dumtaxat liquoris admittentes, hoc dubium remonent, præprimis animadver-
 tendo hos tubulos in nobis vitali motu esse donatos, qui languescens, potens est
 omnem sistere transitum, & magis agens, promovere absorptionem. Hanc Ab-
 sorptionem paulo amplius persequi oportet, ut in sequentibus de hac re nullum
 moveatur dubium. Ut in nobis fiat humoris *Absorptio* multa requiruntur con- *Absorptio*
 currentia, quorum unum vel alterum si deficit, protinus non amplius absorbetur *describi-*
 liquor, quod in tubis amplioribus mortuis minime observatur; hi enim sequun- *tur.*
 tur leges generales hydraulicas; tubuli autem in nobis, & ob exilitatem, & ob
 motum vitalem, ab his legibus generalibus frequentissime recedunt. Ut itaque
 ingrediatur liquor tubulos minimos, 1. tanta in particulis liquorem constituen-
 tibus requiritur *Parvitas*, ut particulæ illæ non superent magnitudine aperturas
 in tubulis: hoc non est ita verendum in tubis amplioribus: crassissima enim a-
 limenta egeruntur, tenue vero solum oscula absorbentia intrat: inde quæcum-
 que in intestino colo crassa ante putredinem egeruntur, putredine vero multa
 ex his liquefacta & attenuata absorbentium oscula subire possunt. 2. In tubulis
 majoribus *Tenacitas* seu *Cohæsi*o major inter partes raro impedit ingressum; in
 tubulis autem minimis frequens est causa, modo enim inter partes aliqua sit
*Cohæsi*o denegabitur introitus; propterea contenta intestinorum viscida copiosio-
 rem solito faciunt alvi egestionem: imo quæ intrare potuissent, iis quoque præ-
 cluditur introitus, osculis a viscido obsessis. Quæ vero hanc visciditatem de-
 stru-

struunt, inter quas causas excellit putredo, promovent absorptionem. Quare, quæ antea non potuerunt intrare, eorum post putredinem facilis est in oscula minima introitus. 3. Specialis quoque lex in tubulis minimis observatur, liquorem enim satis valida potentia tubulum ingredi, qui aliquam cum tubulo attrahente possidet *Convenientiam*, alienum vero non intrare: hoc in canalibus majoribus non observatur. Quid autem sit istud *Conveniens* non est hujus loci perquirere; sufficiet huic negotio experimenta probare, pingua & oleosa non attrahi, seu, si mavis, non ingredi tubulos exilissimos humido madentes, neque in iis contra naturalem gravitatem ascendere. At vero eadem hæc per putredinem commutata imbibuntur promptius. Quæ ergo in cavis corporum conservabantur & non absorbebantur, nunc per putredinem, non solum in liquamen, sed & aliam indolem conversa, intrare possunt oscula absorbentia. 4. Denique specialis illa quoque observatur lex, quod canaliculi impleti *renuant evacuationem*: nam eadem potentia, quæ attrahit, donec plenus est tubulus, eadem quoque est, quæ facit ne exeat liquor susceptus; quare in canalibus quietis semel facta impletio facit, ut canaliculi maneant pleni & nihil novi recipiant: hinc in corpore vivente requiritur, non solum causa absorbens quæ implet absorbentia vasa, quia in tali statu nulla fieret corpori communicatio, sed & alia, quæ facit ut receptus a tubulis absorbentibus liquor ducatur in reliquam massam, locusque relinquatur vacuus pro novi liquoris receptione. Hoc perficitur in canalibus, qui sunt valvulis ornati, motu alterno constringente & demittente, quo quaquaversum in constrictione & compressione urgetur liquor & in dictis vasis versus partem eam, quam respiciunt valvulæ, in relaxatione autem operatur iterum actio absorbens ut impleatur: alterno igitur hoc motu pergit absorptio & propulsio secundum directionem valvularum in istis vasis. Quia vero in venis absorbentibus ea directio fit semper versus truncum, liquor absorptus tandem communicatur liquoribus seu sanguini qui fluit per venas in quas se exonerant hæc primo absorbentia, dein lymphatica vasa. Nisi hic accedat motus, nulla haberetur propulsio putrefacti & translatio in communem massam. Inde manifestum est, si putrefactum tenetur in quodam loco in cuius ambitu talis non est motus, putrefactum diu hære posse sine communicatione ulla; quamprimum vero accedit motus pellens absorptum ex minimis vasculis directione valvularum in eorum trunculos, orificia vasculorum absorbentium novo liquore putrefacto implentur, putrefacto in quodam cavo hærente, atque ita successive istud corruptum communicatur circulantibus. Ille motus languidior igitur permittit corruptum diu hære in corpore sine communicatione ulla: si vero stagnans liquor sensim fit acrior, ut irritamento suo in ambitu hærentia vascula possit commovere, id quod diu quietum hæsit ingreditur circulantia vasa & inficit corpus: ita si in Tympanitide & post Hæmoptoen & Sputum purulentum, contenta materia redditur acrior dolorem inferens, interitum minatur, quia ex perceptione doloris constat acce irritare in ambitu hærentia vasa, quæ tunc absorbent corruptum, quod diu immobile hæsit in eo loco. Si deinceps intenditur sitis, quæ indicat putrefactum quoque ferri ad salivæ organa vel os, est mali omnis, cum non solum has, sed & alias partes, existimandum sit a corrupto infici, bonosque humores brevi in similem corruptelam conversum iri.

Signa sitis ex putredine.

§. XV. Ut sciamus num ex putredine excitetur sitis, superius dicta non sufficiunt, hæc enim ab hac causa sitim generari posse probant, sed non exhibent signa, si quis sitiat, num illa ex putredine oriatur: hoc autem magis conducit ægro quam subtilis disputatio, quippe qui siticulosus est ex putredine non quærit possibilitatem, sed auxilium, quod ex arte præcipi nequit, nisi constet ex adjunctis, signis, vel prægressis causis, sitim in oblato morbo ex putredine oriri. Duplici via ad eam pervenimus cognitionem. 1. Ex comparatione causarum antecedentium ad generalem putredinis historiam, quam dedimus in *Comp. nostro Tr. 37.* & ex iis, quæ in præcedenti sectione exhibuimus. Dein 2. ponderando phænomena,

quæ.

quæ una cum sitis in corpore observantur: si enim in Tympanitico, Hydropico, Lochiis retentis, vel foetu mortuo, Alvo diu adstricta, Empyematico, Hæmoptoico, Ulcere diu suppresso, oritur, πολυδίψιος cum anorexia, fastidio, nausea, eructatione foetida, oris sorditate, alvi excrementis foetidis, urina oleaginosa spumante calore corporis mordaci, sudore colliquativo, & similibus, minime dubium est, quin sitis illa ex putredine oriatur. Hoc nostrum iudicium confirmatur, si per antiseptica exhibita temperatur sitis.

§. XVI. Difficilior nulla est curatu Sitis, quam quæ ex putredine inducitur, quia, *Curatio.* nisi emendetur corruptum vel evacuetur, vix leniri potest; siccitati enim possumus largiori potu succurrere, sed putrefactum auferre vel emendare vix valent medicamenta: titulo quidem multa sunt, quæ vocantur antiseptica, sed ea parum efficere nimis frequens experimur in morbis; nec carnem vel cruorem corruptum medicamento adperso emendare valemus, quod tamen medicamentum perhibetur id præstare ore sumtum. Si demus ægro multum potandum, humidum putredinis mater magis promovet, quam emendat corruptelam; si imperemus abstinentiam, mora putrefactum magis degenerat: si fallimur sitim retinendo refrigerantia antiseptica in ore, non attingimus mali scaturiginem, aliunde enim ex corpore ad os fertur corruptum. In tanta rerum difficultate Medicus quantum potest suppetias ferre tenetur, ut curetur vel relevetur æger. Mediocris in hoc statu concedenda est portionis copia, nisi observet naturam per urinam moliri putrefacti exitum, largior enim tunc potius est concedendus, qui corruptum elutriat: & ut simul emendetur aliquo modo & præveniat ulterior corruptio, danda sunt, quæ dicuntur antiseptica & condientia, quæ ex balsamicis, resinosis & vinosis atque spirituosis petuntur, si febris absit; in morbis autem acutis & febribus acida vegetabilium & mineralium hoc præstant, nisi summa adsit debilitas, quæ quoque vinosa & spirituosas exigit. In hoc casu non est mirandum, non raro vinum & spiritus fermentatos minori copia potos magis temperare sitim quam largiorem aquæ haustum. Hæc quamvis peraguntur, necatur veluti æger siti intolerabili, quæ ei vix quietem aut somnum concedit, conquerens se statim a potione sitire & nimis impletum esse liquore, quare exposcat potionem, & non audeat bibere, ob ventriculi nimiam impletionem: nihil tunc restat quam fallere sitim, colluendo os cum aquosis acidulis, adstringentibus, refrigerantibus, vel retinendo aut masticando in ore similia, vel mastichen in chronicis, lapidem prunellæ aut terram cathecu, taleolamve citri in acutis, ut ita minus afficiatur æger a sitis sensu.

§. XVII. Biliosis & Erysipelatosis morbis sitis est molesta & frequens non absimilis illi, quæ ex oleo combusto assumpto nascitur: si enim bilis materia alienata miscetur sanguini venæ cavæ, tandem ducitur ad salivæ organa, in nervis oris & faucium talem excitat sensum, quem solemus placare potu; & ob adjunctum caloris sensum desideramus frigida & acida præprimis adstringentia: hoc in Hepaticis, Ictericis & Cholericis frequens, & qui Erysipelate tentantur, aut humor tenuis, acer, subpinguis & utcumque saponaceus, qui, cum miscibilis lymphæ, ad os facile ferri potest cum reliquis liquoribus, ut irritamento suo sensum sitis excitet, uti talia pingua attenuata acria faucibus applicata. Quibusdam mirum videbitur me sequi veterum sententiam, reducendo ad bilem corruptam Erysipelas, cum videatur levior inflammatio: at graves sunt quæ me movent rationes. Non ignoro in Erysipelate & Inflammatione nonnulla esse communia phænomena, uti Rubedo, Calor & Dolor, sed causam, effectum & curationem ab inflammatione recedentem, plus valere ad distinguendum existimo. Purum Erysipelas nunquam convertit sanguinem in lentorem, sed relinquit tenuem & potius ichorosum liquorem, neque in urina format sedimentum album, optimum in inflammatoriis criticum signum, sed tenuem, croceam, pellucidam & quandoque turbidam, cum crasso sæpe & subflavo vel subviridi sedimento, neque in loco affecto commutatur in humorem album æqualem, *Cur erysipelas ad biliosos morbos referatur.*

Differt ab inflammatione. subpinguem pus dictum, sed potius in humorem flavescens, acrem, ichorosum, pruritus magis, quam dolorem inferentem; minus quoque ab hæmorrhagia quam Inflammatio levatur; refrigerantibus, absorbentibus, actu frigidis & adstringentibus temperatur, inflammatio autem iisdem in deterius ruit. Meretur in morbis biliosis & Erysipelate observare, Calorem majorem & auctam circulationem non formare in sanguine lentorem, qui tamen in morbis inflammatoriis, & aucto motu corporis, perpetuo generatur: hanc differentiam fieri existimo, quia bilis & pinguedo corrupta, aucto calore & motu in nobis, non compingitur, uti fit in globulis rubris sanguinis & gelatina seu parte flocciformi, sed commutatur in liquamen ichorosum, cujus interventu, tanquam esset menstruum saponaceum solvens, præpeditur etiam concrescendi potentia, quæ alias ex aucto motu in corpore nostro generatur. Ex hac posita causa Erysipelatis phænomena & curatio firmantur: nam calor & motus major magis dissolvit & acriorem hanc facit materiem, quæ ob tenuitatem facile commutat loca, seu metastasim frequentiore facit quam inflammatorius lentor; quæque per adstringentia figenda est, cum Lentor resolutione eget; quæ absorbentibus elicitur, cum lentor iisdem densatur in scirrhum; quæ solita exiens tingit urinam colore croceo vel flavo, lentor vero solutus album laudabile deponit in urina sedimentum; quæ loco puris albi crassi, prodit ichorem. Ex his quoque constat Erysipelatis & Inflammationis non esse eandem materiem, dumtaxat loco distinctam, ut esset lentor in arteriarum cruentarum, Erysipelatosa vero materia in lymphaticarum extremitatibus, sed indole esse distinctam.

Signa. §. XVIII. Materiam hanc tenuem & mobilem ferri posse ad os non eget probatione, sed ut curetur Sitis ab hac causa nata, ea est cognoscenda vel ex sitienti modo, vel ex adjunctis phænomenis hanc causam indicantibus. Sitis ex hac causa magis est molesta reliquis cum desiderio potionis frigida acidula, adest nauseosum fastidium, febris continua vel remittens cum mordaci magis, quam ardenti calore; pulsus frequens & celer magis quam durus; corporis inquietudo & inexplicabilis molestia; urina præ corporis calore nimis flavescens, sæpe spumosa, quandoque pellucida, quandoque cum multo sedimento subflavo crudo.

Curatio. §. XIX. Molestissima hæc sitis potioni non obtemperans, quia dilutione non tollitur sitis causa, nisi subactione vel evacuatione hujus materiæ levetur, multum & diu lacescit ægrum: nam pro momento, dum vel potione vel collutione sitim faciens causa ablata sit ex ore, affluente ad os nova materia iterum increfcit sitis: quamobrem multa simul in hac causa sunt agenda, ut cum eventu bono leniatur Sitis. Hæc autem dirigenda ad naturam materiæ sitim excitantis, ut cuncta ex arte fiant. Invenimus 1. pingua ab Erysipelatosis ferri non posse, quin intendatur morbus, quia forsan pinguedo soluta corporis calore & infectione materiæ erysipelatosæ, brevi abit in similem acrimoniam. 2. Aucto calore magis solvi majoremque acquirere acrimoniam gradum; quo enim pingua fervantur in majori calore, eo magis fiunt tenuia & agilia, atque eo citius in rancorem convertuntur. 3. Resolventibus soluta reddi acriora, sed adstringentibus figi. 4. Acidis mutari in corpus densius. Si tenuis sit, posse evacuari per alvum urinam & cutim. Ex omnibus his perpensis curandi methodus est elicienda. Requiritur igitur, ut servetur æger in aere temperate frigido; bibatque portiones ex adstringentibus refrigerantibus acidis; taliaque retineat in ore, vel & os iisdem colluat & gargarizet, ut emendetur acre & aliquomodo inspissetur tenue. Simulque tentanda est hujus materiæ evacuatio: cavendum vero ne fiat aucto motu, qui auget morbi causam, sed est facienda bilis evacuatio per alvum, cum ea est via commodissima, si corrupta & attenuata bilis continuo novam suppeditet materiem; ita enim minor bilis corruptæ pars reducitur in sanguinem; si vero bilis simul facta est viscidior seu lenta, conducit saponaceis acescentibus mistis purgantibus resolvere tenacitatem, ut commodius exeat. Quæ

vero

vero circulantibus est recepta & utcumque spissa, quod sæpe in ictericis, salibus neutris & diureticis est educenda; quæ tenuior, uti in morbis erysipelatosi, adstringentibus, acescentibus leniter diaphoreticis est expellenda: conducit quoque absorptionem externe promovere siccis bibulis applicatis, ut eliciatur ea acrior materia: ita agunt Chirurghi pulveribus absorbentibus parti erysipelatosæ applicatis, ut minuatur rubedo educto stimulo subpingui.

§. XX. Lentorem seu Phlogisticam Diathesin semper inducere sitim ita palam est, ut in morbis acutis inflammatoriis, si sitis non urget, inter mala symptomata censetur: modus autem quo generatur sitis a præcedenti distat: vix enim credere fas est, lentorem ad os delatum, suo stimulo excitare sitim, ut diximus de materia erysipelatosæ, sed quia magna pars sanguinis in lentorem conversa, dum simul a causis compingentibus expellitur tenue, sanguis ad oris partes delatus, non stimulo quodam, sed potius defectu humidi (IV) quo etiam in nobis naturalis fit sitis, sitim generat: ob quam rem tam naturale est his morbis sitire.

§. XXI. Ad naturalem sitim ex humidi defectu sufficiebat suppeditare liquorem; ex lentore autem simul ad lentoris resolutionem, aliaque multa in curatione est respiciendum: ratio igitur dictitat, medicus sciat, num ex lentore generetur sitis. Hoc scimus ex generalibus lentoris signis cum siti apparentibus; ut est Calor urens; Siccitas totius; Respiratio densa frequens; Pulsus durus; Pulsatio in partibus corporis insolitis; Dolor vehemens fixus, & reliqua, quæ in *Compendio nostro* Tr. 41. & 47. recensita sunt.

§. XXII. Lentor ille, siue febre acuta, siue Inflammatione particulari, siue vehementiori corporis Motu, natus, meris aquosis non semper dilui & resolvi potest: tanta enim interdum est in sanguine spissitudo, ut renuat miscelam cum pura aqua, sed eam post ingestionem statim per urinam copiosiore tenuem dimittat, quod inde malum in acutis signum. Conducit ergo recepta methodo solvere lentorem & temperare inflammationem & interim ad sitis diminutionem dirigere curationem, quæ exigit potionem largiorem, ut suppeditetur humidum, sed tepide datum, quo facilius unitur densis humoribus, quamvis avidissime expetunt potionem frigidam; hæc autem magis aridet, sed actuali frigore coagulans sanguinem in concretionem pronum, obstructions multaque alia mala inducit, ut experiuntur, corpore ab exercitiis excalesceto, si bibant frigidam. Constat potum ex saponaceis acescentibus succis fructuum horæorum, cum pauxillo mucilaginoso ex vegetabilibus, farinosis & similibus, magis lenire sitim quam aquam puram, cum tali modo facilius inter potum & lentorem obtineatur unio. Nihil vero magis in siti tali valet, quam nitrum & cuncta nitrosa, tam ingesta, quam in ore retenta: inde emulsionem ex seminibus farinosis cum sale prunellæ in morbis tam egregie temperant sitim.

§. XXIII. In Chronicis quoque morbis generatur sitis major cujus causam mirantur, quæ potione non ita minuitur, quin statim redeat, & quamvis potus sint impleti, tamen sitiunt, sed sine corporis incalescentia aut prægresso usu salis marini, vel alius alimenti, quod experientia docuit sitim intendere: mirati igitur nos consulunt, ut intelligant insolitæ sitis causam, existimantes eam esse imperscrutabilem, & ex hac ratione incurabilem. Hos invenimus homines inappetentia & stomachi cruditate laborare, hisque leniri sitim stomachicis & quandoque alvi ductione. Quamobrem statuendum est, hos homines malum in se formare chylum ex assumtis alimentis, & ita defectu actionis corporis abire in corruptelam spontaneam, quæ Cacoehylia est vocanda. Hæc ex intestinis per lactea sanguini communicata, ad os delata fallacem sitim, non ex humoris defectu, sed humore corrupto stimulante sitis organum, sitim infert: quæ multo potu non potest tolli, quia potus hic non curat continuo pergentem corruptelam; imo quo magis bibunt, eo magis deinceps fiunt siticulosi; nam potionis abundantia enervantur chylopoietica organa, & ita promovetur corruptela. Stomachica vero non statim, sed post continuatum usum, sitim leniunt, restituendo primis viis

concoctionis actionem. Alvum ducentia, mirum est videre in tali siti, unica vice sæpe tollere sitim, quam multus placare non potuit potus, quia per purgans, educta cacochylia ex primis viis, ulterius ad os ferri nequit, ut sitis sensum excitet.

Signa. §. XXIV. Qui hujusmodi Siti laborat medici auxilium implorat, sed non revelat, se ex ventriculi cruditate sitire, solummodo miratus, se ex causa sibi ignota, ita præter modum esse sitibundum; quare medici est expiscari qualisnam sit hujus Sitis causa, ut opportuna det auxilia. Hoc medico est præcipuum signum, ægrum nescire causam; inde enim patet neque assumtis alimentis sitim moventibus, neque inflammatione aut erysipelate, hanc sitim generari. Sed tunc medicus edoctus quibusnam causis generetur sitis, illas adit, quæ sine aucto corporis calore vel evacuatione copiosiore sitire faciunt. Dein istas causas perspicit, donec ex aliis signis siti junctis inveniatur, nonnulla adesse phænomena certam aliquam causam indicantia. Nam si quis simul laborat inappetentia, dyspepsia, eructatione materiæ corruptæ ex ventriculo, gravitate circa præcordia, ventris intumescencia, nausea, & fastidio, facile conjicere potest, ex corrupto chylo sitim generari.

Curatio. §. XXV. Ex hac detecta causa omnino aliam, quæ solet præcipi in siti aucta, format indicationem curativam, bene gnarus, restituto appetitu & concoctione ventriculi curatum iri sitim: Inde ad removendam cacochyliam ex primis viis, lenè Vomitorium & Purgans exhibet, dein stomachicis ventriculo & intestinis restituere conabitur amissam actionem; quibus acquisitis, sensim minuetur sitis, tunc scilicet, quando actione corporis cacochylia vel subacta vel expulsa fuerit ex tota massa sanguinea.

In cachexia. §. XXVI. Ut bona alimenta in primis viis convertuntur in Cacochyliam, ita in viis secundis seu in organis circulatoriis ex humoribus bonis, defectu actionis generatur Cacochymia & Cachexia a veteribus dicta, & eo citius, si in primis viis non recte elaborata communicantur sanguini. Quandoque humores morbosus, ut Pituita & lymphæ hydropicorum, in corpore collecti, ex indole nullam sitim excitantes, tandem longiori mora in talem degenerant acrimoniam, quæ sitim fastidiosam excitat. Hoc frequens est videre in Cacochymicis & Cachecticis; si hoc fiat in

In hydropicis malis. Hydropicis & Leucophlegmaticis, semper habetur malum signum: nam contenti humores, abundantia satis periculosum morbum inferentes, si insuper corruptelam acquirunt, alterum accedit periculum. Imo, quia abstinentia a potu in his hominibus præcipua erat curationis pars, acrimonia hæc ad organa sitis delata impossibilem facit sitis abstinentiam; quare copiosiori ingestione potus multum augment morbum. Huic corruptelæ morborum chronicorum non raro in his regionibus ac-

In scorbutico. cedit scorbutica acrimonia; quare sitis major inter scorbuti signa refertur. Quamdiu vero liberiori fruuntur cacochymici perspiratione, qua id acre exoneratur, minus sunt siticulosi; sed perspiratione prohibita affecti, maxime siticulosi fiunt, quia tunc circulantes humores hoc acri copiosius imprægnati organum sitim excitans magis afficiunt. Ex quibus facile intelligitur, quod alias videretur paradoxum, retentionem humoris tenuioris, uti sit in prohibita perspiratione, sitim augere posse; nunc vero, cum sitis æque ab acrimonia vellicante, quam ex defectu tenuioris, generetur, nemini mirum esse potest, evacuationem humoris acris, quæ sitis sensum excitare potest, minuere sitim, ejus autem retentionem esse sitis causam.

Signa. §. XXVII. Ex ignorantia hujus causæ miraculum nonnullis videtur, hominem sine causa, ut ajunt, ita sitire posse; sed nobis hæc ignorantia est signum, cacochyliam vel cacochymiam sitis causam esse: quare consulimus signa his morbis propria, ex quibus collatis certiores reddimur de sitis causa. Si ergo ex corporis languore, cutis colore lurido subflavo, cita defatigatione, urina alba crassa cum multo sedimento, vel colorata sine corporis incalescentia multa, cum lingua humida, alba vel subflava pellicula tecta, constat hominem cacochymia laborare, sitim inter signa cacochymiae tuto locare possumus: frequentissime hæc jungun-

tur prioribus (XXIV) quia raro diu durat vitiosa ventriculi coctio, quin subsequatur per totum corpus cacochymia. In hydropicis quoque detegere possumus, num sitis ex inducta acrimonia, vel ex defectu humoris tenuis generetur: nam si hydropicis accenditur febris, accedit stranguria, tussis inanis, dolores, talis tunc sitis magis ab acrimonia, quam humoris defectu oritur.

§. XXVIII. In curatione hujus attendendum, num simul adsit Hydrops, vel *Curatio*. sola cacochymia, cum largior potio sit concedenda cacochymicis quam hydropicis. In ipsa quoque Cacochymia differt curatio, si originem ex primis viis petit, cujus curatio superius tradita est: quamobrem, si primæ viæ valent, Cacochymia est emendanda, subigenda, & expellenda, quibus peractis cessabit sitis. Multa ab auctoribus laudantur anticachectica, quibus sanguinis emendarent impuritates, quorum tamen effectus derogat laudes: si enim in nobis aliquid ex bona indole in alienam fuit commutatum, quod vires corporis debiliores non potuerint istud conservare, nullum huc usque fuit inventum medicamentum, quod potuit istud alienum mutare suo admistu, ut fiat simile sanis: sola autem corporis actio prævalens hoc præstat. Ex quibus patet ad emendationem Cacochymiae nos ita dirigere debere corporis actiones, ut motu suo id alienum subigant: quamobrem stimulantia, moventia, calefacientia, corporis exercitationes & functiones præstantissimæ sunt in Cacochymia, quæ majori corporis actione est emendanda. Expellentia seu purgantia tamen multa inveniuntur, quæ expellunt alienum vel per alvum, vel vesicam, vel cutim. Num vero solam Cacochymiam extrudant relicto bono, asserere non audeo; conducit autem aliquid simul de bonis amittere, modo corpus liberetur a Cacochymia. Sed corporis quoque actio fortior hoc quoque præstat, præprimis si per insensibilem distillationem sit educendum alienum. In cacochymia igitur curatione magis ad dirigendas corporis actiones est attendendum, quam ad specifica medicamina Cacochymiam emendantia & expellentia. In Hydropicorum siti ex corruptela vix ulla restat medela: inhibere enim non possumus corruptelæ progressum stagnantis lymphæ; neque conducit placare sitim multitudine potionis: sed ut levetur æger, os est humectandum, sitisque fallenda, ut præcepimus in *Comp. nostr.* T. 35. LXII.

§. XXIX. Homines *Catarrhosi* matutino tempore siti affici solent, quandoque sentiunt humorem tenuem falsum in fauces destillare, qui cum oris satis magna humiditate sitim facit. Hujus generatio & via per quam duci potest ad os, quia non *Ex Catarrho*. satis erat perspectum, nonnullos ita abripuit, ut negarint fieri posse. Sed quod observatio practica firmat, id rationibus everti nequit: si veteres non observassent hoc phænomenon, sed ex rationibus deduxissent, in dubium posset vocari; sed & Veterum & Neotericorum experientia confirmat hujus falsi liquoris destillationem; quare satius est in theoreticis, nos latere originem & cursum, quam negare experientiam. Agedum experiamur an phænomenon hoc careat omnibus rationibus, & an contrarietur legibus naturæ consuetis. Est 1. Humor falsus tenuis, 2. frigidus, 3. destillans in os, 4. & sitim excitans. Hujus ut reddatur ratio, liquor morbosus est assignandus, qui talem possidet qualitatem, & via est describenda per quam fertur. Homo cum cibo & potu quotidie assumit *Nitrum* ex vegetabilibus & *salem marinum*, quo condiuntur alimenta & sapidiora fiunt: dum viget corporis vis, Nitrum sensim redditur in nobis volatile & exit insensibiliter; verum in corpore debiliori diutius propriam servat naturam, ut in horum hominum urina frigescentia sæpe conspiciantur crystalli oblongæ instar nitri; si vero in his redditur urina tenuis pellucida, instar aquæ puræ, non erit absurdum statuere, hanc materiem salinam retineri. Verum nitrosa vel applicata vel exhibita frigoris sensum inducunt; quare ad frigoris sensum exponendum duntaxat requiritur in nobis esse nitrum lymphæ permixtum, quæ partes alluit. Priorem partem ex dictis patere autumo, posteriorem negari non posse statuo, cum sales nitrosi premte solvantur aquosis, uti est lympa corporis nostri.

*A sale
marino.*

stri. Salem marinum quotidie a nobis assumi, eumque sitim excitare, nemo experientia quotidiana victus negare potest: eum quoque in corpore debiliore suam servare indolem uti nitrosa, neminem latere potest: imo statuunt nonnulli etiam in corporibus sanis non mutari, sed immutatum præprimis cum urina evacuari. Ille sal quamdiu est in corpore ad os ferri declarat sitis intensa post ejus usum, tandem vero in corporibus sanis cum aliis humoribus evacuatus cessare facit sitim; quibus vero parciore est humorum excretio, diutius ille sal obambulat cum corporis lymphâ, sæpissimeque redit cum saliva ad os, sitim perseverantem faciens: si vero instar salis nitri corporis actionibus statuitur subigi, minus quoque cito in debilitatis illa perficitur subactio; quare in his sitim diuturnam inferre potest. Salem nitrosum putredine converti in alcali volatile docent experimenta chemica, nec multum abaudit hæc commutatio, quæ inducitur nitro assumpto actionibus corporis nostri, cum sanguinem ceterosque liquores præbere salem alcalinum volatilem probent tentamina chemica, cujus originem non inepte deducunt chemici ex nitrosis assumptis. Ita volatilis factus sal facile per insensibilem perspirationem evolat: verum in corporibus debilioribus, quibus parciore est perspiratio, diutius retinetur, dein, quia

*A sale
ammonio-
niacali.*

solutus est in eodem liquore cum sale marino, non est mirum, tandem ex combinatis his nasci alterum sal neutrum, quod vocamus Ammoniacum, constans sale marino & alcali volatili, ut probat analysis chemica. Ille sal falsissimum saporem præbet si degustetur, facileque in minima portione aquæ solvitur, imo liquefcit in solo aere aperto; quare statuendum est, eum quoque salem cum nostris humoribus circumduci, & ut alios liquores, ad os ferri posse, ubi ex sua natura falsædinis saporem præbet. Ex dictis igitur satis constat, si sales hi soluti, salivæ missi, ferantur ad os, generare sitim, falsædinem, & sensum frigoris. Restat, quod videtur multis imperscrutabile, exponere, hunc liquorem in os & fauces destillare, præprimis ex capite, a quo ad fauces & os nulla fuit detecta via. Qui supponunt secretionem fieri solummodo ex sanguine allato per arterias, his largior, ex capite descendere non posse catharros falsos ad os & fauces; qui vero etiam admittunt, nervos quoque aliquid præbere secretioni & excretioni, hos non latet via, cum multi ex capite nervi ad has vadunt partes; sive nervus eo deponit suos spiritus usui amplius ineptos, sive suum succum ad fibrillarum nutritionem & humectationem destinatum, pro utrisque est satis patula via ex capite ad has partes: quare disputandum erat, num nervi aliquid tribuant secretioni. Hoc non est hujus loci adstruere, sufficet quædam adducere, ex quibus B. L. facile deducere potest, quid sit de hac re statuendum. *Glandula* majori copia nervorum ornatur, quam pars similis organica movens; vix sentit, vixque commovetur motu sensibili; ingrediens liquor crassior parcioreque quam egrediens in conglobatis; continuus est fluxus in nervis ab origine versus organum, nullus refluxus per nervum; arteriarum & venarum magnitudo in glandulis uti in partibus aliis; ex glandulis tamen, quæ carent speciali emunctorio, magna copia lymphaticorum oritur.

*Catarrhi
secretio
per ner-
vos.*

*Glandula
e nervis
secer-
nunt.*

*Signa si-
tis in ca-
tarrho.*

§. XXX. Non est magni laboris sitim cognoscere ex hac causa, cum ipsi ægri eam indicent causam; conqueruntur enim se tunc præprimis sitire, quando Catharri falsi destillant in os & fauces: sed ut simus certiores, attendere meretur ad ea, quæ in *Perspiratione insensibili* in Cap. VII. §. XXII. & sequentibus exhibuimus.

Curatio.

§. XXXI. Curatio hujus multum recedit a reliquis speciebus; potus enim largior eam lenit, sed inducta debilitas majorem hujus materiæ proventum facit: scopus est roborando & movendo facere ut sales ingesti subigantur citius, atque subacti eliminantur, vel per insensibilem perspirationem, vel urinam, quemadmodum in acrimonia frigida loco citato præcepimus.

*Sitis ex
pure.*

§. XXXII. Sitis morbis *purulentis* tam frequens est, ut nemo dubitare possit, quin pus ad fauces & os delatum sitis sensum excitet; ita Hæcticis, Vomica pulmonis laborantibus, Empyematicis, Ulcere vel Abscessu interno affectis, vel dum

dum transit febris inflammatoria in suppurationem, semper generatur Sitis major. Tribus modis fertur pus ad sitis organum. 1. Si ulcus vel abscessus in fauces deponit pus: quare hi homines præ ceteris sunt siticulosi, qui ulceribus oris, faucium vel narium vexantur. 2. Si pus toti massæ circulanti sit mistum, & ita cum aliis liquoribus fertur ad Os, uti ex commutata febre inflammatoria in suppuratoriam.

*Tribus
modis
fertur pus
ad os.*

3. Si pus quadam in corporis parte factum & collectum, dein absorptum, cum reliqua massa circumductum, fertur ad organum Sitis. Primum ab omnibus adstruitur, alterum a nonnullis non satis perspectum, qui nesciunt febrem ardentem per totum corpus, eodem modo, uti particularis inflammatio, abire sæpe in suppurationem, quæ suam dimittit materiam purulentam per urinam, sub forma sedimenti albi laudabilis critici, quia hæc evacuatione eliminatur confectum pus, & ita liberatur homo a morbo acuto; vel quæ suppuratio facit ad aliquam corporis partem metastasin. Ultimum vero majorem videtur involvere difficultatem, quod pus nimis crassum ex cavo quodam absorberi nequeat. Illi autem scire debent, pus crassum stagnando liquefcere, & ita intrare posse: quod confirmant experimenta, pus scilicet omne exantlatum fuisse ex pectoris cavitate per urinam, vel metastasin fecisse in cruribus, ubi sine præcedenti inflammatione locali magnum fecerit abscessum cum liberiori respiratione.

§. XXXIII. Homines ex pure siticulosos fuisse factos non est difficile detegere, nam pus in femore destillans conspectu detegitur: sanguini vero mistum esse ex præcedenti inflammatione vel febre ardente conjicimus, si ea cessante, homo febricula quadam hectica afficitur, neque perfectam crisin habuit per urinam, ceteraque signa adjunguntur siti, quæ in suppuratis observari solent.

Signa.

§. XXXIV. Hanc tollere sitim non est possibile quamdiu pus est in sanguine: quare hujus medela nihil differt a generali, quæ suppuratis solet adhiberi, de qua egimus in *Comp. T.* 48.

Curatio.

§. XXXV. Tandem *Motus insolitus* sine ulla materiali causa sitire facit. Nonnunquam homines ira instigati, vel mœstitia pressi, siticulosi fiunt: aliis quamprimum ingruit dolor, sitiunt, hoc frequens podagricis, & colicis: imo paroxysmus febris ingruens tam frequens excitat sitim, ut plebeji ex insolita oborta siti cognoscant febrem incipere. Quid autem faciat hic motus insolitus, ut fiat inde sitis, non ita planum est: num scilicet ille motus organo sitis communicatus sitis sensum excitet; num vero impediatur humidi & salivæ excretionem; num vero promoveatur humidi in faucibus & ore absorptionem. Invenimus hoc quoque tempore has exarescere partes; quare vero similis videtur, eum motum augere absorptionem, & ita partes aridiores, uti in humidi defectu, producere sitim. Non est opus vel signa vel curationem adjicere, sufficit hanc addere cautelam, nos non debere nimis hic indulgere potioni, ne æger multitudine obruatur, nisi in ingruente paroxysmo febris, quando largior potatio liquoris calidi ex antiphlogisticis, & nitrosis non solum temperet sitim, sed præveniat etiam nimium compactum ex subsequenti febre expectandum.

*Sitis a
motu in-
ordinato.*

§. XXXVI. Quæ superius recensita sunt non parum lucis accipiunt experimentis institutis, applicando vel exhibendo quædam externa. Nonnulla enim detrahendo humidum, alia vero sua qualitate specifica sitim faciunt, denique aliud utrisque simul. Ita specifica sudorifera Diuretica & Purgantia, aer siccior & calidior, detrahendo humiditatem, sitim faciunt: sal maris, Aromata acria, Putrefacta, Cantharides, sua ratione sæpe, sine defectu humidi siticulosos faciunt homines. Inde ex purgantibus & diureticis non omnia cum æquali evacuatione, æqualem sitim excitant, sed quædam ex his, & facta evacuatione, & simul sua specifica virtute, sitim producant. Hoc quoque speciale videtur in morsu canis rabidi, quod sitiant *Hydrophobia* laborantes, & tamen horreant ad conspectum potionis. Auctores quoque ferunt morsum *Dipsadis* reptilis feræ, intolerabilem & insatiabilem inferre sitim; uti quoque alia, quæ inter venena recensentur. Hujusmodi sitis gene-

*Varia
causa.*

ralis curatio consistit in ablatione causæ, priusquam sitim fecit, ablutione, inustione, applicatione attrahentium: specialis autem curatio solis experimentis detegenda.

*Prognosis
ex siti.*

§. XXXVII. Ex sitis præsentia duplici modo formatur *Prognosis*. Primus fons est, cognoscere effectus, qui ex siti tolerata (VIII) nascuntur: hos autem antequam fiunt possumus prælagire, quali modo effectus descripti commutantur in signa prognostica. Alter fons est causarum observatio, quæ sitim faciunt; hæ enim non solam sitim inferunt, sed & alia quoque signa, quæ ex præsentia causa prædicuntur. Ita *Hipp.* a pag. 474. & 589. ex siti cum aliis signis prædixit Delirium, quia si sitis oriat, ab erysipelate, cum aliis signis capitis affecti, frequens subsequitur Delirium.

*Lac cur
sitientibus non
dandum.*

§. XXXVIII. Dubium movet *Hipp. Aph.* 64. Sect. V. in quo præcipitur *lac malum esse siticulosum*, quasi dandum non esset lac ad temperandam sitim; quum tamen experientia docuit, lac quandoque egregie temperare sitim: verum *senex noster*, prohibet *lac sitientibus febricitantibus*, & quibus *præcordia elevata murmurant*, quod quoque hodie fieret, si quis ex bile corrupta (XVIII) sitiret, cum lac tunc nimis cito ob adjunctam pinguedinem, converteretur in corruptam amaritudinem, ut experiuntur biliosi si lac bibunt. Ex quibus patet nos non ita absolute posse Hippocratis præcepta omni siti applicare, sed cum iudicio si decernantur, omnibus palmam præripiunt.

Adipsia.

§. XXXIX. De *Siti minori* seu *Adipsia* non semper eadem ferenda est sententia; sæpe enim laudabile, alias vero funestissimum est signum: quare respiciendum ad causam morbi in homine, num ex bona vel mala causa homo non afficitur siti: quod recte ab *Hipp. Aph.* 480. pronunciatum fuit, *sitis præter rationem soluta in acutis Morbis mala est*. In morbis enim inflammatoriis (XXI) & erysipelatosi (XVIII) sitis semper adest, & eo quoque major, quo morbus est vehementior,

*Sitis diminutio
bona &
mala.*

quia ex oris inducitur siccitate semper homo debet sitire. Si vero minuatur sitis cum diminutione reliquorum symptomatum, & post criticam evacuationem, talis sitis mitigatio salutem portendit; si vero perseverat, denotat non minutum esse morbum, neque perfectam fuisse crisin, quia his peractis, siccitas totius corporis, ex morbi vehementia nata, quoque erat minuenda; quam ob rem diminutio symptomatum reliquorum infidelis est, potius ex suppressis viribus, quam mitigatione morbi, nata. Sed si tollatur sitis sine bona crisi & morbi diminutione, id fit sine ratione, nam permanet causa sitim inferens, & æger tamen non sitit. Hoc observamus in morbis fieri, si homo incipit delirare, ut ita non sentiat vel dicat se sitire, cum ore tamen siccissimo; vel quando morbus acutus transit in sphacelum, qui sensum sitis tollit. Utrumque hoc malum esse neminem latet; in perseverante enim morbo vel aucto, ut delirium faciat, non solum malum est signum, verum insuper interceptum necessarium medicamentum, ingestionem scilicet potionis sufficientem, quæ ad curationem acutorum requiritur. Si fiat ex commutatione in Sphacelo brevi post morietur æger, cum non sit in Medici potestate curare sphacelum internum. Ut ergo cognoscamus in acutis num sitis minor sit bonum vel malum signum, inspicienda simul est lingua, si maneat sicca cum perseverantibus symptomatibus, talis sitis diminutio est infidelis: si vero os simul humectetur, linguaque reddatur purior, post criticam evacuationem, optimum est signum sitis diminutio. In morbis Chronicis non est naturale sitire; pituitosi enim, frigidi, cacochymici, hydropici, non sitiunt, quia abundantia est humidi in corpore: si vero sitiunt, illa sitis produci, vel ex acquisita corruptela, uti superius indicavimus, vel quia massa circulatoria privetur humido in hydropicis: quo igitur sitis est major, eo quoque major est ea mala causa: inde in suppuratis, hydropicis, & cacochymicis, inter bona signa censetur non sitire. In medicamento purgantis potione sitire bonum est, quia tunc potu copiosiore eluitur acre purgans, uti *Hipp. aph.* 129. *Qui in medicamentorum potionibus, dum purgantur non sitiunt, non cessant priusquam sitierint*. Hoc autem non convenit omnibus purgantibus assumtis; nam non raro

*Sitire a
purgantibus.*

ex dato purgante, ut diximus (XXV. & XXXVI.), cessat sitis, si causa præternaturalis sitim faciens per purgans, quod simul humectat & refrigerat, simul tollitur. Olim vero cum fortioribus ducebant alvum, quibus simul generabatur sitis, non erit mirum non cessare actionem purgantis, quamdiu a motu diluente non eluitur ex intestinis; quare non cessat actio purgantis quia homo fit siticulosus, sed quia ad sitim leniendam multum liquoris ingerit.



EXERCITATIO MEDICA QUINTA

DE ACTIONE VIVENTIUM PARTICULARI.

P R Æ F A T I O.



IN Praxis Medicæ exercitio a longo tempore detexi aliquid latitare absconditum, quod neque principiis Chemicis, neque Mechanicis, neque Hydraulicis eruere potui, sed provenire ex distinctis vitæ legibus, quæ intellectæ in fere omnibus morbis, tam quod ad cognitionem quam curationem mihi magnam lucem, & ægris commodum præbuerunt. Primo animadverti leges generales, quas Anno 1734. publice defendendas dedi Filio meo *Davidi de Gorter*. Ab eo tempore accuratius agitans morborum & corporis actiones, detexi præter generales has actiones, quas vocavi *Motum Vitalem*, alias etiam inveniri *Speciales*. Istas igitur, ut starem promissis in præfatione ante quatuor Exercitationes Medicas, nostra inventa & cogitata de *Actione Viventium particulari* publici juris facere volui, ut constaret tota illa doctrina specialis, qua recedo a consueta explicatione Mechanica. Non, quia eam repudio, summopere eam laudo, & passim in operibus meis & institutionibus extollo, sed ut demonstretur, aliquid speciale etiam inveniri in corpore vivente, quod ad cognitionem & curationem multa præstat, & cujus neglectu in multis hallucinamur, & non raro præposteram medelam adhibemus. Qui igitur in posterum ad faciliorem cognitionem & certiolem curationem, his nostris novis principiis propositis velit uti, vel suis contentus esse, liberum huic relinquo arbitrium.

DE ACTIONE VIVENTIUM PARTICULARI.

§. I. **I**Nter omnes corporum actiones vix ulla invenitur obscurior, quam quæ facit in nobis specialem Præparationem, Secretionem & Excretionem humorum in variis corporis partibus: olim vocabantur Facultates; ab Helmontio adscribuntur Archæo; his temporibus conati sunt, repudiatis omnibus figmentis, has omnes actiones deducere ex legibus mechanicis & hydraulicis. Experientur autem omnes, semper aliquas relinqui tenebras, quas suis experimentis in corporibus mortuis discutere non potuerunt. Propterea agnoscere debemus in corporibus viventibus aliquam Actionem incognitam, & quidem in variis partibus & organis distinctam, qua arcana hæc sunt referenda.

Hoc autem incognitum est aliquid, quod quædam phænomena producit, quasdamque leges sequitur, quæ in aliis principiis agentibus non deteguntur, & propterea ut principium agens huc usque non descriptum est admittendum. Sed si propterea non sit admittendum hoc principium, quia non invenitur descriptum, omnia quoque his temporibus inventa a physicis & chemicis essent repudianda, quod clauderet januam ulteriori investigationi, & remoraretur scientiam. Melius sentiunt his temporibus, qui liberam profitentur philosophiam: quoties enim multa detegunt phænomena actionem aliquam specialem indicantia, rei indicatæ quamvis ulterius incognitæ, dant nomen. Non negant Attractionem, Magnetismum, Electricitatem, quamvis exerceant actiones legibus mechanicis non explicatas, sed sedulo experimentis rimantur leges rei incognitæ agentis, unde multa utilia redundant, quod etiam in Actione viventium particulari erit imitandum. Qui vero putant se clariorem proferre physicam, dum explicant leges motuum, gravitatis & elasticitatis, equidem nihil plus in illis rebus agentibus intelligunt; supponunt enim esse elasticitatem, & gravitatem, & horum principiorum phænomena & leges assequuntur experimentis; quid autem sit gravitas, quid elasticitas, fatentur ignorare, sed res esse dictis proprietatibus donatas. Idem quoque sentio de hac Actione viventium particulari; fateor quoque rem ipsam mihi incognitam esse, sed esse aliquid distinctum in viventibus, quod experimentis detegitur exercere proprias operationes. Propterea non fingo aliquam hypothesein, sed assigno aliquam causam agentem, quæ sibi proprias possidet leges. Abhorrent his temporibus omnes hypothesein, atque contendunt, ex ea nihil veri concludi posse, & hoc quoque statuo, modo non intelligant actiones, quæ experimentis investigari & assequi possint. Esse in rerum natura virtutem Magneticam, Attractivam, inveniri Elasticitatem, Gravitatem, Corruptionem, Fermentationem, Effervescentiam, nullus dubitat, quamvis primum principium horum sit incognitum: qui contendit talia existere, & inter se distincta esse, non nititur futili hypothese, sed fatetur quasdam diversas fieri in corporibus actiones. Quis quoque esset, qui inter corpus vivens & cadaver nullum supponeret discrimen? etiamsi nullam in fabrica organi inveniret differentiam, sed experiretur duntaxat actionem, quam in viventibus detegebat, deficere, eamque se nullo auxilio revocare posse. De hoc motu vitali ante aliquod tempus satis fuse egimus; nunc vero agendum erit de particularibus quibusdam corporis viventis operationibus, quæ non ita sunt generales per totum corpus, ut motus vitalis, sed in speciali parte diversa producentes.

§. II. Qui mechanicis experimentis conati sunt explicare spirituum, bilis, salivæ, feminis, aliorumque humorum præparationem, secretionem & excretionem, infelicissimi fuere, quum verisimilitudinem aliquam, minime vero rem ipsam exponere valuerint; si enim quis eadem uteretur machina seu organo particulari cadaveris, frustra tentaret, facta traiectione cujusvis humoris, talem producere humorem,

Definitio.

Differt a motu mechanico.

rem, qui per experimenta constaret, esse salivam, bilem, semen vel quemvis alium specialem in viventibus humorem. Diceret forsan sibi deficere sanguinem, vel calorem, vel requisitum motum. Sed hoc est quod quaeritur, quia indicare volo præter motum mechanicum esse aliquam aliam actionem, quam vitalem, & hoc loco vitalem particularem voco, qua quædam in corpore efficiuntur specialia, quæ mera actione mechanica absolvi non possunt. Propterea non negamus in viventibus fieri actiones mechanicas & hydraulicas; firmiter enim persistimus cum hodiernis in eadem sententia; sed contendimus insuper aliquid in corpore vivente fieri, quod non ita purum est mechanicum, ut servet omnes leges a mechanicis detectas, sed facit præterea aliquid, quod mechanicam actionem superat, quodque possidet quasdam speciales leges agendi, quæ experimentis in solis corporibus viventibus, sed frustra in machinis mortuis, sunt investigandæ. Motum hunc non esse mere mechanicum sequentia experimenta evincunt. Si adnectatur tubulus arteriæ apertæ caput tendenti canis, isque impleatur aqua tepida ad tantam altitudinem, cujus gravitas respondet potentiæ prementi cordis in eandem arteriam, quæ est altitudo circiter quatuor vel quinque pedum, implebuntur omnes arteriæ & vasa capitis hac aqua, quæ faciet ut ex vena jugulari tunc aperta effluat sanguis rubellus, sensim magis dilutus donec moriatur animal. Sed post hoc tempus non amplius transluet aqua, nisi altitudo prementis elevetur ad novem vel decem pedes. Unde certe liquet, vitam superstitem in capite adjuvasse aquæ transitum, qui duntaxat urgetur pressione aquæ in tubulo elevata. In hoc experimento ante & post mortem cor nihil faciebat ad propellendum sanguinem; nam intercepta erat via per arteriam abscissam. Ergo quod minori causa premente transfluere potuerit in vivente quam jam jam mortuo cane, id motui vitali & particolari adjuvanti hunc fluxum est adscribendum. Propterea motus in hac parte non est mere mechanicus. Idem verum est in aliis partibus: nam si aortæ canis mortui alligatur tubus, qui tanta altitudine aquæ tepidæ repletur, quanta est potentia cordis agens in eandem arteriam, renes quidem tument, sed nihil transit in ureteres; hepar pallet & tumet, sed nihil transit in venam cavam vel ductum choledochum; Pancreas etiam turgescit, sed non stillat succum; Impleta intestina magna aquæ altitudine intus pressa nihil recipiunt vasis lacteis aut venis meseraicis, dum tamen in viventibus chylus aqua tepida crassior facillime ingrediatur. Nullus erit, confido, quin, perpensis his experimentis, fatebitur, trajectionem humorum non solum pendere a mera actione mechanica vel sola cordis propulsione, sed insuper esse in ipsis vasis & visceribus aliquam actionem vitalem, quæ etiam cum vita animalis exstinguitur.

Ab Elasticitate & Contractilitate.

(a) Exercit. I. de Mot. Vit.

§. III. Quoniam tam in corporibus mortuis quam viventibus detegitur Contractilitas automatica, ea nequit esse vitalis actionis causa, præterea in contractilitate hac perpetua & constans remanet constrictio, quæ magis impediret quam promoveret fluxum, ad quem continuandum alterna constrictio & dimissio in fibris requiritur, quod locum habet in actione vitali, non vero in automatica contractione. Magis autem videtur convenire Elasticitati, qua corpora oscillant: sed hanc sententiam olim repudiavimus (a) & experimentis confirmatur; nam in viventibus ex aperta arteria alterne salit sanguis; verum in animali mortuo si truncus arteriæ alterne impletur, ex ejus ramis abscissis æquali fluxu effluit liquor: adeo ut Elasticitas magis impediatur quam promoveatur alternum fluxum.

Ab Attractione.

§. IV. Potentiæ attrahendi inter quasdam partes actionem particularem totam in viventibus adscribere absurdum mihi videtur, quia etiam observatur inter globulos rubros sanguinis e corpore emissos, in qua certe nullus locaret actionem vitalem; videtur equidem in tali stagnante sanguine globulos se invicem arripere & in grumum coagulari: sed quam primum ac vita deficit in corpore, brevi quoque cessant omnes particulares actiones, quæ certe pergerent, si attractio, quæ etiam post mortem manet, harum esset causa. An non autem illa attractio aliquid

aliquid faciat in viventibus ad specialem secretionem humorum, non omnino absurdum videtur: dum enim humores parum propelluntur in locis diffitis seu remotissimis a motore generali, illa congregandi potentia inter quasdam particulas allati humoris, & forsan inter tubulos recipientes & quasdam particulas humoris transfluentis, secretioni favet. Sed tanta non est virtus, ut sola ea absolveretur specialis secretio. Magis conveniens est credere hac attractione inter globulos rubros adjuvari retentionem sanguinis rubri in arteriis & venis cruentis, dum in lymphatica dimittitur portio magis aquosa, & minori attractione donata.

§. V. In corporibus præprimis liquidis vel mollibus quiescentibus tandem sponte concitatur aliquis motus intestinus, qui partes istius massæ mirifice commovet, *A motu intestino.* quasi tota moles intus vita fuisset donata, uti experimur in putredine, fermentatione & omni spontanea corruptione: nullus autem physicorum vel chemicorum statuit illum motum a causa vitali provenire, sed reduxerunt has species ad motum automaticum vel intestinum, qui non eget pabulo ad continuandum, quod in motu vitali tam animalium quam vegetantium requiritur. Hoc præterea speciale invenitur in his speciebus, quod materia aeris massæ juncta nullum indicium elasticitatis exhibens, per motum illum intestinum ab ea massa separetur & elastica fiat, dum in omni corruptione multum aeris elastici emittatur, ut docent experimenta: motus autem vitalis aerem ambientem consumit seu massæ jungit, quando ille aer simul amittit elasticitatem, quod docent verum esse in vegetantibus & animalibus experimenta. Ab his non multum distat Ebullitio, Ustio, & Effervescentia, in quibus quoque intus valide commovetur & mutatur massa, sed cum aeris emissionem. Propterea hæ actiones omnino sunt distinguendæ ab omni actione vitali, quia omnino aliud agnoscunt principium, & producta differunt.

§. VI. Tandem summa cautela opus est ut in nobis viventibus distinguamus hunc *A motu animali.* motum viventium particularem ab aliis motibus, qui etiam in viventibus observantur. Occurrunt duo motuum genera in viventibus, alterum est sanum, & requiritur ut maneat vita & sanitas; alterum potest vocari morbosum, quod concitatur ut amissam sanitatem restituat: vel per idem genus interdum destruitur machina nostra & invertitur natura humorum. Quia vero agendum est de solo motu, qui in viventibus sanis observatur, differentia est ponenda, quæ invenitur primo inter motum animale sanum & motum viventium particularem. Utrique motus fiunt in quadam speciali corporis parte; sed motus animalis regitur a voluntate nostra, & illam proprietatem habet ut certis temporibus omnino quiescere debeat. Motus autem viventium particularis nullo modo regitur imperio mentis, & continuari potest & debet, ut experimur in actione ventriculi, intestinorum, hepatis, renum & aliarum partium, quæ specialem functionem in nostro corpore exercent.

§. VII. Opus non erit multis verbis adstruere, quid sit Motus vitalis, quia de *A motu vitali.* eo in prima Exercitatione satis fuse egi. Duntaxat hic proferendæ sunt quædam proprietates motus vitalis, quibus distingui debet a motu viventium particulari. Nulla est pars in toto nostro corpore vivens, forte excipiuntur ungues, pili, & epidermis, quin motu vitali agitetur, quamdiu animal est vivens, estque ubique sibi similis in perfecta sanitate: quoties enim motus vitalis in quadam parte deficit vel intercipitur, illa semper perit seu sphacelo corripitur; hoc verum est æque in omnibus partibus generalibus quam particularibus organis, adeo ut motus hic requiratur ad vitam continuandam in omnibus partibus. Hic autem motus viventium particularis specialis est unica parte, & patitur extinguui sine subsequente sphacelo istius partis. Ita enim quædam speciales secretiones in organis & glandulis extinguuntur, quamvis organum istud simul non moritur, sed inutile redditur ad proprium suum munus obeundum: verum extincto motu vitali istius organi simul etiam extinguitur actio organi particularis; quod etiam in motu animali verum est; nam cuius musculi motus animalis extinguitur vitalis motus, perit quoque motus voluntarius;

sed extincta actione muscoli motus animalis, uti sæpe observatur in paralyfi, manebit tamen ille musculus vivens sed iners. In omni puncto corporis, quod patet in pulsus exploratione, motus vitalis eodem momento temporis facit contractionem, & altero momento dilatationem, adeo ut pulsatio cujuscunque partis respondeat omnibus reliquis arteriis. Si enim simul tango manum, pedem, pectus, caput, in omnibus partibus exterior eodem tempore eandem arteriarum agitationem. In motu autem particulari viventium talis concentus non observatur; interdum enim motus particularis organorum particularium augetur non mutato motu arteriarum & cordis; interdum mutatur pulsus sine mutatione motus particularis in organis: imo sæpe observatur motum vitalem augeri dum motus particularis minuitur & vicissim. Propterea mihi videtur motum viventium particularem æque distinguendum esse a motu vitali, quam ab eodem distinguitur motus animalis. Concedendum quidem est idem organum moveri motu vitali, quod quoque movetur motu particulari, sed inde hæ duæ actiones non sunt confundendæ: satis enim in musculis motum animale distinctum agnoscimus a vitali ejusdem musculi. Ita est actio pulmonum, hepatis, ventriculi, intestinorum & aliarum partium particularis, quam quæ in iisdem dicitur vitalis. Inter actiones has particulares quasdam & motum vitalem generalem majorem & minorem esse concentum non ignoro, de quo infra est agendum, sed propterea non liquet eandem esse cum motu vitali actionem.

*Probatur
ejus. exi-
sistentia.*

§. VIII. Omnes agnoscunt in diversis organis diversas quoque fieri Secretiones, Excretiones & Præparationes: hoc tam manifestum est, ut non indigeat probatione: frustra enim in renibus expectarem spiritum, bilis, salivæ, vel aliorum humorum secretionem, sed solius urinæ inutilis, dum in cerebro, hepate, glandulis salivalibus proprii humoris præparationem & secretionem expecto, adeo ut non sine discrimine quivis humor secretorius vel excretorius per quodlibet organum a communi massa segregari possit. Non inficior multos contendere hanc differentiam oriri a diversa fabrica istius organi, in qua quoque cum multis fui sententia, sed postea re bene perpenſa, & inveniens motum viventium particularem tanquam regulam fundamentalem, priorem sententiam repudiavi, & differentiam secretionis, & præparationis huic motui seu actioni particulari adscripsi, quod infra clarius demonstrabitur.

*Motus
viventium
um parti-
cularis
duo gene-
ra.*

§. IX. In perscrutando motu viventium particulari invenio duo genera. Unum quod cum vita nostra incipit & desinit, & quantum observare possumus, non plane cessat in statu sano; quæ actio quoniam habetur in quadam sola parte, dum motus vitalis sit universalis, ab eo distingui potest & debet. Alterum autem quodam tempore vitæ est præsens, alio autem tempore non operatur sine ullo detrimento sanitatis, quod in motu vitali perfectorum animalium non admittitur. Utriusque generis quasdam species delibabimus, ut constet quid sit sentiendum de præstantia & usu hujus motus particularis in quibusdam organis. Generale in omnibus organis detegunt accuratissimi anatomici, ea singulari cingi membrana musculosa fibris motricibus donata, ita glandulæ omnes, bulbus oculi, cerebrum, ventriculus, intestina, hepar, renes, pulmones, testes filamenta motricia specialia habent, & ipsa ossa suo cinguntur fibroso perioſteo, quibus non leve petitur indicium, aliquid speciale in istis præstari, quod a communi circulatione & vitali actione differt, & quod mirandum est, si multa concurrant organa ad eandem actionem conspirantia, cuncta hæc communi involucro cinguntur, quod experimur in chylicationis & generationis organis.

*Præpara-
toria or-
gana.*

§. X. Cor & arteriæ ad omnia corporis puncta ducunt suo motu vitali humores, ut in diversis organis suppeditaretur humor usui aptus; qui tunc restat sanguis venis reducitur ad communem scaturiginem. Is ergo rediens sanguis orbatus est illo succo, qui eidem functioni debet inservire, & propterea præparatione eget, ut iterum possideat similem materiam. Forsan aliquis contendat eundem humorem absoluto munere redire, & iterum inservire posse: sed experientia docet humores agen-
tes

tes agendo amittere priorem indolem: quis crederet bilem, succum pancreaticum, salivam, absoluta chylicatione, illibatis viribus redire in communem massam, & agere posse ut antea, si redeant sine prævia præparatione? Hoc etiam si concederetur, quo argumento statui potuisset semen virile emissum redire, ut iterum serviret. Magis ergo est conveniens statuere, si humores agentes redeant, antequam ad idem organum ferantur, præparari. Hoc etiam continuo experimur in ipso sanguine rubro, quamdiu est in arteriis præparatus apparet, sed per venas rediens effoetus & crudior censetur. Absurdum ergo foret admittere nolle præviam præparationem in humoribus antequam operantur. Tandem in locum inutilium factorum venit chylus ex assumptis alimentis confectus, qui suppetias adfert. In nostro corpore videntur esse quædam organa, quæ soli præparationi impenduntur, alia quæ simul præparant & præparatum humorem separant ad aliquem usum necessarium.

§. XI. Si ex visibilibus judicare licet de invisibilibus, manducatio alimentorum & eorum deglutitio magnam lucem præbere potest Chylicationi ulteriori in ventriculo & intestinis. Partes enim manducationi servientes omni tempore ut reliquæ motu vitali agitantur, sed motus ille nihil præstat ad chyli præparationem, verum confluere debet simul saliva, alterne comprimi debent dentes, & tandem manducata sunt deglutienda, atque forsan in eadem actione simul aliquid absorbetur, quod venoso traditur sanguini. Inde in manducatione, præter motum vitalem permanentem in organis manducationis, habetur motus animalis maxillas agitans, adductio salivæ involuntaria, sed hoc tempore copiosior, & denique deglutitio in principio utcunque voluntaria, sed in œsophago veniens voluntati non amplius obtemperans, qui œsophagus vermiculari sua constrictione protrudit receptum ex faucibus tanta quidem potentia, ut in pronis vescentibus animalibus contentus bolus & liquores contra insitam gravitatem attollantur. Idem quoque sentiendum est fieri in ventriculo & intestinis. Agitantur quidem hæ partes motu vitali, sed ille motus tam parum facit ad præparandum chylum, quam vitalis motus in ore ad manducandum. Verum hic etiam requiritur, si cibus sit præsens, validior ventriculi & intestinorum actio, quæ instar manducationis assumpta alimenta præparat & miscet: sed actio illa nobis non est voluntaria, neque est vitalis, sed dici debet motus viventium particularis, qui præparationi alimentorum inservit. Hic motus tam visibilis est, ut in viventibus animalibus, abdomine aperto, contueri possit nudis oculis, & manu tangente percipi. Absurdum foret hunc motum referre ad motum animale, quia nullum in eam actionem valemus exercere imperium; vel vitalem, quia tam parum vitalis est ac ipsa voluntaria manducatio aut deglutitio, & quia augetur & minuitur manente motu vitali in eodem statu: imo in mactatis animalibus hic motus, cessante motu vitali, per longum insuper tempus, modo hæ partes maneant humidæ & tepidæ, persistit, ut testantur repetita experimenta in mactatis animalibus: adeoque hanc actionem ventriculi & intestinorum præparantem alimenta, referre debemus ad motum viventium particularem, qui absolvit præparationem. An vero unica sit hæc in ventriculo & intestinis actio præter motum vitalem, quæ reliqua omnia absolvit, dubitare possumus, dum in manducatione cooperantes experiamur actiones. In ventriculo enim & intestinis, præter præparationem contentorum etiam requiritur propulsio in vasa lactea: num vero cuncta hæc eadem unica actione, vel pluribus conjunctis absolvantur, ut observavimus in manducatione, determinare nolo. Hoc autem verum est, tempore confectionis majorem simul copiam humorum affluere, sensim recrementa propelli ad anum, & chylum duci in vasa lactea. Perinde nunc est unico nomine has omnes actiones complecti, vel singulis concedere nomen speciale; sufficit indicare hoc loco, chyli præparationem, absorptionem, & recrementorum propulsionem absolvi quodam motu viventium particulari. Si autem rimamur morbos has partes afficientes, certe inter dictas actiones videtur quædam esse differentia.

Aromatica assumpta promovent chyli confectionem & promovent absorptionem, sed remorantur recrementorum ejectionem. Purgantia data augent dejectionem, sed minuunt absorptionem per vasa lactea. In Lienteria & Coeliaca passione sæpe præparatus chylus per anum ejicitur. Est ergo in praxi medica scitu necessarium observare, qui morbus hanc vel illam speciem hujus actionis chylicationis notet vitiatam, & perpendere simul, quænam medicamenta huic vel illi speciei magis opitulentur, ut certius speciali vitio medicamentis succurrere possimus.

Præpara-
tionis
organum
generale.
Pulmo.

§. XII. Ita organa chylicationis præbuerunt humorem communi massæ, qui re-
sarciret defectum actione corporis & facta excretionem natum, nempe humorem chy-
losum ex assumtis alimentis confectum. Is autem humor non ita hucusque est ad-
aptatus, ut suppeditare possit cuicunque parti suum proprium humorem, sed conti-
nuata præparatione acceptus ille chylus ita est elaborandus actione corporis viven-
tis, ut tandem ad functiones peragendas aptus sit. Quia vero in omnibus quædam
portio humoris redditur inutilis agendo, requiritur vel organum generale, quod pro
omnibus præparat, vel particulare, cuicunque secretioni serviens, & forsan ad con-
ficiendos quosdam humores, quod infra amplius agitabitur: generalis illa & dein
particularis præmitti debet, priusquam aptus sit natus humor. De generali præpara-
torio organo hoc loco est agendum, quod quasi pro omnibus præparat. Tale orga-
num istam debet habere proprietatem, ut totam massam circumducendam transmit-
tat: quod enim non transit per hoc organum, ab eo præparari nequit. Tria talia
inveniuntur in toto nostro corpore, Cor, Extremitates omnium arteriarum, &
Pulmo. Cui vero horum præcipua actio præparationis sit tribuenda experimentis
constare debet. Magna moles simul confusa, & brevi temporis momento in orga-
no permanens, ab eo organo non potest multum mutari, quia organum duntaxat
solam superficiem molis attingit, & propterea partes a superficie remotæ, quia non
tanguntur ab organo, mutari nequeunt. Tale organum est Cor, quod quidem sua
constrictione valida potest propellere receptum sanguinem, & huic impetum conci-
liare, sed minime mutare aut præparare tam brevi temporis spatio receptam san-
guinis molem. Si autem a corde deberet fieri, parva fieret in ventriculo dextro
ob minorem præ sinistro potentiam, præparatio, sed ventriculo sinistro præcipua
præparationis actio, utpote robustiori, esset concedenda. Ut autem a posteriori con-
stet, quid sit in corde actum, ingredientem & egredientem sanguinem examinare
oportet; alius enim esse debet in sua qualitate, qui egreditur, quam qui cor adiit,
tam ex dextro quam sinistro ventriculo, ut constet aliquam fuisse mutationem in-
ductam. Communi & repetitis experimentis comprobatum est, sanguinem venæ
cavæ & arteriæ pulmonalis sibi ita similem esse, ut adstruere nefas esset, aliquam
in ventriculo dextro cordis esse factam sanguinis mutationem. Itidem inter san-
guinem venæ pulmonalis & eum, qui transit per ventriculum cordis sinistrum
in aorta inventum, nullum omnino invenimus discrimen. Quare cordi nullam
sanguinis præparationem adscribere possumus, sed concedenda est potentia totam
massam propellens. Neque *Extremitates omnium arteriarum* plus valent ad præ-
parationem, etiamsi sanguis transeat per minimos canaliculos, & experimur in
majori circulatione sanguinem magis præparari: nam rediens per venas minus
præparatus invenitur sanguis, quam qui adiit partem per arterias, nimisque sero
præparatus veniret sanguis, quia a sanguine allato per arterias fieri debet functio
particularis, non vero a sanguine venoso, qui reducitur ad cor. Quod adducitur
experimentum in exercitatis, nihil stringit, quia in his non solum plus patitur in
extremitatibus aortæ, sed etiam in pulmonibus, unde incerta manet conclusio in
exercitatis, num illa perfectior elaboratio absolvatur in extremitatibus arteriarum,
vel in pulmonibus, & quia rediens sanguis comprobatur quid sit factum, nullo
modo concedere possumus arteriis per totum corpus dispersis præparationis nego-
tium. *Pulmonibus* ergo solis præparatio generalis est concedenda. Hi autem agi-

tan-

tantur (1.) motu voluntario pectoris , quo cavitates ampliantur & angustantur : & quoniam sola larynx aperta aeri concedat introitum , pulmones passive tument & collabuntur , eodem modo ac si cavum pectoris intus vesica mortua esset obductum ; illa enim etiam alterne intumesceret & collaberetur cum dilatatione & constrictione cavitatis pectoris . Quia vero voluntaria respiratio non est perpetua , & in dormientibus deficit , inepta esset actio præparatoria . Movetur (2.) motu vitali pectus & pulmo , quia observatur continuari in nobis non volentibus & dormientibus : si ille motus quoque absolvitur constrictione & dilatatione pectoris , pulmones eodem modo passive sequuntur , uti in respiratione voluntaria . Hic autem motus alternus non respondet actioni vitali cordis & arteriarum : ter aut quater ad minimum cor vibrat , dum pectus tantum unicam constrictionem & dilatationem absolvat : quare alia est vitæ actio , quæ exercetur in pectore quam in corde . An vero hæc illa sit actio , quæ præparat communem massam , dubitare possumus , quia tunc Pulmones duntaxat passive agerent , ac si esset viscus mortuum ; præstantior equidem est præparationis generalis actio , quam ut concederetur pulmonibus patientibus & ex se nihil agentibus : imo noxius ingrediens aer non induceret suffocationem , quod experimur fieri , & quisquis potuisset accedente respiratione voluntaria libere & sine molestia respirare , quod in asthmaticis , & qui noxium aerem inspirant , contrarium invenimus : quare ipsis pulmonibus adscribere quoque debemus aliquam potentiam , quæ respirationi favet & præparationem sanguinis absolvit . Requiritur tamen illa alterna dilatatio & constriction pulmonum , ut novus toties accedat aer , qui a latente in pulmonibus actione consumi potest & transeuntibus humoribus misceri , amissa priore sua elasticitate : nam experimenta cum vivis animalibus vasculis clausis capta , atque in nobis respirantibus in quodam vase clauso , non concedente aeris renovationem , docent semper respirando aerem elasticum consumi , quam diu vivit animal : si autem in cadavere ope follis alterne impleatur & depleatur simili modo pulmo , illa aeris consumptio non detegitur . Propterea , præter causam alternam dilatationem pulmonum facientem , alia latitat in pulmonibus viventibus , quæ hunc aerem consumit . (3.) Magis conveniens videtur sententia hanc aeris consumptionem & sanguinis præparationem concedere *motui vitali pulmonum* , quæ est actio communis omnibus reliquis partibus nostri corporis viventis , & quam descripsimus in speciali *Exercitatione de motu vitali* . Sed quoniam superius demonstravimus , omnes partes , quamdiu durat vita , simili motu vitali agitari , eum distinguere debere a motu musculorum voluntario in eodem organo , & motu peristaltico chylicationis organi , eumque motum vitalem ad omnes partes ducere humores , sed in speciali parte non facere istius partis particularem actionem ; ex hac generali lege quoque admittimus motum vitalem pulmonibus , ad quem forsan accipiunt præparatum sanguinem per arterias bronchiales ; huic autem vitali actioni concedere non possumus id speciale , quod in pulmonibus absolvitur , nempe aeris consumptio , & transeuntis sanguinis præparatio : non tamen est negandum sine vitali actione dicta non fieri , sed id quoque verum est in motu animali , dum tamen nullus statuet motum animale & vitalem eandem esse actionem , aut motum animale musculi pendere ab eadem causa , a qua dependet vitalis circulatio per eundem muscolum , quamvis observat cessare motum animale si ejusdem musculi vita exstinguitur . (4.) Propterea admittenda est pulmonibus quædam *actio huic parti specialis in viventibus* , cujus ope receptus aer amittit elasticitatem & unitur transeuntibus humoribus , & qua actione receptus sanguis venosus ex arteria pulmonali , arteriosus & præparatus redit per venam pulmonalem . Si nullum aliud esset experimentum quam istud , quod semper demonstrat ingredientem sanguinem esse crudum & venosum , egredientem vero præparatum & arteriosum , quod in transitu per pulmones semper experimur & communi suffragio etiam a veteribus de hac præparatione non cogitantibus admittitur , sufficeret ad adstruendum

dum pulmones esse organum præparatorium. Et quoniam ubique in corpore habetur motus vitalis atque trajectus sanguinis per extremitates angustissimas in venas, sine autem hac observatione in mutata indole sanguinis, fateri cogimur pulmones habere particularem actionem, qua id speciale faciunt, quod sanguinis præparationem vocamus. Hoc ulterius ex pulmonum morbis adstrui potuisset; sed quoniam tunc nimis a scopo esset aberrandum, & hoc aptius in pertractatione illorum morborum fieri potest, contenti erimus hoc loco probasse, pulmones possidere specialem actionem, qualem nullibi in toto reliquo corpore vivente invenimus, & propterea varios nasci posse morbos in pulmonibus hanc actionem mutantem, qui etiam alibi inveniri nequeunt, quod in explicandis phænomenis, formanda prognosi, & curatione illorum specialium morborum, magnam lucem adferet.

Lienis
actio.

§. XIII. Quia *Lien* visibilem non possidet motum, & nunquam speciale ex eo veniens detectum fuit emunctorium, Physiologicorum maxime torfit ingenia, qualem actionem & usum adscriberent Lieni, & ad quodnam genus organorum referrent. Non est mea sententia aliorum conjecturas enumerare & refellere: nauseam certe generarem, & sine fructu tererem tempus omnia perpendens. Adstruere conabor Lienem esse organum præparatorium, speciali actione donatum instar pulmonum, qui transeuntem sanguinem aliquo modo mutat pro speciali aliqua functione per egredientem sanguinem absolvenda. Sed quoniam non omnem sanguinem transmittit, & transmissum præprimis ducit versus hepar, videtur sanguinem eum transeuntem præparare, ut perfectior functio in hepate possit absolvi, adeoque Lien prospicit hepati, ut pulmo toti corpori. Sanguis qui per arteriam splenicam in Lienem ducitur nihil differt a reliquo sanguine arterioso, sed ex Liene rediens per venam splenicam multo minus coagulabilis est, quam reliquus sanguis venosus; hæc differentia ergo inducta fuit sanguini per actionem Lienis: & quoniam talis mutatio nullibi invenitur in toto corpore, patet clare Lienem præter actiones generales aliis partibus communes, possidere actionem seu motum particularem, quo hoc speciale in corpore vivente producit. Quid autem boni vel mali ex naturali hac actione vel ea mutata aut extincta proveniat, explicari debet in Lienis usu & morbis, dum hoc loco sufficiat indicare Lienem exercere motum viventium particularem.

Secretoria
organum.

§. XIV. Ex communi allata sanguinis massa, particularia quædam organa specialem segregant humorem, qui ad functionem alterius partis peragendam requiritur. Ita saliva, succus ventriculi, intestinorum, pancreatis & bilis, eo scopo miscentur ingestis alimentis, ut non solum ea alimenta fotu ambientium, & motu vitali vel & particulari præparentur in aptum humorem, sed ut ille affusus humor suam quoque afferret opem. Hinc sola vita, sola actio particularis organi, neque solus boni humoris affluxus sufficit ad functionem illam absolvendam, sed unita opera absolvuntur functiones. Neque sufficit ut quivis affluat humor; is enim qui accedit, speciali qualitate donatus esse debet, ut patet ex deficiente naturali indole bilis, salivæ vel succi pancreatici, quando imperfecta absolvitur chyli coctio, quod in omnibus functionibus particularibus corporis viventis verum est. Sed & unusquisque affluens humor suam specialem possidet naturam, qua a se mutuo certis nominibus distinguuntur, unde tot nomina varios humores in nostro corpore indicantia. Interim omnes illi humores magis minusve distincti ex eadem communi sanguinis massa proveniunt. Unum ex his binis est verum, vel tales speciales humores præexistunt in communi sanguinis massa, & duntaxat ope glandulæ vel organi secretorii segregantur a communi massa & traduntur emunctorio illius organi: vel idem organum simul sua speciali actione ex communi massa conficit & segregat humorem. Quidquid horum admittitur, semper præcedere debet præparatio massæ circulantis, ut conficiatur ille particularis humor. Adeoque solum discrimen est, num solus pulmo, quod supra demonstratum fuit, transeuntem sanguinem ita præparet, ut sine ulteriori præparatione per simplicem separationem quivis hu-

humor specialis possit generari. An vero pulmo totam massam eousque præparet, ut dein accedente ulteriore præparatione cujusvis organi, tandem ope ejusdem organi separari possit. Hoc ultimum mihi admodum videtur verisimile in humoribus secretoriis; sed an hoc etiam in excretoriis requiratur, infra videbimus. Hanc ulteriorem confectionem in organis particularibus requiri innuere videtur bilis confectio, quæ præviam exigit Lienis actionem, & quia glandulæ omniaque organa secretoria novis motricibus fibris donata sunt, quibus speciali motu, quod etiam observavimus in chyli organis & pulmonibus, agitantur. Si nunc per arterias a communi massa sine interveniente speciali organo sola fabrica vasorum & generali motu vitali separatur humor in arteriis lymphaticis, qui per vasa lymphatica redit, is ubique sibi similis est; sed rediens humor per specialis organi emunctorium, quando dicitur secretus, is qualitate a communi lymphæ semper differt, ut fateri debeamus naturam seu qualitatem aliquam specialem acquisivisse secretum humorem ab actione istius organi: quot enim invenimus organa secretoria, tot etiam varios invenimus secretos humores magis minusve inter se distantes. Hæc ergo inducta mutatio adscribi nequit communi massæ allatæ, neque motui vitali generali, quia supponitur ubique sibi similis, sed tribuenda est diversæ fabricæ vel actioni particularis organi. Si autem concedatur fabricæ soli, secretio erit proportionata quantitati liquoris adfluentis: sed interdum cum parvo motu circulatorio magna fit secretio & cum majore secretio interdum subsistit, atque augetur & minuitur particularis secretio, sine ulla mutatione facta in generali circulatione. Propterea concedendum est organa particularia & glandulas possidere propriam suam actionem moventem, qua adductam massam, vel aliquid in ea mutant, & mutatum simul a residuo segregant ad usum publicum, quia id, quod confectum & secretum est, non inservit organo illi proprio, sed fertur ad aliud, ut ibi suam functionem exercent humor secretus.

§. XV. Glandularum descriptionem quia dedimus in *Chirurgia repurgata* §. 1453. -- *Glandularum Secretio.* 1460. non erit opus repetere: sufficit notare horum corpusculorum ope diversum a communi massa secerni humorem, istaque corpuscula præter communia vasa, intertexta esse & cingi velamento seu stamine fibroso. Quis statuere auderet frustra glandulis concessum esse novum stamen fibrosum, vel istud mortuum esse sola contractilitate vel elasticitate donatum instar chordarum mortuarum, dum experimur quamcumque glandulam suam specialem secernere liquorem, & irritatam sine mutata circulatione generali ingentem fundere liquoris copiam? Equidem in rebus viventibus magis est conveniens glandulis concedere motum seu actionem particularem, quam suis fibris, quibus intertexuntur, exercent, quæ suo consueto motu agentes, una cum apto affluente humore, & requisita fabrica vasorum specialem humorem conficiunt, & separant: sed agitatæ majorem copiam fundunt, & languentes interdum totam secretionem sufflaminant sine ulla facta obstructione. Hoc convenit chylicationis organo & pulmonibus, quæ partes in sua particulari actione languentes imperfecte vel omnino non absolvunt sua munera.

§. XVI. Quia ab hodiernis & a nobis *Compendii T. 15. VII. & Ch. 766.* satis *Cerebri & Cerebelli.* comprobatum est magnam spirituum copiam secerni in Cerebro & Cerebello, qui ducuntur per canaliculos nervosos ad sensum & motum exercendum, eam fieri secretionem hoc loco suppono. Verum qui sanguis ducitur pleno rivo per carotides & vertebrales ad encephalon, a reliqua massa nihil differt, & tamen suppeditat præstantissimum illum & tam copiosum humorem per totam vitam. Tentarunt subtilissimi Anatomici injectionibus artificiosis in arterias encephali hanc viam demonstrare ex arteriis in canaliculos nervosos, ast frustraneo conamine, si modo in his partibus cesset vitæ actio, omnes veluti intercluduntur viæ. Manet quidem statim a morte fabrica illorum vasorum, & injectus liquor subtilior est ipso sanguine in vivente animali, & tamen liquori subtiliori non conceditur aditus, quia scilicet deficit actio vitalis alterne aperiens & claudens vascula atque propellens contentos li-

quores. Hoc etiam in crassioribus vasculis est verum, dum ex cavo intestinorum viventium facilis sit in lactea aditus, sed in mortuis ne quidem majori vi pressus in cavo intestinorum liquor lactea ingrediatur. Actio ergo vitalis est in cerebro & cerebello causa segregans a communi massa spiritus, istosque fundens in canaliculos nervosos, quando hic humor spiritus nomen induit. An vero hæc secretio sit mera vitalis & nullo modo distincta a reliqua actione vitali in toto corpore, dubitare possumus; nam similis ductus sanguinis ad renes, qui etiam vitales sunt, & fere eandem vasorum fabricam habent, deponit humorem inutilem urinosum. Propterea cogimur hoc loco admittere aliquid absconditum & arcanum, quod sua actione facit ut a communi massa sanguinis præparetur & segregetur spiritus. Hoc agens arcanum a nobis vocatur in encephalo actio particularis viventium.

*Succi
nervosi.*

§. XVII. In encephalo & nervis alius quoque secernitur humor, qui duntaxat dura matre in encephalo, vagina medullæ spinalis, capsulis & gangliis nervorum coercetur, canaliculos medullosos nervorum externe alluens, quem, ut distinguam a spiritibus, voco Succum Nervosum. An hujus succi confectio & secretio sit ita particularis ut est spirituum, dubio non caret; videtur enim ex substantia duræ matris, vaginarum, nervorum & gangliorum deponi, ut intus contenti canaliculi nervosi maneant humidi & forsan nutrentur: quia autem invenimus omnes membranas arteriarum, venarum, œsophagi, ventriculi, intestinorum, viarum urinæ, ligamentorum circa articulos, vaginarum, tendinum, aliquem ex sua substantia deponere specialem humorem, hujus succi nervosi secretio utcunque generalis potest statui. Non tamen peccatum esset adstruere etiam esse particularem, quia inter humores hos dictarum partium aliqua observatur differentia, quæ etiam dependere videtur a speciali actione dictarum membranarum. Neque verisimile videtur muci pulmonum, quo intus obducuntur larynx & bronchia, confectionem & secretionem fieri ab eadem particulari pulmonum actione, qua supra demonstravimus produci sanguinis transfluentis præparationem. Major utique est similitudo inter mucum narium, faucium, & viarum urinæ cum sputo pulmonum, quam inter sputi confectionem & secretionem cum actione pulmonis præparatoria. Quare in omnibus organis semper habetur motus vitalis generalis, sed actiones particulares plures ab eodem organo exerceri possunt. Ita etiam ventriculus & intestina præparant chylum, absorbent, propellunt recrementa, novum secernunt humorem; omnia hæc eadem actione movente absolvi non videtur verisimile.

*Lachry-
marum.*

§. XVIII. Mirabile est observare in lachrymarum secretionem, quæ funduntur perpetuo ad oculi bulbum abluendum & humectandum, quæque in sanis non exstillant, quod in quibusdam animi pathematibus tam copiose proveniant, ut non solum exstillent ex oculis, verum etiam descendentes in cava narium, succum tenuem vel lympham copiosam exhibeant, sine ulla facta in generali circulatione mutatione; vel ipse oculus, vel interna narium irritentur, tantus est lachrymarum proventus, qui decuplo quidem major est quam in sanis: si tamen in capite arterias pulsantes exploramus, nullam detegimus in his auctam circulationem, ex qua conjicere potuissemus majorem sanguinis copiam ad has glandulas ferri. Interim copiosior fit secretio: propterea judicandum est motum vitalem in eo solo ramo arteriæ ad glandulas salivales tendente auctum fuisse, vel actionem particularem harum glandularum esse auctam. Sed in hac secretionem hoc est notatu dignum, eam augeri animi pathematibus, ac si actio harum glandularum his pathematibus obtemperaret.

Saliva.

§. XIX. Salivæ copiosior secretio, non solum ab impetu majore ad caput observatur, sed & ab oris irritatione concitatur, ut aliæ particulares secretionem, atque inter manducandum provenit, ut & denique in esurientibus a grato conspecto cibo, & nauseosis ab inordinato ventriculi motu. Hoc omne ex Mechanicis deducere causis, vel ex generali circulatione aucta, ut multi conati sunt, mihi

nimis

nimis arduum videtur: malo huic secretioni concedere actionem particularem, quæ suas proprias habet leges, quæ omnes non in omnibus secretionibus inveniuntur. An Mercurius concitando salivationem, hanc actionem particularem augeat specifica sua virtute, non absurdum erit credere.

§. XX. Ne omnes particulares secretiones nimis longo sermone percurram, solam hepatis actionem particularem in præparando & secernendo Bilem delibabo: *Bilis secretionis particularis.* reliquæ enim secretiones ex antecedentibus intelligi possunt, quoniam illa organa habent communem arteriam, venam, & nervum, sed duntaxat varia actione in propria fabrica fibrosa id speciale faciunt, quod distinctum invenimus in variis secretionibus. Sed hepar præter arteriam hepaticam, aliam habet, quæ recipit ex vena portarum allatum sanguinem, qui magis bilis confectioni & secretioni favet, quam sanguis per arteriam hepaticam advectus, qui respectu molis hujus visceris copia est parva & quasi destinatus ad hepatis nutritionem & motum vitalem conservandum datus, dum alter sanguis bilis confectioni ministret. Cingitur hoc vas arteria portarum dicenda cum ductibus choledochis speciali quodam stamine, quo constat hic aliquid fieri, quod a generali motu vitali differt. Et a posteriori hoc etiam patet, quia hoc loco generatur & secernitur aliquis humor bilis dicendus, qualis nullibi in corpore similis invenitur. Quia in occultis hæc peragitur secretio, non ita apertis experimentis probari potest secretionem augeri & minui a quibusdam causis, uti observavimus in lachrymis & saliva: verisimile tamen admodum est quasdam actiones vel affectiones partium, & forsan medicamenta, hanc specialem secretionem augere posse, ut observatur in salivatione. Adeoque non omnino repudiari potest veterum sententia de Cholagogis, quæ observationes tanquam impossibiles negliguntur ab iis, qui omnia mechanice conantur explicare, nescientes nostrum corpus vivens suas proprias possidere leges agendi.

§. XXI. Excretorii humores in sanis duplici constant materia, altera omnibus excretionibus communi, altera singulari, quæ non patitur per alienum organum eliminari. Et in morbis quædam morbi materia duntaxat patitur vel hoc vel illo organo a sanis separari & dein ejici, non vero per quodlibet. Quæ si vera sint, leges mechanicæ & hydraulicæ non valent id speciale determinare, & non sine discrimine hoc vel istud emunctorium sollicitamus ad augendam excretionem & ad minuendam morbi materiem, sed practicis observatis assequendum, quodnam genus evacuationis sit augendum, ut corpus liberemus ab inutili vel morbi materia. Operæ pretium igitur erit dicta accuratius rimari experimentis practicis. Tria nobis sanis concessa sunt emunctoria, Cutis, Vesica, & Alvus; quæ vomitu redduntur non sunt naturalia. Cutis non habet receptaculum, in quo pro tempore colligere potest excretorium humorem, veram urinam separata colligitur in vesica, & stercora in crassis intestinis, ne homo cogeretur perpetuo deponere excrementa visibilia. In sanis experimur minuta perspiratione augeri urinæ copiam & alvum fieri liquidiorum; in copiosiore urinæ evacuatione minuitur perspiratio, & alvus siccatur; alvus autem profluens minuit perspirationem & urinam, quod experimentis in *Perspiratione insensibili* nostra comprobavi. Materia autem quæ hujus vel illius excretionem augeat, a nobis dicitur communis, & est aquosum vehiculum, quod reliquam materiem duntaxat diluit & conduit; sed quando ad emunctorium venit mistus ille humor, transmittitur vehiculum commune cum illa materia, quæ ope istius organi a communi massa separari potest. Nullus enim vivere potest si modo una ex his tribus excretionibus omnino deficit. In alvi & urinæ suppressione hoc unicuique constat, quia sunt visibiles evacuationes; sed etiam verum est de insensibili perspiratione, quæ, etiamsi eliminat subtilissimum humorem, id tamen quod perspirabili proprium est, tam parum potest per renes vel alvum evacuari, quam alvi excrementa per vesicam vel cutem, aut urinam per alvum. Unusquisque humor specialem eget organo excretorio, & non patitur per alienum separari a communi massa,

præter dictum vehiculum commune. Separatio ipsa a communi circulanti massa eodem modo fit motu particulari organorum ut diximus in secretionibus. Sed in Secretionibus separabatur humor utilis & præparatus, ut præstaret alicubi aliquam necessariam functionem: si ergo non fiat secretio, cessabit etiam functio a secreto humore peragenda; si autem secretus humor ejiciatur, turbatur quoque eadem functio defectu affluentis humoris agentis, & privatur insuper communis massa utili suo & præparato humore. Verum humor excernendus si non emittitur, relinquit in communi massa id, quod usu inutile est, & retentum sensim majorem subit corruptelam, bonos simul humores coinquinans. Nostrum enim corpus suis functionibus vitalibus, portionem humorum reddit inutilem agendo, dum alia assumpta, nimis tenacia vel aliena, quam ut functionibus adaptari possint, in corpore relinquuntur inutilia & eliminanda. Quædam ex his inutilibus duntaxat per alvum, alia per urinam, alia per cutem eliminari possunt, quod constanter observamus in corporibus viventibus: & fateor me in rebus mortuis non satis detectas habere leges, quibus commonstrare valeo hoc discrimen: sed quia tamen verum est, quod profero in viventibus, coactus fui fateri particularem esse actionem viventium, quæ certam duntaxat materiem per determinatum organum separare & eliminari potest.

*Alvi e-
gestionis.*

§. XXII. Omnia, quæ per os ingeruntur, organis chylicationis non possunt ita subigi & immutari, ut vasis lacteis vel & aliis absorberi possint & massæ circulanti tradi, sed relinquunt quædam semper inseparabilia & inutilia per anum ejicienda. Multi quoque & diversi in ventriculum & intestina confluunt humores ad chyli elaborationem adjuvandam, qui peracto opere, pro parte inutiles facti cumcrementis ingestorum sunt ejiciendi. Obducuntur interna latera viarum nutrimenti copioso mucos, quo defenderentur ad acria intus præparanda & transmittenda, qui mucus tandem instar mucis narium & pulmonum redditur inutilis & dein ejiciendus. An vero pars chylosa sanguini tradita crudior ducatur ad chylicationis organum, ut repetitam subeat præparationem, quemadmodum sanguis toties ad cor & pulmones redit ut novam præparationem subeat, asserere non audeo, quum res hæc in occultis peragitur, & propterea sola conjectura judicari potest: absurdum tamen non videtur, quia morbi ex cruditate humorum nati commodissime per alvum laxiorem depurantur & curantur. An vero eadem actio chyli, organi, quæ præparat ingesta & ducit præparatum in vasa lactea, etiam sit actio intestinorum, qua contenta aliena propellat & eliminat, dubio non caret, quia invenimus medicamina promoventia concoctionem, id est quæ augent actionem intestinorum destinatam ad chyli elaborationem, sed quæ non promovent evacuationem, itidem quæ minuunt chyli præparationem, & tamen propulsionem augent; quædam alvum ducunt & non augent concoctionem, quod solis experimentis in viventibus experimur, cujus ratio nos latet in mechanicis: nam purgantia ventri applicata aut venis injecta, ut & vomitoria & sialagoga assequuntur suas operationes ac si immediate istis partibus fuissent applicata. Hinc ergo in præveniendis & curandis morbis perutile erit observare ex phænomenis, quænam actio organi chylicationis deficiat, aucta, minuta aut turbata sit, ut adhibeantur auxilia experimentis practicis detecta in viventibus hominibus, quæ vitiatam illam functionem particularem emendare valeant. Hoc experimentis in corporibus mortuis eruere velle mihi videtur impossibile in commodum decumbentium. Neque majoris esset doctrinæ five hoc comparetur his vel istis experimentis, sufficit si modo ratum sit; et majori fide uti possumus auxiliis in corpore hominis viventis detectis, quam quibusvis aliis; natura ut plurimum tot et tanta habet arcana, ad quæ invenienda non valet acumen ingenii. Si ergo detectum fuerit quodnam genus medicamenti certam speciem actionis exagitat et vitiatum emendat, feliciores semper erimus in curationibus nostris et certiores, paucioresque committentur defectu judicii errores. Experimur in praxi materiem crudam et biliosam omnium facillime per alvum elimi-

eliminari posse, difficillime per alia excretoria: conducit ergo in his morbis præter cætera simul exhibere in principio alvum ducens, quod collectam in intestinis caco-chyliam eliminat, atque deinceps uti medicamento cum aliis morbo accommodatis, quod alvum laxiorem servat, ne nova fiat inutilium accumulatio, & ut ea duntaxat quæ morbosa sunt ejiciantur, ne ulteriore mora in deteriore corruptelam abeant, vel talem subeant metamorphosin, quæ non amplius patitur per alvum eliminari. Inde non sine ratione egregii in arte viri curarunt febrem lentam seu nervosam dictam leni alvi ductione alterno die. Nec inutile est observare alvi ductione egregie curari morbos, quorum materia latitat in succo interne obliniente nutrimenti vias, qui morbus frequentior in praxi observatur quam inscius judicaret: frustra enim hunc humorem morbosum satageremus eliminare per urinam vel sudorem.

§. XXIII. Aqua infusa in aortam canis mortui tanta vi ut est cordis actio in eandem arteriam, renes tumebant maxime, sed non trans mittebant in ureteres. Ex renalibus ductibus nihil effluit si injectio fiat in arteriam, nisi renes digitis alterne compresseris: habent quoque renes sibi proprium involucrum & fibras motrices. Quis dubitare nunc potest, quin Renes speciali sua actione, non vero ab hydraulica causa pendente, vel motu cordis generali, secernant urinam a communi allata massa sanguinis? Omnia enim requisita si adsint, sed modo deficiat renum actio particularis, non procedit urinæ secretio. Urinæ autem secretæ per ureteres propulsionem, & ex vesica per uretram evacuationem, nullus credo erit qui contendet fieri per eandem, qua fit secretio, actionem, sed aliam esse in renibus, aliam iterum in ureteribus, vesica & uretra. Urinæ nomine primo emittitur vehiculum commune aquosum vel lymphaticum, quod etiam permittit per alia excretoria eliminari, & maximam præbet urinæ quantitatis differentiam. (2.) Portio chyli sanguini tradita, sed inepta functionibus obeundis, tenacior, vel interdum etiam copiosior cum reliqua urina exit. (3.) Quædam pars agentium humorum etiam inutilis agendo facta, ope renum segregatur & eliminatur; an vero duntaxat separetur ab allato sanguine, an etiam a spiritibus & succo nervoso eorum nervorum, quibus renes copiose gaudent, non sine ratione credere possumus, quia morbi nervorum nati ex urina suppressa egregie curantur quoque per diuresin, multaque ex diureticis simul egregia sunt nervina. (4.) Mucus viarum urinæ absoluto munere una cum reliquo urinæ liquore eliminatur: unde morbi hujus succi non nisi cum urina deponunt materiem. (5.) Denique quædam specialis morbi materia optime per urinæ vias eliminatur, ut est materia purulenta, & critica morborum acutorum.

§. XXIV. Perspirationem salubrem & naturalem cum sudoris excretionem hoc loco simul tradere voluimus; quia cutis utriusque est organum excretorium. Causas externas perspirationem & sudorem retardantes, supprimentes & augentes satis in peculiari Libro de *Perspiratione Insensibili* expositas inveniet Lector benevolus. Hoc solo loco notandum erit, omnem materiem perspiratione vel sudore emissam non esse propriam huic evacuationi, sed constare maximam partem ex vehiculo communi, quod etiam patitur per urinam & alvum eliminari, & ita auget copiam hujus vel illius evacuationis; verum in perspiratione & sudore quoque esse portionem humorum, quæ non patitur per alia organa a communi massa separari & eliminari deinceps. An vero negatus exitus materiæ perspirabilis per alia organa sit adscribendus nature humorum, fabricæ partis, vel actioni hujus organi, meretur examen. Materia quæ exhalat certe tenuissima est, & forsan tenuior ipsa aqua; potuisset itaque per cuncta organa, crassiores humores secernentia, a communi massa separari, unde nullum esset periculum retentionis per cutem; sed experientia in viventibus docet, ex retento perspirabili semper nasci morbos: latet ergo aliquid in hac excretionem incognitum. Si partis fabrica sola sufficeret, sufficeret etiam aucta circulatio ad eliminandum perspirabile; verum hæc hypothesis caret eventu in praxi medica. Propterea invitus quisque agnoscere debet

Urinæ
seu Re-
num.

Perspira-
tionis &
Sudoris.

cutem in perspiratione & sudore viventium exercere particularem actionem, quædam materia ad cutem delata præparatur & eliminatur. Sed quoniam eliminatur humor tenuis, qui per alia organa separari nequit, in cute agnoscenda est specialis actio, quæ in viventibus hoc efficit.

*Absor-
bentia.*

§. XXV. Ut liquor superficiei alicujus corporis firmi applicatus ingrediatur ejus substantiam variæ occurrunt causæ. (1.) Introitus fit si augeatur externa causa pre-mens eum liquorem: ita urgemus liquidum in poros minutissimos. (2.) Ablata causa sustentante, ut fit in suctione, etiam absorbetur liquidum: quibus modis fit mechanica absorptio. (3.) Attractio inter solida & liquores etiam absorptionem facit, uti hodie infinitis experimentis demonstratur in tubulis capillaribus, corporibusque omnibus bibulis. Hæc autem corpora si semel satura sint, non amplius imbibunt. Hi omnes modi absorbendi fiunt & in mortuis & viventibus, & deducuntur vel a causa premente vel attrahente. Verum in corporibus viventibus insuper aliam detegimus absorptionem, quæ his causis agentibus adscribi nequit. Corpus enim vivens facile ex cavo intestinorum absorbet chylum promptissime, quod etiam fit in aliis corporis cavitatibus; sed quamvis magna vi urgetur in cavum intestinorum, potius rumperetur intestinum, quam ut intraret vasa lactea vel venas mesaraicas. In experimento hoc neque deficit causaurgens liquorem in oscula lacteorum, neque mutata fuit natura in jamjam mortuo animali attractionis, & tamen non ingreditur liquor; qui tam facile intrabat antea eadem oscula: propterea admittendum mihi videtur in animali moriente eam causam fuisse ablatam, quæ tam facilem absorptionem faciebat in viventibus. Nihil certe ablatum fuit, nisi illa actio quam vitalem vocamus. Non tamen judicare debemus generalem motum vitalem facere absorptionem, sed particularem aliquem in organo absorbente, quo canalıs absorbens ab orificio absorbente exercet motum tendentem versus truncum. Res hæc clarius concipitur ex conspectu animalis prono bibentis: liquor œsophago conceptus motu vermiculari ducitur sursum versus ventriculum. Ita etiam liquor osculis absorbentibus receptus motu vermiculari vasculorum ab osculis ulterius propagatur. Quare vera causa absorbens est particularis motus vermicularis in vasculis absorbentibus, qui distinctus est a motu peristaltico intestinorum, quo contenta præparantur & protruduntur versus intestinum rectum. Ex distincta hac actione clare concipitur, cur chylus interdum in intestinis optime præparatur & non intrat vasa lactea, verum per anum eliminatur, ut interdum fit in Lienteria, modo deficiat vel debilior sit actio absorbens in vasis absorbentibus, sine ulla osculorum obstructione, quæ fere semper in hoc morbo accusatur. Distincta hæc idea absorptionis nos magis attentos facit ad inquirenda auxilia deficientem absorptionem curantia. Si enim supponatur obstructio, medela quærenda in resolventibus; sed si fiat ex deficiente actione, medicamina hanc actionem roborantia essent adhibenda. Quæ hucusque dicta sunt de manifestissima Chyli absorptione, applicari quoque possunt ad reliquas minus visibiles absorptiones, unde in curandis morbis multa alias obscura elucescunt, & nos magis attentos reddunt ad inveniendâ medicamina per experimenta in viventibus, quæ hanc vel illam absorptionem promonent, quod hucusque non satis fuit ex cultum. Spes tamen aliqua elucescit inventum iri talia, quoniam invenimus specialia quoque evacuantia.

*Incon-
stantes
Actiones.*

§. XXVI. Hucusque præcipuas Actiones viventium particulares exposuimus, quæ cum vita incipiunt & cum morte totius animalis extinguuntur: sunt etiam aliæ, quæ cum vita corporis non incipiunt, vel abolentur manente vita: quales sunt illæ, quæ præprimis ad generationis negotium pertinent.

*Funiculi
& Pla-
centæ.*

§. XXVII. Cor & arterias tanta vi urgere posse sanguinem in vasis feminæ gravidæ, ut intret vascula venosa placentæ, & transeat per intortum funiculum usque in corpus foetus; vel foetum viribus pollere, quibus duceret sanguinem per arterias umbilicales, se tandem in venas uteri exonerantes, vix ullus legibus

hydraulicis instructus credere potest: est enim ex uteri arteriis multo commodior sanguinis transitus in socias venas, quam ut intraret placenta solidæ venas & flueret per longum & intortum funiculum donec in foetus corpus veniat, ubi insuper remove debet contentum in vena portarum sanguinem: certe si quis adigeret aquam facilius vasa permeantem non majori potentia, quam urget sanguis arteriarum uteri in principia venarum placenta, nunquam ad alteram funiculi extremitatem veniret. Neque cordis actio debilis in foetu valet continuare sanguinis fluxum per arterias umbilicales in venas uteri: nimis multa enim occurrunt obstacula. Origo arteriarum umbilicalium ex iliaco angulo acuto versus truncum; potentia duntaxat cordis non superans actionem ventriculi dextri, qui se etiam per canalem arteriosum exonerare debet in aortam, non sufficit ad tam longam distantiam & per inflexam viam propellere sanguinem, ut veniat in venas matris, nisi fluxus promoveatur particulari actione vitali in funiculo & placenta. Si quis instituat experimenta in calentibus his partibus trudendo sanguinem vel aquam tepidam in arterias umbilicales, experietur facile multo maiorem vim applicandam esse, quam quæ a foetu vivente exerceri potest. Quare inviti agnoscere debemus in funiculo & placenta viventibus aliam accedere causam moventem, quæ continuat fluxum per has partes. Mirabile est in fluxu per has partes observare, quod funiculus inveniatur elasticus se ipsum expandens (Conf. Exerc. I, LVII.) dum in reliquis vasis circulatoriis vigeat contractio impletionem liquidi superanda. Sed & Expansio hæc elastica cum motu vitali contrahente alterne, maxime promovet fluxum per funiculum & placenta. Quippe contractione vitali alterna comprimitur & protruditur contentus in his vasis sanguis; atque expansione elastica iterum ampliantur vasa non egentia implente causa, quæ in reliquis vasis requiritur: fit ergo receptio ab elasticitate restituyente, & propulsio a motu vitali satis facilis, quamdiu inter has oppositas actiones servatur æquilibrium. Quamprimum vero fiunt rigidiora illa vasa, quam ut a motu vitali contrahi possint, vel actio vivens in funiculo debilior, quam quæ potest superare elasticitatem se extendentem, subsistet fluxus, qui per has concurrentes causas conservaretur; sed liquor contentus urgetur duntaxat actione matris vel foetus, quæ non sufficit, ut supra probavimus, ad ducendum sanguinem a matre in foetum & vicissim per tam longam & intortam viam funiculi. Hoc sciunt obstetrices, si in partu funiculus primo prodeat, explorantes num in funiculo pulsatio percipiatur vel omnino nulla, amissam pulsationem præfigere foetum mortuum, quum designet extinctam esse inter matrem & foetum circulationem, sine qua foetus vivere nequit, non statim concessa respiratione. Actionem hanc pulsationem facientem refero ad motum viventium particularem, quoniam in omnibus animalibus extinguatur instante partu, vel brevi postea. Nam funiculus ligatus non solum moritur extra ligaturam, verum etiam usque ad umbilicum, quod docet quotidiana experientia; imo in animalibus sine ligatione ulla, funiculus post partum usque ad umbilicum exarescit, quia moritur in funiculo & placenta illa particularis actio vitalis semper cum nativitate. Hæc specialis actionis observatio multa egregia præbet in physiologicis gravidarum: quippe si moritur præmature, subsequi debet abortus nulla arte præveniendus, quoniam intercipit communem inter matrem & foetum circulationem. Dum vero circa finem gestationis languescere incipit cum majori rigiditate in funiculo, quali modo fere in decrepita ætate mutantur corpora senilia, foetui parit illam anxietatem ex qua se conatur liberare per partum. Neque omnino absurdum videtur extincta actione hac in solo funiculo circa principium gestationis, manente autem in placenta, nasci Molam, quod alibi amplius exposuimus.

§. XXVIII. Detegunt anatomici ovula & cicatriculas in ovariis feminarum maturæ ætatis, neutiquam vero ante tempus istud aut in vietus inveniuntur ova: hoc quoniam constans est, & quia ipsa ovaria in matura ætate sunt multo maiora, quam ætate reliqua, admittere his debemus aliquam actionem, quæ matura ætate incipit &

& tandem moritur. Quantum observare possumus, in ipsis ovariiis non mutatur propterea fabrica, aut cessat vitalis actio, sed evanescit actio particularis, qua turgabant hæ partes & conficiebant ova. An vero confecta ova coitus tempore duntaxat propellantur per tubas in uterum, an vero sine eo hoc etiam procedat, experimentis, quia est actio in corpore latens, probari nequit: verisimile tamen videtur ovaria ovis turgentia conceptu orgasmo se exonerare, steriliaque sua deponere ova, quemadmodum in viris interdum spontanea generatur pollutio.

Uteri.

§. XXIX. Uterum in feminis maturæ ætatis aliquem exercere specialem motum, multa sunt, quæ suadent: fibris enim motricibus multis gaudet, & in excludendo foetu satis validam constrictionem facit, quæ immissa manu superari non potest, ut experiuntur obstetrices & embryulci, si foetum male locatum, vel placentam relictam educere conantur: & quoniam ille motus non est voluntarius, atque quibusdam tantum temporibus exercetur, neque ad motum animale neque vitalem referri potest, propterea ad actionem hanc viventium particularem pertinet. Hæc actio observatur primo singulis mensibus in catameniorum evacuatione (Aph. 249.), dum interdum sine sanguinis abundantia, menses extrudat, atque hoc motu deficiente abundans sanguis nullam evacuationem faciat. Denique in Abortu, Partu naturali, & eliminandis Lochiis non parvam sane actionem exercet, ita ut non raro motum animale & vitalem in consensum trahat ad fortio rem actionem præstandam. Non ignoro a multis hunc motum adscribi stimulo; sed non quærimus hujus actionis instigantem causam, quæ ab iis assignatur, sed ad quamnam motus speciem pertineat: ita motus vitalis instigatur stimulo, ita ventriculi & intestinorum motus ab irritamento concitatur; sed neque inde motus vitalis arteriarum & vermicularis viarum chyli referuntur ad motum ex stimulo, sed motus illæ species a stimulo exagitari possunt, quod etiam verum est de motu particulari in utero. Inde etiam hoc in utero particulare, quod extendatur sine laterum extenuatione, & ulla labe morbosa, quod præter partes genitales nullibi locum habet in nostro corpore vivente.

Testium.

§. XXX. Uti in feminis stato ætatis tempore incipit & tandem iterum evanescit uteri & ovariorum actio, ita etiam in viris eodem fere tempore ætatis incipit feminis generatio, & tandem sensim minuitur & exstinguitur in decrepita ætate. Hujus confectio motui vitali adscribi nequit, quia ablatis testibus nullibi in reliquo corpore similis conficitur humor, neque fabricæ partis, quia ante ætatis tempus & in senibus remanet fabrica eadem sine feminis generatione.

Genitalia.

§. XXXI. Turgescientiam genitalium multi adscribunt compressioni venarum sanguinem reducentium ex his partibus; ego vero judicarem motu particulari aucto in his partibus protrudi in arteriis sanguinem majori impetu; ab utrisque causis tument & rigent partes, sed ex compressa vena simul livent, gravantur, & plerumque simul frigent, quæ phænomena intumescentiæ harum partium non respondent: at Arteria majori impetu implens partem, ut experimur in tumoribus & frictione, vel attritu, producit tumorem huic intumescentiæ omnino similem. Sive hæc vel illa causa admittatur, certum est illam intumescentiæ fieri actione particulari vel comprimente venam, vel augente arteriarum propulsionem.

Mammarum.

§. XXXII. Mammarum fabricam, cursumque arteriarum & omnium vasorum ad mammas tendentium in lactantibus & ante istud tempus, eundem esse, nullus dubitare potest: uno autem tempore conficit & emittit lac, alio vero tempore lactis generatio est nulla. (Conf. Aph. 230. & 232.) Incipit hæc lactis generatio circa finem graviditatis, ut in his sæpe lac ante partum exstillet; sed maxime duobus tribusve diebus a partu, atque deinceps continuatur interdum per multos annos. Hoc ita consuetum phænomenon, ut sit omnibus etiam mulierculis & in arte medica omnino ignaris notum, a multis habetur imperscrutabile; quæsi-erunt igitur in mammis fermentum, alii excogitarunt mutatam circulationis directionem, ut explicent hanc confectionem & excretionem. Sed fermentum propter

nimiam absurditatem diu repudiarunt, mutatam autem circulationis directionem multi adhuc adstruunt causam esse lactis secretionis: verum quia incipit secretio ante partum, non potest illa mutatio impeditæ circulationi adscribi; dum etiam in posterum, quando uterus naturalem iterum acquisivit magnitudinem, perseverat. Immo mutata circulatio per uteri vasa post partum in puerperis insufficiens est lactis generationis causa. Nam si supponatur transitus per uteri vasa impeditus, impedimentum non magis mammas, quam reliquas corporis partes turgere faceret: quia in canali ramoso, ut in arteriis, impeditus transitus per unum ramum, æquabiliter per omnes reliquos ramos augetur velocitatem; atque ex compressa iliaca, ut fit in amputatione pedis, etiam produceretur lactis generatio, quod nullus expertus est. Quamvis igitur supponatur impeditus per uteri vasa transitus, nondum sufficeret ad lactis productionem in mammas post partum: nam solus impetus sanguinis major ad mammas non sufficit ad lactis generationem. Si concederetur ille major impetus tanquam causa generationis lactis, ipse impetus major in puerperis esset probandus: invenimus autem in pulsu debiliore et minuto corporis calore, minutam esse in puerperis circulationem; quare hæc hydraulica explicatio non valet ad formandam ideam lactis generationis. Propterea inviti agnoscere debemus in mammas particularem actionem, quæ hoc solo tempore operatur, quiescens vero reliquo tempore vitæ. Hoc autem speciale est in hac actione, quod in ceteris non observatur, eam aliquoties renovari et quiescere in matura femina, dum reliquæ actiones generationi servientes magis constantes sint. Non solum generatur lac per hanc actionem in mammas, verum si mamma tandem turgent, percipiunt in mammas feminae specialem actionem, qua lac confectum extruditur: norunt enim feminae lactantes ex sensu hoc percepto lac copiosius stillare, et facilius suctione infantis extrahi posse, quam si illam sensationem antea non perceperint.

§. XXXIII. Videtur huc referri posse actio concitata per aliquod irritamentum, quia fit in speciali parte, et statis temporibus etiam contra nostram voluntatem, uti fit in *sternutatione, tussi, singultu, vomitu, reddenda alvo & urina*, atque in *contractione pupillæ* ad copiosiores incidentes radios lucis: verum quia illa actio sequitur generalem legem actionis viventis, quæ augetur in omnibus partibus a stimulo, has speciales operationes a communi lege motus vitalis separare nolui. Dum enim quidam arteriæ ramus irritatur, validiorem motum exercet, non vero alium quam consuevit: sic musculus motus animalis se fortius vel validius contrahens non exercet actionem distinctam, sed magis aut minus validam, quali modo etiam quædam organa particularia ex stimulo suam actionem validiorem exercent, quæ nova aut distincta non est dicenda actio.

*Actio ex
stimulo.*

§. XXXIV. Superius satis esse demonstratum reor, quasdam partes speciali actione agitari: quænam vero sit hujus motus causa nullibi descriptum invenio. Hippocrates admittit *Impetum faciens*: Helmontius *Archæum*: Mechanici quærent causam moventem, quum videant omnia corpora moveri a suo iterum motore: multi hanc actionem tribuunt *menti immortalis*: quibus satis constat Auctores inter se non consentire. Inveniunt autem omnes in corporibus viventibus fieri quasdam actiones, quæ in omnibus non respondent motui mechanico vel hydraulico: quamobrem harum actionum cognitio tamdiu latuit. Quidam quæsi verunt motum illum in alterna oscillatione fibrarum, alii in rapidissimo impetu spirituum per nervos: sed quamvis hæ sententiæ admitterentur, clarius non haberetur harum actionum doctrina. Eodem enim jure rogare possem, qua causa movente ita agitantur fibræ vel propelluntur spiritus: nulla equidem restaret responsio: fatendum igitur est, DEUM corporibus viventibus hanc Actionem moventem dedisse, quæ suas proprias habet & sequitur leges, quæ Actio præsens vitalis est dicenda, quoniam ex ejus præsentia corpus dicitur vivens, & est ejus absentia mortuum. An vero hæc actio locanda sit in partibus firmis vel fluentibus, disputari potest. Si supponatur in partibus

*Causæ
actionis
particularis.*

S

firmis,

firmis, instar motus mechanici, brevi tempore exstingueretur, quia chorda in medio liquido hærens, vel inter alia corpora solida, valide ex pulsu tremens ad quietem veniret: si manere debet tremens, novo opus est motore: quare ipse motus in fibris nequit esse causa motus continuati. Si supponatur in spiritibus fluentibus causa movens, neque hoc respondebit legibus hydraulicis in liquoribus fluentibus per exilissimos canales; brevi enim tempore fluens liquor si egeat motore ad stagnationem absolutam veniet. Sive ergo supponatur in solidis sive in fluentibus causa movens, imo in utrisque simul, nunquam mechanice demonstrari potest motus ille, qui in viventibus observatur. Quamobrem coacti sumus admittere actionem moventem a Deo corporibus viventibus innatam, quæ videtur in nervis cum suis spiritibus locata, ut actione hac deinceps reliquum corpus moveatur. Sicuti in nobis intervenientibus nervis exercetur sensus, illeque est universalis & particularis in solis oculis, auribus, naribus, ita etiam comparatum est cum motu in viventibus: nam motus vitalis per totum corpus est instar sensus generalis; verum motus particularis in singulis organis, sensibus particularibus comparari potest. Omnia hæc absolventur in organis per nervos & influentes spiritus; verum, uti ad speciales sensus distincti tendunt nervi, qui aliquid percipiunt, quod aliis nervis sentientibus percipi nequit, ut patet in visu, auditu, olfactu & gustu, ita etiam fit in motu seu actione particulari in quibusdam organis, aliqua enim fit in iis actio, quæ distinguenda est a generali actione vitali. Hæ omnes actiones exercentur intervenientibus nervis & spiritibus: quid autem istud sit primum movens, quod per nervos ad istud organum fertur, arcanum est, & actio vitalis a nobis vocatur, quæ a Deo corporibus viventibus est data, nulla arte imitanda.

Organi
fabrica.

XXXV. Quibus partibus exercemus speciales sensus visus, auditus, &c. his etiam concessa est specialis fabrica, ut patet in oculis, auribus, naribus; nemo autem ex sola illa fabrica ausus fuit sensus particulares explicare, quin simul admisit nervis ad has partes tendentibus specialem perceptionem, quæ exerceri nequit sine apta fabrica organi. Ita quoque constitutum est cum motu particulari: singulis his organis concessa est specialis fabrica, ea autem sola non absolvitur specialis actio in singulis; aliquid quoque concedendum est nervis & spiritibus ad talia organa tendentibus. Quare speciali fabrica organi cum suis propriis nervis & spiritibus affluentibus ille exercetur motus seu actio, quæ a nobis vocatur Actio viventium particularis.

Ufus.

§. XXXVI. Egregius ex hac observatione profluit in cognoscendis & curandis morbis particularibus usus: nam inde scimus motum particularem minutum, augmentum, turbatum & extinctum specialia proferre posse phænomena, quæ neque ex mechanicis legibus, neque ex generali actione vitali deduci queunt: hasque partes exercere posse consensum cum aliis actionibus particularibus, cum actione vitali, sensibus & forsan motu animali, quæ ex generali motu vitali aut mechanico intelligi nequeunt, atque curatio eodem modo, ut in sensibus particularibus ad actionem specialem læsam potest dirigi. Optandum esset in arte medica, ut magis attenderetur ad has curationes particulares, ut factum fuit in sensibus particularibus: forsan certior fieret morborum particularium curatio.

Consensus.

§. XXXVII. Etiam si in corporibus viventibus separatim proponuntur Actiones, ac si nihil commune haberent cum reliquis, ita res ipsa non est accipienda: omnia enim, quæ corpori insunt, aliquo modo inter se consentiunt, vel concentum exercent, quamvis videantur omnino contraria: nihil magis differens invenitur, quam inter animam nostram & corpus: quis autem propterea negaret inter hæc consensum? Quamvis igitur copula non potest intelligi vel verbis exprimi, experimenta tamen docent copulam esse. Sic etiam invenimus 1. Actiones particulares quasdam inter se; 2. easdem cum motu vitali; 3. cum motu animali; & denique 4. cum sensibus aliquem exercere consensum. Hoc est, inducuntur his actionibus quædam mutationes duntaxat, non quod ipsa pars agens proprie afficiatur,

tur, sed quia affecta actio particularis alias actiones in consensum trahat. De his singulis unum alterumve exemplum adducemus.

§. XXXVIII. Sive consensus exerceatur 1. continuatione ejusdem membranæ; *Inter a-*
2. concursu nervorum in gangliis vel in eorum origine; 3. sive conspiratione operis; *ctiones*
4. sive similitudine secreti humoris; sive denique 5. quadam nos latente causa, istud *particu-*
certum est, quasdam actiones particulares omnino conspirare, ut una affecta, al- *lares.*
tera consentiat: sic oculi inter se, dum uno affecto alter simul afficiatur ex con-
sensu; oculi bulbus læsus vel irritatus producit copiosiore lachrymarum effusionem;
faucium agitatio inducit nauseam & inversum ventriculi motum, atque ipsum vo-
mitum; ventriculus affectus salivæ secretionem auget, ut patet in nausea: maxi-
mus autem consensus inter actionem mammarum & uteri detegitur. Hæc res am-
plius hoc loco non est agitanda, quia ad generalem titulum consensus pertinet.

§. XXXIX. Omnes partes particulari actione donatæ etiam gaudent motu vitali, *Inter*
sive quo omnis actio in ea parte cessat: sed fieri potest, ut testantur observata practi- *particu-*
ca, motum particularem organi esse extinctum, manente tamen vita ejusdem partis, *lares &*
quod etiam verum est in motu animali & sensibus: quia in paralyfi & stupore manet *vitali.*
plerumque vita affectæ partis. Hoc observamus inter actionem intestinorum & mo-
tum circulatorium in Dysenteria cum & sine febre (*Aph.* 268. 11.). Ventriculi au-
tem languor debilem pulsum inferre solet: seu respiratio affecta magis mutat circu-
lationem, quod forsan magis turbato fluxui sanguinis per pulmones, quam consensui
est adscribendum. Si autem alicubi concentus sit agnoscendus, certe videtur inter
respirationem & circulationem: quia aucta respiratione etiam augetur circulatio, &
vicissim cum aucta circulatione intenditur respiratio. In ceteris autem actionibus
particularibus minus evidens est concentus: nam in aucta circulatione morbosa ple-
rumque particulares actiones ventriculi & intestinorum languent; & particulares se-
cretiones non augentur & minuuntur cum aucta & minuta circulatione, quod probant
infinita observata practica in morbis, dum in pulsu frequentiore & pleniore sæpe subsi-
stant secretiones & excretiones, & in motu vitali languidiore, detegatur interdum hu-
morum profluvium. Hinc patet calorem & frigus alicujus partis non pendere ab actio-
ne particulari istius partis, sed a majori & minori motu vitali in tali parte. Quod au-
tem mutetur circulatio in affecta actione particulari, magis videtur adscribendum cau-
sæ actionem particularem mutanti, quæ simul afficit in eadem parte motum vitalem.

§. XL. Inter animalem & vitalem motum major quam inter particularem & ani- *Et ani-*
malem detegitur consensus, quia in aucto motu animali & quiete pulsus intenditur *malem*
& sedatur, inde forsan, quia motu animali promovetur circulatio per venas valvu- *motum.*
lis instructas, quæ in venis organorum particularium non inveniuntur. Inter par-
ticularem & animalem motum aliquem consensum esse patere videtur in quibusdam
exemplis. Dum enim ventriculus cibo plenus est & majorem tunc exercet actio-
nem, languor percipitur in motu animali: atque in nauseosis ex turbato ventriculi
motu, vix valet musculorum voluntaria actio corpus tenere erectum. Inveniuntur
quædam particulares actiones affectæ, quæ semper in consensum trahunt contra vo-
luntatem nostram aliquem motum animalem, ut patet in vomitu, alvi egestionem,
partu, in quibus exclusio non fit contentorum solo particulari motu istius orga-
ni, sed adjuvatur contractione spasmodica musculorum motus animalis.

§. XLI. Animi pathemata miris modis totam nostram machinam in suis actionibus *Inter a-*
turbare quotidiana testatur experientia, adeo ut non solum inde mutetur pulsus, ve- *nimi pa-*
rum totum corpus etiam in motu animali contremiscat. Hoc etiam detegitur in *themata.*
quibusdam actionibus particularibus, dum inveniuntur, quibus ex audito vel viso nau-
seoso nausea & vomitus fiat (*Aph.* 125. 111.) quibus ex terrore supprimitur respira-
tio, aut commoventur inordinate intestina, unde ex animi pathematibus non ra-
ro concitantur morbi periculosissimi in motu particulari turbato vel suppresso.

§. XLII. Dolores quasdam actiones particulares debilitare, res est in praxi medica *Inter*
sensus.

notissima, quia in dolentibus omnes functiones languidiores peraguntur. At vero ex turbata vel deficiente actione particulari non generatur semper dolor, nisi valens turbata actio nervum sentientem eodem modo afficiat; ut idem nervus ab aliis causis dolorem inferentibus agitetur. Sed quando actio particularis deficit, percipitur quædam *Anxietas* intolerabilis, ut patet in affectis pulmonibus, ventriculo, intestinis, mesenterio, hepate, liene, utero: quare in partibus his nascuntur dolores & anxietates, quæ non percipiuntur in aliis partibus, quibus non est concessa actio particularis, uti membris externis. Adeo ut *Anxietas* sit inter characteristicæ signa affectæ actionis particularis. An vero ipsi nervi & influentes spiritus, quibus fit actio particularis, affecti sensum anxietatis præbeant; an vero actio particularis deficiens vel impedita tali speciali modo adjacentes nervos sensuum afficiat, ut inde nascatur anxietatis perceptio, alibi est amplius inquirendum.

Leges
actionis
particularis.

§. XLIII. Præter consensum inter alias corporis viventis functiones quædam specialia fiunt his Actionibus particularibus, quæ hoc loco sunt perpendenda. Ut omnes actiones in corpore vivente possunt augeri, minui, turbari, deficere & impedi, hoc etiam in his omnibus est verum: sed talia si fiant, nascuntur specialia in corpore ita affecto symptomata, quæ præcipua præbent signa in morbis particularibus. Hæc magis a veteribus & præcipue Hippocrate sunt tradita, quam a recentioribus; hi enim magis addicti generalem condere theoriam in praxi medica, sedulo observarunt & notarunt signa generalia; illi autem, qui sine discrimine omnia morborum tradiderunt signa, plura quoque illa particularia ex actione speciali læsa notarunt. Si ergo specialis functionis morbus sit addiscendus, magis noster Hippocrates vel propria praxis est consulenda, quam hodierni theoretici. Nolo autem ut quis neotericos repudiet, aut omnem laborem in veteribus medicis locet, sed ut, intellecta generali hodiernorum theoria, veteres quoque & propriam praxin, ad cognitionem morborum particularium, examinet & exercent: quia in particularibus morbis multa specialia sunt observanda, quæ in generalibus non occurrunt. Hoc satis experimur in Vulneribus, Inflammationibus, Hydrope, aliisque morbis, qui generaliter sunt pertractandi, quando specialem partem vel actionem aggrediuntur, quanta sit differentia in signis, prognosi, methodo medendi, & quantus selectus in præscribendis medicamentis sit observandus, ut nemo dubitare possit, quin sola generalis cognitio morborum sit insufficiens ad curandos morbos particulares.

Egens
spirituum
influxu.

§. XLIV. Ad omnes corporis viventis actiones requiruntur tria cooperantia. 1. Machina apta ad faciendum motum. 2. Liquor communis totam machinam permeans arteriis adductus & venis reducendus. 3. Spirituum influxus per nervosos canaliculos distinctos. Quamprimum unum ex his deficit, sistitur omnis actio. Agentem autem causam nemo adscribere potest ipsi machinæ solidæ, neque influxui sanguinis per arterias, sed communi suffragio & ab omnibus hoc tempore vitalis causa agens conceditur fluentibus spiritibus per nervos, quod quia non est hujus loci adstruere, & a nobis alibi demonstratum fuit, pro concessio admittam. Ille spirituum influxus varias producit actiones, ut patet in motu vitali cordis & arteriarum, motu animali & in sensibus generalibus & particularibus. Sicuti speciales sensus in auditu, visu, olfactu, & gustu differunt a generali sensu, & hi iterum inter se differunt; omnes tamen exercentur spiritibus influentibus; eodem modo quoque accipiendi sunt motus particulares in distinctis organis, qui dependent ab influxu spirituum per distinctos nervos. Quamobrem majus arcanum non est quærendum in actione, quam sensu particulari. Neque magis incognitum profertur in descriptione actionis particularis organorum, quam sensus particularis in visu vel auditu.

Sola tur-
bari po-
test.

§. XLV. Quia in organis præter actionem particularem quoque habetur actio vitalis generalis, non semper est opus, ut, turbata vel extincta actione particulari, organum istud moriatur. Sunt enim distincti nervi in illo organo, qui ferunt spi-

spi-

spiritus ad istius organi actionem particularem & generalem. Quale quoque observamus in sensibus. vitiari enim & extinguere potest in lingua gustus, manente sensu tactus, quia hæ duæ sensationes distinctis peraguntur nervis. Hinc sæpe vitiata in organis particularibus observatur actio, quæ non communicat istius partis actioni generali. Interdum vero simul afficitur generalis motus vitalis istius organi, quod quoque fieri potest ex communi causa utrosque nervos afficiente.

§. XLVI. Quia omnis actio consistit in alterna constrictione & dimissione *Adjuvat circulationem.* fibrarum, ex quibus tale organum componitur, eodem hoc motu etiam promovetur fluxus adjacentis humoris, qui perpetuo quoque augetur motu vitali: sed quia in actione particulari accedit alia propellens causa, magis promovetur humoris vitalis fluxus per hoc organum quam si solo motu vitali esset propellendus. Inde in languidiore & deficiente actione particulari humor vitalis tardius progreditur per hoc organum, & ita accumulatus partem aggravat cum deficiente effectu, qui in sanis ab actione particulari dependet.

§. XLVII. Merito potest rogari, an organi particularis calor & frigus morbosum *An caloris & frigoris causa.* dependeat ab hac particulari actione mutata? Alibi demonstravimus motum vitalem causam esse caloris sani per totum corpus; & quoniam ille etiam habetur in organis particularibus, nulla erit dubitandi ratio, quin idem motus vitalis etiam organis particularibus naturalem calorem conciliet. Si ergo organum particulare nimis morbose caleat vel frigeat; hanc morbosam mutationem potius tribuerem motui vitali, quam particulari.

§. XLVIII. Vix ulla detegitur specialis in corpore functio vel organum, quin *Specificæ admittit auxilia.* veteres his adscripserint specifica medicamenta, unde adhuc in praxi recepta sunt stomachica, hepatica, pectoralia, cephalica, sialagoga, diuretica & similia; recentiores autem multi, ratiociniis magis quam experimentis ducti, specifics in medicamentis virtutes negarunt, existimantes ex majori minorive energia, vel immediata applicatione varias fieri in organis particularibus operationes: experimenta autem testantur, quædam vomitum, alvum, urinam, sudorem, salivam ducere, alia magis ventriculum, intestina, pulmones, cerebrum in sua actione roburare, æquali quantitate data & sine discrimine ad quasvis corporis partes applicata. Fateor equidem has speciales in medicamentis operationes ratiocinando non inveniri posse, sed duntaxat experimentis in hominibus viventibus esse detegendas. Hoc autem veritati nihil detrahit. quid quæso scimus in omnibus medicamentorum operationibus sine experimentis? certe nihil. Utinam nunquam talis in scientia medica irrepsit sententia? multo certe plura cognita haberentur medicamina quibus aliquam specialem organi functionem vitiatam vel languentem emendare & erigere potuissimus, quam hodie possidemus. Interest ergo medici & ægri sedulo perscrutari in operationibus medicamentorum speciales actiones organorum, ut eo certius cognoscantur eorum morbi & medicamenta.

O R A T I O

De Praxis Medicæ repurgatæ certitudine.

DUO sunt modi, quibus medici eruunt veritates & comprobant: alter est accurata & circumspecta rerum observatio, tam clara & distincta, ut nemini ansa relinquatur dubitandi: alter vero conclusiones continet, quibus res absconditæ sensibus tali modo proferuntur, ac si præsentessent. Utrumque autem horum, etsi videatur certissimum, erroribus tamen non parum obnoxium deprehenditur; experientia enim non minus, quam ratio, in multis sæpissime turpiter fallimur, quoniam externi sensus, quibus extimas tantum contemplamur rerum imagines, nimis tardi, stupidique sunt, quam veram ut possent sciscitanti exhibere notitiam. Hoc forsitan nimis durum quibusdam videbitur, aut incongruum, quum vix ullus sit, quin, si modo notabili non laboret alicujus organi vitio, se æque prompte & accurate sensibus uti judicet, ac quivis exercitatus. Fallimur equidem: sensuum enim organa, usu, longaue consuetudine, & promptiora & aptiora fiunt. Ita musicus, continua modulatione exercitatus, cum dissonantiam chordarum, tum distantiam tonorum, multo accuratius imperito, distinguere valet promptissime: Cæci quoque, qui tactu ad externas corporum superficies explorandas majori studio utuntur, haud mediocri sensu videntur præditi. His sensus non est natus perfectior, verum usu frequenti hanc sibi promptitudinem compararunt. neque desunt, olfactu, gustuque, alios homines qui antecellunt, sensus minori studio exercentes. Anatomici quoque multi & Physici, quibus continuus Microscopiorum fuit usus, & plura, & magis distincto, quam insueti, ordine, contemplari corpuscula minutissima valent. sensus itaque externi omnes, usu & studio, perfectiores fiunt; imo iisdem non raro errores, qui minus attentis & assuetis obvenirent, emendantur & evitantur. quis enim indoctus, corporis quadruplo majoris, in tanto longiore distantia locati ab oculo, eandem magnitudine in fundo oculi imaginem pingi, crederet, ac alterius in primo stadio locati? corpus enim majus, e longinquo positum, multo majus ipsi videbitur, quam istud exiguum propius admotum: &, nisi per cameram obscuram edoctus, aliaque per experimenta confirmatus, huic nunquam assentiretur. omni ergo cautela opus, ne falsa pro veris obtrudantur in experimentis instituendis, nudis sensibus percipiendis.

Non minor equidem cura est adhibenda illi, qui veritates rationibus elicere conatur: multi enim sunt modi in hoc, quibus in errores abducitur: quorum tamen primarii sunt, non satis perspecta, vel perverse instituta experimenta, pro veris datis admissa: Conclusiones etiam formatæ generales ex uno alterove singulari casu. Denique veritates elicendi modus perperam adhibitus: ultimo, omnis cautela licet adhibeatur, tamen defectu judicii in omnibus minutiis notandis, & observandis, turpissimi sæpe committuntur errores. At quis hæc omnia poterit evitare? non est sane imperiti, nimisque festinantis, quod auxiliis necessariis sit destitutum, minusque ad singula attentum, sed exercitati, sagacisque ingenii, opus, experimentis aut rationibus augere & firmare scientiam.

Tantum est A. H. scientiarum condere fundamenta, omni ævo duratura. Certe hac via, hoc ordine, si tractata fuisset medicina, ut nulla, nisi a perito, cum omni cautela instituta, admitterentur experimenta, nullæque rationes, nisi legitima methodo ex veris principiis elicita, proferrentur, neque inconstantia, neque conjecturalis scientiæ, neque incertitudinis fuisset accusata.

Ut autem hac hora, qua fruor vestra præsentia, mihi pro tam Illustri Con-
 cione verba facere est data potestas, possimus confirmare, medicinam repurgatam
 esse

esse certam & perpetuam, minimeque conjecturalem, orationis argumentum duplex concipiendum erit. Humanissimum vestrum & æquissimum iudicium exspecto atque flagito, benignasque aures mihi præbere velitis, rogo.

Primo examinabimus, scientiæ medicæ incertitudo an artis, an vero artificis, culpa fiat, ne ars incertitudinis accusetur, quæ tamen artificis ignorantia fuit producta. Dein proponemus modum, quo possumus evitare istos errores, ne disciplina medica in eandem recadat infamiam.

Aptiorem Orationi materiem hoc tempore non potuimus eligere; debebat enim placere omnibus, quorum tamen minima pars medicorum sacris delectatur: est quidem argumentum vulgare, omnibusque notum, sed tamen, ut confido, ita compositum, ut inde haud mediocris honos & dignitas afferatur medicinæ, vobisque omnibus non ingratum fuerit.

Prima pars demonstratu erit facilis: scientiam enim illam, quæ incertis, fallacibusque & futilibus nititur principiis, aut quæ dependet ab alicujus beneplacito, vel imaginario conceptu, conjecturalem atque futilem esse, nemo ibit inficias. verum, quæ ex constanti & perpetuo rerum ordine est producta, incertitiæ accusare quis unquam ausus? tum revera nihil constans & perpetuum esset in tota rerum natura, neque mathematica, neque arithmetica forent certa; imo ipsius solis reditus statim tempore in dubium posset vocari: quid absurdius? nihil ergo est probandum aliud, quam quod certis principiis disciplina medica nitatur. hoc si evincimus, id autem restabit inquirere, cur tamen instabilis fuerit per tot sæcula.

Tota scientia medica his duobus absolvitur, nempe cognitione & curatione morborum. in cognitione signa continentur, & causæ morborum; si in signis locetur conjectura, non omni tempore eadem fuissent criteria morborum, atque instabilis esset naturæ operatio, quæ non omni tempore eodem modo sua munera persequeretur. imo vero omnes, quos nunc tractamus, morbi, si nonnullos excipiamus, non satis accurate descriptos, vel ex nova causa postea natos, eodem modo incipiunt, crescunt, stant, & recedunt, ac fuere a parentibus inventoribusque medicinæ, atque successive per plusquam tria millia annorum, notati, & iisdem signis, quibus olim, etiam hodie cognoscuntur: quippe Hippocratis, Celsi, & Galeni scripta, quatenus morborum continent signa, irrevocabile & certissimum suggerunt testimonium. si cui enim libuerit horum, aliorumque medicinæ principum, pervolvere opera, & ea, quæ ex operationibus naturæ notarunt, cum quotidianis comparare, ut decet, observatis, ne minimum a nostris recedere inveniet. Olim & etiam nunc, ex pulsus celeritate & duritie, corporisque calore exæstuante, cum inextinguibili siti, orisque siccitate, & pectoris vehementi dolore, qui in inspiratione intenditur, eamque difficilem facit, cognoverunt, & nunc cognoscimus, in corpore robusto, cujus pulmonum explicatio nimio dolore non impeditur, veram & legitimam pleuritidem: nec alio modo veteres cognoverunt ex ægritudine corporis cum pulsu celeriori, & æstuante calore, post toleratum frigus, a causa interna natis, præsentiam febris, in homine viribus satis valido, quam nos nunc quoque comperimus, quamquam illi, ut & neoterici, varias hujus morbi dedere descriptiones. Plura similia A. H. possem afferre, quæ iisdem descripta phænomenis habentur, quibus nunc quoque comperiuntur, nisi vereretur me vestra abuti patientia. ita ergo clarissime cum pateat, nullam per tot sæcula factam fuisse mutationem in morbis, indubitate atque intrepide hanc partem nostræ scientiæ certam, & non conjecturalem, admittere debemus.

Unde tamen tanta in morborum cognitione est orta varietas & discordia, quæ lites adhuc dum non sunt compositiæ, posset aliquis jure quodam a me petere. hoc quæsitum ut paucis verbis expediam, sciendum est: Veteres morbos naturali suo cursui committebant, diligenter tantum eorum notarunt mutationes; Ho-

dierni vero eosdem aggrediuntur, venæ sectione, sudoriferis, diureticis, purgantibus, calefacientibus, refrigerantibus, & quod pejus est, sæpe oppositis medicamentis, & aliena methodo medendi. Si ergo ex hac varia, & quandoque præpostera curatione (si curatio sit dicenda) naturalis morborum cursus pervertatur, id non ex natura morbi, aut scientiæ Medicæ peritia, sed artis ignorantia provenit. Veteres etiam summo studio & cura notarunt dies criticos: ipsisque piaculum erat, eos ullis perturbare medicamentis: Dum vero Juniores eos nunquam detegunt certos, eosque quodam casu fortuito contingere judicant, quod illos sua perversa curatione semper perturbant; ne quidem dubitant hoc utilissimum in curatione diligentissime observandum criterium inter nugas veterum locare. At vero si quis ita moderatur acutorum morborum commutationes, quibus nimis exagitatis omnia pervertuntur, quibus nimis suppressis nulla sit coctio, ut paulo celerior, quam in sanitate, retineatur circulatio, quod semper moris erat veteribus, omnes dies criticos, & reliqua memoriæ relicta, confirmata videbit.

Maxima autem videtur restare difficultas, quod morborum historiæ tantum inter se discrepant, quæ ab auctoribus etiam celeberrimis descriptæ habentur, ut idem esse morbus non videatur. Tu ergo Medice, dicat Irrisor, conaris certitudinem scientiæ Medicæ adstruere, quum vero optimi auctores Medici non consentiant; atque quotidiana experientia, Medicorum discordiis, incertitudinem abunde comprobet? Largior hæc omnia; attamen disciplinam Medicam neque conjecturalem, neque incertam, esse assero. quippe sermo est de morborum ordine naturali & perpetuo, nulla præpostera curatione, aut errore in diætâ perturbato. potest equidem naturalis cursus, variata methodo, alienas subire mutationes; ut si quis fructus maturos, aut flores, alieno cupiat tempore, id cultura & industria efficere valet: inde tamen nemo inferet, totum naturæ ordinem esse incertum, sed hanc mutationem sua arte fuisse inductam. sic quoque in nostra scientia, si calidiore regimine, ante solitum tempus, variolarum pustulæ protrudantur, vel refrigerantibus, evacuantibus, & nitrosis, nimis tarde eædem prodeant, hæc non ex indole morbi & inconstantia, sed applicata methodo medendi provenisse, existimari debet.

Multo adhuc pejus, si ab imperitis curatio suscipitur; Hi, quoniam certum naturæ ordinem non intelligunt, jam his, jam vero illis, tentant expugnare morbum: Imo, quum nullum scopum habeant aut finem medendi, singulis diebus alia præscribunt medicamina, donec æger, multis anomalis symptomatibus laceffitus, tandem benignitate naturæ emergat. hoc tantum si esset vitandum, facile foret; sed vero illi, qui ipsam scientiam profitentur, multosque in ea fecere progressus, tradendo morborum historias, & descriptiones, alieno titulo, re ipsa non satis perspecta, non modo incautos, sed quoque prudentiores quosdam in varias distrahunt opiniones: sæpe enim inveni Erysipelatis historiam titulo Inflammationis insignitam, tali quoque modo tractatam, quamvis signa multa hi duo morbi habeant communia, & inde ab imperitis, aliisque quibusdam magis exercitatis, promiscue pertractantur, merentur tamen, ob varios exitus, diversamque curandi methodum, accuratissime distingui: Humor enim blandus, albus, æqualis, in Erysipelate frustra expectatur; at tenuis, serosus, pruritusque excitans, effluit, nullumque tempus observans criticum; Dum vero purulentus, benignus, in inflammatione accurate diebus criticis mutationes faciat. non est ergo negandum, ut multi faciunt, Medicos quosdam & Chirurgos adstringentibus, refrigerantibusque actu & potentia, curasse inflammationes hujusmodi: nam veræ inflammationes si fuissent, gelatinosus sanguinis in phlogisticam diathesin condensatus liquor, in vasculis hærens, densiori compactione, validiorique constrictione firmarum partium, adstringentibus & refrigerantibus inducta, non modo non resolveretur, sed & in insolubilem, densam, compactam materiem converteretur. Dum vero levis Erysipelatosa intumescencia, fixata volatili biliosa materia, & in-

ducta

ducta quiete vasculis, & benignior, & minus infesta, reddatur iisdem. Prioris enim attenuatio, hujus condensatio, desideratur. Non absimili modo vidimus, Tubercula exigua duro folliculo inclusa, minimi momenti, ut Atheromata, steatomata, ablata a chirurgis, gloriantibus sua dexteritate, vel insigni virtute arcani, se abstulisse Cancros. Hæc ergo & similia, quæ passim occurrunt in praxi, si a peritioribus mandentur litteris, alios quoque multos in similes conducunt errores. Hujusmodi errores evitare qui cupit, eum oportet animadvertere, num ille, qui morbi historię dedit nomen, non alium depingit morbum, quam nomen indicare videtur; cujus effecta tamen tradit & curationes. multi enim habentur compilatores, cruda & indigesta congerentes, quibus sua opera infarciunt: pauci vero docti atque fideles, quorum sententiis in omni eventu uti possumus. Dolendum sane est, omnes reliquas partes Medicinæ, Anatomicam, Chemicam, Botanicam, absolutissimas haberi; solam vero Praxin, partem omnium utilissimam, ab omnibus veluti derelictam adeo esse, ut vix possimus unum alterumve commendare Tyronibus auctorem, quem possent in omni morbo sequi.

Majoris altiorisque est indaginis, magisque exercitatum exigit Medicum, ejusdem morbi varias notare species, spontaneamque in aliam conversi indolem ex arte pertractare: hoc enim negligitur ut plurimum, suntque parum solliciti, varias quamvis contineat species, subeat mutationes, quæ specialem postulant curationem, si modo nomen habeant morbi. Ut si quis curandum susceperit morbo regio laborantem, nondum vero examinaverit, num Inflammatione hepatis, ejusdemve obstructione ab acri adusta, tenui, vel glutinosa, tenaci, inertii materia; sive calculo vesicæ felleæ; aut commotione febris, hic natus sit morbus: talis nec debitam prognosin, nec rectam medendi rationem proponere valet; si autem casu curatur æger, tanquam Medicus prudentissimus alterum, si eodem laborat morbo, verum ex alia causa, suæ curæ commissum, quandoque curando interficit. Tantum est morborum cognoscere causas, tuto ut possimus vincere ægrotudines; si enim perversa assignetur aut aliena, ægris quandoque evadit exitialis.

Sed quis nunc præluce in tanta rerum caligine? Confugiemus ad Hippocratem, accusabimusque spiritus insontes? vel consulamus potius temperamenta & qualitates Galeni? etiamsi sciamus, archæum esse iratum cum Paracelso, tamen ad Praxin nihil redundabit certitudinis. quid ergo? quum neque Anatomia, neque Chemia, neque Physica aut Mathematica scientia, certa Medica praxis sit fundata. mecum perpendite A. H. quodnam fuit hujus impedimentum, eo enim detecto, & emendato, facilius erit, in posterum firmare praxin, & ab omni infamia incertitudinis & conjecturæ liberare; patebitque hanc quoque partem esse certam.

Omnis hypothesis, pro inveniendâ causâ huc usque excogitata, nullos habuit successus, quoniam humanum ingenium per hypotheses a priori ad eliciendas rerum causas nimis tardum est & stupidum; hæc ergo non amplius est calcanda via. Dum autem Harvæus circulationem invenisset sanguinis; & post eum Anatomici vel minutissimas perscrutati fuissent partes, nil dubium amplius in Medicina restare videbatur: verum tamen pingendo partes firmas, intactas relinquere fluentes, & Practicis, ex varia humorum indole deducuntibus morborum originem, nullum ab eleganti hac & præstantissima Anatomia allatum est auxilium. Converterunt horum plurimi se ad liquorum phænomena, vi ignis, aut effervescentia, aut fermentatione, aliave operatione Chemica, producta; quibus abstrusissimas morborum causas sunt conati explicare, infausto sane atque irritò successu. si enim aliquis occurrat morbus, sive in firmis partibus, vel fluentibus seorsim, simplex, aut utrasque simul affligens, motu mechanico peccans, appropriatis legibus hujus scientiæ, cum natura liquoris & firmarum partium comparatis, exponendus est: hos si vellem morbos principiis Chemicis enodare, & oleum & operam perderem. quis enim problema Mathematicum, aut Mechanicum, per Chemicas operationes posset explica-

re? neque inde gloriantur Mathematici, quasi ipsis solum morborum explicationem, causarumque investigationem, atque certam medendi methodum debeamus: multa quidem fatemur in nostram scientiam inducta fuisse utilia & indubitata; sed etiam alia quam plurima, vel quod non responderent legibus Mechanicis, vel quod eadem male & perversè essent applicatae, magis obscura & incerta facta fuisse: nam si legibus Mechanicis differentiam inter symptomata varia acrimoniae cancrorae, scorbuticae, arthriticae, acidæ, alcalinæ, explicare aggredieretur, rem, per se difficilem, simul & obscuram redderet Mechanicus. quod autem magis in hujusmodi explicatione est damnandum, insufficientia nempe datorum, ut loquuntur hujus scientiæ antistites, atque eorum nondum satis comprobata veritas: quibus accedit aliena principiorum applicatio, & error commissus in supputando. Primum est frequens, quoniam ultima partium structura, & actio, non satis explorata habentur, quamvis maxime exculta sint. quanta vero sit nonnullorum assumptorum incertitudo, ex differentia virium cordis in sanguine ejiciendo facile est dijudicare. nam Keiliana supputatio virium a Borelliana quam maxime distat. in motu etiam musculorum, alius elatere fibrarum, tensioneve nervorum, filamenta vectis adinstar concutientibus, alius impletione tubulorum cylindricorum, vel vesicularium, eorum operationem exponit; non cogitant illi, constructam tali modo machinam non majorem exercere vim, quam ipsi fuerit conciliata, & arteriam quoque ligatam sensim musculo adimere contractilitatem, eamque iterum impletione tepidæ restitui, quibus omnis eorum destruitur imaginaria actio. sed vero si fibræ exiles, obliquæ, decussatim longitudinalibus intertextæ, a nervis derivantur; aliæ autem crassiores, & parallelæ cum directione musculi decurrentes ab arteriis; & facilis & certus contractionis formatur conceptus: nam comparatione facta roris, in interstitia funis tensi se facile insinuantis, magnamque vim exercentis, nulla tamen sensibili potentia adacti, ad motum spirituum, seu succi nervosi, in fibris obliquis fluentium, parallelas, quamdiu plenis, sua extensione comprimentibus, omnis eludetur objectio. quamvis motus automaticus insectorum, & etiam in aliis animalibus post mortem observatus, & quiescens omnino per stimulum, etiamsi solidum, suscitandus, videatur denegare, influxu spirituum per nervos motum musculorum peragi, tamen solutio erit facilis accurate pensitanti, canales flexiles, elasticos, liquore implente distentos, humidi motum continuare tam diu, ac ad summam pervenerint contractionem: neque motum alternum oscillatorium, si tali modo constructum sit organum istud, ut, tempore contractionis, simul constringatur liquoris moventis aditus, dubitabit a spirituum quoque æquabili influxu per nervos suscitari posse. horum omnium contemplatio rem certam exponit, horum autem insufficientia, & aliena causa assignata, ansam præbent instabili conjecturæ.

Non minor fallacia, legibus mechanicis perversè casui solvendo vel explicando applicatis, profluit: ut si quis leges motus corporum per medium quiescens applicet ad motum humorum per nostra vasa plena, ubi corpora cum suo medio promoventur, (in altero leviora, in altero autem graviora præcurrent.) equidem absurdas promeret conclusiones: aut si vas flexile amplum, impletum liquore, magno pressum pondere, dum interim exilissimi canaliculi, huic communicantis, pauca liquoris quantitate sustentatur, haberetur, ac si minima portio aquæ, quod retineat æquilibrium, eandem quam totum pondus contineret gravitatem; non modo hoc, sed & multa alia absurda in physicis, passim invenienda, provenirent.

Ut ergo causæ morborum eliciantur certissimæ, omnes scientiæ applicandæ sunt studio & cura: mutationes humorum stagnantium, caloreve nimio agitatorum, ex Chemicis; motus autem horum per determinata vasa ex hydraulicis: potentia firmarum in motu suscitando ex mechanicis principiis, quatenus generalia continent: sed specialia in nostro corpore, ex ipsis functionibus integris & læsis, indoleque singulari humorum, petenda. utut hoc videatur certissimum, ta-

men

men in eo non pauci committuntur errores. si enim quis non habeat exactam cognitionem morborum externorum visibilium, & functionum partis internæ a morbo obsessæ, impossibile erit dignoscere, quæ sit causa latens interna, & pars affecta. absurdum itaque esse arbitror, morbos externos solis Chirurgis committere, quasi Medico forent nullius momenti, quum tamen reliquorum internorum firmissimum præbeant fundamentum. neque minus inepte fecerunt, Anatomiam nequaquam Medico utilem esse, statuentes; imo, quod deterius, totam scientiam Theoreticam qui exploserunt, experientiis solis confidentes. hi tamen ut plurimum laudantur ab omnibus, tanquam multiplici experientia docti. sed credite mihi, isti, quo sæpe longius versantur in arte, eo imperitiores evadunt.

Ne autem aliquis in causarum explicatione plura a nobis exigat, quam ipsa scientia permittit, tribus verbis nos explicare in hoc negotio conabimur. Si quis me rogaret, quæ est febris causa, aut podagræ, & similium morborum; putaret sciscitator, me non satisfacisse quæsito, causam proximam, respondendo, esse aliquid alienum in nostro corpore, febrim excitans, in primo aggressu frigus, cum ægitudine, horripilatione, & anxietate, produciens, postea vero erumpens in calorem vel æstum, cum corporis siccitate & siti majore; denique in sudorem desinens. hæc enim videntur nimis plana, omnibusque nota, quam ut deceret Medicum talia proponere, multo enim obscuriora desiderantur, quæ si proposuerimus, contenti sunt, quamvis tales Medici se ipsos aliosque decipiant. ego vero assero, hæc vilissima, ut videntur, firmare Medicinam, eamque ab omni conjecturæ infamia liberare; & Doctrinam illam, multo abstrusiora explicantem, altius non penetrare, imo Medicinæ progressum impedire. etenim si dicatur, febris est effervescentia ex acidi febrilis conflictu cum alcali sanguinis, adeoque acidum causa febris est habendum: hanc sententiam scio majori applausu acceptum iri, tanquam plus explicantem, & curationi magis accommodatam. quamvis hæc quandam fallacem recipiat hypothesin, tamen nihil plus explicat, nec ulterius progreditur. quippe si rogemus ulterius, quid est acidum, nihil aliud de eo potest dici, quam quod saporem acidum imprimit linguæ, colorem syrupi violarum commutat, & cum alcalicis effervesceat. adeoque ipsum id incognitum, quod hos producit effectus, est acidum; atque id etiam incognitum, quod dicta signa, quibus cognoscimus febris præsentiam, producit, est materia febrilis. nulla ergo restat differentia nisi nominis, atque imaginaria illa ratio nihil plus efficere potuit, quam simplex illa & plana explicatio.

Eadem quoque certitudine & simplicitate in podagræ causa eruenda progredimur, eam nempe consistere in singulari humorum acrimonia, quæ in corpore vegeto, & ob errorem commissum non perturbata, articulos primo pedis, in loco sensibili, invadit, dolorem ut plurimum gravissimum sine tumore excitat, demum intumescencia notabili partem elevat, & rubore suffundit; denique insensibiliter evanescens, statim tempore reditura. qui autem diceret, materiam esse tartaream, in articulos depositam; aut poros invisibiles, de quibus nullam habet nisi imaginariam cognitionem, esse obstructos, liberum transitum primi elementi, quod forsan in insomniis ipsi incidit, impediens: vel ebullitionem sive effervescentiam, & centena talia, generare dolorem podagricum, eadem quoque simplicitate posset vinci. equidem isti non solum obscuriorem reddunt causam, quia id, per quod explicatur, ipsa causa est obscurius, & quandoque non nisi in inventoris cerebro existit; verum etiam damnosam ægris medicinam suggerit. horum etiam antistites, non contenti suis explicationibus, & arguta causæ proximæ inventionem, ipsam quoque medendi methodum eo dirigunt, multorumque hominum calamitate adstruunt: Dum vero simplex illa, clara, constans, certa, omni tempore persistat, a nemine in dubium vocata, sed propter simplicitatem rejecta. Certum ergo est & inconcussum, ipsam scientiam, ab omni hypothesi liberatam, non modo non esse conjecturalem, in causis quoque eruendis, sed ita videri, si debito

modo non tractetur: verum etiam perfectiorem prudentioremque reddere Medicum.

Quamvis hæc nostra causarum explicatio videatur simplex, sine vix ullo labore comparanda, multo tamen difficilius, quam alia imaginaria, acquiritur: facile enim est quandam cudere hypothesim; difficile vero, varias intricatissimasque naturæ operationes mente assequi: quum multi morbi ita larvati quandoque incedunt, ut vel exercitatissimus Medicus nostram ita simplicem causam haud valeat detegere; quod, vel diversitate visceris, partisque affectæ, vel nimia morbi symptomatumque vehementia, sæpe accidit. si enim, causæ febrilis vehementia, corporis vincantur vires, lipothymia cum pulsu debili, loco caloris pulsusque fortis, conspicitur; quam frustra volatilibus nitimur erigere. vel aliquam invadit sæpe partem, ubi tam mala & anomala producit symptomata, ut ipsa febris delitescere omnino videatur, non nisi a peritissimo detegenda. Pleuritis quoque legitima vehemens, quæ sufficientem pectoris dilatationem inhibet, pulsum, qui alias fortissimus & durus est, ut in omnibus membranarum inflammationibus, debilem, intermittentem, & inæqualem exhibet. Plura possent afferri, nisi essem persuasus, me satis probasse, nostra methodo jam dicta, scientiam Medicam, etiam in causa proxima eruenda, æque certam esse, quam in aliis partibus suis; nihilque aliud in hac desiderari parte, quam quod liberetur a suis hypothesibus, fictaque opinione, reducaturque ad puram simplicitatem.

Omnes forsan judicabunt, maximam fallaciam & incertitudinem in morborum curatione latere, quum vix duo Medici, ad unum ægrum vocati, consentiant; confido tamen, hujus etiam partis certitudinem me æque facile probaturum, quam præcedentium. Morbus est, si quædam functio, quæ in sanitate, cum quadam constantia, facilitate, & jucunditate fit, aut potest fieri, ab aliqua causa, commutata, aucta aut imminuta sit. id, quod hanc mutationem producit, causa vocatur, sit simplex, sit composita; hujus expulsio, subactio, vel ablatio, Medicis dicitur curatio. in hoc ergo faciendo tota versatur ars Medica. viæ, quibus hæc causa ducitur extra corpus naturales sunt alvus, vesica, cutis, & os. quæeductio quibusdam perficitur medicamentis, quorum virtutes multiplici experientia satis compertæ habentur. hæc medicamina, quamvis adaugeant evacuationes, aliis præterea non sunt virtutibus destituta, quibus simul morbi causam minuunt, vel fovent, & ob id selectus quam maxime desideratur, quo neglecto, ut fit a multis, frustra optatos expectamus effectus. Dein ut morbi causa possit educi, aptitudo requiritur materiæ; nam ut urina per alvum nequit duci, ita ceteri humores suis propriis tantum eliminantur emunctoriis, non vero per alia si parva tantum eorum portio. maturitas insuper liquoris educendi in omnibus desideratur, quæ si deficiat, non solum difficilis siteductio, sed & nociva semper deprehenditur, ut illicum suo damno, quibus abscessus aperitur immaturus, experiuntur, omnesque evacuationes, crudo existente morbo, semper confirmant. Medicus itaque, qui hæc omnia summo studio animadvertit, a suis exhibitis medicamentis certam operationem expectare poterit; imprudens vero incertum & dubium vidit effectum. nonne ergo hujus curationis incertitudo est imprudentiæ Medici, non vero arti, adscribenda?

Idem quoque verum esse comperimus in causarum subactione. quis enim posset ignota causa curare morbum? hic quamvis casu absolvat curationem, hanc tamen conjecturalem esse statuerem. Causæ morborum duplici modo subiguntur, vel viribus vitæ, quas tunc juvat Medicus prudens: vel specifica virtute Medicamenti. priorem Methodicam, posteriorem specificam vocitant curationem. quænam sit præstantior, haud facile est definire, quum non omnes morbi ejusdem sint indolis, & ad omnes non habeantur specifica. harum ut notissimum adferam exemplum, methodum curandæ febris intermittens legitimæ perscrutemur, nam symptomatice, in malignis alicubi latentibus humoribus, aliam omnino curationem exigunt; intermittens enim, ex cacochylia primarum viarum, unico sæpe vomitorio, aut cathartico superatur, eliminata sc. materie peccante. quoniam vero ex
hac

hac frequentissime oriantur causa, multi Medici magnam virtutem in his evacuantibus ad febrem curandam locarunt. eodem etiam modo, diaphoretico, vel sudorifero, febris intermittens, ex prohibita perspiratione nata, superatur. Dum intermittens legitima reddatur atrocior, imo in continuam satis periculosam sæpe commutatur. Puræ intermittens, in corpore satis robusto, viribus vitæ, materies ita commutatur, ut non amplius febrim suscitare valeat, sed visibili, aut invisibili evacuatione expellatur: hæc autem materiæ immutatio, an longiori tempore, vitæ viribus aut medicamentorum, peragitur; an breviori, propria antidoto, perinde erit, hoc si ratione & experientia confirmetur. Id agit Methodica curatio, ut vires vitæ tantum vel excitentur, vel supprimantur, quantam commotionem experientia docuit citissime superasse febris causam: ingenue adeoque fatendum, causam proximam morbi methodica curatione nondum vinci; sed in viribus vitæ dirigendis consistere. specifica autem curatio simplex, ita exstinguens morbi causam, ut evadat vel innocua, vel specie insensibilis perspirationis evolet, de qua pauci cogitant, semper bona dicenda; nisi febris sua commotione pejorem morbum curaret. hoc in casu noceret exhibitum antidotum, non vero sua natura, sed quia febris non curanda erat: eodem jure, si alia methodo quavis curata fuisset febris, imprudentia Medici, non vero medicamentum aut methodus medendi, essent accusanda. huc usque utraque methodus eodem modo juvare & nocere potest. verum, quoniam omnis febris, majore actione virium corporis, quam impenduntur in sanitate, utitur in causæ ejus proximæ vel subactione vel expulsionem, semper quoque debilitantur corpora, quemadmodum quotidiana comprobatur experientia. specifica vero, sola extinctione hujus causæ, sanitatem, sine ulla virium diminutione, restituit. hac ergo in re specifica methodus, præ omnibus aliis, est æstimanda. sed vero, si antidotum aliam præterea possideat energiam, quæ nocere posset, medici est animadvertere, num hæc energia aliquid mali in eo homine, cui propinatur, produceret, quod etiam in quavis alia methodo incumbit Medico.

Nolo enim A. H. judicetis, methodicam curationem omnino esse insontem; nam hæc quoque medicamina alienas sæpe possident operationes: neque semper tutum, spontaneum expectare febris recessum: hydropem sæpe, atque viscerum infarctionem, cachexiam, fatuitatem, passionem hypochondriacam, rachitidem, & in his regionibus scorbutum, relinquit.

His animadversis, facile erit componere litem, an spontanea, vel methodica, vel specifica curatio, prævaleat, nam hi tres tantum inveniuntur modi; si Cortex Kinæ Kinæ nil aliud, nisi extinguere febris causam, faceret; quum priores duæ simul deterunt corporis vires, prævaleret omnino; sed si alias ob qualitates noceat, certe eæ a fidelissimis auctoribus, Sydenhamio, Montono, Listero, Bo-
hnio, Helvetio, aut tandem propria praxi, detectæ fuissent: dum e contrario uno veluti ore, nunquam corticem Chinæ Chinæ in pura febre intermittente datum, testantur, aliquid mali attulisse. quæque cortici adscribuntur mala, ut scorbutus, rachitis, & infarctio viscerum, dubium movent, an non ex ipsa proveniant febre, quoniam hæc ipsa mala, & in febre intermittente diuturna, sine corticis usu, frequentissime conspiciuntur: & non in febre recenti, cortice fugata, sed tantum in diuturniori, prædeunt, ut plurimum Medici & vulgus, si hæc mala, post longam toleratam febrim, quæ tempore exhorrescentiæ, ob stagnationem humorum, validissimas quandoque facit concretiones polyposas, & obstructions irresolubiles, vel in vigore incalescentiæ, impetu majori humorum, tenerrima rumpit vasa lymphatica, laticemque effundit in cava, conspiciunt; protinus omnem conjiciunt culpam in corticem. insontem dico, nam in febre symptomatrica, aut in ea febre, quæ non curanda erat, vel in iis, quæ ex diuturnitate febris oriuntur, malis; vel Medici imprudentia, vel ipsa febris malignitas est accusanda. Damnabimus Corticem, quod adstrictionem possideat, dum gustetur?

quæ mitior, quam in Cortice tamarisci, Cinnamomo, tormentilla, similibusque, quæ Medicis in frequenti sunt usu, & maximæ efficacix? hæc equidem potius essent damnanda. imo invenitur quandoque alvum movere, raroque adstringere; adeo ut quandoque admiscere cortici validiora adstringentia debeamus, aut opiata; ne nimis cito per alvum ducatur ejus virtus. qui mala dicunt in Corticem, aliasque específicas curationes, quoniam sensibilem non moveant evacuationem, non intelligunt equidem, solam insensibilem difflationem omnes sensibiles simul superare; & venenosa etiam, antidoto subacta, quandoque fieri innocua. recidiva febris, quæ in spontanea & methodica curatione non minus frequens, quam in specifica, reperitur, non potest Corticis usum abrogare. Mirandum sane est, quare sola in febre non debeamus medicamenta exhibere specifica, dum vero in aliis quibuscunque morbis, ut lue venerea, scorbuto, acrimonia omni, summa laude extolluntur; quorum omnium medicamentorum non magis compertas habemus virtutes, quam corticis Kinæ Kinæ. ita ergo certissime morborum sanabilium causæ tribus his modis subiguntur; incurabiles vero morbi, vel sua propria pertinacia contra optima quævis medicamina; & sanabilium ab ignaro Medico frustra curatio suscepta ipsam scientiam nequaquam incertitudinis accusare poterunt: sed morbos aliquot insanabiles esse, quosdam etiam male ab imperitis tractatos, comprobant.

Quoniam omnes examinavimus Medicinæ partes, easque vidimus, si modo repurgatæ sint, certas esse & constantes, neminem posthac Medicinam, artem nobilissimam, incertitudinis accusare reor, sed vere ita videri, quod ab imperitis frequentissime excolatur. D I X I .



O R A T I O

De animi & corporis consensione mirabili tam
in secunda quam adversa valetudine.

UT omnis nostra vis in animo & corpore sita est ; nosque animi imperio , corporis autem servitio magis utimur : ita omnibus cupidis literarum observatio major necessaria est , ut , quod studii ratio detrahit , cura restituat ; corpusque exercitatum , sanum , & vegetum , conservetur diu , Medici auxilio vix indigens . quo mihi rectius videtur ingenii , quam virium opibus gloriam quærere . Ad sanitatem autem conservandam , corporis exercitatione modica uti , satius est . verum hebescit animus corporis nimio motu , quia alterum alterius auxilio viget , & ingenium & corpus exercendum esse , suadet ratio . Hunc servare modum paucis datum . si ergo animi , si corporis exercitio , langueat homo , Medici erit his mederi vitiis . Quibus ut opituletur , Medicum scire oportet , quomodo animi & corporis actiones conspirant ; quali nexu animus cohæret corpori , num omnes , an quasdam tantum , habeant actiones & passionες communes . his maxime juvantur illi , qui corporum suorum robora inquieta cogitatione , nocturnaue vigilia , minuerunt .

Veritas hujus ut constaret , A. H. constitui hac hora *De animi & corporis consensione mirabili* verba facere , & explicare simul , quæ in secunda & adversa valetudine inde proveniunt ; ut scientiæ & usui simul inserviat hic sermo .

Rem copiosorem esse & subtiliorem , quam ut brevi hoc tempore omnibus in partibus posset explicari , fateor ; si elegantiae studerem ; verum operam dabo , res ipsa ut clara & intellectu facilis fiat : si vero aliquantulum a sermonis & orationis elegantia recedam , mihi ignoscere velitis , rogo , rei enim perspicuitati magis , quam ornato sermoni , serviendum .

Elegi hanc materiem , medico haud indignam , aliisque hominibus non ingratiā , ut vobis A. H. rem scitu necessariam simulque jucundam exponendo , hic placeret sermo , & ut mihimet ipsi non deessem : dicam enim , quod omnes scire expedit , medicorum acuit ingenium , & ægrotantibus non mediocrem adfert opem .

Ut ea , quæ de hoc mirabili nexu animi & corporis dicenda sunt , ordine procedant ; ad hæc duo animum advertere oportebit : primum est , quomodo & quæ mutationes corporis afferuntur menti ; alterum vero , quid , & quousque , mens agit in nostrum corpus . In primæ partis examine duo itidem occurrunt . Primum complectitur mutationes corporeas , quas sensus externos appellamus , alterum horum vitia includit .

Qui mutationem aliquam in corpore factam percipit , sentire censetur : si vero similis mutatio afferatur menti ab aliqua incognita causa , qualis non observatur in aliis , hujus mentem aberrare autumant . Desipientia ergo , differentia causæ incognitæ , a vera sensatione decernitur , quum respondeat homo talis mutationibus internis , non vero illis , quæ ipsi per sensus externos afferuntur . nunquam autem sentit homo sanus , nisi quædam in suo corpore fuerit facta mutatio . quum vero omnes hæ mutationes in rebus corporeis aliquem includant motum , hic ergo in parte quadam suscitatus , simplex sane , ut nihil simplicius , ad eam partem corporis , cui consentit animus , delatus , totum mysterium includit . Quid
si va-

si valemus exponere evidenti ratione, experimentis comprobata, quomodo hic motus, & qualis, & qua via, defertur ad eam corporis partem, cui Deus voluit animum esse annexum; nonne satisfactum erit quæsitum? nonne satis expositum, quo modo sensus exercentur in nobis? quomodo vitia corporis inquinant animum? nihil ulterius petit Physicus, nihil amplius exigit Medicus. quantum in his eruendis valemus, tentabimus vires, quid valeant humeri, quid ferre recusent.

Quo pauciores hujusmodi motus eodem tempore in nobis fiunt, eo vividior perceptio: Quo autem plures, eo minus perfecta, imo confusa nascitur sensus idea. Ut mens attenta accuratius percipit suscitatum in quodam organo motum, & distracta aliis rebus quandoque ne quidem sensum percipit; ita corpus, consuetum percipiendis minutissimis, omnibus aliis antecellit. si quis hujus sit ignarus, vulgaria consulat experimenta, quæ multa sunt. nonne attentus minimum percipit auscultando susurrum? dum sonum clariorem vix audiet aliis rebus distractus? nonne quoque hoc idem, olfactu, gustu, tactu, & visu experimur? sed & ipsa exercitatio incredibilem promptitudinem sensibus præbet: Musicus enim minimam chordarum dissonantiam; cæcus inpalabilia aliis, Physicus, microscopiis assuetus, invisibilia visus acumine detegit. hic autem non subsistit: quædam quoque esse animalia sensibus perfectioribus donata, credendum. Nonne noctivaga in meris tenebris vident? nonne canis venaticus feram insectatur, quam odore vestigiorum sequitur? & quædam animalia tempestatem futuram præsentunt? quæ sunt hominibus denegata. num fabulæ hæc omnia? eadem quoque in hominibus demonstrabo vobis, quæ facta in animalibus videntur. sit Asthmaticus in cubiculo occlusus, hic aeris mutationem persentiet, quam nemo convivarum animadvertit: & relicta ex ulcere diuturno cicatrix in multis tempestatem futuram prælagit. Sunt ergo hæc falsa aut ficta, quod naturali causa videantur carere? imo vero æque ex causis & mutationibus naturalibus proveniunt, quam aliæ quæcunque a nobis perceptæ mutationes. Constat enim Barometri experimentis, quod aerem leviozem subsequantur tempestates, hæc vero aeris levitas ab homine sano non percipi potest; teneræ vero cicatrici, & pulmmoni vitiatò, minima hæc aeris mutatio sensibilem adfert molestiam.

Idem objectum variis organis applicatum diversas notiones præbet; Cinnamomum enim colorem visui, fragrantissimum odorem olfactui, tactui duritiem, gustui aroma exhibet. & quis novit, an non in animalibus sit aliud organum, quod in homine non invenitur, quo quædam distinguunt, hominibus ignota? quid si nobis deesset omnibus olfactus, quis unquam de effluviis odoriferis somniasset? quale cæcus de coloribus, & surdus de sono, ferrent judicium? perfricta sane fronte hæc omnia negarent. ita ergo non liquet, plura non posse existere organa in quibusdam animalibus, nec perfectiora, quam in sanis hominibus: verum tamen nobis non constare, alia an sint organa: sed quædam animalia perfectioribus organis gaudere, alia vero animalibus quædam esse denegata, experimenta evincunt.

Hic non subsistendum; sed ulterius investigandum, quousque sensuum fallacia procedat, ut quædam, quæ perfecte percipiuntur sensibus, tamen falsa esse, cognoscamus. quis unquam crederet, orbem terrestrem moveri, & solem manere in eodem loco, si nudos tantum sensus consuleret? intuens baculum in aqua demersum oblique, nonne juraret eum esse fractum vel incurvatum? oculis lachrymis madentibus si aliquis aspiceret candelæ flammam, nonne proferret, se vidisse radios lucentes ex candela emanantes? hæc sunt vulgaria, omnibus nota, obscuriora autem, & quæ magis ad nostram scientiam pertinent, proferenda, ut cognoscamus modum, quo mens nostra percipit ea, quæ in nostro corpore fiunt.

In cujus oculi fundo vasa cruenta solito magis impleta sunt ut in phrenitide; imo in multis, quorum præcordia compressa majorem sanguinis quantitatem oculos versus ducunt, illi judicabunt, se videre anguillulas rubras, quæ nusquam sunt, & a nemine videntur: ita circulatio in auditus organo validior bombum, soni-

tum,

tum, fufurum, & fimilia proferre videtur, quæ tamen ab adftantibus non audiuntur. ex morbis putridis refurgens de omnium alimentorum falſedine sæpe conqueritur, cujus tamen cauſa in proprio latet corpore. membro mutilatus dolorem partis mutilatæ ſe ſentire aſſerit, ſi fibrilla nervi, quæ antea erat v. g. in pollice, nunc in parte relicta poſt mutilationem vellicetur. hæc pauca ſufficere reor ad comprobandum, ſi organum a cauſa externa ſolitum ſit mutari, quoties ſimilis aſſeratur mutatio a cauſa interna, eam provenire tamen ab externis, animum judicare.

Qui intelligit, qualis in organo excitatus motus deferatur ad ſenſorium commune, ille facile quoque judicabit, an mentis aberratione de rebus ſentiamus perverſe, an vero corporis vitio: ex dictis quum conſtet, motum in organo excitatum nobis præbere ſenſus ideam, igitur motus idem non repræſentatur animo (transferendus enim eſt per nervos ad eam partem, ubi hi omnes incipiunt,) aliud quid ſit in horum nervorum principiis, quod ſenſus notitiam præbet, quam in cerebro, ubi percipitur. ſi enim perſcrutemur hunc motum, in principio nervorum excitatum, ille ſane omnino alius erit, quam qui in ſenſus organo fuit excitatus. neque calor tactu exploratus per nervos ſenſorios, neque lucis radii per opticum, neque aeris concuſſio ſonora per acouſticum, neque ſapida linguæ applicata per guſtatorium, feruntur ad ſenſorium commune: verum ſimilis mutatio nervorum principiis inducta, ſi res eadem ſenſus organo applicatur, mentem idem de re externa judicare facit. ſi fieri ergo poſſet a quavis cauſa alia, tam interna quam externa, ut talis quoque producat mutatio, mens eandem de hac re ferret ſententiam, quam tulit de præcedenti, quamvis res non ſint eadem.

Similem induci poſſe mutationem principiis nervorum a rebus diverſis, clarius patebit, ſi organum deferens examinetur accuratius. omnibus conſtat experimentis, ſenſus perceptionem fieri in capitis eo loco, ubi incipiunt omnes nervi, verum motum fieri in quodam organo ſenſus, quod altera quorundam nervorum gaudeat extremitate. viam ergo intermediam præbet nervus, & motus propagationem ab una ad alteram extremitatem ſui. hic motus per firmas vel fluentes propagatur partes: firmæ autem tremulum ſuum receptum motum, quum nervi flexuoſa incedant via, ipſæque fibræ ſint molliſſimæ, imo inter alias partes molles coercitæ, nequaquam poſſent uſque ad cerebrum propagare. verum fluentes agiliſſimæ partes, propriis canaliculis contentæ, hoc opus abſolvere valent. Non ponderabimus aliorum ſententias, qui contendunt, eoſdem ſpiritus in organo ſenſus contentos icſtu oculi citius, inſtar lucis radii, ab organo volare ad cerebrum; noſtram ſolam proponemus, quæ ſi ſit vera, reliqua ſponte corruent.

Si motus æquabilis fiat per canalem, qui in itinere vel fine perturbatur, eodem quoque momento in hujus canalis principio influxus æquabilis mutatur aut ſiſtitur; ſeu quod idem eſt, ſi ſpirituum animalium moderatus & æquabilis fluxus per nervorum fibrillas ſolitarias, ſive in ipſo organo, a cauſa interna, ſive externa, aut etiam via intermedia turbatur, in harum fibrarum principio turbabitur quoque influxus: quia vero mens noſtra tantum percipit mutationem in nervorum principio excitatam, eandem ergo fert ſententiam, ſive hæc mutatio fuit facta ab interna vel externa cauſa, in ipſo organo, vel in media via. Quum autem, in ſano ſtatu, ab externa cauſa in ſolo organo hæc inducebatur mutatio, idem etiam ſentiet animus, ſi ab alia quoque cauſa influxus fuerit perturbatus.

Hinc nunc facile videtis Aud. H. non animum hujusmodi in rebus, ſed corpus aberrare. Deus enim ita creavit hominem, ut mente ſua perciperet, quænam in corpore fierent mutationes, & quidem ope nervorum. Si ergo per eundem nervum eadem adferatur mutatio, quæ tamen ab alia corporea fuit inducta cauſa, & mens tunc judicat, quemadmodum ſolebat in ſecunda valetudine, quis unquam hanc deſipientiam mentis adſcriberet vitio? Ita vidimus A. H. animum inſontem multis in rebus accusari; & omnia infantiæ genera, ex cauſis corporeis potius, quam men-

te alienata, provenire: præterea, insanientes mentis deinceps compotes factos, sæpe audiui dicentes, se non intellexisse, quæ eo tempore fuere facta, sed sibi aliquid imaginatos fuisse, cui respondebant: nonne idem quoque fecisset prudens?

Id, quod menti obversabatur, a corporea provenisse causa, curationis eventus quoque docuit. Detractum enim aliquid de sanguinis abundantia furorem phrenitici compescuit: hæmorrhagia oborta omnem anguillarum rubrarum visum discussit, & hæmorrhoidum fluxus omnem ex melancholici animo timorem & mœstitiā delevit: quod idem quoque Melanagogum purgans, atraque educta excrementa, efficiunt. peregrinis humoribus spiritus imprægnati miras producant in nervorum principiis mutationes, quæ, ab animo perceptæ, tot varia inferunt insanix genera, vel in ipso organo insolitos proritant motus, quos tamen veros esse mens judicat. His omnibus in rebus videtis A. H. mentem recte sentire, omniaque mala in corporeis latere partibus, quamvis delirare videatur homo.

Absoluta prima parte, qua constitit, perversam sensationem non mentis, sed corporis vitio fuisse inductam, ad alteram transgrediemur. Hæc quoque, ut præcedens, in duas distinguitur partes: quædam enim animi actiones aliquam in corpore producant mutationem: aliæ vero nullam sensibilem inducunt; an vero nullam, examinabimus deinceps.

Qui ex voluntate excitatur motus, animalis dicitur actio. ligato vel destructo nervo, ad partem movendam destinato, protinus cessat hoc commercium; quo constet, voluntatem nostram in ipsa parte non operari, sed alia in parte corporis, unde, ad eam partem aliquid per nervum ferri, nemo dubitare poterit. Iterata experimenta, variis in corporis partibus instituta, docuerunt, nostram voluntatem agere in partes encephalo inclusas, nervosque solos præbere vias ab hoc ad partes movendas. motum musculorum provenire ab influxu spirituum, nemo est, qui inficias ibit. quia vero in rebus corporeis nusquam suscitatur motus, nisi a causa movente, spirituum igitur influxus per nervos in musculum motus animalis est causa. quid autem agat animus, dum hos propellit spiritus, quum ipse incorporeus sensibilis & satis validos inducat motus, fatemur nos latere. ne tamen judicetis, Medicum non posse aliquid deducere veri, quem latet effectus alicujus causa; imo vero æque fructuosa, abundans, & certa est hæc doctrina, ac si ipsa fuisset cognita causa. non enim desistunt Physici proferre motuum leges, gravitatis proprietates, virium attractricium actiones, quamvis incognita prima motuum causa, gravitatis & virium attractricium natura; ita sane Medici quoque agunt, primo invenerunt medicamenta, & explorarunt eorum operationes, postea vero de operandi ratione coeperunt cogitare. quum ergo mens in motu animali id tantum agat, ut motus major fiat spirituum per aliquem nervum; corporea ergo causa hoc idem si faciat, subsequetur quoque motus idem. nonne spina infixæ, vel & stimulus mere mechanicus, diras suscitavit convulsiones? nonne humor rodens nervos miras induxit contorsiones? nonne ossis excrecentia dura, vellicans cerebrum, morbum comitialem creavit incurabilem? quid faciunt hæc omnia, ut reliqua taceam? Inferunt similem motum, quem animus solebat in spiritibus excitare. Simplex hic motus, sane magis cognitus, quam qui ex nostra voluntate excitatur, cui non rei adscriptus? alius enim iræ divinæ, alius incantamentis, fascinationibus Dæmoniis, aliisque rebus illicitis adscripsit. utinam curationem quoque similibus deliramentis, quibus multorum fascinant ingenia, & absurda, imo turpia cogitare cogunt, non implevissent! Equidem rectam inde medendi methodum aspernantur, inutilia & superstitiosa quærentes. qui vero corpoream hanc simplicem causam admittit, eamque examinat sedulo, diras has contorsiones minimo sæpe auxilio sustulit.

Quamvis in animali motu animus magnum exerceat imperium, ut suo nutu veluti omnes sequantur motus: frequenti vero exercitatione iidem fiunt promptiores, imo, nobis non cogitantibus. Num attendit Musicus, quanam movendus est

digitus? aut saltator, quali modo ponendi pedes? aut etiam nos loquentes num meditamur, qui muscoli linguæ & labiorum contrahendi aut relaxandi? an non hæc omnia sua exequuntur munera promptissime? Si vero corpus non est assuetum, quæ non fiunt contorsiones, motusque perversi, & inconditæ voces? adeo quidem, ut infuetus & attentus ne quidem valeat, etsi omnes intendat vires, similem proferre motum. Tantam enim acquirit promptitudinem exercititione corpus nostrum; hæc sane promptitudo in corpore, non vero animo, sita est. ut animus ergo noster in corpore producat motum, organum ipsum debet esse paratum, expedita via intermedia, spiritusque puri: cum organo enim destructo perit ejus actio, & nervus intersectus parti inducit paralyin, spiritus vero crudi, alienati, infecti, deficientes, miras producant commotiones. Nec hoc in casu ullum in mente detegitur vitium.

Quid autem agit animus in corporis motu automatico, seu vitali, paucis complectar: vibrat pulsus, perennat stomachi & intestinorum actio, continuatur circumductio sanguinis per omnia viscera & vasorum labyrinthum, & quidem contra nostram voluntatem. Nulla ergo in peragendis valet animi virtus, sed a perenni influxu spirituum per proprios nervos dependent. Hoc nemini videatur mirum, me asserere, perpetuum & non interpolatum spirituum influxum, ad motum alternum excitandum, valere; structura enim organi, qua contractionis tempore sistitur spirituum influxus, alternus hic motus continuatur: nullum vero imperium animum habere in motionibus his mutandis nemo, nisi imprudens, admittet: animi enim passiones & accelerare, & retardare, si non omnino sistere, valent sanguinis fluxum. si ira incandescat homo, pulsus non parum citatur: mœrore vero si langueat, omnes vitales actiones retardantur.

Nec hic quoque motus & actio omni caret vitio: iisdem quoque modis, ut animalis functio, organi, nervorum, & spirituum influentium, labe vitatur. Sed mira tunc inferunt & plane insolita: anxietates enim, motusque fiunt interni mirabiles, debilitatesque graves. quot non gravitates in visceribus, commotionesque viventium animalium instar in ventre, suffocationes in respiratione sentiunt, qui spirituum vitalium morbis laborant? qui si deficient spiritus, pondere ingenti premi videntur, & tantum sæpe sentiunt frigus, ac si frigidissima glacies in ipsorum lateret visceribus.

Ut vitalis motus animi viribus vix obtemperat, ita in nobis animi fiunt actiones, cogitationibus solis constantes. Profunde quidem potest meditari homo, corpore omnino quiescente: verumtamen vires deterit profundior meditatio, multasque evertit actiones, quo liquores a bona degenerant crasi, solidaque enervantur. spiritus ita vel exhausti studio indefesso, vel & alienati, cogitationibus inservire inepti, ipsas quoque simili modo, ut in animali & vitali statim diximus motu, cogitationes perturbant.

Accipite hujus nunc sermonis argumentum A. H. quod quam potero in paucissima verba conferam. Ex antecedentibus constat, multas corporeas mutationes mentem turbare, mentisque actiones multa creare vitia corporea; inter mentem igitur & corpus vinculum esse & consensionem; quomodo autem hæc duo cohærent, hominibus non esse revelatum; & mirabilem hunc esse nexum, quo voluit omnipotens Creator hæc duo conjungere, non dubitavimus asserere. Quia vero in perquisitione patuit, omnia desipientiæ genera causam corpoream agnoscere, concludi posset, animam ipsam, quæ ad æternitatem est nata, vix ullo morbo posse affici ex sua natura, cuncta vero ejus vitia ex corporeis provenire causis: sed corporis morbos integrum sui minari interitum. ita A. H. brevi hoc sermone autumo me absolvisse mysterium hujus consensionis mirabilis: quid autem præstiterim, vestrum erit dijudicare. DIXI.

F I N I S.

Fig. 1.

